


199/c

F VII

18/12

2 volumes



LANGSVERT, Wenceslaus. Joan. Nepom. **Theoria medica**, de arteriarum et venarum in corpore humano adfectionibus (title of the second vol.:) De vasorum lymphaticorum, humorum secretionis, telae cellulosae, et temperamentorum in corpore humano affectionibus. Two volumes in one. 10 leaves, 132 pp. (badly numbered 134); 8 leaves, 140 pp. With two folding-plates (explanatory diagrams). Large 4to. Original boards. Prague, Joa. Jos. Clauser (1763—1764). Fr. 15. —

9 hensis 1 vol.

10 leaves

132l badly numbered 134 pp.

1 folding plate

8 leaves

140 pp

1 folding plate

1/2 1/2

A 2

L. Ant. Cuvier
Lugano

15 Sw fr
128

1672-1673

WENCES. JOAN. NEPOM.
LANGSVERT,
PHILOS. ET MEDIC. DOCTORIS
THEORIÆ MEDICÆ.
TOMUS I.

Autograph of J. B. Smith

Autograph of J. B. Smith

Autograph of J. B. Smith

Autograph of J. B. Smith

WENCESLAI JOAN. NEPOM.
 LANGSVERT,
 PHILOSOPHIÆ ET MEDICINÆ DOCTORIS
THEORIA MEDICA,
 DE
 ARTERIARUM ET VENARUM
 IN
 CORPORE HUMANO
 AFFECTIONIBUS.
TOMUS PRIMUS.



PRAGÆ,
 LITERIS JOANNIS JOSEPHI CLAUSER,
 REGII TYPOGRAPHI.




Ad cognoscendam Geometriam & numerorum
scientiam - - - multum studii adhibeto ; non
enim solum vitam tuam illustrem & ad multa
commodam in humanarum rerum statu effi-
cient : sed etiam animam acutiores, & clario-
res reddent, ad omnium quorum usus in me-
dicina expetitur, utilitatem consequendam.

Hippocrates in Epist. ad filium suum Thessal.

AUGUSTISSIMÆ,
POTENTISSIMÆ, AC GLORIOSISSIMÆ
MARIÆ THERESIÆ
ROMANORUM
IMPERATRICI,
HUNGARIÆ, BOHEMIÆ, DALMATIÆ, CROATIÆ,
SCLAVONIÆ, BOSNIÆ, RAMÆ, SERVIÆ, BULGA-
RIÆ, CUMANIÆ, HALLICÆ
REGINÆ APOSTOLICÆ;
ARCHIDUCI AUSTRIÆ;
DUCI
BURGUNDIÆ, BRABANTIÆ, MEDIOLANI, STYRIÆ,
CARINTHIÆ, CARNIOLIÆ, MANTUÆ, PARMÆ, PLACEN-
TIÆ, LIMBURGI, LUXEMBURGI, GELDRIÆ, WÜR-
TEMBERGIÆ, ET UTRIUSQUE SILESIÆ,
PRINCIPI
SVEVIÆ, ET TRANSILVANIÆ,
MARCHIONI
S. R. I. BURGOVIÆ, MORAVIÆ, SUPERIORIS, ET INFERIO-
RIS LUSATIÆ; COMITI HABSPURGI, FLANDRIÆ, TYROLIS, NA-
MURTIÆ, FERRETIS, KIBURGI, GORITIÆ, GRADISCÆ, ARTESIÆ,
ET SICULORUM; LANDGRAVIÆ ALSATIÆ; DOMINÆ MARCHIÆ
SLAVONICÆ, PORTUS NAONIS, SALINARUM,
MECHLINIÆ &c. &c.
DOMINÆ DOMINÆ
CLEMENTISSIMÆ.
D. D. D.

WENCESLAUS LANGSVERT.



AUGUSTISSIMA
ROMANORUM IMPERATRIX
REGINA APOSTOLICA.



*F*avebis AUGUSTISSIMA
IMPERATRIX *hos qua-*
les quales labores meos SA-
CRÆ MAJESTATIS TUÆ *pedi-*
bus devotissime adsterni, quibus perficiun-
dis adcurata SAPIENTISSIMÆ, ac
SUPREMÆ VOLUNTATIS TUÆ
expletio unicus scopus fuerat.

Scio etenim (& quem latere possit)
quanta REGII ANIMI TUI sollicitu-

dine , atque industria rem litterariam in
Antiquissima Univerſitate TUA Pragenſi
indies promoverè adnitaris, DOMINA
CLEMENTISSIMA; atque mihi ve-
bementer gratulari nunquam non poſſum
eam felicitatem , quod in eadem Univer-
ſitate ſub GLORIOSISSIMO RE-
GIMINE TUO educatus fuerim tem-
pore illo , quo ea , quæ alii longo tempo-
re , in diſſitis terra marique regionibus,
combibere debuerant , Medicæ ſcientiæ
do-

*documenta, ego ad eorum certe invidiam,
domi mihi comparare potuerim. Æquum
proinde est, ut, qui e Materno Sinu TUO,
AUGUSTISSIMA DOMINA, in
me promanarunt, nunquam satis æsti-
mandi scientiarum thesauri, TIBI ite-
rum reverentissime dedicentur, consecren-
tur. Atque hæc ratio una erat, qua le-
ve hocce conamen meum SACRATIS-
SIMÆ MAJESTATI TUÆ inscri-
bere veritus non sim.*

Alte-

*Alterum erat ardentissimum AUGU-
STISSIMÆ VOLUNTATI TUÆ
obsequendi desiderium, quum nihil am-
plius in votis habeas, DOMINA CLE-
MENTISSIMA, quam rem litterariam
in Regnis TUIS a subditis TUIS ea,
qua valent, industria nullo non tempore
magis magisque propagatam videre; opti-
me gnara: quanti ad Regni felicitatem,
ac incrementum intersit scientiarum stu-
dia identidem excolere. Stimulum addi-
dit,*

dit, quum novissime viderem, quam sereno oculo laudabilia quorundam in Universitate nostra decertantium conamina susceperis. Denique animum meum confirmavit ineffabilis CLEMENTIA TUA, qua me, dum nuperrime sub AUGUSTISSIMUM CONSPECTUM TUUM admitterer, suscepisti; atque singularis gratia illa, qua mihi sacerrimam manum TUAM osculo reverentissimo venerari est concessum.

*Respice igitur , IMPERATRIX
AUGUSTISSIMA, benignissimo MA-
JESTATIS TUÆ vultu levidenssem
hunc meum laborem , & non tam rem,
quæ tenerioris adhuc ætatis partus est ,
quam promptissimum SACRATISSI-
MAM VOLUNTATEM TUAM
explendi animum intueri.*



PRAE-



PRAEFATIO.



Ut primum Artem medendi in Urbe
Regni nostri Principe profiteri sum
adgressus, nihil majori studio, at-
que contentione sum meditatus;
quam ut præclarissima istius scientiæ documenta,
quæ a Nobilissimis hujus Universitatis Professoribus,
præcipue vero ab ILLUSTR. PRAESIDE NO-
STRO, D. MAC-NEVEN O KELLY, EQUITE
AB AGHRIM, Cujus ab ore, quatuor annorum
(utinam lustra numerarem!) spatio, pependi di-
scipulus, acceperam; ut ea, inquam, documenta,
in breve redigerem compendium; e quo regulas
vix non infallibiles depromerem, quoties medici-

na esset facienda ægris, quorum miseras levare, sanitatique consulere, nunquam non possem.

Inter ea autem documenta primum locum sibi vendicant, quæcunque in sanitatis, morborumque natura determinanda versantur. Et, quum omnis vita a jugi, atque sano humorum per sua vasa circuitu pendeat; sanitas omnis inde derivetur: non abs re me facturum arbitrabar; si ad horum vasorum adfectiones, tam sanas, quam morbosas, omnium primum oculos, animumque converterem ideo, quod plurimæ in Arte salutari exercenda occurrentes ægritudines ab his veluti fontibus promanent. Quippe, ut alios, a læsis vasorum conditionibus pendentes, morbos præteream: *Febres solæ* (adnotante CL. SYDENHAMO) *cum adpendicibus suis duas fere tertias partes omnium, quæ sunt morborum, complent.*

Quoniam vero factum, ut labor hic qualis qualis lucem videret publicam, pauca de ejusdem instituto commemoranda habeo.

Me-

Methodum in universum sequutus sum Geometrarum, quum hæc sola regia ad Medicas veritates inveniendas via sit; solaque ea sit lingua, qua A U T H O R N A T U R A E conceptus suos manifestat. Quum enim animale sit corpus humanum, ejusque operationes vitales motus sint; corpora vero, & motus subiectum Mathematicæ constituent, erit talis scientifica contemplatio prorsus Geometrica. Pariterque animalium operationes fiunt a causis, instrumentis, & rationibus mechanicis, secundum eas,

- - - *quas, dum primordia rerum
Pangeret omniparens, leges violare Creator
Noluit, æternique operis fundamina fixit.*

Earum autem scientifica cognitio, cum prorsus Geometrica sit, exercet sane DEUS in constructione organorum animalium Geometriam, & nos in earum perceptione Geometria indigemus, quæ est unica, & adaptata scientia, (si veram experimentorum, cum Anatomicorum, tum Practicorum fidem ei junxeris) qua Creatoris in animalium corpore intentio legi possit, atque intelligi. Medicum itaque

rationalem eum aut esse, aut dici posse, nemo crediderit, qui, Geometriæ ignarus, ægritudines corporum debellare contendit; nisi eorum e numero fuerit, de quibus HIPPOCRATES: *Unusquisque ex his, quæ ipse non habet, judicat, quod in alio abundat, superfluum esse.* Sic sane etiam timidus fortitudinem immodestiam putat, & avarus magnanimitatem. ^(a) Qui enim, amabo, in corpore motum excitabit, sopiet, vel diriget per applicationem instrumentorum ^(b), qui corporis, motus, & instrumentorum adfectiones, quas Geometria docet, ignorat?

Ea autem Geometriæ necessitas præprimis in vasorum nostrorum adfectionibus exponendis sese manifestat. Qui enim *Physiologiam cum aliqua spe successus, docendam suscipit* (monitum est CEL. BOERHAAVII) debet callere *Mathemata*, & ad *arterias imprimis adfectiones fluidorum datæ indolis, per datos canales motorum, adplicare.* ^(c) Ex quibus abunde elucescere opinor, cur eam potissimum methodum sim amplexus.

Quia

(a) In Epist. ad Dionis.
ad §. 212.

(b) BOERH. Aphor. §. 6.

(c) Prælect. Acad. T. II.

Quia vero in morborum natura exploranda, eorumque causa proxima determinanda, nihil magis est necessarium, quam exploratas habere cunctas partis læsæ in sanitate adfectiones, ex quarum aliqua, aut pluribus, seu deficientibus, seu impeditis, morbus omnis originem ducit; sanas prius tum vasorum, cum fluidi per ea moti, tum denique, quæ ex utrisque nascuntur, adfectiones, actionesque exposui.

In his singulis descriptiones Anatomicas, & experimenta, quantum potui, aut prætermisi penitus, aut succincte tantum, suis apud Authores optimos locis indicatis, adnotavi. Enimvero talia sunt, quæ sine longa expositione pertractari nullatenus possunt, cui stabilitæ brevitatis ratio omnino repugnat. Quid? quod eorum in mente ideas clariores, firmioresque, monstrans Anatomici, aut Physiici digitus, quam longa enarratio, efficiat.

Inde ad vasorum morbos progressus, ea serie cunctos tractavi, quam vulgata partium in solida, & fluida divisio docet. In compositis autem præ-

ci-

cipue Obstructionem , Inflammationem , morbosque inde oriundos , quum in Medicina occurrant frequentius , summa cura , & , quo intellectu clariores evaderent , multa propositionum serie ornavi.

Demum , quia cunctis fere morbis Græcia , ubi Medicina plurimos progressus fecit , sua imposuit nomina , quæ ob linguæ fecunditatem , una quasi voce , rei per nomen designatæ naturam indicant , si recte intelligantur ; in eorum , qui in hac lingua sunt hospites , utilitatem , plerisque nominibus Græcis , radices , e quibus proveniunt , harumque significationes subjunxi.

Faxit DEUS ter O. M. ut labor hic in Nominis sui gloriam , mortalium vero commodum cedat , ac emolumentum ; & , si vita , viresque mihi suffecerint , ultiores hujus doctrinæ partes , eadem methodo , pertractare , non intermittam. Dabam Prægæ Bohemorum in Musæo meo Idibus August. Anno salutis MDCCLXIII.

INDEX

GENERALIS CAPITUM,

SECTIO I. De Fabrica Arteriæ, & Venæ.

CAPUT I. De Arteriis, & Venis in genere.

II. De Arteriarum Natura.

III. De Venarum Natura.

SECTIO II. De Natura Humorum in Arteriis, & Venis
contentorum.

CAPUT I. De Proprietatibus eorum generalibus.

II. De Proprietatibus sanguinis specialibus.

SECTIO III. De Arteriarum Actione.

CAPUT I. De Motu sanguinis per Arterias in genere.

II. De Motu sanguinis per Arterias progressivo.

III. De Motu sanguinis per Arterias laterali.

IV. De Motus utriusque effectibus.

SECTIO IV. De Venarum Actione.

CAPUT I. De Motu sanguinis per Venas in genere.

II. De Motu sanguinis per Venas progressivo.

III. De Motu sanguinis per Venas laterali.

IV. De Motus utriusque effectibus.

SECTIO V. De Arteriarum, & Venarum morbis ratione
partis solidæ.

CAPUT I. De Morbis in genere.

II.

- II. De Morbis vasorum simplicissimis.
- III. De Morbis vasorum organicis.

SECTIO VI. De Morbis Arteriarum, & Venarum ratione sanguinis.

- CAPUT
- I. De sanguinis quantitate morbofa.
 - II. De sanguinis qualitatibus morbofis.

SECTIO VII. De Morbis Arteriarum & Venarum Compositis.

- CAPUT
- I. De Obstructione.
 - II. De Inflammatione.
 - III. De Gangræna, sphacelo, suppuratione, scirr-
ho, Cancro, & Carcinomate.
 - IV. De Aneurysmate, & Varice.



SEC-



SECTIO I.

DE

FABRICA ARTERIÆ, ET VENÆ.

CAPUT I.

DE

ARTERIIS, ET VENIS IN GENERE.



§. I.

Corpus, cujus partes tam valide cohærent, ut, non nisi vi quadam majore, separari possint, *solidum* est.

§. II.

Quod vero partes insensiles, tam parum sibi cohærentes habet, ut, minima vi, queant separari, *fluidum* dicitur.

§. III.

Omnes corporis humani partes, aut *solidas* (§. 1.) aut *fluidas* (§. 2.) esse, Anatome docet.

TOM. I.

A

§. IV.

§. IV.

Inter *solidas* corporis humani partes (§. 3.) aliæ reperiuntur, quorum interna superficies cava est, & humores transmittit; aliæ vero simili cavitare destituuntur.

§. V.

Priores (§. 4.) in *Canales*, *Sinus*, & *Receptacula* dividuntur. *Canales* jugi motu humores transmittunt; eos paululum retinent *Sinus*, longiori tempore *Receptacula*.

§. VI.

Ex *canalibus* (§. 5.) ii maxime oculos Anatomicorum feriunt, qui, humorem vitalem vehentes, ex corde originem ducunt.

§. VII.

Hi (§. 6.) in duas iterum dispescuntur classes: Illi enim, qui sanguinem a corde versus corporis extremitates vehunt, *Arteriæ*; qui vero eundem ab extremitatibus ad cor reducunt, *Venæ*, hodie omnibus dicuntur.

SCHOLIUM I.

Veniam me facile impetraturum spero, quod in definitionem (§. 7.) ea receperim, quæ omnibus hodie per experimenta sunt demonstrata, proprietates horum canalium, seorsim fusius propositurus.

SCHOLIUM II.

Veteres utramque canalium (§. 7.) speciem *Venas* dixerunt, & in *salientes*, ac *non salientes* divisere; *Arteriam* vero ἀπὸ τῆ τὸν αἶρα τήρειν, ab aëre *trahendo*, *Trachæam* primam adpellarunt. Primus autem ERASISTRATUS, ex errore hypotheseos suæ, hoc nomen priori canalium (§. 7.) Classi imposuit.

CAPUT II.

DE
ARTERIARUM NATURA.

§. VIII.



umor vitalis ruber, in universum *sanguis* dicitur.

§. IX.

Arteriæ sanguinem continent. Humor vitalis ruber, sanguis est (§. 8.); eum autem in arteriis semper, etiam a morte reperiri, demonstrat Anatome; igitur arteriæ sanguinem continent.

SCHOLIUM.

Non ergo spiritum, aut aërem continent *arteriæ*, ut primus PRAXAGORAS, deinde ERASISTRATUS docuit.

§. X.

Sanguis in vita, & sanitate per arterias jugi motu fluit. Ex incisa enim arteria cum impetu profilit; is ergo impetus vel jam ante vulnus adest, vel per instrumentum vulnerans imprimi, debuit; sed per instrumentum vulnerans impressus non est; cum id præter simplicissimam continui solutionem in arteria nihil omnino mutaverit; ergo necesse, sanguinem jam ante vulnus, id est, jugiter in motu fuisse.

SCHOLIUM.

Is autem sanguis quiescit a morte, & ubi arteriæ in vita obstructæ, aut cum liquido suo concretæ deprehenduntur.

SECTIO I. CAPUT II.

§. XI.

Corpus, quod absque cohæſionis mutatione complanari, & in figura ſua mutari poteſt, *Teres* vocatur.

§. XII.

Arteriæ canales ſunt teretes. Solidum, quod interna ſuperficie humorem continet, cavum eſſe debet (§. 4.); ſique jugi motu humorem transmittit, canalis eſt (§. 5.); id autem in arteriis obtinere, eſt evidens (§. 9. 10.); ergo canales ſunt. Q. E. primum.

Quoniam autem teres dicitur, quod absque cohæſionis mutatione complanari, & in figura ſua mutari poteſt (§. 11.); arteriæ vero dicto modo, ligaturis, aut quacunque, ſive interna, ſive externa preſſione adfici poſſunt; teretes ſint, eſt neceſſe. Q. E. alterum.

§. XIII.

Corpus, cujus partes ita cohærent, ut in aliam cohæſionem mutari poſſint, & tamen cohærere, *Flexile* audit.

§. XIV.

Arteriæ canales ſunt flexiles. Corpus flexile eſt, cujus partes ita cohærent, ut in aliam cohæſionem mutari poſſint, & tamen cohærere (§. 13.); ſed elementa arteriarum dicto modo ſe habent; cum ſalva cohæſione in latitudine, & longitudine mutari poſſint, ut experientia docet: proinde arteriæ canales flexiles ſunt.

SCHOLIUM.

Fig. I.

Partes alicujus corporis in aliam cohæſionem mutari, & tamen cohærere, poſſe, facile videmus. Sit enim priſma AB (Fig. I.), ex binis partibus AD, & CB compoſitum, quæ ſibi cohærent per parallelogrammata CD;

poterunt hæ duæ partes suam cohesionem, & hinc totum corpus suam figuram mutare, manente tamen cohesione. Supponamus enim, partem CB poni in loco DE, & tantum pars CB transposita fecit motum FE; ergo est idem adhuc corpus constans ex duabus partibus AD, & CB, sed pars CB mutata est in DE; ergo corporis figura est mutata; hinc quædam partes locum mutarunt, quædam coherent adhuc, ut in puncto D; & sic mutata est corporis figura, & partium cohesio, manente tamen adhuc cohesione, Q. E. D.

§. XV.

Ad flexilitatem requiritur 1) *paucitas punctorum contactus*, 2) *humor lubricans intermedius*. Omnis cohesio eo facilius mutari potest a vi aliqua, quo illa cohesio minor est; sed cohesiones sunt in ratione superficierum; (a) ergo, quo ea superficies minor, eo minor est cohesio; quo autem superficies minor est, eo, cæteris paribus, pauciora sunt contactus puncta; erit itaque cohesio, ut puncta contactus. Quum igitur in corpore flexili, partes facile in aliam cohesionem mutari posse debeant (§. 13.); ad flexilitatem paucitas punctorum contactus requiritur. Q. E. primum.

Humor lubricans intermedius puncta contactus minuit; ergo (n. 1. huj.) ad flexilitatem etiam requiritur. Q. E. alterum.

§. XVI.

Arteriarum membrana ex minoribus arteriis, venis, & nervis, componi debuerunt. Veritatem hujus propositionis docet injectio anatomica; necessitatem autem sic demonstro: Arteriæ canales flexiles sunt (§. 14.); ad flexilitatem autem paucitas punctorum contactus, & humor lubricans in-

A 3

ter-

(a) S' GRAVESANDE Elem. Phys. Math. n. 72.

terminus requiritur (§. 15.); id utrumque obtinetur, si arteriarum membranæ vasis arteriosis, venosis, & nerveis, suis humoribus plenis, componantur; proinde iis componi debuerunt.

SCHOLIUM I.

Aliam necessitatem, imponit arteriarum nutritio, quæ consideratio hujus loci non est.

SCHOLIUM II.

Tales membranæ (§. 16.) sunt tunica arteriarum *Celluloso-vasculosa*, & *nervea*. (a)

§. XVII.

COROLLARIUM.

Hinc arteriæ in propria substantia augeri, vel minui possunt (§. 16.).

§. XVIII.

Omnes arteriarum sectiones, quæ ad ejus axim sunt perpendiculares, circuli sunt. Arteriæ in omnibus sectionibus sanguinem continent (§. 9.); quum vero sanguinis partes tam parum sibi cohæreant, ut minima vi possint ab invicem separari, adeoque sanguis fluidum sit (§. 2.); fluidum autem in omnem sensum, & hinc a centro ad peripheriam, undique æqualiter premit; (b) sanguis singulas arteriarum sectiones æqualiter in superficie interna premet. Sed huic pressioni obediunt arteriæ teretes (§. 12.), & flexiles (§. 14.); erunt ergo in ea sectione omnes lineæ, a centro ad ambitum ductæ, id est, radii, qui pressionis directiones repræsen-

(a) HALLER. Elem. Physiol. T. I. p. 59. & seqq. & 65. & seq. (b) s'GRAVESANDE l. c. n. 1419.

sentant, æquales. Linea autem, ad quam omnes radii ex centro ducti sunt æquales, Geometris circulus est; proinde omnes sectiones arteriarum ad axin perpendiculares circuli sunt.

SCHOLIUM I.

Veritatem hanc (§. 18.) uberiùs demonstrat BERNOULLIUS (a): Sit *ABC* (Fig. 2.) fibra, vel si mavis filum perfecte flexile in extremitatibus *A*, & Fig. 2. *C* affixum, quod in omnibus suis punctis *B* trahitur, vel pellitur ad perpendiculum ad suam curvaturam potentia æquali, & indefinite parva, quæ hic denotatur per lineam *BH*; queritur curvaturæ species. Est abscissa *AF* = x , ejus differentia *Ff* = dx , semiordin. *FB* = y , ejus differentia *Gb* = dy , curva *AB* = s , ejus differentia *Bb* = ds , *BH* (potentia pellens, & multiplex ipsius *Bb*) = nds , quia nunc quælibet potentia pellens *BH* dividi potest in duas laterales horizontalem *BE*, & verticalem *BD*; quæ rectangulum *DE* constituunt, cujus diagonalis est ipsa *BH*: erunt ob similitudinem triangulorum *BGb*, & *BDH*, *BE* = ndy , & *BD* = ndx . Quoniam autem potentia sustinens in *A* semper eadem, & constans manet, ubicunque etiam filum, præterquam in *C*, figatur, ceu cuilibet attendenti patebit, ponatur illa = a : sed ex mechanicis constat, eam tantam esse, quanta foret, si loco fili curvi *AB* substituerentur duo alia fila recta tangentia, & alligata in punctis *A*, & *B*, quæ traherentur in puncto concursus *I* a duabus potentiis *L*, & *K*, una horizontali *LI*, & altera verticali *KI*, quarum illa omnes potentias horizontales *BE*, hæc autem omnes verticales *BD* simul sumptas æquaret; verum omnes *BE* æquantur integr. ndy , quod est = ny , & omnes *BD* = integr. ndx , quod est = nx ; ideoque potentia *L* = ny , & potentia *K* = nx ; igitur ut inveniatur potentia in *A*, quæ nimirum requiritur ad sustinendam solummodo potentiam *L*, faciendum est, ceu docet CEL. VARRIGNONUS, ut sinus anguli *AIB*, vel ejus complementi ad duos rectos *KIB*, ad sinum anguli *MIB*, id est, ut $IM : MG$, seu ut $bG : GB$,

id

(a) De Motu Muscul. n. 10.

SECTIO I. CAPUT II.

id est, ut $dx : dy$, ita potentia L seu ny ad potentiam in A, quæ itaque invenitur $= \frac{ny dy}{dx}$; quia nunc directio potentia K est ipsa tangens K I, sustinebitur hæc tota a puncto A, ideoque potentia inventæ $\frac{ny dy}{dx}$ addenda est potentia K, seu nx , ad habendam potentiam totalem, & constantem in A: quam posuimus $= a$; & sic eliciemus hanc æquationem differentialem:

$$\frac{ny dy}{dx} + nx = a,$$

quæ multiplicata per dx , dat

$$ny dy + nxdx = adx,$$

sumptisque integralibus habebitur

$$\frac{1}{2} nyy + \frac{1}{2} nxx = ax$$

seu

$$yy + xx = \frac{2ax}{n};$$

quæ æquatio ostendit, curvam quæsitam ABC esse circularem, cujus ra-

dus vel semidiameter $= \frac{1}{n} a$. Q E. I. Ubi notandum potentiam susti-

nentem in B, seu quod tantundem est, vim firmitatis, quæ requiritur, ne filum rumpatur, docente V A R I G N O N O reperiri ubique æqualem potentia sustinenti in A. Si præterea velimus rationem invenire inter vires *disstendentes*, & vires *resistentes*, seu firmitatis fili requisitæ, id est, si crescentibus, vel decrescantibus n , aut B H determinare libeat, in qua ratione crescant, vel decrescant potentia sustinentes in A, & B, seu vires *resistentes*, ponatur B H $= m ds$, & potentia sustinens in A, vel B $= b$, & habebitur hæc æquatio:

$$yy + xx = \frac{2bx}{m}$$

quia autem radii ponuntur æquales, erit:

$$\frac{b}{m} = \frac{a}{n}$$

ideoque

$$n : m = a : b,$$

hoc

hoc est, vires *resistentes*, seu firmitatis requisitæ sunt in ratione virium *distendentium*.

SCHOLIUM II.

ILL. HALLERUS problema (Schol. præc.) minus recte veritati (§ 18.) propositæ adplicari censet, (a) quod unice locum habeat in tubo, cujus eadem undique firmitas sit, & quem nulla externa causa cogat aliqua in fede magis cedere, in alia minus; arterias vero plerumque ab aliis causis premi, ut aortam in lumbis & pectore. Ast Ipse CL. VIR mox fatetur, (b) planam, quæ videtur, qua vertebris incumbit, aortam, planam non esse, quamprimum repletur, idemque a sanguine in vivo animali præstari.

§. XIX.

Arteriæ in suo a corde itinere sensim in minores ramos dividuntur. Id culter anatomicus, & injectionis artificium ad summam hominum admirationem docet.

§. XX.

Si unum arteriæ ramum (§. 19.) prosequaris, coni convergentis obliqui adfectiones habet; sed imperfecte. Si unum arteriæ ramum prosequaris, ejus lumen, quod circulus est (§. 18.), continuo minuitur; unde concipi potest eum ramum generari, ex motu circuli secundum lineam, quæ circuli centro oblique insistit, ita ut is circulus continuo minuatur, donec in punctum desinat. Sed corpus sic productum conus convergens obliquus est; ergo ejus adfectiones is ramus habet. Sed tamen *imperfecte*. De natura enim coni convergentis perfecti est, ut basis decrescat in ratione duplicata distantiarum; id autem in tali arterioso ramo non observatur: Nam 1.) Quamdiu arteria absque ramo, aut certe absque notabili ramo decurrit, ad sensum decrescere

Tom. I.

B

non

(a) Elem. Physiol. T. I. p. 55. (b) HALLER, l. c. 56.

non videtur ; sed potius cylindrica est. 2.) Omnes arteriæ supra divisionem suam , quoties in ramos divaricantur, omnino paulum dilatantur. 3.) Arteriæ capillares longe cylindricæ sunt,

SCHOLIUM I.

Hæc omnia (§. 20.) summi in Anatome Viri observarunt.

SCHOLIUM II.

Eadem propositio (§. 20.) vera manebit , siue arterias vere conicas , siue cylindrorum , successive minorum , sibi que junctorum , seriem esse posueris. (a).

§. XXI.

Si omnes arteriarum ramos cum trunco suo ad cor compares , conis divergentis obliqui truncati adfectiones habent ; sed imperfecte. Conus divergens obliquus contraria (demonstr. §. 20.) ratione generatur , ita ut genesis initium punctum , aut in truncato circulus minor , finis vero major circulus sit ; sed ramorum (§. 19.) arteriosorum initium in corde , finis in tota corporis , tam interna , quam externa superficie ; ergo finis multo major initio est. Cum tamen ostium arteriosum in corde punctum non sit , sed notabile lumen habeat ; conus is divergens , & truncatus est. Est vero *imperfectus* , ut (ex demonstr. §. 20.) patet.

SCHOLIUM.

HALLERUS rationem omnium ramorum ad aortam facit , uti vigesimam potentiam numeri 3, ad vigesimam potentiam numeri 2, siue uti 1, 048, 576 ad 3, 585, 218, 301, quæ ratio ad istam redit, 1 ad 3420. (b). Hæc tamen in diversis subjectis nimium variat.

§. XXII.

(a) HALLER. l. c. p. 57. (b) Ibid. T. II. p. 175.

§. XXII.

Arteriæ quidem se contrahere, non tamen propria vi lumen suum delere, possunt. Arteriæ fibras musculosas habent, ut monstrat anatome; hæ autem se contrahere possunt; (a) ergo & arteriæ. Q. E. primum.

Sectiones arteriarum circuli sunt (§. 18.); ergo & fibræ, has cingentes, circulos constituunt. Sed fibræ circulares non possunt se contrahere ultra $\frac{2}{3}$ suæ diametri; hinc non possunt efficere, ut nulla earum sit diameter; ergo nec fibræ arteriarum lumen suum delere possunt. Q. E. alterum.

SCHOLIUM.

Nulla arteriarum fibra integrum circulum absolvit, aut annulo comparari potest; sed segmenta circulorum sunt, quæ juncta invicem circulos (demonst. §. 22.) constituunt. (b).

§. XXIII.

Arteriæ suæ dilatationi resistunt: rami autem magis, quam trunci, sed tamen in ratione incerta. Arteriæ canales sunt flexiles (§. 14.); ergo dilatari non possunt, nisi partes earum in cohæsiōe mutantur (§. 13.); sed partes in cohæsiōe mutari nequeunt, nisi loco moveantur (§. 14. in Schol.). Corpus autem omne, quod loco moveri debet, causæ moventi resistit; (c) ergo & arteriæ resistunt. Q. E. primum.

Ut solidum possit loco moveri (n. 1. huj.), omnes ejus partes, ob cohæsiōem movendæ sunt (§. 1.); ergo omnes resistunt (n. 1. huj.); & quo plures sunt, eo resistentia ma-

B 2

jor;

(a) BOERH. Instit. §. 391. (b) HALLER. l. c. T. I. p. 63. (c) s' GRAVESANDE l. c. n. 127.

jor ; est igitur resistentia in ratione densitatis. Sed arteriarum rami (§. 19.) truncis densiores sunt ; nam densitas est in ratione punctorum contactus : hinc in ratione cohæſionis (demonſtr. §. 15. n. 1.) ; proinde , quo densitas major est , eo major cohæſio , & vice verſa. Ramos autem magis cohærere , & rupturæ reſiſtere , quam truncos Recentiores Anatomici docent ; proinde rami densiores ſunt , quam trunci , & hinc magis reſiſtunt. Q. E. alterum.

Experimentis conſtat , denſitates ramorum (n. 2. huj.) non increſcere in ratione determinata , ſed incerta ; ergo & reſiſtentia ſunt in ratione incerta (n. 2. huj.) Q. E. tertium.

SCHOLIUM I.

Experimenta (ad §. 23. n. 2, 3.) fecit CLIFTONUS WINTRINGHAM junior. (a).

SCHOLIUM II.

Arteriarum denſitas , & robur , præcipue in tela earum cellulosa locum habet. (b).

§. XXIV.

Corpus , quod , dum figuram , aut magnitudinem ſuam per flexibilitatem (§. 13.) mutat , eandem cauſa flecente , aut diſtrahente ablata , recuperat , *Elaſticum* eſt.

§. XXV.

Arteriæ canales elastiçi ſunt. Elaſticum dicitur , quod , dum figuram , aut magnitudinem ſuam per flexibilitatem mutat , eandem cauſa flecente , vel diſtrahente ablata , recuperat

(a) Experimental Inquiry on ſome parts of the animal ſtructure. (b) HALLER. l. c. T. I. p. 72.

rat (§. 24.) ; id vero in arteriis observatur (§. 14. 22. 23.) ; ergo elasticæ sunt.

§. XXVI.

Rami arteriarum omnes ad acutos cum trunco suo angulos oriuntur. Id accurata Anatomicorum observatio detexit.

SCHOLIUM.

Ut veritas (§. 26.) pateat , anguli hi metiendi sunt in vasis , quæ a tela cellulosa nondum soluta sunt ; secus enim anguli in majores mutantur.

§. XXVII.

Eadem observatione etiam constat , *arterias in corpore nostro diversimode flexas esse.*

§. XXVIII.

COROLLARIUM.

Hinc *arteriarum longitudo insigniter augetur.* Cum enim linea recta omnium brevissima sit , quæ inter duo puncta data duci possunt ; quæcunque ab ea deflectunt (§. 27.) longiores sunt.

§. XXIX.

Quoniam præterea in multis locis ex uno arteriarum ramo in alterum sanguini via patet , ut experimenta docent ; id autem fieri nequit , quin rami hi aut immediate inter se , aut mediante alio ramo uniantur ; eam verò unionem Anatomici dicunt ; evidens est *Arteriarum ramos anastomoses inter se facere.*

§. XXX.

Et , quum etiam Anatome internam arteriarum superficiem omnino lævem , nec ullis eminentiis asperam , depre-

hendat ; neque in ostiis ramorum ullas pelliculas ostendat , præter duos arcus (quorum alter , cordi propior , cavus est , alter magis eminet) ; certum est , *nullas in arteriis valvulas esse , nisi ad cor.*

§. XXXI.


Quum denique ligaturæ , microscopium , & injectiones doceant , liquorem ex arteriis aut in venas rubras continuato canale , aut viscerum ductus excretorios , aut in vasa exhalantia tum cavitatum corporis internarum , cum superficiei externæ , aut in vasa minora rubris , aut denique in fabricam cellulofam transire ; sequitur , *Arteriarum fines esse 1.) venas rubras , 2.) viscerum ductus excretorios. 3.) Vasa exhalantia , 4.) vasa minora rubris. 5.) fabricam cellulofam.*

CAPUT III.

DE

VENARUM NATURA.

§. XXXII.

 *Venæ (§. 7.) oriuntur , 1.) ex arteriis , 2.) ex tela cellulosa , 3.) ex caveis corporis tum majoribus , cum minoribus , 4.) ex superficie corporis externa , 5.) ex ramis minimis collectis. Omnes vero in truncos magnos , inde in cor terminantur. Ligaturæ , injectiones , microscopia , morbi has origines ostendunt.*

§. XXXIII.

Venæ , quoad fabricam , tenuiores sunt , quam arteriæ ; sed tamen firmiores. Parietum alicujus vasis crassities est in

ra-

ratione inverſa ejus, quam habet pars vaſis ſolida ad lumen ſuum; quum igitur per experimenta detectum ſit, venas majorem rationem luminis ad partem ſolidam dicere, quam arterias; venæ arteriis tenuiores ſunt. Q. E. primum.

Firmitas eſt in ratione cohæſionis (demonſt. §. 23. n. 2.), & hæc in ratione denſitatis (ibid.); denſitas autem eſt in ratione compoſita ex directâ maſſarum, & inverſa voluminum; ^(a) & hinc in ratione gravitatis ſpecificæ. Sed pars ſolida venarum eſt ſpecificè gravior, illa arteriarum, ut docent experimenta; ergo denſior, inde magis cohæret; proinde fir-
mior eſt. Præterea venæ magis diſtendi poſſunt absque ruptionis metu, quam arteriæ; ergo magis cohærent; proinde firmiores ſunt. Q. E. alterum,

SCHOLIUM.

Experimenta (§. 33.) fecit laudatus CLIFTON WINTRINGHAM. (b).

§. XXXIV.

Venæ ſanguinem continent, qui in vita, & ſanitate jugi motu per eas fluit. Demonstratur ut (§. 9. 10.).

SCHOLIUM.

Cum venæ tenuiores ſint arteriis, & magis dilatari poſſint absque ruptionis metu (§. 33.); poſt mortem majorem ſanguinis copiam continent, quæ ex arteriis in eas propellitur; hinc ampliores adparent, quam in vita.

§. XXXV.

Venæ canales ſunt teretes, & flexiles; idque magis, quam arteriæ. Demonstratur (ut §. 12. 14.).

§. XXXVI.

(a) de la CAILLE Leçons Element. de la Méc. n. 34. (b) L. c.

§. XXXVI.

Venarum membranae aequae ex minoribus vasis componuntur, ut in arteriis. Demonstratur, ut (§. 16.).

§. XXXVII.

Omnes venarum sectiones, ad axin perpendiculares, in vita, & sanitate, circuli sunt. Demonstratur (ut §. 13.).

§. XXXVIII.

Si unum venae ramum prosequaris, coni divergentis obliqui adfectiones habet; sed imperfecte. Cum venae itinere arteriis opponantur (§. 7.), & earum initia in corporis extrematibus sint, finis vero ad cor (§. 32.); demonstratio est conversa (demonst. §. 20.).

§. XXXIX.

Si omnes venarum ramos cum trunco suo ad cor compares, coni convergentis obliqui truncati adfectiones habent; sed imperfecte. Demonstratio est conversa (demonst. §. 21.).

SCHOLIUM.

Imperfectionem (§. 38. 39.) majorem in venis, quam in arteriis (§. 20. 21.), Anatomici inveniunt.

§. XL.

Venae minus contractiles sunt, quam arteriae. In venis pauciores fibrae musculares reperiuntur, quam in arteriis; quum igitur contractilitas ab his pendeat (demonst. §. 22. n. 1.); sequitur, minus contractiles esse.

§. XLI.

Venae arteriis elasticitate cedunt. Venae ob tenuitatem majorem (§. 33.) magis sunt dilatabiles, & minus contrahuntur, quam arteriae (§. 40.); hinc pristinam figuram, &
ma-

magnitudinem minus perfecte recuperant; ergo minus elasticae (§. 24.) sunt.

§. XLII.

Venæ plerumque arteriis sunt ampliores diametro. Lumen vasis est in ratione composita, ex directa virium distendentium, & inversa resistentium (§. 18. in schol. 1.); sed vires resistentes, quæ sunt crassities, & contractilitas, magis minuuntur in venis (§. 33. 40.), quam vires distendentes, respectu habito ad arterias; proinde lumen amplius est.

SCHOLIUM I.

Excipi debet *Vena pulmonalis*, quæ socia arteria minor est. (a).

SCHOLIUM II.

Mensuras (§. 42.) collegit HALLERUS. (b).

§. XLIII.

Venæ arterias numero excedunt. Docet anatome.

§. XLIV.

Venæ diversimode flexæ sunt, minus tamen, quam arteriæ. Ex anatomicis certum est.

§. XLV.

Venarum rami anastomoses inter se faciunt. Demonstratur ut (§. 29.).

§. XLVI.

Venæ copiosas valvulas habent. Has Anatome uberri-
me demonstrat.

TOM. I.

C

SEC-

(a) HALLER, Elem. Physiol. T. III. p. 167. & seqq. (b) Ibid. T. I. p. 131.
& seqq.

SECTIO II.

DE

NATURA HUMORUM IN ARTERIIS,
ET VENIS CONTENTORUM.

CAPUT I.

DE

PROPRIETATIBUS EORUM GENERALIBUS.

§. XLVII.



Sanguinis elementa solida sunt. Quum omne fluidum a solido sola cohæsione differat (§. 1. 2.), & fluidum in solidum, ac vice versa, sola cohæsione variata, mutari possit (^a); evidens est, similia in fluido, ac in solido, id est, solida elementa esse. Sed sanguis corpus fluidum est (demonst. §. 18.); ergo ejus elementa solida sunt.

§. XLVIII.

COROLLARIUM.

Ergo iisdem, ac solida, motus legibus, hæc elementa (§. 47.) obediunt.

§. XLIX.

Sanguinis elementa habent magnitudinem, & figuram; eamque determinatam. Sanguinis elementa non sunt entia simplicia, sed moleculæ ex aliis compositæ; ergo extensa, & hinc magnitudinem habent. Q. E. primum.

Fi-

(^a) s' GRAVESANDE I. C. D. 1410.

Figura est limes extensionis; sed elementa hæc extensa sunt (n. 1. huj.); & , quia actu infinitum corporeum repugnat, etiam limitata sunt; ergo figuram habent. Q. E. alterum.

Elementa sanguinis vasis nostris continentur (§. 9. 34.); vasa autem certam diametrum habent; & , quum vasa sint, quæ unicum tale elementum (47.) transmittunt, ut docet microscopium; sequitur, etiam elementa hæc determinatam extensionem, id est, determinatam magnitudinem, & figuram habere. Q. E. tertium.

SCHOLIUM.

Magnitudinem determinatam sanguinis elementis tribuit LEOWENHOECKIUS; ejus diametrum $\frac{1}{3000}$ pollicis suspicatur HALLERUS (a), minorem alii faciunt.

§. L.

Elementa sanguinis levissime sibi cohærent. Sanguis noster fluidum est (demonst. §. 18.); fluidi autem partes infensiles, tam parum cohærent, ut vi minima queant separari (§. 2.); igitur etiam sanguinis elementa levissime sibi cohærent.

§. LI.

COROLLARIUM.

Quum cohæsiones sint in ratione punctorum contactus (demonst. §. 15. n. 1.), *elementa autem sanguinis levissime sibi cohæreant (§. 50.); paucissima puncta habebunt contactus.*

C 2

Scho-

(a) l. c. T. II. p. 56.

SECTIO II. CAPUT I.
SCHOLIUM.

In morbis valide elementa hæc cohærere possunt.

§. LII.

Quoniam vis, qua corpora sublunaria tellurem versus pelluntur, vocatur gravitas; (a) elementa autem sanguinis, sibi relicta, tellurem versus descendunt; talem vim, seu gravitatem habent; *ergo sanguinis elementa gravia sunt.*

§. LIII.

Quantitas sanguinis, in determinato vase contenti, non unicum gravitatis centrum habet. Centrum gravitatis punctum est in corpore, circa quod omnes partes corporis, in quocunque situ positi, in æquilibrio sunt. (b) Id punctum in corpore unicum est, si corporis elementa sibi juncta sint adeo, ut nonnisi vi separari possint. Sed sanguinis elementa tam valide non cohærent (§. 50.); ergo unicum gravitatis centrum habere nequeunt.

§. LIV.

Quum singula sanguinis elementa gravia sint (§. 52.), neque eorum quantitas determinata unicum gravitatis centrum habeat (§. 53.) singula elementa propria gravitate moventur; *premunt ergo hæc elementa in omnem sensum.*

§. LV.

Sanguinis elementa figuram sphericam habent. Sanguinis elementa determinatam figuram habent (§. 49.); quum autem levissime sibi cohæreant (§. 50.); figura talis esse debebit, quæ elementum vicinum in paucissimis punctis contingat (§. 51.). Ea vero est figura spherica; cum sphæ-
ra

(a) S' GRAVESANDE l. c. n. 148. (b) Ibid. n. 202.

ra sphæram in unico puncto contingat ^(a); proinde sanguinis elementa sphærica sunt.

SCHOLIUM I.

Rationi suffragantur (§. 55.) experimenta LEUWENHOECKII ^(b).

SCHOLIUM II.

Elementorum figuram sphæricam (§. 55.) in dubium vertit ILL. HALLERUS, nec magis probat figuram ellypticam ^(c) Sed peto ab ILL. AUTHORE figuram aliquam, cui proprietates sanguinis (§. 55.) memoratæ exacte conveniant, assignari; & agnita veritate, in Ejus sententiam lubens abibo.

§. LVI.

Elementa sanguinis sunt divisibilia. Sanguinis elementa molculæ sunt ex aliis compositæ, magnitudinis determinatæ (§. 49.); ergo in minores divisibilia sunt.

SCHOLIUM I.

Sanguinis globulum in sex flavos, & eorum quemlibet in sex pellucidos dividi, observavit LEUWENHOECKIUS ^(d). Idem confirmat CEL. BOERHAAVE, ^(e) & ILL. BARODE SWIETEN ^(f). Idem suadet spontaneus sanguinis, e corpore emissi, in sua elementa secessus ^(g), & degeneraciones sanguinis morbosæ. Contrariam attamen sententiam tuetur HALLERUS. ^(h).

SCHOLIUM II.

Qui globulorum divisionem (schol. præc.) propugnant, congeriem flavorum globulorum *serum*, pellucidorum *lympham* dicunt.

C 3

§. LVII.

(a) EUCLIDES Lib. III. Prop. 13. (b) Phil. Transact. n. 102. 106. (c) l. c. T. II. p. 51. seqq. (d) Arcan. detect. Vol. II. p. 8. 35. (e) Instit. §. 226. (f) Comment. §. 94. (g) BOERH. Instit. §. 223. (h) l. c. T. II. p. 66. & seqq.

§. LVII.

Sanguinis globuli facile a quacunq[ue] causa physica in motum concitari possunt. Omnis causa physica agit contactu physico; corpus enim in aliud corpus aliter agere nequit. Sed de natura fluidi (§. 2.) est, ut partes ejus facile cuique impressioni cedant; ergo, quum sanguis fluidum sit (demonst. §. 18.), etiam ejus partes facile huic causæ physicae cedere debent. Cedere autem non possunt, quin successive locum mutant, & successiva loci mutatio motus est; ergo ab ea causa sanguinis elementa in motum concitantur.

§. LVIII.

Sanguinis globuli elastici sunt. Corpus, quod, dum figuram suam per flexibilitatem mutat, eandem causa mutante ablata, recuperat, elasticum est (§. 24.); sed id obtinere in globulis sanguineis experimenta docent; proinde elastici sunt.

SCHOLIUM.

Globulos sanguinis incompressiles (a), & in figura sua immutabiles (b), HALLERUS pronunciat. Sed elasticos deprehendit ILL. BARO DE SWIETEN. (c) Et sane globuli hi aquæ innatantes, dum in se invicem impigere, celerrime resiliisse, per microscopia visi sunt.



CA-


(a) L. c. p. 60. (b) Ibid. p. 58. & seq. (c) Comment. §. 116. 175.

CAPUT II.

DE

PROPRIETATIBUS SANGUINIS SPECIALIBUS.

§. LIX.



Non omnia sanguinis elementa eandem soliditatem habent.
 Soliditas in majori partium cohæsione sita est (§. I.); quo autem partes magis cohærent, eo plura sunt puncta contactuum (demonst. §. 15. n. 1.), & quo plura sunt puncta contactuum, eo pauciores pori inter has partes reperiuntur; quo vero pauciores sunt pori, eo plus massæ sub dato volumine continetur, id est, eo corpora hæc sunt densiora, & hinc specificè graviora; ergo corpora, quæ habent eandem soliditatem, etiam eandem gravitatem specificam habent, & contra: sed elementa sanguinis omnia, eandem gravitatem specificam non habent, ut experimenta ostendunt; ergo nec eandem soliditatem.

SCHOLIUM.

Pars sanguinis rubra, sero, & aqua specificè gravior deprehenditur. (a)
 Serum etiam aqua specificè gravius est. (b). Rationes collegit HALLERUS (c), & HAMBERGERUS (d).

§. LX.

Non omnia sanguinis elementa, si ab eadem causa impellantur, eandem motus quantitatem recipiunt. Motus quantitas, five momentum corporis est, ut factum ex massa
 in

(a) HALLER. l. c. T. II. p. 38. & seqq. (b) Ibid. p. 122. & seqq. (c) l. citatis. (d) Physiol. Med. §. 6. 8. & seqq.

in celeritatem ^(a); proinde, si velocitates sint æquales, motus quantitas est in ratione densitatis, seu soliditatis; sed sanguinis elementa omnia non habent eandem soliditatem (§. 59.), & celeritas imprimitur æqualis (ex hypoth.); ergo eandem motus quantitatem non recipiunt.

SCHOLIUM.

Sit pollex cubicus sanguinis rubri = A, pollex cubicus feri = B;
celeritas sanguinis = C, feri = c: Densitas sanguinis = D, feri = d;
momentum sanguinis = Q, feri = q; massa sanguinis = M, feri = m;
volumen sanguinis = V, feri = v. Erit:

$$Q: q = D: d.$$

$$\text{Nam (§. 60.) } Q: q = MC: mc$$

$$\text{sed (ex hypoth.) } C = c.$$

$$\text{Ergo } Q: q = M: m.$$

$$\text{Et quoniam (b) } D: d = \frac{M}{V}: \frac{m}{v}$$

Erit augendo æqualiter per Vv

$$D: d = \frac{MVv}{V}: \frac{mVv}{v} = Mv: mV$$

$$\text{Sed (ex hyp.) } V = v$$

$$\text{Ergo } D: d = M: m.$$

$$\text{Proinde etiam } Q: q = D: d.$$

$$\text{Quum igitur (§. 59.) } D > d,$$

$$\text{Erit in eadem ratione } Q > q,$$

Id est, motus quantitates inæquales erunt. Q. E. D.

§. LXI.

Sanguinis elementa non habent omnia eandem magnitudinem. Omnia sanguinis elementa (§. 56.) sua propria vasa habent, quibus continentur, ut docet Anatome; ergo his pro-

(a) De la CAILLE l. c. n. 59. (b) Ibid. n. 34.

proportionalia esse debent; sed hæc vasa non habent omnia eandem diametrum, ut microscopiis, & injectionibus ostenditur; & horum elementorum quædam solitaria in vasis moventur (§. 47.); ergo ea elementa omnia eandem diametrum, & hinc eandem magnitudinem habere nequeunt.

SCHOLIUM.

Globulis rubris serosi, hisque lymphatici (§. 56. in schol. i.) minores sunt.

§. LXII.

Elementa sanguinis viscida sunt. Viscidum dicitur, cujus partes aut inter se, aut lateribus vasorum cum tenacitate quadam adhærent; talia autem sanguinis elementa esse, patet, quod in minori motu, aut quiete, illico inter se, & cum vasis suis concrecant; proinde viscida sunt.

SCHOLIUM I.

Visciditas a vi adtractiva commode repeti potest.

SCHOLIUM II.

Sanguinis arteriosi aliam, quam venosi, indolem esse; aut sanguinem in diversis arteriis diversum esse, vix credo, constanter affirmari posse, (a).



SECTIO III.

DE ARTERIARUM ACTIONE.

CAPUT I.

DE
MOTU SANGUINIS PER ARTERIAS
IN GENERE.

§. LXIII.

AXIOMA I.



*Cor sanguinem suum ex ventriculis in arterias
projicit.*

§. LXIV.

AXIOMA II.

*Cordis potentia in sanitate omnes vasorum resistentias
superat.*

§. LXV.

AXIOMA III.

Sanguis celeritatem suam primigeniam a corde accipit.

SCHOLIUM I.

*Celeritatem primigeniam (§. 65.) hic voco eam, quam sanguis habet
e corde egrediens, dum nihil adhuc ob vires contrarias de ea amisit.*

SCHOLIUM II.

*Propositiones (§. 63. 64. 65.) instar axiomaticum recepi, eorum metho-
dum sequutus, qui propositiones, alibi demonstratas, in alia doctrinae
par-*

parte dicto modo pro certis adsumunt; harum enim demonstrationes aliam Physiologiæ partem sibi vendicant.

§. LXVI.

Sanguis a corde in arteriarum truncos, a truncis in ramos, ex ramis in vasa minima fluit. Corpus mobile a pluribus causis, sibi oppositis motum, directionem fortioris sequitur, ut demonstrant Physici; sanguis autem, quum ex cordis ventriculis in arterias projiciatur (§. 63.), directionem accipit a corde in arteriarum truncos, inde in ramos, & sic porro. Sed potentia cordis in sanitate omnes vasorum resistentias superat (§. 64.); ergo causa fortior est, & hinc ejus directionem sanguis sequitur, nempe a corde in truncos, & sic porro movetur.

SCHOLIUM I.

Hanc directionem (§. 66.) juvant *Valvulae* cordis *semilunares* oppositam directionem impedientes.

SCHOLIUM II.

Eandem sanguinis arteriosi directionem ostendunt vincula, & microscopium.

SCHOLIUM III.

Per eam (§. 66.) denique directionem arteriæ a venis essentialiter differunt.

SCHOLIUM IV.

Motus sanguinis per axin arteriarum, *progressivus* dicitur; ille vero, quo in latera arteriarum sanguis nititur, *lateralis* vocatur.




CAPUT II.

DE

MOTU SANGUINIS PER ARTERIAS
PROGRESSIVO.

§. LXVII.



Sanguinis celeritas primigenia (§. 65.) in Aortæ sinu minuitur. Celeritas liquidi per canales moti pressione acquiritur ^(a); pressio autem est in ratione altitudinis ^(b); sed eadem liquidi quantitas eō majorem altitudinem acquirit, quo lumen vasis minus est, & contra: ergo quo lumen vasis magis increfcit, eo celeritas liquidi contenti magis minuitur. Sed lumen Aortæ in sinu suo increfcit; est enim ad lumen aortæ in ostio cordis, ut 37 : 32 ^(c); ergo sanguinis celeritas minuitur.

§. LXVIII.

Eadem celeritas minuitur in arcu Aortæ. In arcu Aortæ sanguis lineam curvam describit, quæ inter parabolam, & circulum ambigit ^(d); motus autem per lineam curvam semper a duabus potentiis disparatis fit, quarum utraque aliquid amittit; cum corpus viam mediam, nempe diagonalem (qualium infinite parvarum aggregatum curvam constituit) sequatur. Sed earum virium altera est celeritas sanguinis (§. 65.), altera resistentia lineæ curvæ; ergo utraque aliquid amittit; hinc celeritas minuitur.

SCHO-

(a) s' GRAVESANDE l. c. n. 1575. (b) Ibid. n. 1430. (c) BOISSIER

Mem. de l'Acad. de Berlin 1755. p. 38. (d) HALLER. l. c. p. 160.

SCHOLIUM I.

Sit arcus circuli ABC (Fig. 3.), qui arcum aortæ repræsentet, cum Fig. 3. arcui circuli aliquantum similis fit (§. 68.); *a b* ostium arteriosum, AD sit celeritas (§. 65.); DE vis gravitatis sanguinis (§. 52.), una cum resistentia laterum arcus ABC. Dico *celeritatem AD imminui*. Nam, si sola celeritas AD ageret, moveret sanguinem secundum directionem AD, quæ tangens est arcus ABC, & vim centrifugam exprimit; corpus enim directionem semel acceptam tamdiu servat, quamdiu ab alia causa non mutatur; sed etiam agit vis gravitatis, & resistentia laterum arcus, quæ exprimitur per DE, & vim centripetam repræsentat; sunt ergo duæ potentiaë disparatæ AD, & DE, quæ per completum parallelogrammum AE repræsentantur. Sed potentiaë disparatæ eodem tempore conjunctis viribus diagonalem parallelogrammi describunt, quo separatis viribus latera ejus percurrerent; (a) hinc eodem tempore potentiaë AD, & DE describunt viribus conjunctis diagonalem AE, quo separatis viribus conficerent latera AD, & DE. Diagonalis autem AE minor est, quam $AD + DE$, quia in omni triangulo summa duorum laterum major est latere tertio; ergo minor effectus, si conjunctis, quam si separatis viribus agerent hæ potentiaë. Cum autem effectus adæquati causis adæquatis sint proportionales, etiam potentiaë illæ, in casu proposito, erunt minores; sed inter eas est celeritas AD; ergo hæc imminuitur. Q. E. D.

SCHOLIUM II.

Quia linea curva concipi potest, ut aggregatum talium infinite parvarum diagonalium (schol. præc.), erit etiam celeritas AD, quoad partem infinite parvam, in qualibet tali diagonali minuta, si frictionem demas; eam enim jacturam esse quantitatem infinite parvam secundi ordinis, demonstrat CL. de la CAILLE (b). Interim, cum ea jactura in omnibus dictis lineis arcus aortæ (§. 68.) fiat; summa omnium jacturarum tamen sensibilis evadet.

D 3

§. LXIX.

(a) de la CAILLE l. c. n. 68. (b) Ibid. n. 414.

§. LXIX.

COROLLARIUM I.

Quum circulus a corpore mobili describatur, quoties vis centrifuga, & centripeta constantes sunt; celeritas autem (§. 65.) variabilis fit; patet, *arcum aortæ arcum circuli perfecti non esse.* (a).

§. LXX.

COROLLARIUM II.

Quum ulterius, quoties vis centripeta comparate ad centrifugam infinite parva est, corpus per tangentem abeat; patet ratio, *qua sanguis in arterias Carotides fertur.*

SCHOLIUM.

Huic ingressui sanguinis etiam favet margo ostii, qui versus cor est depressior. (b).

§. LXXI.

COROLLARIUM III.

Quia denique partes sanguinis æquali celeritate omnes e corde ejiciuntur (§. 65.); eæ autem, posita celeritate æquali, majorem motus quantitatem habent, quæ solidiores sunt (§. 60.), quales globuli rubri sunt; partes vero, quæ majorem motus quantitatem, etiam majorem vim centrifugam habent (c); *liquet, cur potissimum globuli rubri carotides intrent.*

§. LXXII.

Sanguis cum impetu arterias transit. Impetus enim est actio corporis in corpus cum motu (d); sanguis autem per
ar-

(a) HALLER. l. c. (b) Ibid. T. I. p. 66. & seq. (c) s^r GRAVESANDE l. c. n. 588. (d) HAMBERGER. Phys. §. 34.

arterias movetur (§. 10.), celeritate a corde accepta (§. 65.); ergo cum impetu arterias tranfit.

§. LXXIII.

Eum impetum (§. 72.) majorem habent partes sanguinis rubræ. Globuli rubri majorem denfitatem (§. 59.), & ob figuram sphæricam (§. 55.) minimam superficiem habent; hinc maximam inter reliquos motus quantitatem recipiunt (§. 60.); proinde majorem impetum (§. 72.) habent.

SCHOLIUM.

Præterquam, quod figura sphærica omnium isoperimetrarum fit capacissima, ut Geometræ demonstrent; eandem superficiem etiam insigniter minui, quoties sex globuli flavi in unum rubrum (§. 56. in Schol. 1.) compinguntur, sic ostenditur: sphærarum superficies sunt inter se in ratione quadrata radiorum; pondera, ut cubi: erit ergo, in dicto casu, cubus globuli majoris, ad cubum minoris, sextuplus; superficies vero majoris ad superficiem minoris cujusque non nisi, ut $\sqrt[3]{36}$ ad 1, nempe paulo plus, quam tripla cum una quarta, ut superficies pene duplo imminuatur, quando sex globuli in unum compinguntur. Sit enim Denfitas globuli sanguinei = D, sex serosorum = d; Massa globuli sanguinei = M, sex flavorum = m; superficies sanguinei = V, sex flavorum = v; radius globuli sanguinei = a, unius flavi = b. Erit (demonst. §. 60. in Schol.): $D : d = M v : m V$.

Sed (§. 73.)

$$M = a^3,$$

$$m = 6 b^3,$$

$$\& a^3 = 6 b^3;$$

Ergo

$$M = m.$$

Proinde

$$D : d = v : V.$$

Præterea (§. 73.)

$$V : v = a^2 : 6 b^2$$

Et cum

$$a = \sqrt[3]{6 b^3}$$

Erit:

$$V : v = \sqrt[3]{6 b^3}^2 : 6 b^2.$$

Jam

Jam si $b = 1$,
 Erit $\sqrt[3]{6b^3} = \sqrt[3]{36}$,
 Quæ est major, quam $\frac{13}{4}$, minor, quam $\frac{10}{3}$,
 Erit ergo $V : v = \frac{10}{3} : 6$,
 Proinde $D : d = 6 : \frac{10}{3}$. Q. E. D.

§. LXXIV.

Eadem sanguinis partes rubræ motum suum conservant diutius. In globis heterogeneis, ab eadem vi motrice communi, & in eodem fluido resistente, projectis, jactura motus, pro ratione superficierum, directioni resistentiæ fluidi oppositarum, & conservatio motus, pro ratione densitatum se habent. (a). Sed globuli rubri minimam habent superficiem (demonst. §. 73. in Schol.), & maximam soliditatem (§. 59. 60.); proinde motum suum conservant diutius.

§. LXXV.

Sanguinis partes celerius per arteriarum axim moventur. Arteriarum axis linea plerumque recta est, aut rectæ propior; ergo via brevissima, & quum simul causæ moventis directionem fervet, minores resistentias habet; proinde non decedit tam multum celeritati liquoris moti; ergo sanguinis per axin celeritas major est.

§. LXXVI.

COROLLARIUM.

Quum globuli rubri simul motus sui tenaciores sint (§. 47.); axin arteriæ magis sequuntur.

SCHO.

(a) s' GRAVESANDE l. c. n. 1918.

SCHOLIUM I.

Inter resistentias (demonst. §. 75.) non exigua est frictio, quam partes in vasorum lateribus patiuntur; de qua infra.

SCHOLIUM II.

Veritates (§. 74. 76.) experimentis, in globulis diversæ materiei, institutis confirmavit CARTESIUS (a); impugnat autem CL. HAMBERGERUS (b).

§. LXXVII.

Sanguinis celeritatem (§. 65.) non minuit arteriarum vis contractilis (§. 22.). Arteriæ contractiles sunt (§. 22.), & suæ dilatationi resistunt (§. 23.); hinc elasticæ sunt (§. 24. 25.). Sed etiam sanguinis globuli elastici sunt (§. 58.); ergo, dum per arterias moventur, & in latera impingunt (de quo infra), idem fit, ac si corpus elasticum in aliud elasticum impingat. Sed tum post ictum eadem celeritas manet, quæ ante ictum fuit (c); ergo non minuitur.

§. LXXVIII.

Nec eandem (§. 65.) minuit figuræ in arteriis mutatio. Arteriæ flexiles sunt, hinc in figura sua mutabiles (§. 13. 14.); sed simul sunt elasticæ (§. 25.); quoniam igitur ab elasticitate celeritas non minuitur (demonst. §. 77.); nec a figuræ in corpore elastico mutatione minuetur.

SCHOLIUM.

Frictio hic aliquam imminutionem facere potest; sed de hac infra.

TOM. I.

E

§. LXXIX.

(a) HALL. l. c. p. 167. (b) Physiol. Med. §. 167. in schol. (c) S'GRAVE-SANDE l. c. n. 1100.

§. LXXIX.

*Nec eadem minuitur a pressione incumbentis atmosphæ-
ræ.* Pondus atmosphæ-
ræ, corpus nostrum comprimentis,
æstimatur æquale ponderi columnæ aqueæ, cujus altitudo
fere 33 pedum, basis vero 15 pedum quadratorum esset ^(a);
sed aër est corpus elasticum, ut Physici norunt; ergo æque
de celeritate sanguinis nihil decedet (§. 77.).

§. LXXX.

*Neque pondus partium corporis humani, ut musculorum,
adipis, cutis, &c. quæ arteriis incumbunt, eam celeritatem
minuit.* Sanguis per arterias motus eas partes elevat, ut
in arteria poplitæa adparet, si unum crus alteri imponatur;
ergo aliquam celeritatis suæ partem iis communicat. Sed
eadem partes momento sequenti, gravitate sua reagunt in
arterias eadem virium proportionem, qua elevatæ fuerant;
ergo eandem velocitatis partem sanguini reddunt; nihil pro-
inde sanguis ex hac causa de celeritate amittit.

§. LXXXI.

*Sanguinis autem celeritas vere imminuitur ab arteria-
rum dilatatione.* Si omnes arteriarum ramos cum trunco
suo ad cor compares, coni divergentis obliqui truncati ad-
fectiones habent (§. 21.); sed in cono divergente celerita-
tes decrescunt in ratione inversa (§. 67.) luminum ^(b); pro-
inde ob dilatationem celeritas vere minuitur.

SCHOLIUM.

Eam retardationem (§. 81.) in aneurysmatibus expertus est ILL. HALLERUS ^(c).

§. LXXXII.

^(a) HALLER. l. c. p. 169. ^(b) D. BERNOULLI Hydrodynam. p. 87. conf.
p. 276. ^(c) l. c. p. 177.

§. LXXXII.

Eadem celeritas minuitur frictione. Frictio enim, ad nostrum casum adplicata, est contactus successivus superficiei globulorum sanguinis ad superficiem internam vasorum; quum autem in rerum natura nulla superficies adeo lævis sit, ut aliquas eminentias, & cavitates non haberet, idem de arteriarum superficiei interna, etsi satis lævi (§. 30.), verum est; eminentiæ vero illæ totidem sunt resistentiæ, quas globuli moti superare debent; hinc globulos retardant; proinde celeritatem minuunt.

§. LXXXIII.

COROLLARIUM I.

Frictionem similem etiam ipsi globuli inter se patiuntur (§. 82.).

§. LXXXIV.

COROLLARIUM II.

Quum globuli per axin moti latera arteriarum non contingant, etiam frictionem (§. 82.) non experiuntur, sed solum alteram (§. 83.); unde iterum patet, *quare reliquis celerius moveantur* (§. 74.).

§. LXXXV.

Hæc frictio (§. 82.) augetur 1.) *longitudine vasis*, 2.) *angustia vasis*, 3.) *celeritate corporis moti*, 4.) *pressione corporis moti*. Frictiones sunt in ratione superficierum; sed superficies in vase longiore major est; ergo & frictio. Q. E. primum.

In vasis angustis puncta contactuum augentur, quia plures fluidi partes vasis latera tangere debent; sed frictiones

sunt in ratione contactus (§. 82.); ergo etiam augentur. Q. E. alterum.

Si tempora sint æqualia, corporum celeritates sunt, ut spatia, seu superficies percursum; ergo quo celeritas major, eo spatium, seu superficies major; sed frictiones sunt in ratione superficierum (n. 1. huj.); proinde cum celeritate augentur. Q. E. tertium.

Quo corporis moti pressio major est, eo arctius corpus hoc superficiei, super quam movetur, adplicatur; sed quo fortius ei adplicatur, eo plura sunt contactus puncta; quum igitur frictiones sint in ratione contactus (n. 2. huj.); frictiones etiam augentur. Q. E. quartum.

SCHOLIUM I.

Ratio frictionis (§. 85. n. 2.) non sequitur rationem angustiae vasis in infinitum; postquam enim ad ea vasa perventum fuerit, quæ unicum globulum transmittunt, in iis frictio iterum minor est; cum globulus talis latera quælibet non nisi in unico puncto contingat.

SCHOLIUM II.

Veritas (§. 85. n. 3.) ulterius sic declaratur. Sint duo corpora mota A, & B, corporis A celeritas = C, corporis B = c; corporis A tempus = T, corporis B = t; corporis A spatium = S, corporis B = s; corporis A frictio = F, corporis B = f.

Erit : $F : f = C : c.$

Nam (a) $S : s = CT : ct$

Sed (ex hyp. $T = t,$

Ergo $S : s = C : c.$

Sed (§. 85. n. 1.) $F : f = S : s.$

Ergo etiam $F : f = C : c.$ Q. E. D.

SCHO-

(a) de la CAILLE l. c. n. 49.

SCHOLIUM III.

Neque tamen hæc proportio (schol. præc.) semper obtinet; ubi enim motus celerrimus est, facile corpus motum superficierum asperitates præterlabitur, ita, ut ab iis notabilem retardationem vix percipiat.

SCHOLIUM IV.

Experimenta tum hydraulica, cum Physiologica, quæ confirmant id (§. 85.), adducit HALLERUS (a).

§. LXXXVI.

Cum frictio sit in ratione punctorum contactus (demonstr. §. 85. n. 2.); puncta vero contactus eo plura sint, quo superficies se invicem fortius complectuntur (demonstr. §. 85. n. 4.); ea autem complexio fortior fiat, quoties tota vi liquor in plicam canalıs nititur, ut eam in rectum extendat; patet, *frictionem augeri, quoties canales flexos in rectos exporrigit.*

§. LXXXVII.

COROLLARIUM.

Hinc licet, ob figuræ mutationem, de celeritate sanguinis (§. 65.) in his plicis nihil decedat (§. 78.); decedit tamen ob frictionem auctam (§. 86.).

SCHOLIUM.

Id (§. 87.) experimentis confirmat HALLERUS (b), & HAMBERGERUS (c).

§. LXXXVIII.

Quoniam unus arteriæ ramus coni convergentis obliqui adfectiones habet (§. 20.); in eo autem cono angustia, &

E 3

con-

(a) l. c. p. 178. & seqq. & 185. & seq. (b) Ibid. p. 187. (c) Physiol. Med. §. 172. & seqq.

contactuum puncta augentur, & hinc frictio continuo major fit (§. 85.); sequitur etiam *figuram arteriarum aliquid celeritati sanguinis (§. 65.) detrahere (§. 82.)*.

§. LXXXIX.

Etiam ramorum anguli celeritatem (§. 65.) minuant, eoque magis, quo majores ipsi sunt. Maxima celeritas in arteriarum axi est (§. 75.); quæcunque ergo lineæ ab axi recedunt, minorem celeritatem habent; sed quo angulus rami major est, eo linea directionis magis ab axe recedit; proinde etiam celeritas magis minuitur.

SCHOLIUM I.

Fig. 4.

Propositio hæc (§. 89.) ulterius sic illustratur. Sit linea AB (Fig. 4.), quæ repræsentat axin cujusdam arteriæ; CD, quæ repræsentat axin ejus rami, qui cum arteria facit angulum DCB, circiter 16 grad. Dico celeritatem per CD esse minorem, quam per AB. Nam diagonalis CD, resolvi potest in EC, & ED, & ED repræsentat vim, qua fluidum per axin AB movebatur, & EC vim, qua versus latera tendebat, cum sanguis in omnem sensum premat (§. 54.); sunt adeo EC, & ED duæ potentiaë disparatæ; sed hæ minus spatium describunt viribus conjunctis, quam separatis (demonstr. §. 68. in schol. 1.); &, si tempora sint æqualia, celeritates sunt, ut spatia (demonstr. §. 85. in schol. 2.), ergo celeritas in CD minor, quam in axi AB. Q. E. primum.

Præterea concipiatur axis rami GC, ut cum axi AB faciat angulum GCB fere 55 grad; completo parallelogrammo IF, latus IC = EC repræsentabit vim, qua fluidum lateraliter premitur, sed GC minus, quam DC; & etiam IG, quæ repræsentat vim, qua fluidum per axin AB movebatur, minus quam ED; proinde celeritas in CG minor, quam in CD (n. 1. huj.). Sed angulus GCF > DCB (ex constr.); ergo, quo angulus major, eo celeritas minor est. Q. E. alterum.

SCHO-

SCHOLIUM II.

Experimenta id evincentia fecit CL. HAMBERGERUS, (a) aliique (b).

§. XC.

Denique sanguinis viscositas celeritatem (§. 65.) minuit. Sanguinis elementa viscida sunt, &, solo motu deficiente, per vim adtractivam concrefcunt illico (§. 62.); ergo motus ea in fluore confervat; poterunt igitur vires adtractivæ particularum ut potentiæ confiderari, quæ a motu sanguinis superari debent; fed superari nequeunt, nifi aliqua pars celeritatis iis communicetur, ut ex Phificis certum; ergo ea parte celeritas (§. 65.) minui debet.

SCHOLIUM I.

Rationem *Visciditatis* haberi debere negavit HAMBERGERUS. (c) Sed fola anatomica injectio docet, aquam puram multo facilius, quam liquores viscidos, per vafa urgeri.

SCHOLIUM II.

HALLERUS inter caufas retardantes etiam refert anastomofes (§. 29.); cum fapiffime contrario ductu fibi occurrant; ficque motus oppofiti fiant (d). Verum cum globuli sanguinis elastici fint (§. 58), nihil de celeritate in tali occurfu peribit (demonftr. §. 77.).

§. XCI.

Resistentiæ (§. 67. 68. 81. 82. 85. 87. 88. 89. 90.), quas vis cordis superare debet (§. 64.), poffunt concipi, ut vires, vi cordis directe oppofitæ. Resistentia est id, quod effectui alicujus vis vel toti, vel ex parte æquilibrium dat. (e)

Sed

(a) Phifol. Med. §. 176. (b) HALLERUS l. c. p. 184. 187. & feq. (c) de Cordis diaftole N. X. (d) l. c. p. 189. & feq. (e) WOLF. Elem. Hydroftat. Germ. §. 8.

Sed æquilibrium non fit, nisi in viribus æqualibus directe in se invicem absque motu agentibus ^(a); igitur resistentiæ hæ, ut vires directe oppositæ concipi possunt.

§. XCII.

COROLLARIUM I.

Quoniam inæqualibus viribus, in uno eodemque corpore directe oppositis, movetur illud corpus secundum directionem vis majoris, ea vi, quæ æqualis est differentiæ virium directe oppositarum ^(b); sequitur, *sanguinem moveri secundum directionem cordis, ea vi, quæ æqualis est differentiæ virium cordis, & resistentiæ* (§. 67. ad 90.) *directe oppositarum* (§. 91.)

§. XCIII.

COROLLARIUM II.

Hinc manente eadem vi cordis *movetur sanguis in ratione inversa resistentiarum* (§. 91.)

§. XCIV.

Spatium, quod sanguis actu percurrit, est directe, tempus autem, quo spatium illud describitur, inverse proportionale eidem virium directe oppositarum differentiæ. Spatia enim sunt in ratione composita celeritatum, & temporum; ergo, si tempora sint æqualia, sunt, ut celeritates directe (demonstr. §. 85. in schol. 2.). Sed celeritates sunt in ratione directa differentiæ virium directe oppositarum (§. 92.); ergo & spatia. Q. E. primum.

Tempora sunt in ratione composita ex directa spatiorum, & inversa celeritatum ^(c); sed celeritates sunt, ut differen-
tiæ

(a) HAMBERGER. Phys. §. 24. (b) s' GRAVESANDE l. c. n. 357. (c) de la CAILLE l. c. n. 51.

tia virium directe oppositarum (n. 1. huj.); ergo tempora se etiam habent inverse ad differentias dictas. Q. E. alterum.

SCHOLIUM.

Sit spatium in vase v. g. $A = S$, in vase $B = s$; celeritas sanguinis in $A = C$, in $B = c$; tempus in $A = T$, in $B = t$; differentia virium in $A = D$, in $B = d$.

Erit (demonstr. §. 85. in schol. 2.):

$$S : s = CT : ct.$$

Sed fit interea $T = t$.

Erit $S : s = C : c$

Quia vero (§. 92.) $C : c = D : d$,

Erit etiam $S : s = D : d$. Q. E. primum.

Sed iterum (§. 94.) $T : t = \frac{S}{C} : \frac{s}{c}$

Igitur æqualiter augendo per Cc , erit:

$$T : t = \frac{SCc}{C} : \frac{sCc}{c} = Sc : sC.$$

Sed (§. 92.) $C : c = D : d$,

Ergo etiam $T : t = Sd : sD$.

Quum autem (n. 1. huj.) $S : s = D : d$.

Erit etiam $T : t = Dd : dD$,

Et dividendo per D , d :

$$T : t = d : D. \text{ Q. E. alterum.}$$

§. XCV.

Celeritas crescit, prout spatium augetur, & tempus minuitur; decrescit autem, quemadmodum tempus augetur, & spatium minuitur (§. 94.). Celeritates enim sunt in ratione composita ex directa spatiorum, & inversa temporum (a) spatia autem se habent directe, ut differentia virium op-

TOM. I.

F

po-

(a) de la CAILLE l. c. n. 44.

positarum (§. 94.); ergo etiam celeritates, si tempora sint æqualia; proinde augebuntur auctis spatiis, & temporibus (si inæqualia sint) minutis, & contra.

SCHOLIUM.

Ex (demonstr. §. 94. in schol.)

$$S: s = C: c$$

Sed etiam $S: s = D: d,$

Ergo etiam $C: c = D: d.$

Sed (§. 92.) $D: d = St: sT,$

Ergo etiam $C: c = St: sT.$

Sit jam (ex hyp.) $S > s,$

Erit etiam $C > c.$

Et contra si $s > S,$

Erit $C < c.$ Q. E. D.

§. XCVI.

Quum tot sint resistentiæ in arteriis (§. 67. ad 90.), & sanguis in ratione inversa resistentiarum moveatur (§. 93.); patet *celeritatem sanguinis (§. 65.) in arteriis multum minui, & in ramis tardius, quam in truncis (§. 66.) sanguinem moveri.*

SCHOLIUM.

Diverforum Authorum calculos, circa hoc celeritatis decrementum (§. 96.) HALLERUS recenset (a). Ast arduum sane, & periculi plenum est in quantitatibus determinatis hic aliquid definire.

§. XCVII.

Quum interim microscopia doceant, etiam præsentibus causis retardantibus (§. 96.), sanguinem tamen in motu per vasa ultima capillaria, celeritatem majorem, quam
in

(a) L. c. p. 193. & seq.

in ramis, qui inter magnos, & vasa capillaria medii sunt, habere; necesse est, *ut in arteriis capillaribus quædam novæ celeritatis causæ adsint; aut certe causæ retardantes (§. 96.) hic loci insigniter minuantur.*

SCHOLIUM.

Novam hanc celeritatem (§. 97.) LEUWENHOECKIUS, & HALLERUS viderunt. (a).

§. XCVIII.

In arteriis capillaribus non minuitur celeritas (§. 97.) ab earum dilatatione, ut in ramis majoribus fit (§. 81.); immo sæpe contrarium hic evenit; Trunci magni in ramos dividuntur, quorum lumina simul sumpta lumen trunci excedunt (§. 19. 21.); id autem in arteriis capillaribus non observant Anatomici; sed potius truncus penultimus ramis minimis satis notabili ratione major est (b); proinde celeritas ex hac causa non minuitur. Q. E. primum.

Si celeritas minuitur, dum vas capacitate augetur (§. 67.); augetur vero vas capacitate ob ramorum numerum, & contra (§. 21. 39.): necesse est, ut celeritas augeatur, quoties duo vel plures rami in unum truncum conveniunt, venoso more; atqui id sæpe fit in retibus minimarum arteriarum (c); ergo celeritas augetur; proinde contrarium (§. 81.) evenit. Q. E. alterum.

§. XCIX.

Friçtio in arteriis capillaribus minus de celeritate demit. Friçtio enim ibi minor est (§. 85. Schol. 1.); proinde de celeritate minus demit.

F 2

§. C.

(a) Ibid. p. 195. & seqq.
& seq.

(b) Ibid. T. I. p. 80.

(c) Ibid. T. II. p. 197.

§. C.

Quoniam præterea arteriæ hæ (§. 97.), antequam in venas mutantur, diu cylindricæ, & absque ramis decurrunt (demonstr. §. 20. n. 3.); etiam *a figura* (§. 88.), & *a ramorum angulis* (§. 89.) *minorem, aut fere nullam resistentiam sanguis patitur.*

§. CI.

Causa autem novæ celeritatis (§. 97.) non est sanguinis arteriosi pondus, quod sanguinem in venas transire, ibique, in animale vivo, adscendere cogeret, ut pondus liquorum in tubis communicantibus. Si hæc lex in arteriis obtineret locum, etiam aqua arteriis immissa, gravitate sua in venis adscensum, ficque æquilibrium moliri deberet; atqui non moliri experimenta docent. ^(a) Igitur pondus sanguinis novæ celeritatis causa non est.

SCHOLIUM I.

Neque sanguinis arteriosi effectus, qui sunt: rubor, faciliior sudor, & arteriarum pulsatio, hæmorrhagiæ, & exanthemata, facilius in pedibus, quo sanguis gravitate ruere deberet; sed potius in capite omnium primo manifesta redduntur.

SCHOLIUM II.

Nolim tamen omnem gravitatis effectum sanguini arterioso denegare. Cur enim in phrenitide *corpus erectum tenendum* (b)?

SCHOLIUM III.

Propositio (§. 101.) de arteriis tantum valet, non de venis; & quidem in animale vivente, in mortuo enim vis gravitatis plura præstat.

§. CII.

(a) HALLER, l. c. T. II, p. 202. (b) BOERH. Aphor. §. 781.

§. CII.

Nec vis nervorum talis causa (§. 97.) est. Ea enim alicujus entis nequit esse causa physica, qua absente tamen ens ponitur, & mutata non mutatur. Sed etiam sublata vi nervea, celeritatem (§. 97.) permanere, ex paraplegia constat, ex placenta uterina, & ex celeritate sanguinis in arteriis offeisis; & aucta vi nervea, ut in spasmodicis hystericeis, celeritas hæc augeri visa non est; proinde causa ejus vis nervea esse nequit.

§. CIII.

Neque arteriarum contractio (§. 22.) talis causa (§. 97.) est. Arteriarum enim contractio (§. 22.) eam solum celeritatis (§. 65.) partem restituit (§. 77.), quæ in arteriarum dilatationem (§. 23.) impensa fuit; & ibi deest (a), ubi celeritas (§. 97.) est maxima; proinde ejus causa non est.

§. CIV.

Vis derivationis in arteriis locum habet. Vis derivationis ea est, quæ a spontanea arteriæ contractione pendet; sanguis autem movetur etiam a morte aliquo tempore (b); sed motus is non provenit a corde, quod cordis quies cum morte necessario conjuncta sit; nec a contractilitate (§. 22.) musculosa, quæ pariter cum vita cessat; ergo a contractione elastica (§. 25.), quæ chordis inanimatis etiam communis est, pendere videtur; sed ea vis derivationis est; ergo hæc vis in arteriis locum habet.

(a) HALLERUS l. c. p. 210. & seq. (b) Ibid. p. 221.

SECTIO III. CAPUT III.
SCHOLIUM.

Diu a morte sanguis moveri potest a propria gravitate (§. 101. in Schol. 3.), a frigore vasa constringente, a vi adtractiva parietum vasorum, denique a sanguinis per putredinem dissolutione, & aëre elastico inde evoluto.

§. CV.

Motus muscutorum sanguinis celeritatem auget. Truncos enim arteriosos majores inter musculos decurrere, Anatome docet. Sed muscoli in actione tument ^(a); ergo spatia intermedia minuunt, & vasa, ibi posita, comprimunt. Huic autem pressioni cedunt arteriæ teretes (§. 12.); ergo cavitates suas minuunt, & latera ad invicem accedunt; huic vero pressioni sanguis cedit, sicque movetur (§. 57.); ergo motus muscutorum celeritatem auget, dum facit, ut breviori tempore majus spatium describatur (§. 95.); proinde auctæ celeritatis causa est.

C A P U T III.

DE

MOTU SANGUINIS PER ARTERIAS LATERALI.

§. CVI.

Arteriæ sanguine semper plenæ sunt. Id vulnera arteriarum, in frigidis animalibus microscopia, & natura arteriarum contractilis (§. 22.), docent.

SCHOLIUM.

Quæ in frigidorum arteriis spatia aliquando vacua adparent, vacua non sunt, sed humoribus pellucidis repleta.

§. CVII.

(a) BOERH. Instit. §. 401. n. 7.

§. CVII.

Sanguis arteriarum ab unda insequente impellitur. Arteriæ sanguine semper plenæ sunt (§. 106.); ergo nova unda ex corde advenire nequit, nisi ei spatium paretur. Sed sanguis in arteriis contentus etiam de celeritate sua continuo amittit (§. 97.); nova autem unda, cum nihil experta sit, celeritatem (§. 65.) adhuc integram habet; ergo unda sequens movetur celerius, quam præcedens. Si vero corpus unum tardius motum præcedat, & alterum celerius motum insequatur, hoc in illud impinget excessu celeritatis, illudque impellet, ut Phycis notum; proinde sanguis præcedens ab insequente impellitur.

SCHOLIUM I.

Sit massa undæ novæ = M , præcedentis = m ; celeritas novæ = $a + b$, præcedentis = a ; impulsus quantitas novæ = Q , præcedentis = q .
Erit (§. 60.) $Q : q = (Ma + Mb) : ma$.

Et dividendo per a , erit:

$$Q : q = Mb : m.$$

Hinc idem est, ac si unda præcedens haberet celeritatem = 0 , id est, quiesceret; & unda nova moveretur celeritate = b ; ergo unda nova præcedentem impellet velocitate = b . Q. E. D.

SCHOLIUM II.

Hujus impulsio (§. 107.) calculum in quantitativis determinatis tentavit CEL. BOISSIER. (a)

SCHOLIUM III.

Ea propulsio (§. 107.) ad motum sanguinis progressivum (§. 67. ad 105.) pertinet.

§. CVIII.

(a) Mem. de l'Acad. de Berlin 1755. p. 38.

§. CVIII.

Arteriæ in quavis cordis contractione a sanguine in longitudinem exporriguntur. Arteriæ ramos habent (§. 19.), iique ad acutos cum trunco angulos oriuntur (§. 26.); ergo a directione axeos trunci arteriosi deflectunt, & parietes ramorum obliqui ad eam axim sunt. Sed columnæ sanguinæ in trunco secundum axin, & lineas ad eam parallelas moventur tamdiu, quamdiu in sua directione a vasorum parietibus non mutantur (§. 74.); incidunt ergo in parietes ramorum obliquos; sed hi parietes flexiles sunt (§. 14.); ergo cedunt huic vi incurrenti; cedere autem nequeunt ob cohæsionem (§. 1.), nisi elementa horum ramorum secundum eam directionem, id est, secundum longitudinem, paulum ab invicem dimoveantur; sed, quum id in cordis contractione in omnibus ramorum arteriosorum parietibus contingat; iidem elongari etiam omnes debent; proinde tota arteria in longitudinem exporrigitur.

SCHOLIUM I.

Fig. 5.

Sit enim ABC (Fig. 5.) truncus arteriosus cylindricus (§. 20. in schol. 2.), cujus axis linea *ab*; dividatur is truncus in duos ramos BD & CE, qui simul angulum DBC faciunt; latera *bD*, & *bC* angulum constituunt cum axi *ab*, hinc ad axim obliqua sunt. Sanguis in trunco ABC movetur secundum directionem axeos *ab*, & lineas huic parallelas, v. g. *ce*, & *df*, quæ simul directionem cordis repræsentant; incidunt ergo globuli sanguinei oblique in latera *bD*, & *bE*, in punctis *e*, & *f*, quæ ob parietes *bD*, & *bE* flexiles cedunt huic vi, & a vicinis punctis magis dimoveantur; sed hoc fit in omnibus punctis linearum *bD*, & *bE*; ergo omnia elementa magis ab invicem discedunt; proinde rami BD, & CE elongantur. Q. E. D.

SCHO-

SCHOLIUM II.

Eam elongationem (§. 108.) in arteria pollicis pedis ad unam lineam geometricam fieri, vidit ILL. BARO DE SWIETEN (a); similia oculis usurpavit HALLERUS; causam vero a minuta sanguinis celeritate repetit (b)

§. CIX.

Sanguis arteriarum latera premit perpendiculariter. Arteria quomodocunque considerata canalis obliquus est; ergo liquidi eum transeuntis motus obliquus etiam est; sed omnis motus obliquus in duas rectas resolvi potest, quarum una axi, & parieti arteriæ parallela, altera perpendicularis est, ut ex mechanicis notum; ergo sanguis latera etiam premit perpendiculariter.

SCHOLIUM I.

Hanc pressionem (§. 109.) a posteriori confirmant aneurysmata. (c).

SCHOLIUM II.

Ea pressio (§. 109.) eo minor est, quo sanguinis circulus est expeditior; & contra. In calculo autem ejus inveniendi summa difficultas est. (d).

§. CX.

Quoniam vero unda præcedens lentior est, quam insequens (§. 107.); & idcirco cedere loco non potest illico undæ recens ex corde advenienti, cor tamen validissime in contractione sua eam undam exprimit; parietes arteriarum tam in longitudinem (§. 108.), quam ad latera (§. 109.) valide premit; ea vero latera, cum flexilia sint (§. 14.), huic impressioni cedunt, ut spatium novæ undæ parent; ergo *arteria in contractione cordis dilatatur.*

TOM. I.

G

Scho-

(a) Comment. §. 33. (b) l. c. T. II. p. 229. & seq. (c) HALLER, l. c. p. 231. & seq. (d) Ibid. p. 234. & seqq.

SECTIO III. CAPUT III.
SCHOLIUM.

Non ignoro a CL. WEITBRECHT exiguam novæ undæ ad totum vaforum sanguineorum systema rationem opponi. Ast datur in dilatatione successio, quæ, licet oculis sit imperceptibilis, minime tamen ex hoc solo principio negari debet.

§. CXI.

Quum autem arteriæ cessante causa extendente, tam vi elastica (§. 25.), quam vi musculari (§. 22.), se contrahant; cessante vi cordis premente in sua dilatatione, *arteriæ iterum contrahuntur.*

§. CXII.

Hæc contractio (§. 111.) proportionalis est dilatationi prægressæ (§. 110.). In corporibus elasticis vires inflectentes sunt, ut quadrata inflexionum ^(a). Sed in iisdem elaterium, dum relaxatur, actionem præstat æqualem illi, qua fuit flexum ^(b); igitur etiam vires relaxationibus communicatæ sunt, ut quadrata inflexionum ^(c). Sed dilatatio in arteriis (§. 110.) se habet, ut chordarum inflexio; & contractio (§. 111.) ut relaxatio; proinde etiam contractiones dilatationibus sunt proportionales.

§. CXIII.

Quoniam autem hæc alterna dilatatio (§. 110.) ad singulas cordis contractiones, Pulsus Medicis dicitur; liquet: *Arterias pulsare.*

§. CXIV.

Quum in pulsu arteriæ alterne dilatentur (§. 113.); dilatatio autem fiat, dum vis, qua cor novam undam expellit,
ad

^(a) S' GRAVESANDEL, c. n. 1341. ^(b) Ibid. n. 1083. ^(c) Ibid. n. 1344.

ad arteriam (§. 110.) pertingit; sequitur, *alternam vim cordis acceleratricem ad arteriarum pulsum requiri.*

§. CXV.

COROLLARIUM.

Ibi igitur nullus observatur pulsus, quo dicta vis (§. 114.) non pertingit.

SCHOLIUM.


Pulsus antiquitates HALLERUS recenset (a); discrimina vero ante expositam cordis actionem haud queunt intelligi, hinc eo releganda.

CAPUT IV.

DE

MOTUS UTRIUSQUE EFFECTIBUS.

§. CXVI.

 *Elementa sanguinis motu hoc (§. 67. ad 115.) in arteriis varie conturbantur, inter se colliduntur, seque invicem de suo deturbant itinere.* Elementa sanguinis in arteriarum parietes oblique incidunt (demonstr. §. 108.); cumque elastici sint, & ipsi (§. 58.), & arteriarum parietes (§. 25.), resiliunt; sub eodem, quo incidebant angulo; sed ita reflexi moveri nequeunt, quin in oppositum parietem, immo in globulos axin tenentes, impingant, & nova resilio sequatur; idque cum in omnibus globulis fiat, ii varie conturbantur, inter se colliduntur, & se de suo itinere deturbant.

(a) l. c. p. 243. & seq.

SCHOLIUM I.

Fig. 5.

Sit enim canalis arteriosus ABCDE (Fig. 5.); incidat in punctum *f* oblique globulus (§. 108. in schol. 1.). Per reflexionis leges, reflectetur in *b*; sique ob globulos, axin *mn* tenentes, posset, reflecteretur ex *b* in *k*; inde iterum reflecteretur in *l*, & sic porro; sed cum ob dictos globulos eo pervenire non possit, incidet, v. g. in globulum *g* aut *o*, & si illo celerior fuerit, hunc e loco suo deturbabit, inde iterum reflexus in alium incidet, & sic porro.

SCHOLIUM II.

Hæc propositio (§. 116.) non evertit dicta (§. 75.); quippe certum est, axin maxime sequi, & ex natura sua adfectare globulos rubros; interim tamen eorum quilibet ab axi deturbari, aut alterius generis (§. 56. in schol. 2.) globulus ad axim detrudi potest.

§. CXVII.

Cum nullis duobus momentis sibi sequentibus idem sit arteriarum status, sed jam dilatentur (§. 110.), jam contrahantur (§. 111.); patet etiam *sanguinis elementa nullis duobus momentis sibi sequentibus in eodem situ manere, & magis diffundi in arteriarum dilatatione (§. 110.); magis vero compingi (§. 116.) in earum contractione (§. 111.).*

§. CXVIII.

Elementa sanguinis in arteriis comprimuntur, & figuram sphaericam induunt. Elementa hæc undique ex lateribus (§. 111.), anterieus ab unda antecedente (§. 107.), posterius a vi cordis, hinc ubique æqualiter premuntur, & simul compressibilia sunt (§. 58. in schol.). Sed si corpus compressibile undique prematur æqualiter, figuram sphaericam induit, ut ex mechanicis notum; & in minus spatium redigi-

gitur; proinde sanguinis elementa in arteriis comprimuntur, & figuram sphaericam induunt.

SCHOLIUM.

Ad eam figuram (§. 118.) etiam aliquid conferre potest lumen circulare (§. 18.) arteriarum capillarium, per quas elementa solitaria transeunt; & frictio, quam hi globuli patiuntur. (a).

§. CXIX.

Quæ concreverant diversi ingenii particulae in majores moleculas, in arteriis dividuntur. Arteriae in ramos dividuntur (§. 19.), qui cum trunco angulos acutos constituunt (§. 26.); hi autem anguli in arteriarum cavitate calcaria constituunt, quæ ex duobus quasi planis in aciem scindentem coeuntibus constant. Tale autem corpus Mechanicis cuneus dicitur, & ad corpora, quæ in illud impingunt, aut vicissim, dividenda est aptissimum. Atqui moleculæ sanguinis in ea calcaria impingunt, præsertim eæ, quæ axin tenent, idque cum impetu (§. 72.); proinde dividuntur.

SCHOLIUM I.

Adparet facile consideranti (Fig. 5.), particulas, quæ axim *ab* tenent, Fig. 5. in simile calcar (§. 119.) *ebf* impingere, quod cunei proprietates habet.

SCHOLIUM II.

Quum autem in cuneo potentia sit ad corporum separandorum resistantiam, ut cunei basis ad ejus altitudinem (*b*); patet, potentiam eo minorem sufficere, quo, cæteris paribus, basis minor est; sed, positis iisdem planis lateralibus, basis eo minor est, quo angulus, quem ea plana constituunt, est acutior; proinde, quo angulus *ebf* est acutior, eo dictæ (§. 119.) moleculæ facilius dividuntur.

G 3

SCHO-

(a) HALLER. l. c. p. 275. (b) s' GRAVESANDE l. c. n. 277.

SCHOLIUM III.

Eam divisionem (§. 119.) etiam juvat mutua particularum, tam invicem, quam cum arteriarum lateribus collisio (§. 116.), & frictio inde nata (§. 82. 83.).

§. CXX.

Anastomoses (§. 29.) *sanguinis motum liberiores reddunt.* Pone enim quoddam obstaculum in ramo aliquo, quod a vi cordis illico superari non potest; cessabit eo tempore motus sanguinis, non tantum in illo ramo, sed etiam in omnibus aliis ramis, qui ex eo, tanquam trunco nascuntur. Quum vero anastomosis sanguinem ex uno ramo in alium deferat (§. 29.); poterit interea, ex ramo alio, mediante anastomosi, in ramos illos minores sanguis pervenire, donec ramus major ab obstaculo suo liberatus fuerit; proinde per anastomoses motus sanguinis liberior fit.

§. CXXI.

COROLLARIUM I.

Hinc etiam arteria destructa, aut immeabilis reddita per anastomoses compensari potest.

§. CXXII.

COROLLARIUM II.

Cum in anastomosis sæpe globuli ex oppositis partibus convenient; patet etiam, collisiones globulorum (§. 116.) inde multiplicari.

§. CXXIII.

COROLLARIUM III.

Vasorum capillarium retia anastomoses esse multiplicatas, injectio docet; hinc eosdem præstant effectus (§. 120. 121. 122.).

§. CXXIV.

§. CXXIV.

Elementa sanguinis in vasis capillaribus magnitudinem suam (§. 49. 61.) adquirunt. Arteriæ enim capillares diametrum determinatam, & ob majorem densitatem (§. 23.) constantiorem habent; & elementa solitaria eas percurrunt. Sed elementa hæc compressilia sunt (§. 58. in schol.), & divisibilia (§. 56.); sunt ergo arteriæ hic pro modulo elementis; hinc magnitudinem eorum determinant (§. 49.).

§. CXXV.

Eadem elementa in ramis minoribus viscida fiunt. In ramis minoribus celeritas sanguinis primigenia (§. 65.) insigniter minuitur (§. 96.); sed minuta celeritate particulæ facilius ab invicem, & a vasorum lateribus adtrahuntur; hinc viscida (§. 62.) fiunt.

S C H O L I U M.

Quum celeritas in vasis ultimis capillaribus iterum augeatur (§. 97.); etiam visciditatem hic loci aliquantum minui, credo.

§. CXXVI.

Sanguis in arteriis conservatur fluidus. Ad fluiditatem requiritur minima partium cohæsiō (§. 2.); quum autem cohæsiōnes sint, ut puncta contactuum (demonstr. §. 15. n. 1.), ibi cohæsiō erit minima, ubi puncta contactus, quolibet momento mutantur; atqui puncta contactus globulorum sanguinis in arteriis omni momento mutantur (§. 117.); ergo fluiditas conservatur.

§. CXXVIII.

§. CXXVII.

COROLLARIUM I.

Hinc *fluida nostra in quiete, aut motu lentiore concre-
sunt* (§. 126.).

§. CXXVIII.

COROLLARIUM II.

Cum calor a motu pendeat ^(a); liquet etiam, *cur calore
fluiditas conservetur.*

§. CXXIX.

COROLLARIUM III.

Quoniam præterea sphaerica figura paucissima contactus
puncta habet, hinc minime cohæret; adparet, *quid eadem
(§. 55.) ad fluiditatem conferat.*

§. CXXX.

*Densitas, tam globulis singulis, quam toti massæ sangui-
neæ, in arteriis conciliatur.* Densitas augetur, si manente
eadem massa superficies minuatur; hoc autem fit, quoties
plures globuli in unum compinguntur (§. 73. in schol.); sed
in arteriis ita compinguntur (§. 116. 118.); proinde singuli
globuli densiores fiunt. Q. E. primum.

Densitas est totius massæ in globulorum numero (§. 59.),
& ad serum proportionem; hæc autem dicta compactione (§.
116. 118.) augentur; ergo & tota massa densior fit. Q.
E. alterum.

§. CXXXI.

Calor sanguinis in arteriis generatur. Calor in motu
intestino gyratorio materiæ cohærentis positus est, ut alias
often-

(a) Dissert. Inaugur. de Causa calor. in sang. §. 1. 20.

ostendi (a). Sed in arteriis nostris sanguis eo modo movetur (§. 66. 72. 73. 74. 75.); proinde calor in arteriis generatur.

SCHOLIUM I.

Is calor in homine sano in thermometro Farenheitiano 94, ad 102 gradus esse observatur (b).

SCHOLIUM II.

Monui alias (c), atque iterum moneo in caloris causa determinanda aliquid adhuc latere, ulteriori ingenii, atque experimentorum industria evolvendum; quum nemo hactenus experimentis ILL. DE HAEN (d) satis responderit.

SCHOLIUM III.

Proposita brevitate gratia, aliorum de sanguinis calore hypothesen præmitto; cum eas fuisse ILL. HALLERUS (e); & earum celebriores olim ipse (f), adduxerim.

§. CXXXII.

Rubedinem sanguis in arteriis induit. Sanguinis globuli (§. 56.) in arteriis compinguntur (§. 116. 118.), & densantur (§. 73. in schol. §. 130.); densitas autem una ex primariis causis rubedinis est (g); proinde in arteriis sanguis ruber nascitur.

SCHOLIUM I.

Exigua ferri quantitas, quæ in sanguine reperitur (h), & a qua HALLERUS rubedinem repetit (i); phaenomenis hujus coloris exponendis haud sufficere mihi videtur.

TOM. I.

H

Scho-

- (a) Ibid. §. 15. (b) DE HAEN Rat. Med. T. II. p. 157. (c) Dissert. Inaugur. §. 31. (d) Rat. Med. T. II. p. 163. T. III. p. 139. & seqq. T. IV. p. 210. (e) l. c. p. 286. & seqq. (f) Dissert. Inaug. §. 27. & seqq. (g) NEWTON Opt. L. I. Part. II. Prop. X. & L. II. Part. III. Prop. X. (h) HALL. l. c. p. 120. & seq. (i) Ibid. p. 316. & seq.

SCHOLIUM II.

Alias hypothesen mox laudatus HALLERUS uberius exponit (a), & de præcipuis alias ipse disserui (b).

§. CXXXIII.

Motus sanguinis progressivus (§. 67. ad 105.) putredinem impedit. Putrefactio æque motu partium intestino perficitur, ut fermentatio: solo quippe effectu hæc ab illa distinguitur (c); sed fermentationem impedit motus progressivus (d); ergo & putredinem.

SCHOLIUM.

Ad putredinem impediendam etiam juvat continuata excretio humorum, qui jamjam putredini sunt proximi; & humorum blandorum, atque aquosorum, recens advenientium, miscela.

§. CXXXIV.

Idem tamen motus (§. 133.) humores nostros ad urinofam naturam disponit. Ad naturam urinofam calor 94, aut 96 grad., & tritus perpetuus requiritur (e); sed & calor (§. 131.), & tritus (§. 116.), adest in corpore; proinde humores ad naturam urinofam disponuntur.

§. CXXXV.

COROLLARIUM.

Hinc aucto calore augetur putredo.

§. CXXXVI.

Membranæ arteriarum densantur. Membranæ arteriarum vasis constant (§. 16.); vasa autem hæc sunt teretia (§. 12.), hinc compressilia. Sed comprimi nequeunt, nisi humo-

(a) Ibid. p. 310. & seqq. (b) Dissert. de Causa Rubed. in sang. (c) BOERH. Elem. Chem. II. p. 167. (d) Ibid. p. 186. (e) Ibid. p. 292.

mores contenti (§. 9.) expelluntur; quum autem præterea omnes corporis nostri partes ita comparatæ sint, ut, quoties se immediate contingunt, concrecant facile, idem in vasis his minõribus, dum, expulso humore, successiva & sæpius repetita compressione, latera vasorum se immediate contingunt, eveniet. Sed, si vasa hæc sensim concrecant, puncta contactuum augentur; ergo & densitas membranarum augetur (demonst. §. 59).

§. CXXXVII.

In his effectibus (§. 116. ad 134.) nullam, præ reliquis arteriis, pulmones prærogativam habent. Si prærogativam quandam pulmones haberent, vis aliqua adsignari deberet, quæ in pulmonibus esset, & in nulla alia arteria; atqui talis adsignari nequit (*a*); ergo nullam prærogativam pulmones habent.

SCHOLIUM I.

Vim aëris pulmones ingressi plurimi adsignant; sed hanc certe æquat, si non superat, vis muscutorum in arterias (§. 105.).

SCHOLIUM II.

Id dubium (§. 137.) jam olim circa sanguinis colorem uberius exposui (*b*).

§. CXXXVIII.

Elementa sanguinis in arteriis separantur. Arteriæ in ramos dividuntur (§. 19.) diversæ capacitatis; quilibet igitur ramus sibi convenientem humorem recipit, & e sanguine avehit, id est, humorem illum a sanguine separat.

H 2

SCHO-

(*a*) HALLER. l. c. T. III, p. 359. & seq. (*b*) Dissert. de Causa Rubed. in sang.

SECTIO IV. CAPUT I.
SCHOLIUM.

Hoc (§. 138.) est *secretionis* negotium, quod ob dignitatem suam peculiarem Physiologiæ tractatum meretur.

SECTIO IV.
DE
VENARUM ACTIONE.
CAPUT I.

DE
MOTU SANGUINIS PER VENAS IN GENERE.

§. CXXXIX.

AXIOMA I.



Venæ sanguinem suum ab arteriis accipiunt.

§. CXL.

AXIOMA II.

Sanguinis venosi velocitas primigenia ea est, quam in ultimis arteriis capillaribus habet.

§. CXLI.

Sanguis venosus ex ramis minimis ad ramos majores, ex his in truncos, inde ad cor fluit. Venæ arteriis munere opponuntur (§. 7.); est itaque demonstratio hujus propositionis conversa demonstrationis (§. 66.).

SCHOLIUM I.

Hoc iter (§. 141.) monstrant valvulae (§. 46.), vincula, microscopium, & injectiones.

SCHOLIUM II.

Æque duplex motus, *progressivus* nempe, & *lateralis* in venis, ut in arteriis (§. 66. in schol. 4.) deprehenditur.


CA.

CAPUT II.

DE

MOTU SANGUINIS PER VENAS
PROGRESSIVO.

§. CXLII.

 *Velocitas (§. 140.) globulorum secundum axin fluentium major est. Demonstratur ut (§. 75.)*

§. CXLIII.

Ea velocitas (§. 140.) non acceleratur a corde. Unda sanguinis ex corde propulsa partem celeritatis suae impendit undae antecedenti, hæc autem proxime antegressæ, & sic porro (§. 107.). Sed in canali longo hæc celeritas ita minuitur, ut tandem nulla sit (a); ergo vis cordis acceleratrix ad fines canalium longorum non pertingit. Sed arteriæ canales longi sunt; ergo ad earum fines non pertingit, & hinc eo minus ad venas; proinde sanguis venosus a corde non acceleratur.

SCHOLIUM.

Vim hanc (§. 143) ad ultimas arterias non pertingere (b); neque in venis observari (c), experimenta docent.

§. CXLIV.

Nec eadem (§. 140.) multum juvatur a venarum vi contractili. Venæ minus contractiles (§. 40.), minusque elasticæ (§. 41.) sunt arteriis; proinde eo minus sanguinis motum adjuvant (§. 103.).

H 3

§. CXLV.

(a) KAAUW Impet. facient. p. 183. (b) HALLER. l. c. T. II. p. 211. (c)

Ibid. p. 324.

§. CXLV.

Quoniam autem etiam venis ligatis, sanguis venosus ad cor redire conatur ^(a); *nec sola venarum in auriculam depletio motum sanguinis multum promovet.*

§. CXLVI.

Eam velocitatem (§. 140.) plurimum juvat natura venarum conica. Si omnes venarum ramos, cum trunco suo ad cor compares, coni convergentis adfectiones habent (§. 39.); & rami plures in unum truncum conveniunt (§. 32.); sed tum fluidi velocitas augetur ^(b); igitur natura conica velocitatem auget.

§. CXLVII.

Eandem (§. 140.) plurimum accelerant muscoli. Musculi venas comprimunt, ut arterias (§. 105.), & ob tenuitatem (§. 33.) majorem multo facilius; ergo sanguinem celerius movent (demonst. §. 105.). Is autem sanguis versus corporis extremitates moveri nequit ob valvulas (§. 46. 141.); ergo ad cor redire cogitur; proinde velocitatem ejus muscoli plurimum juvant.

§. CXLVIII.

Vis derivationis (§. 104.) eandem (§. 140.) accelerat. In defluxionibus, & arte institutis revulsionibus, insignes sanguinis venosi motus fiunt ^(c). Sed ii non pendent a corde, cum eo etiam evulso, vel arteriis ligatis tales motus observentur ^(d); nec a vi contractili musculari, quæ in venis exigua est (§. 40.); igitur a vi derivationis (§. 104.).

§. CXLIX.

(a) Ibid. p. 325. (b) D. BERNOULLI Hydrodynam. p. 112. & s' GRAVESANDE l. c. n. 1694. (c) HALLERUS l. c. p. 328. & seq. (d) Ibid.

§. CXLIX.

Sanguis venosus magis gravitate regitur, quam arteriosus. Sanguis venosus contra propriam gravitatem (§. 52.) ascendere debet, & causæ eum moventes (§. 144. 145. 146. 148.) sunt debiliores, quam in arteriis; proinde magis gravitat.

§. CL.

Huic ponderi (§. 149.) resistunt valvulae (§. 46.). Valvulae canalem venosum in tot receptacula, & hinc columnam sanguinis in tot partes dividunt, quot ipsæ sunt, unitate addita; ergo earum quælibet unam tantum ponderis partem sustinet, & æque infima, ac suprema valvula, unam solum partem, non totam columnam, a relapsu prohibet.

SCHOLIUM I.

Sit vena v. g. sex valvulis prædita, columna sanguinis ponderet v. g. drachmas quatuor; dividetur tota vena, & hinc sanguinis columna in 7 partes; ergo erit pressio, quæ in initio hujus venæ absque valvulis fieret, ad eam, quæ præsentibus valvulis fit, ut 7: 1; valvula enim quælibet, & sic etiam venæ initium solum $\frac{1}{7}$ ponderis totius, id est, fere 1 scrupulum, & $11\frac{1}{2}$ grana sustinebit.

SCHOLIUM II.

Sanguinem autem sæpius præternaturaliter regredi, experimenta ostendunt (a).

SCHOLIUM III.

Eam valvularum utilitatem (§. 150.) perperam negavit HAMBERGERUS (b).

§. CLI.

(a) HALLERUS l. c. T. I. p. 216. & seq. (b) Physiol. Med. §. 154.

§. CLI.

Anastomoses (§. 45.) *motum sanguinis liberio-rem red-
dunt, & gravitatem* (§. 150.) *minuunt.* Demonstratur ut
(§. 120. & 150.).

§. CLII.

*In truncis venarum majoribus inspiratio etiam sanguinis
motum adjuvat.* In inspiratione via facilior sanguini in pul-
monem patet; hinc vi derivationis (§. 148.) sanguis eo
copiosius confluit; proinde motus ejus promovetur.

§. CLIII.

COROLLARIUM.

Quum in expiratione status sit pulmonis oppositus (§.
152.), patet tum *sanguinem venosum iterum retardari.*

SCHOLIUM.

Inde (§. 152. 153.) nascitur *Pulsus venosus* (a).

§. CLIV.

Celeritatem vero (§. 140.) *minuit frictio.* Demonstra-
tur ut (§. 82.).

§. CLV.

Hæc frictio (§. 154.) *in venis minor est, quam in arte-
riis, 1.) ob celeritatem minorem* (§. 140.). 2.) *ob diame-
tros venarum ampliores* (§. 42.). Demonstratio est con-
versa (demonst. §. 85. n. 2. 3.).

§. CLVI.

Ea frictio augetur ob plicas venosas (§. 44.). Demon-
stratur ut (§. 86.).

§. CLVII.

(a) HALLERUS I. c. T. II. 332. & seq.

§. CLVII.

Etiam figura venarum frictionem auget. Omnes venarum rami cum trunco suo conum convergentem efficiunt (§. 39.); ergo angustia major, & hinc celeritas major fit (§. 146.); igitur & frictio major (§. 85. n. 2.).

§. CLVIII.

Quoniam sanguis e secta vena motu continuo, & æqualiter accelerato fluit ^(a); patet sanguinis undam sequentem premere præcedentem; ergo hæc illi resistit; proinde etiam *sanguis venosus anterior resistit subsequenti* (§. 107.).

§. CLIX.

Denique pondus sanguinis etiam celeritatem (§. 140.) *minuit.* Sanguis venosus magis gravitate regitur, quam arteriosus (§. 149.); est autem gravitatis directio opposita directioni motus venosi; ergo ei resistit; hinc ejus celeritatem minuit.

§. CLX.

Quum igitur tot sint resistentiæ (§. 154. ad 159.) in venis, quarum quædam (§. 154. 155.) in truncis minores, quam in ramis; adminicula vero (§. 146. 147. 148. 150. 151. 152.) pleraque in truncis majora sint; patet, *sanguinem venosum celerius in truncis, quam in ramis moveri.*

SCHOLIUM.

Calculos varios hujus differentiæ velocitatis (§. 160.) HALLERUS habet ^(b).

TOM. I.

I

§. CLXI.

(a) HALLER, l. c. T. II. p. 339. (b) Ibid. p. 342. & seqq.

§. CLXI.

COROLLARIUM.

Ex collata celeritate (§. 96. 97.), cum celeritate (§. 160.), determinari potest, *quo tempore sanguis majorem circum absolvat.*

SCHOLIUM I.

Is calculus (§. 161.) similes patitur difficultates, ac (§. 96. 160.) memorati (a).

SCHOLIUM II.


Motus sanguinis venosi a morte easdem agnoscit causas, ac in arteriis (§. 104. in schol.).

CAPUT III.

DE

MOTU SANGUINIS PER VENAS LATERALI.

§. CLXII.



Venæ sanguine semper plenæ sunt. Demonstratur (ut §. 106.)

§. CLXIII.

Sanguis venarum latera premit perpendiculariter; ea vero pressio in truncis major est, quam in ramis. Ex incisa enim vena sanguis cum impetu profilit; sed is impetus per vulnus inductus non est (demonst. §. 10.); ergo jam ante fuit, id est, jam ante sanguis latera preffit; sed pressiones fluidorum in vasorum latera perpendiculares sunt (§. 109.); igitur sanguis latera premit perpendiculariter. Q. E. primum.

Ve-

(a) Ibid. p. 345. & seqq.

Venarum rami cum trunco conum convergentem efficiunt; ergo trunci ramis sunt angustiores (§. 39.); sed in vase angustiore celeritas augetur (§. 146.), & hinc etiam pressio; proinde major est pressio in truncis, quam in ramis. Q. E. alterum.

SCHOLIUM.

Hanc pressionem (§. 163.) ulterius confirmant præternaturales venarum dilatationes (a).

§. CLXIV.

Venæ in cordis contractione non dilatantur. Ad dilatationem requiritur, ut ad vasa dilatanda vis cordis acceleratrix pertingat (§. 114.); sed hæc ad venas non pertingit (§. 143.); ergo non dilatantur.

§. CLXV.

Quoniam autem contractiones proportionales sunt dilatationibus prægressis (§. 112.); ubi nulla est dilatatio, etiam nulla erit contractio; igitur (§. 164.) *nec venæ alterne contrahuntur.*

§. CLXVI.

Ergo venæ non pulsant (§. 113.).

SCHOLIUM.

Quidam venas ideo *non pulsare* crediderunt, quod singuli rami coni divergentes essent (§. 38.). Verum si ea ratio esset, pulsaret certe vena ligata, aut varix; quod tamen non observatur, nisi obstaculum aliquod circa cor, aut iter venosum fuerit (b).


(a) HALL. l. c. p. 351. (b) Ibid. p. 353. 356.

CAPUT IV.

DE

MOTUS UTRIUSQUE EFFECTIBUS.

§. CLXVII.


 Quoniam arteriis venæ fabrica sunt tenuiores (§. 33.), & minus contractiles (§. 40.), minusque elasticæ (§. 41.); atque motus sanguinis per eas paulum lentior, maxime in earum ramis (§. 160.); liquet facile: *effectus* (§. 116. ad 124. & 126. ad 136.) *in venis eodem esse, ac in arteriis, sed aliquantum minores; visciditatem* (§. 125.) *vero in venis majorem produci.*

§. CLXVIII.

Effectus vero, quo venæ arteriis opponuntur, mistio est. Demonstratio est conversa (demonst. §. 138.).



SECTIO V.

DE

ARTERIARUM ET VENARUM MORBIS
RATIONE PARTIS SOLIDÆ.

CAPUT I.

DE

MORBIS IN GENERE.

§. CLXIX.



Quoniam omnis mutatio motus in parte quadam corporis humani viventis, Actio dicitur; *mutationes motuum in arteriis* (§. 66. ad 138.) & *venis* (§. 142. ad 168.), *horum vasorum Actiones dicuntur.*

§. CLXX.

Actionis (§. 169.) læsio, *Morbus est.*

§. CLXXI.

Quum actionis integritas a determinata conditionum Physicarum serie pendeat; ejus læsio (§. 170.) aliter concipi nequit, quam in cujusdam harum conditionum defectu, aut conditione superaddita, quæ aliquam ex dictis impediat; hinc *morbi* (§. 170.) *arteriarum, & venarum in excessu conditionum enumeratarum* (§. 8. ad 168.): *aut earum impedimento siti sunt.*

§. CLXXII.

Earum conditionum (§. 8. ad 168.), aliæ in partibus vasorum solidis (§. 8. ad 46.), aliæ in fluidis (§. 47. ad 62.), aliæ in utrisque locantur; hinc *totidem erunt morborum classes in arteriis, & venis.*

§. CLXXIII.


Quum arteriæ, & venæ canales solidi sint (§. 7.) ex simplicioribus, & simplicissimis partibus, nempe fibris, earumque elementis, compositi; *alios morbos pati possunt ratione partium simplicium: alios, ut corpora composita organica.*

CAPUT II.

DE

MORBIS VASORUM SIMPLICISSIMIS.

§. CLXXIV.

 Quoniam fibrarum elementa, terra, nempe, & aqua, immutabilia sunt; fibræ minimæ, & vasa ex iis composita, ut solida, alios morbos pati nequeunt, nisi *cohesionis auctæ, minutæ, aut solutæ*; hinc *etiam arteriæ, & venæ, ut solida (§. 173.) iisdem morbis adfici possunt.*

SCHOLIUM I.

Veniam facile omnes dabunt, quod (§. 173. 174.) quædam absque demonstratione adsumpserim; quippe talia sunt, quæ ignota nemini, & quorum demonstrationes aliam doctrinæ partem exigunt.

SCHO-

SCHOLIUM II.

Brevitatis causa imposterum, ubi & arteriæ, & venæ simul nominandæ erunt, communi *Canalium* voce utar.

§. CLXXV.

Quoniam debilitas fibræ est tam parva elementorum cohæsiō, ut a motu ad sanitatem requisito, aut non multum majori, solvi queat ^(a); *Canales debiles erunt, quum eorū elementa (§. 173.) tum parum cohæserint, ut a motu sanguinis ad sanitatem requisito, aut non multum majori, solvi queant.*

SCHOLIUM.

Ea cohæsiō (§. 175.), non nisi relative ad canales determinatos, ætatem, sexum, temperiem, vitæ genus potest definiri ^(b).

§. CLXXVI.

Debilitatem hanc (§. 175.) producit impedita ingestorum adsimilatio in sanguinem. Ut vasa debitam cohæsiōnem habeant, nutriri debent, id est, talia, quæ mole, figura, & natura cum partibus amissis conveniunt, restitui debent ^(c). Hæc autem non nisi ex bono sanguine parari possunt, qui ex ingestis præparatur; sed ubi impedita ingestorum adsimilatio in sanguinem, ibi malus sanguis prodit; & hinc nutritio fere nulla, aut prava est; proinde debilitatem producit.

§. CLXXVII.

Eam ingestorum adsimilationem in sanguinem (§. 176.) impedit, 1.) nimia boni sanguinis jactura, 2.) solidorum debilitas, 3.) alimenta nimis tenacia, 4.) quies musculorum. Ad elaborationem boni sanguinis (§. 176.), requiritur sufficiens

(a) BOERH. Aphor. §. 24.

(b) B. de SWIETEN Comment. §. 24.

(c)

BOERH. Instit. §. 445.

ficiens actio vasorum in sanguinem (§. 116. ad 132., 167., 168.); ea autem in vasorum in contractione fita est (Ibid.); contractio vero nulla fit, nisi prægressa fuerit dilatatio (demonst. §. 165.); quum igitur ad dilatationem requiratur sufficiens copia sanguinis boni (demonst. §. 110.), hæc autem minuta fit (ex hyp.), minuetur etiam dilatatio, hinc & contractio (§. 165.), proinde etiam vasorum actio, & inde sequens ingestorum in sanguinem adsimilatio. Q. E. primum.

Actio vasorum ab eorum forti contractione (n. 1. huj.), hinc ab eorum robore pendet, sed vasa hæc debilia sunt (ex hyp.); ergo minus in liquida agunt; hinc eorum elaborationem impediunt. Q. E. alterum.

Alimenta tenacia, non dant bonum chylum ^(a); hinc nec bonum sanguinem; proinde debilitant (demonstr. §. 176.). Q. E. tertium.

Ad debitum vasorum robur necessaria est bona nutritio (demonstr. §. 176.); ad nutritionem vero bonam requiritur vis vasorum ^(b); hæc pendet a forti vasorum contractione (§. 116. ad 132.), contractio a dilatatione forti (§. 165.), dilatatio autem a motus quantitate sanguinis (§. 110.). Sed, si massa sanguinis sit eadem, motus quantitas est, ut celeritas (demonstr. §. 60.); celeritatem vero auget motus musculorum (§. 105. 147.); ergo vasorum contractionem etiam auget musculorum motus; & contra minuit eorum quies; & hinc debilitat. Q. E. quartum.

§. CLXXVIII.

(a) BOERH. Instit. §. 87. (b) Ibid. §. 445.

§. CLXXVIII.
COROLLARIUM.

Hinc *solida inertia debilitatis causa* (§. 177. n. 2.) *sunt,*
& *effectus* (§. 176.).

SCHOLIUM I.

Inde (§. 177. n. 1.) hydrops frequenter sequitur magna vulnera, abortum, aut alias quasvis magnas evacuationes (a); & morbi similes ob prava alimenta. (b).

SCHOLIUM II.

Motus quantitates esse, ut celeritates, si massæ sint æquales (§. 177. n. 4.) facile patet. Sit enim unius corporis momentum = Q, alterius = q; celeritas unius = C, alterius = c, Massæ unius = M, alterius = m.

Erit: $Q : q = C : c.$

Nam (demonstr. §. 60.) $Q : q = MC : mc;$

Sed (ex hypoth.) $M = m,$

Ergo $Q : q = C : c.$ Q. E. D.

§. CLXXIX.

Si hæc debilitas (§. 175. ad 178.) *pergât, facit* 1.) *vasorum extensionem,* 2.) *sæpe rupturam,* 3.) *tumorem,* 4.) *humorum stagnationem,* 5.) *eorum putredinem.* Vasa nostra flexilia sunt (§. 14. 35.), & eorum lumina sunt in ratione composita ex directâ virium distendentium, & inversâ resistentium (demonstr. §. 42.); ergo, quum vires resistentes minutæ sint (§. 175.), distendentes agunt fortius; huic ergo obediunt vasa (§. 14. 35.), & distenduntur. Q. E. primum.

In debilitate partium cohæsiō minor est (§. 175.); sed manentibus causis debilitantibus (ex hypoth.), & hinc viri-

TOM. I.

K

bus

(a) BARO DE SWIETEN Comment. §. 25. (b) Ibid.

bus distendentibus (demonstr. n. 1. huj.) cohæsiō perpetuo minuetur, & tandem fiet nulla. Sed tum adest solutio continui ex causâ distendente orta, quæ ruptura dicitur. Q. E. alterum.

Si plura vasa extensa fuerint (n. 1. huj.), magnitudo in parte molli insigniter augebitur; sed magnitudo in parte præternaturaliter aucta tumor est; ergo debilitas tumorem facit. Q. E. tertium.

Porro vasa sanguinem continent (§. 9. 34.) fluidum (demonstr. §. 18.); ergo, iis ruptis (n. 2. huj.) sanguis in loca aliena effunditur, & hinc stagnat. Q. E. quartum.

Sanguinis putredinem motus impedit (§. 133.); quia vero ad eam sanguis pronus est (§. 134.), putrescit, quamprimum stagnaverit; sed stagnat (n. 4. huj.); ergo putrescit. Q. E. quintum.

§. CLXXX.

Quum arteriæ ad omnes corporis humani partes vehant sanguinem (§. 66.); pro varietate harum partium *ex uno hoc fonte* (§. 175.) *innumeri varietate distincti morbi oriri, atque intelligi possunt.*

SCHOLIUM.

Primarios (§. 180.) ILL. BARO de SWIETEN (a), & CL. de GORTER (b) recensent.

§. CLXXXI.

Quum laxitas sit partium cohæsiō tam parva, ut a minima vi elongari ultra modum, sine ruptionis metu, possit; patet *laxitatem debilitatis* (§. 175.) *esse speciem.*

§. CLXXXII.

(a) Comment. §. 44. (b) Compend. Med. Tract. VI. §. 3.

§. CLXXXII.

COROLLARIUM.

Hinc *laxitas* (§. 181.) *causas* (§. 176. 177.), & *effectus* (§. 179.) *eosdem habet*.

§. CLXXXIII.

Elasticitas minuta, cum a minore partium in cohæsionem nisu pendeat, ejusdem *debilitatis* (175.) *species est*; hinc *quoad causas* (§. 176. 177.), & *effectus* (§. 179.) *cum ea convenit*.

§. CLXXXIV.

Canalium rigiditas, est cohæsio partium tam valida, ut a motu sanguinis sano superari nequeat.

§. CLXXXV.

COROLLARIUM.

Est ergo *status oppositus* (175), & hinc etiam *causas oppositas agnoscit* (§. 176. 177.).

§. CLXXXVI.

Eadem (§. 185.) *etiam augetur*, 1.) *canalium minorum compressorum concretionem*, 2.) *eorundem cum liquido suo coactu*. Vasa ex membranis constant iterum vasculosis (§. 16. 36.); membranæ hæ a motu sanguinis, compressis vasculis suis, densantur (§. 136.); a densitate autem puncta contactus augentur, & hinc cohæsio major fit; proinde & rigiditas (§. 185.) augetur. Q. E. primum.

Sanguis sola quiete concrefcit (§. 127.), & quum viscidus fit (§. 62.) cum vase suo cohæret; ergo cohæsio, & hinc rigiditas (§. 185.) augetur. Q. E. alterum.

§. CLXXXVII.

Vasa rigida breviora sunt, & angustiora. Vasa elongantur (§. 108.), & dilatantur (§. 110.) a motu sanguinis, dum eorum resistentiam (§. 23.) superat; sed hanc superare nequit in vasis rigidis (§. 184.); proinde breviora, & angustiora manent.

§. CLXXXVIII.

Quoniam ulterius flexilitas pauca contactus puncta requirit (§. 15. n. 1.); canales autem rigidi ob cohæsionem majorem (§. 184.) plura contactus puncta habent (demonstr. §. 15. n. 1.); sequitur *canales rigidos minus flexiles esse.*

§. CLXXXIX.

Ut cor se deplere possit, vasa dilatari debent (demonstr. §. 110.); sed vasa rigida non dilatantur (§. 187.); ergo *cordis depletionem impediunt.*

§. CXC.

Vasa rigida sanguinem nimium condensant. Densitas a globulorum compactione pendet (§. 130.); compactiono autem eo fortior est, quo arteriæ sunt fortiores (§. 118.), & quo major sanguini fit resistentia; sed hæc in vasis rigidis crescunt (184. 187. 188. 189.); ergo etiam compactiono, & hinc densitas augetur.

SCHOLIUM.

Ex his (§. 187. ad 190) innumera mala deducuntur. (u).

§. CXCI.

Partes cujuscunque corporis solidi (§. 1.) a cohæsione sua liberari possunt; ergo & canales nostri; *possunt* igitur *pati continui solutionem.*

SCHO-

(u) B. de SWIETEN Comment. §. 52.

SCHOLIUM.

Talis *continui solutio* in corpore humano pro varietate causa, & modi diversa nomina fortitur. (a).

§. CXCII.

Quum etiam per experimenta detectum sit hodie, omnes humani corporis partes solidas (§. 3.) esse irritabiles; patet etiam, *ob hujus vis augmentum, aut decrementum canales nostros morbosos reddi.*

SCHOLIUM.


Eos morbos (§. 192.) præclare describit CL. GAUBIUS (b).

CAPUT III.

DE

MORBIS VASORUM ORGANICIS.

§. CXCI.

 Lumina vasorum in sanitate certam diametrum habere, Anatome docet; quum autem vasa hæc flexilia sint (§. 14. 35.), & lumina in vasis flexilibus in ratione composita ex directa virium distendentium & inversa resistentium se habeant (§. 18. in schol. 1.); vires autem dictæ mutari possint (demonst. §. 179. n. 1.); sequitur, *ea vasa diametro præternaturaliter augeri, vel minui posse.*

§. CXCV.

COROLLARIUM I.

Ergo in vasis 1. fieri potest, α.) Anastomosis, β.) Diapedesis, γ.) Diuresis. Vitium enim, Anastomosis dictum,

K 3

ea

(a) BOERH. Instit. §. 713.

(b) Instit. Patholog. §. 169. & seqq.

ea est vasis dilatatio, ut emittat retinenda, & heterogenea admittat; vasa autem dilatari posse (§. 193.) dictum; ergo id vitium in vasis reperiri potest. Q. E. primum.

Quum præterea vasa nostra ex fibris etiam secundum longitudinem junctis componantur (§. 173.), hæ etiam a cohæsione sua solvi possunt (§. 179. n. 2.); & erit vitium alterum.

Sed & vera continui solutio (§. 191.) in vasis fieri potest, & erit vitium tertium.

SCHOLIUM I.

Ex vitio (§. 194. *a.*) illud, quod *Error loci* dicitur, originem habet; quod fit, dum crassiores fluidorum moleculæ, dilatata oscula minorum vasorum ingrediuntur, per quorum ultimos fines transire nequeunt (*a*).

SCHOLIUM II.

Eum loci errorem (schol. I.) negat HALLERUS (*b*). Verum a CL. VIRO ostendendum sane est, aut omnia vasorum genera sanguinis globulos vehere, aut nullum vas præternaturaliter dilatari (§. 193.) posse; quod tamen neutrum in corpore nostro possibile est. Possit vero vas aliquod vehere globulos sanguineos, qui nec microscopio in sanitate essent visibiles, ab HALLERO induci nequeo.

SCHOLIUM III.

Anastomosis in sensu pathologico (§. 194. *a.*) sollicite ab Anastomosi Physiologorum (§. 29.) distingui debet. Ex ἀνά per, & σόμωσις, nomen ἀνασόμωσις componitur.

SCHOLIUM IV.

Alterum vitium (§. 194. *β.*) Διαπήδησις, ex διά per, & πηδάω *salio, salto*, nomen habet.

SCHO-

(*a*) B. de SWIETEN Comment. §. 118. (*b*) l. c. T. I. p. 113.

SCHOLIUM V.

Si vitium (§. 194. γ.) tertium a ruptione vasis, a contentis distendentibus illata, fiat, ῥήξις audit; si vero ab erosione, ab acribus facta, proveniat, διάβρωσις vocatur.

SCHOLIUM VI.

Διαιρέσις a διαίρῃω divido, ῥήξις a ῥήγνυμι rumpo, & διάβρωσις a διαβροῶστω peredo, denominantur.

SCHOLIUM VII.

Ad vitia (§. 194.) etiam a CL. GAUBIO refertur Εὐρησµα, cum parietes cavitatis, nimium inter se distantes, spatium justo capacius circumferbant. (a). Idem etiam a CEL. BOERHAAVIO fuerat recensitum. (b). Ab Εὐρύων dilato, amplio, nuncupatur.

§. CXC.

COROLLARIUM II.

2. Quum eadem lumina etiam præternaturaliter minui possint (§. 193.); vel ab humore spisso, tenaci, transire non potenti, aut cum vasis suis concrecente (§. 186. n. 2.), clauduntur penitus, & erit in vasis, α.) *Obstructio*; vel vasa in propria substantia augentur (§. 17. 36.), sicque lumen suum minuunt, & fiet, β.) *Obstipatio*; vel vasa teretia (§. 12. 35.) a causa externa premi, & sive loco figuræ circularis (§. 18.) omnium capacissimæ, aliam minus capacem recipere, sive claudi penitus, possunt, & nascetur γ.) *vasorum Compressio*; vel vasa compressa (γ.), aut obstructa (α.) concrescunt, & erit δ.) *vasorum coalitus*; vel latera vasorum, ob defectum materiæ replentis flaccida collabuntur, at-

(a) Instit. Patholog. §. 203. (b) Institut. §. 708.

atque ε.) *Collapsus* dicitur ; vel denique vasa contractilia (§. 22. 40.), ob auctum robur (§. 187.) propria vi lumina sua minuunt, & ζ.) *vasorum contractio* adpellatur.

SCHOLIUM I.

Vitium prius (§. 195. α.) ἔμφραξις, ἀπὸ τῆς τὸν ἐμφράσσειν *obstruere* dicitur ; alterum (§. 195. β.) στενοχωρία, a στενὸς *angustus*, & χῶρος *locus*, vocatur ; tertium (§. 195. γ.) θλίψις, a θλίβω, *comprimo*, audit. Quartum (§. 195. δ.) Σύμφυσις, a συμφύω *concreasco*, & quintum (§. 195. ε.) Συνίησις, a συνίημι, *committo*, denominatur.

SCHOLIUM II.

Quum vasa nostra elastica sint, (§. 25. 41.), vitium (§. 195. ε.) non nisi subitaneas, & magnas evacuationes, sequitur.



SECTIO VI.

DE

MORBIS ARTERIARUM, ET VENARUM,
RATIONE SANGUINIS.

CAPUT I.

DE

SANGUINIS QUANTITATE MORBOSA.

§. CXCVI.



Quoniam vasa nostra determinatam magnitudinem habent (§. 193.), etiam sanguis eā replens in fanitate determinatam quantitatem habebit; *quoties, igitur, præternaturaliter aucta, vel minuta hæc quantitas fuerit, morbus est.*

SCHOLIUM.

Sanguinis in fanitate quantitatem in homine, mediocris molis, ad 27, aut 28 libras, reducit HALLERUS (a).

§. CXCVII.

Quum autem boni sanguinis abundantia (§. 196.) major, quam quæ ferre possit mutationes vitæ, nisi morbus inducatur, fanitatis effectus sit (§. 116. ad 132. 167. 168.); *nec ipsa hæc abundantia morbus dici potest, nisi postquam functiones læserit (§. 170.).*

Tom. I.

L

Scho-

(a) 1 c. T. II. p. 1. & seqq.

SCHOLIUM.

Hæc abundantia *Plethora* a πλήθος *plenus sum* dicitur; & vulgo duplex, quoad vasa nempe, & quoad vires statuitur; nos priorem duntaxat hoc loco donamus.

§. CXCVIII.

Quo hæc abundantia major est, eo corporis status ad morbum magis accedit; quum autem ad summum pertigerit gradum, morbum inducit. Quo major est sanguinis quantitas, eo majus pondus cor movendum habet, & eo magis vasa dilatari debent (§. 110.); vasa autem, quum limitata sint, certum limitem suæ dilatationis habent; hunc si excesseris, non contrahuntur (§. 111.); verum inertia manent. Sed sine contractione motus sanguinis minuitur (demonstr. §. 77.); hinc functiones læduntur (§. 170.), & morbus est. Ergo, quamdiu hæc abundantia functiones non lædit, morbus dici nequit, sed solum dispositio quædam ad morbum futurum est, quæ dispositio in eadem ratione cum abundantia increfcit; ut primum vero summa est, functiones lædit, & morbus est.

§. CXCVIX.

Plethora ad summum perducta gradum plethora esse definit. In summo plethoræ gradu nulla fere fit vasorum contractio (demonstr. §. 198.); sed sine contractione nulla est eorum in sanguinem actio (§. 116. ad 132. 167. 168.); sine hac autem sanguis novus bonus non paratur, &, qui adest, destruitur; fiunt enim opposita (§. 116. ad 132. 167. 168.); ergo sanguis pravus fit; quum igitur plethora sit abundantia sanguinis boni (§. 197.), plethora esse definit.

§. CC.

§. CC.

Quoniam sanguinis inopia vasa distendere nequit (demonstr. §. 110.), & hinc nulla sequitur contractio (demonstr. §. 165.), etiam hæc ipsa sanguinem depravat (demonstr. §. 199.); hinc *sanguinis inopia vera raro, nisi subita vis externa eam effecerit, adest sine depravato sanguine.*

SCHOLIUM.

Vitium (§. 200.) *νεμεωγγεῖα* dicitur, & a *κενῶν* *evacuo*, & *ἄγος* *vas* derivatur.

§. CCI.

COROLLARIUM I.

Quum sanguis suis contineatur vasis, morbus etiam erit, *quoties in loca aliena deponitur* (194. in schol. 1. 2.).

SCHOLIUM.

Huc Ecchymosis pertinet; nomen ex *ἐκ* *ex*, & *χυμός* *succus*, componitur.

§. CCII.

COROLLARIUM II.

Est & certa sanguinis ad serum, & humores reliquos proportio; hinc *et ea proportione sanguis peccare potest.*



CAPUT II.

DE

SANGUINIS QUALITATIBUS MORBOSIS.

§. CCIII.



Ea sanguinis in qualitatibus depravatio, ut functiones lædat, *Cacochymia* dicitur.

SCHOLIUM.

Κακοχυμία, ex κακός *prævus*, & χυμός *succus*, desumitur.

§. CCIV.

Ea depravatio (§. 203.) vel hæret, 1.) *in fluidis*, quatenus spectantur seorsim partes componentes simul massam fluidi; vel 2.) *in tota mole fluidi simul considerata*.

§. CCV.

Sanguinis elementa seorsim sumpta (§. 204. n. 1.) *peccare possunt*, 1.) *soliditate nimia*. Quo enim sunt solidiora (§. 47.), eo majorem motus quantitatem habent (§. 60.), & hinc impetum majorem (§. 73. 74.); proinde vasa magis destruunt (§. 108. 109. 116.); & ob minorem etiam superficiem (§. 108. in schol.), facile vasa aliena (§. 194. in schol. 1. §. 201.) ingrediuntur, aut ex corpore diffillantur; sicque functiones lædunt.

§. CCVI.

COROLLARIUM.

Nimis minuta soliditas contraria (§. 205.) *facit*.

§. CCVII.

§. CCVII.

Eadem (§. 205.) *peccare possunt*, 2.) *magnitudine nimia*. Vasa enim determinatam diametrum in sanitate habent, & quædam unicum tantum globulum transmittunt (§. 49.); sed eum transmittere nequeunt, si, manente eadem diametro, globulus justo major sit; proinde morbum (§. 195. a.), & quæ inde sequuntur, mala producit.

§. CCVIII.

COROLLARIUM.

Magnitudo minuta fere similia (§. 205.) *facit*.

§. CCIX.

Elementa nostrorum humorum sphaerica esse debent (§. 55.); quæcunque ergo ab ea desleclunt, morbosa sunt, & si angulosam figuram induant, acria dicuntur; igitur *peccare possunt* 3.) *figura*.

SCHOLIUM.

Acrium species recenset CEL. BOERHAAVE (a).

§. CCX.

Quoniam etiam sanguinis elementa levissime sibi cohæ-
rere debent (§. 50.); *peccant*, 4.) *mollitie nimia*; compla-
natis enim ob mollitiem superficiebus, contactus, & hinc
cohæsiones (demonstr. §. 15. n. 1.) augentur.

§. CCXI.

Contra, si rigida nimium, elaborationi suæ, & divisioni
(§. 56.) vitiose resistunt; hinc *peccant* 5.) *rigiditate nimia*.

§. CCXII.

Eadem peccant, 6.) elasticitate nimia. Corpora enim elastica a caloris frigorisque vicissitudine mutantur, & compressioni suæ resistunt; idque eo magis, quo majori gradu elastica sunt; quum igitur sanguinis elementa nimium elastica sint (ex hypoth.), mutantur nimis cito, nimisque vehementer, & sic functiones lædunt.

§. CCXIII.

Elasticitas minuta similia (§. 210.) facit.

§. CCXIV.

Peccant etiam 7.) divisibilitate (§. 56.) nimia. Errores enim locorum (§. 194. in schol. I. §. 201.) & facilem dissipationem (demonst. §. 205.) inducunt.

§. CCXV.

Quum denique nimis fortiter cohærentia resistent divisioni (§. 56.) & hinc motui per ramos (§. 66.), & secretioni (§. 138.) inepta fiant; *peccant 8.) cohæsione nimia.*

§. CCXVI.

Quoniam præterea cuique homini propria est humorum indoles (a), non nisi a posteriori discenda, quam *Idiosyncrasiam* dicunt, etiam *cuique proprii morbi erunt, æque a posteriori cognoscendi.*

SCHOLIUM.

Ex ἰδιος proprius, σὺν cum, & ἡράσις temperamentum, nomen (§. 216.) coaluit.

§. CCXVII.

Quia demum tota fluidi moles (§. 204. n. 2.) peccat, vel ratione cohæsionis (§. 214. 215.), vel motus aucti, aut

mi-

(a) B. de SWIETEN Comment. §. 44.

minuti, vel denique ob compositam indolem ex vitiis (§. 205. ad 215.) recensitis; morbi inde oriundi ex dictis intelliguntur.

SECTIO VII.

DE

MORBIS ARTERIARUM ET VENARUM COMPOSITIS.

CAPUT I.

DE

OBSTRUCTIONE.

§. CCXVIII.



Obstructio est obturatio canalis (§. 5.) transitum tollens liquido per eum transjiciundo (§. 10.), orta ex excessu molis transfiguræ supra capacitatem vasis transmissuri.

§. CCXIX.

Oriri ergo potest, 1.) *ex angustia vasis* (§. 195.), 2.) *ex magnitudine moleculæ sanguineæ transfluxuræ* (§. 201. 207. 209. 215.), 3.) *ex utrisque concurrentibus*.

SCHOLIUM.

Causas, quæ dicta mala (§. 219.) efficiunt, accuratissime exposuit
ILL. BARO de SWIETEN. (a).

§. CCXX.

(a) L. c. §. 112. ad 119.

§. CCXX.

Nontantum arteriæ, sed etiam venæ obstruuntur (§. 218.).
Causæ obstruentes (§. 219.) æque in venis, ut in arteriis
occurrere possunt; ut examinanti patet; proinde etiam ve-
næ obstrui possunt.

SCHOLIUM I.

Fuere, qui arterias potius obstrui, quam venas, crediderunt ex eo, quod 1.) Arteriæ cundo convergerent, 2.) quod frictio in arteriis sensim augetur, 3.) quod sanguis, ob liquores tenuiores per arterias a sanguine secretos, in finibus earum spissior, & viscosior, hinc ad transeundum ineptior fieret. Verum tamen, ut venas æque ac arterias, immo facilius, obstrui possent cum ILL. HALLERO (a) sentiam, sequentia faciunt. 1.) Arteriæ adfectiones habent coni divergentis (§. 21.) : venæ convergentis (§. 39.). 2.) In arteriis frictiones, & resistentiæ haud multo majores sunt quam in venis (confer. §. 80. ad 105. cum §. 144. ad 159.). 3.) In venis unda anterior æque resistit sequenti (§. 158.), ut in arteriis (§. 107.). 4.) Sanguinis viscositas major in venis est, quam in arteriis (§. 167.). 5.) Causæ obstruentes (§. 219.) æque in venis, ut in arteriis, deprehendi, docent observationes medicæ; & venæ insuper ab illis ob tenuitatem majorem (§. 33.) adficiuntur facilius. 6.) Venæ æque frequenter obstruuntur repertæ sunt, & hinc sanguinis motus perturbatus, aut retrogradus (b) observabatur, ut in arteriis (c).

SCHOLIUM II.

Jam phainomena obstructionis eo, quo in morbi (§. 218.) progressu ordine sequuntur, examinabimus, cum ea in plerisque morbis, præcipue iis, quos febris comitatur, intelligendis, summum usum habere possint. Oportet autem vasa insigniora quædam obstructa esse, tum sequentia occurrunt phainomena.

§. CCXXI.

(a) l. c. T. II. p. 349. (b) Ibid. p. 348. & seqq. (c) Ibid. p. 218. & seqq.

§. CCXXI.

Quo plura in corpore vivo intra territorium circulationis, vasa obstruuntur (§. 218.), eo major fit cordi resistentia. Quo plura eorum vasorum obstruuntur, eo plura eorum obturata sunt (§. 218.), adeoque eo plurium lumina pro abolitis censenda sunt; sed resistentiæ, quæ fiunt vi cordis, quæ sanguinem projicit, inverse augentur vel minuuntur, ut lumina vasorum, intra territorium circulationis, majora minorave evadunt; resistentiæ enim, quæ fiunt fluido per canales projecto, sunt inverse, ut lumina canalium; fluida autem, quantum ipsis resistitur, tantum quoque vi motrici resistunt; proinde quo plura vasa obstruuntur, eo major fit cordi resistentia.

§. CCXXII.

Quo magis in corpore vivo resistentia (§. 91.) augetur, vi cordis simul non aucta, eo major sanguinis quantitas in aorta remanet. Quo magis enim cordi resistentia augetur, eo major fit vis eidem directe opposita (§. 91.). Quia vero vis cordis non crescit (per hypoth.), differentia virium directe oppositarum minor evadit; ergo & vis (§. 92.), & spatium (§. 94.) minora fiunt; proinde major sanguinis quantitas in aorta remanet.

§. CCXXIII.

Quum igitur vena cava sanguinem omnem ex aorta habeat (§. 139.); ab ea vero sinus dexter, auricula dextra, & ventriculus cordis dexter sanguinem accipiant (^a); sequitur, *minorem sanguinis quantitatem ad cor dextrum redire.*

TOM. I.

M

§. CCXXIV.

(^a) BOERN. Instit. §. 146. & seqq.

§. CCXXIV.

COROLLARIUM.

Ergo *causa princeps motus cordis minuitur.* (a)

§. CCXXV.

Quo plura in corpore vivo, intra territorium circulationis, vasa obstruuntur, & vis cordis, nata obstructione, non fit major; eo vis hæc sub initium sensim fit minor. Nam quo plura in corpore vivo vasa obstruuntur, eo cordi resistentia fit major (§. 221.). Et quia vis cordis simul non augetur (per hypoth.), minor sanguinis quantitas ad cor dextrum redit (§. 223.); hinc stimulus cordis (§. 224.), & cum eo vis sensim minuitur.

§. CCXXVI.

Quum ob sanguinem in aorta remanentem (§. 222.) ea plus dilatari debeat (§. 110.); neque ob eandem rationem multum se contrahere possit (demonstr. §. 198.); arteriarum contractio; & dilatatio alterna minor, & debilior fit, hinc (§. 113.) *pulsus debilior, & minor nascitur.*

§. CCXXVII.

COROLLARIUM I.

Hinc in morborum febrilium initio, *pulsus debilis, & parvus.* (b)

§. CCXXVIII.

COROLLARIUM II.

Quoniam Vis Vitæ est aggregatum illarum causarum, a quibus humorum circulatio pendet, etiam *Vis vitæ* (§. 225.) *minuitur.*

§. CCXXIX.

(a) HALL, l. c. T. I. p. 489. & seq. (b) B. de SWIETEN Comment, §. 576.

§. CCXXIX.

Quum calor a sanguinis motu pro maxima parte pendeat (§. 131. & in ejusd. schol. 2.); motus autem a vi cordis proveniat (§. 65.); hac minuta (§. 225.), etiam motus sanguinis, & hinc *calor minuitur*.

§. CCXXX.

COROLLARIUM I.

Inde *frigus* in febrium initio. (a)

§. CCXXXI.

COROLLARIUM II.

Ergo caloris gradus magnitudinem virium vitæ designant: (§. 228. 229.) & *contra*.

SCHOLIUM.

Aliquando tamen aliud exhibent experimenta, cum solus motus ad omnia caloris phainomena exponenda necdum sufficiat. (§. 131. in schol. 2.)

§. CCXXXII.

COROLLARIUM III.

Ob calorem minutum (§. 229.) etiam *extremorum frigus adest*. (b)

§. CCXXXIII.

Quo magis extrema corporis vivi, & nullam jacturam sanguinis passi, frigent (§. 232.), *eo major sanguinis arteriosi copia circa cor accumulatur*. Quum enim frigus coarctet vasa, hinc lumina eorum imminuat, quo magis extrema frigent, eo cordi resistentia fit major (§. 221.). Porro, quo magis extrema frigent, eo minus calent: quo minor autem est calor, eo minor est vis vitæ (§. 231.), adeoque

M 2

&

(a) B. de SWIETEN l. c. (b) Ibid.

& vis cordis (§. 228.). Ergo quo magis extrema corporis vivi, & nullo sanguine orbati, frigent, eo magis sanguis arteriosus in aorta accumulatur (§. 222.).

§. CCXXXIV.

COROLLARIUM I.

Ergo *extrema eodem tempore minorem sanguinis partem, quam in sanitate continent* (§. 233.).

§. CCXXXV.

COROLLARIUM II.

Hinc *pallent* (§. 132.) *extrema* ^(a).

§. CCXXXVI.

Quo majus extrema corporis vivi, & nullo sanguine orbati frigus sentiunt; eo major est quantitas sanguinis venosi, quæ circa cor colligitur. Quo enim frigus in extremis fit majus, eo magis venæ extremorum coarctantur, adeoque major vis derivationis oritur (§. 148.), & hinc sanguis ob valvulas resistentes (§. 150.) ad cor redire cogitur; proinde magis circa cor accumulatur.

§. CCXXXVII.

COROLLARIUM.

Quum in morborum febrilium accessione extrema frigeant (§. 232.), licet jacturam sanguinis passa non sint, *sanguis arteriosus, & venosus circa cor accumulatur.*

SCHOLIUM.

Confirmat (§. 237.) culter anatomicus, qui in cadaveribus eorum, qui in principio paroxyfmi febris intermittens extincti fuere, pulmones sanguine incrassato infarctos invenit. (b)

§. CCXXXVIII.

(a) Ibid. (b) HARVÆUS Exerc. Anatom. c. 16.

§. CCXXXVIII.

Quo magis sanguis venosus circa cor accumulatur (§. 236.); eo major est vis, quæ in vacuum cordis ventriculum irruit. Nam quo magis sanguis venosus circa cor accumulatur, eo violentius sinus venosos, & auriculas in contractiones stimulat; adeoque auriculæ contrahuntur fortius, & hinc majori vi sanguinem pellunt ^(a). Quare quum ventriculus dexter vacuus sit, erit etiam relaxatus ^(b); hinc minus resistet; sed sanguis pressus eo se recipiet, ubi minorem invenit resistantiam; ergo quo magis sanguis venosus circa cor accumulatur, eo majore vi in vacuum cordis ventriculum irruit.

§. CCXXXIX.

Quo magis sanguis venosus, & arteriosus circa cor accumulatur (§. 237.); eo minor vis cordis successive evadit. Nam quo magis sanguis venosus circa cor accumulatur, eo major quidem est vis, qua in vacuum cordis ventriculum irruit (§. 238.); hinc causa contractionis cordis pro parte augetur. ^(c) Sed quia sanguis arteriosus pariter circa cor accumulatur (ex hypoth.); cordi resistantia fiet major (§. 221.), & differentia virium oppositarum minor erit (§. 92.); proinde eo minor vis cordis successive evadet.

§. CCXL.

COROLLARIUM.

Quum in principio paroxysmi febrilis, sanguis arteriosus, & venosus circa cor accumuletur (§. 237.), vis cordis (§. 225.), adeoque & vis vitæ (§. 228.), jam ante depressa, *ad hoc magis imminuitur* (§. 239.).

(a) HALL. l. c. T. I. p. 497. ^{M 3} (b) Ibid. p. 491. (c) Ibid. p. 489. & seq. §. CCXLI.

§. CCXLI.

Quo magis in corpore vivo, sanguis venosus, & arteriosus circa cor accumulatur, eo crebrius pulsus intermittit. Quo magis enim sanguis venosus, & arteriosus circa cor accumulatur, eo minor vis cordis successive evadit (§. 239.), & cordi resistentia major fit (§. 221.), præsentem nihilo minus contractionis stimulo (demonst. §. 239.); adeoque tam magna sensim evadet, ut cor pluries se contrahere debeat inadæquate, antequam semel arteriæ dilatentur (§. 110.); sed dilationibus arteriarum proportionales sunt earum contractiones adæquatæ (§. 112.); ergo plures fient cordis contractiones inadæquatæ, antequam una arteriarum dilatatio, & contractio adæquata, id est, unus pulsus (§. 113.) sequatur; ergo pulsus intermittit. Quo autem resistentia hæc major est (§. 221.), eo sæpius ad dictum gradum ascendit, adeoque eo crebrius pulsus intermittit; ergo quo magis sanguis venosus, & arteriosus circa cor accumulatur, eo crebrius pulsus intermittit.

§. CCXLII.

Quia igitur sanguis arteriosus, & venosus circa cor magis magisque accumulatur (§. 237.); *pulsus arteriarum sæpe intermittit.* (a)

SCHOLIUM.

In tota hac phainomenon expositione (§. 223. ad 242.) nullam vis nervosæ in corde, sed solius irritabilitatis, mentionem ex professo feci; non quod eandem cordi denegare penitus, aut velim, aut possim; verum ut inde adpareat, vim nervosam ad cordis, & arteriarum phainomena exponenda non tantòpere, ut vulgo creditur, esse necessariam.

§. CCIII.

(a) B, de SWIETEN Comment. §. 576.

§. CCXLIII.

Quoniam illa ingrata perceptio, quæ sequitur in mente, quando sanguinis e corde egressus impeditur, *Anxietas* vocatur; in primo autem febris paroxysmo sanguis arteriosus, & venosus magis magisque circa cor accumulatur (§. 237.); sequitur *anxietatem etiam adesse*. (a)

§. CCXLIV.

Quo magis vis vitæ imminuitur, eo major debilitas sentitur. Nam quo magis vis vitæ minuitur, eo minor est vis, qua cor sanguinem cerebro applicat; hinc secretio spirituum, & eorum in nervos inde oriundos influxus quoque minuitur; ergo eo minor est causa motum muscularem excitans; hinc potentia motum muscularem exercendi minus viget; sed impotentia motum muscularem exercendi, debilitas dicitur; quo magis ergo vis vitæ minuitur, eo majorem æger debilitatem sentit.

SCHOLIUM.

Spirituum influxum causam, motum muscularem excitantem (§. 244.) interea nominavi. Nervos enim, consentiente HALLERO (b), virium irritabilium esse moderatores ROGERIUS adfirmat. (c)

§. CCXLV.

Quo magis vis vitæ imminuitur, eo major gravitas percipitur. Gravitas est vis, qua corpora sublunaria tellurem versus pelluntur (§. 52.); gravius ergo nobis videri debet, cujus vim dictam sentimus majorem. Sed si corpus sustinendum idem manet, vires sustinentes autem minores evadunt, corpus illud vim dictam relative majorem exercet (§. 92.)

(a) Ibid. §. 631. (b) l. c. T. IV. p. 517. (c) p. 22. & seqq.

(§. 92.). Ergo quia corpus nostrum potissimum ope musculorum sustinemus, quorum actio eo magis imminuitur, quo magis vis vitæ decrescit (§. 244.), patet, quod quo minor vis vitæ evadit, æger eo majorem gravitatem sentiat.

§. CCXLVI.

COROLLARIUM I.

Quum corporis sensibilitas ab eodem influxu spirituum libero (§. 244.) pendeat; liquet, *unde insensibilitas proveniat.* ^(a)

§. CCXLVII.

COROLLARIUM II.

Quoniam vis vitæ magis, magisque imminuta est (§. 228. 240.), etiam in febris initio *debilitas & gravitas sentiri debet.* (§. 244. 245.)

§. CCXLVIII.

COROLLARIUM III.

Quia debilitas est impotentia motum muscularem exercendi (demonstr. §. 244.), ideo est læsio actionum. Quare, quum actionum læsio morbus sit (§. 170.); evidens est, *ex nata obstructione* (§. 218.) *morbum sequi.*

§. CCXLIX.

Quo crebrius pulsus arteriarum per totum corpus intermittit (§. 241.), *eo sæpius tremor sentitur.* Quo crebrius pulsus arteriarum per totum corpus intermittit; eo sæpius contractio cordis, consequenter & vis vitæ (§. 228.), & cum hac influxus liquidi nervosi, & arteriosi in musculos (§. 244.) per aliquot minuta horæ secunda, alternatim cessant, per aliquot iterum vigent (§. 241.). Quoniam igitur

con-

(a) B. de SWIETEN Comment. §. 576.

contractio musculi est directe, relaxatio vero inverse, ut influxus dictorum liquidorum in eundem; ^(a) eo crebrius musculi inter tonum, & laxationem vacillant. Quare, quum reiterata musculi inter tonum, & laxationem vacillatio tremor dicatur; ^(b) quo sæpius pulsus arteriarum per totum corpus intermittit, eo sæpius æger tremorem sentit.

§. CCL.

COROLLARIUM I.

Quoniam in accessione febris pulsus arteriarum ideo intermittit, (§. 242.) quia sanguis arteriosus, & venosus circa cor accumulatus, (§. 237.) contractionem cordis intermittentem reddit; (§. 241.) igitur tum pulsus arteriarum per totum corpus intermittit, (§. 227.) tum *tremor* ^(c) *percipitur*. (§. 249.)

§. CCLI.

COROLLARIUM II.

Et, quia simul frigus adest, (§. 232.) frigus vero cum tremore junctum horripilationem absolvit; una liquet, *quare horripilatio accedat*. ^(d)

§. CCLII.

COROLLARIUM III.

Quum præterea sanguis venosus magis magisque circa cor accumuletur, (§. 237.) & hinc eo majore vi in vacuum cordis ventriculum irruat, (§. 238.) eo citius cor in contractionem cietur. (ibid.) Quia ergo contractioni cordis eo citius ipsius dilatatio succedit, quo minus cor contractum

Tom. I.

N

fuit

(a) BOERH. Instit. 401. n. 4. 6. (b) B. DE SWIETEN l. c. §. 627. (c) Ibid. §. 576. (d) Ibid. §. 575.

fuit (§. 226.), ideo contractio & dilatatio cordis celeriter se invicem excipiunt (§. 237.). Quamobrem, quum contractio cordis dilatationem arteriæ, & dilatatio illius hujus contractionem, synchronam habeat (*a*); manifestum est cur in accessione febris *pulsus celerior* (§. 227.) *deprehendatur* (*b*).

§. CCLIII.

Quoniam vero in omni febre, a causis internis orta, horripilatio, pulsus velox, calor, vario febris tempore vario gradu, adfunt (*c*); ex nata autem obstructione (§. 218.) dicta sequantur (§. 226. ad 252.); patet, *ex nata obstructione febrem sequi*.

SCHOLIUM.

Itaque primum febris stadium (*d*) hucusque (§. 221. ad 252.) expostum est.

§. CCLIV.

Quia frigus coarctans vasa, nixum eorum, ad axin sui canalıs se adplicandi, auget; quo magis in febre incipiente frigus augetur (§. 232.), eo vasa arctiora fiunt. Sed vasa arctiora liquidi transmittendi celeritatem (demonst. §. 67.), & attritum (§. 85. n. 2.) augent, quibus auctis etiam calor augetur (§. 131.); ergo *sensim iterum calor augeri incipit, & frigus minuit* (*e*).

§. CCLV.

Quoniam vero calor vasa expandit (*f*), resistentias (§. 221.) minuit, hinc differentia virium oppositarum (§. 92.) au-

(*a*) BOERH. Instit. §. 217. & seq. (*b*) B. de SWIETEN Comment. §. 576.

(*c*) Ibid. §. 563. (*d*) Ibid. §. 575, 576. (*e*) Ibid. §. 579. (*f*) s' GRAVESANDE l. c. N. 2426. & seqq.

augetur. Quare minor sanguinis quantitas in aorta remanet (§. 222.), adeoque sanguis citius ad cor redit (§. 223.). Quamobrem vis cordis sensim increfcit (§. 225.); unde *pulsus major debiliori* (§. 226.) *succedit*; & *vis vitæ antea depressa* (§. 228. 240.) *sensim iterum resuscitatur*.

§. CCLVI.

COROLLARIUM.

Quo magis vis vitæ augetur (§. 255.), eo *calor* (§. 254.) *major fit* (§. 231.).

§. CCLVII.

Quo magis vis vitæ crescit (§. 255.), *eo celerius sanguis per aperta vasa movetur*. Quo magis vis vitæ increfcit, eo magis calor augetur (§. 256.); calor autem dilatat vasa (demonst. §. 255.), id est, lumina eorum auget; in vasis ergo apertis & resistantia (§. 221.) & vis sanguinem versus cor repellens (§. 91.), eo magis imminuuntur. Sed prout vis vitæ fit major, etiam vis crescit, quam sanguis a corde accipit (§. 228.): sanguis igitur, ut per aperta vasa fluat (§. 92.), majore virium directe oppositarum differentia, necesse est. Quare, quum spatium percurrendum sit directe, tempus vero inverse, proportionale (§. 94.) huic differentia; sanguinem per aperta vasa celerius moveri oportet.

§. CCLVIII.

COROLLARIUM.

Quum adeo vis vitæ iterum refurgat (§. 255.) etiam *sanguis celerius moveri incipit*.

§. CCLIX.

Quo sanguis celerius movetur, (§. 258.) eo vim vitæ majorem reddit. Etenim, quo sanguis celerius movetur, eo majus æquali temporē spatium percurrens, (§. 95.) citius per venam cavam ad cor redit; &, quia majore copia ibidem collectus, majore vi in vacuum cordis ventriculum irruit, (§. 238.) cor in fortiolem contractionem ciet; proinde vis vitæ augetur.

§. CCLX.

COROLLARIUM I.

Quia celeritas sanguinis augetur, (§. 258.) etiam *vis vitæ resurgens* (§. 255.) *adhuc magis augetur.* (§. 259.)

§. CCLXI.

COROLLARIUM II.

Quum vires vitæ caloris gradus sequantur; (§. 231.) vires vero hæ augeantur, (§. 260.) etiam *calor magis augetur.*

SCHOLIUM.

Hoc (§. 254. ad 261.) alterum est febris stadium. (a)



CA-


(a) B. de SWIETEN Comment. §. 579.

CAPUT II.

DE

INFLAMMATIONE.

§. CCLXII.



Quo major fit vis, qua fluidum contra locum obstructum pellitur; eo celerius per canales, loco obstructo vicinos, & apertos, movetur. Nam ob vires motrices auctas, (per hypoth.) fluidum majorem motum adquiret; (§. 92.) sed nec antrorsum cedere valet, ob vasa (per hypoth.) obstructa, quæ ipsi transitum denegant; (§. 218.) nec retrorsum, ob vim fluidi, a tergo urgentis auctam. (§. 92.) Quum itaque sit fluidum, (per hypoth.) adeoque æquabiliter eo diffluat, ubi ipsi minus resistitur; (a) minus autem resistatur in canalibus, loco obstructo vicinis, & (per hypoth.) non obstructis: (§. 221.) movetur per vasa vicina aperta. (§. 91. 92.) Q. E. primum.

Sed per eadem vasa, (n. 1. huj.) eodem tempore, etiam illa quantitas, vel tota vel ex parte, transire debet, quæ transflueret, si fluido liber per loca obstructa transitus pateret. Ergo ut hoc fiat, utrique fluido idem spatium minore tempore, adeoque celerius, (§. 95.) percurrendum. Q. E. alterum.

§. CCLXIII.

COROLLARIUM I.

Quum itaque sanguis fluidum sit; (demonstr. §. 18.) *quo magis motus sanguinis in toto corpore acceleratur, tamen*

N 3

ad-

(a) s' GRAVESANDE l. c. n. 1419.

adhuc majorem celeritatem, per vasa, canalibus, intra territorium circulationis, obstructis, vicina (§. 262.) obtinet (a): major enim celeritas sanguinis, absque majore vi ejusdem, concipi nequit (§. 260.).

§. CCLXIV.

COROLLARIUM II.

Quoniam vis vitæ in febre magis magisque adfurgit (§. 256. 260.), etiam *celeritas sanguinis* (§. 258.) *successive intenditur* (§. 257.), *tum in toto corpore, tum præprimis per vasa loco obstructo vicina* (§. 263.). Et etiam calor (§. 254.) *tum in toto corpore, tum præcipue circa locum obstructum, successive augeri debet (b).*

§. CCLXV.

Quo major est impetus (§. 72.), quo sanguis ruber in arteriam obstructam irruit, eo major in eadem arteria, citra locum obstructum calor exoritur. Impetus est actio corporis in corpus cum motu (§. 72.); actio autem sine vi concipi nequit (demonstr. §. 92.); ergo quo major est impetus, eo major est vis, qua partes nostri corporis ad se invicem moventur; præprimis, quum sanguis, qui in canalem obstructum irruit, sit ruber (per hypoth.), adeoque maximo impetu gaudeat (§. 73.). Sed calor in ratione motus est (§. 131. 231.); igitur calor major exoritur.

SCHOLIUM.

Hunc motum (§. 265.) plurimum juvat motus sanguinis oscillatorius in loco obstructo a LEUWENHOECKIO, aliisque observatus. (c).

§. CCLVI.

(a) BOERH. Aphor. §. 382, n. 8. (b) Ibid. n. 6. (c) HALLER. I. C. T. II.

L. 212 & seq.

§. CCLXVI.

Quo major est impetus, quo fluidum in canalem flexilem obstructum irrui, eo magis idem canalis citra locum obstructum tumet.

Quoniam enim per canalem obstructum fluidum transire non potest (§. 218.), & tamen aucto impetu in eundem irrui (per hypoth.), ut majore copia adferatur, quam inde effertur (§. 72.), adeoque majore vi canalem coërcentem extrorsum urgeat (§. 72. 265.), necesse est. Quum itaque canalis sit flexilis (§. 14. 35.), hinc impetui cedat, latera ejus longius ab axi recedere, & sic capacitatem canalis violenter augere debent (§. 109. 110.). Sed magnitudo augetur, quando capacitas fit major; & augmentum partis in magnitudinem præternaturalem, tumor vocatur (§. 179. n. 3.); proinde eo magis canalis tumet.

§. CCLXVII.

Quando in canalem obstructum impetus sanguinis naturali fit major, oritur dolor. Canalis enim obstructus flexilis est (§. 14. 35.); quando itaque impetus sanguinis, quo in canalem obstructum irrui, naturalem excedit; latera canalis violenter distenduntur (§. 266.). Quare, quum fibra, violenter distensa, violenter elongetur; hoc vero contingere nequeat, nisi fibræ elementa a mutuo contactu, adeoque in continuitate solvantur (§. 179. n. 2.); orietur in mente ea ingrata perceptio ob solutionem continui, in fibra nervosa, cum cerebro communicante, intentatam, quæ dolor dicitur, & crescit prout fibra rupturæ fit propior (a); proinde oritur dolor.

§. CCLXVIII.

(a) B. de SWIETEN Comment. §. 220.

§. CCLXVIII.

Quo magis impetus naturalem excedit, quem canalis obstructus ab influxu sanguinis rubri sustinet, eo saturatius locus obstructus rubet. Sanguis canalem obstructum dilatat; (§. 266.) ergo tam in longitudinem, quam latitudinem præternaturaliter extendit, (§. 108. 110.) & idem fit, ac si singula puncta hiatusum lateralium, in tunicam cellulofam, vasi obstructo circumnatam, ^(a) tendentium, extrorsum traheret, ipsosque hiatus minus resistentes redderet. (§. 221.) Quum itaque ob impetum, quo (per hypoth.) pollet, naturali majorem, & resistentias, per obstructionem auctas, (§. 221.) inter duas vires directe oppositas (§. 91. 265.) violentius prematur; evidens est, quare sanguis ruber, partim in canales loco obstructo vicinos, & apertos, (§. 262.) partim in tunicam cellulofam ambientem se recipiat, (§. 92.) & per eam transpareat, quando impetus, quo in canalem obstructum fertur, naturali est major.

§. CCLXIX.

COROLLARIUM.

Inde (§. 266. 268.) ulterius liquet, quare sub dicta (§. 268.) conditione, *canalis magis magisque tumeat.*

§. CCLXX.

Quo magis sanguinis rubri in canalem obstructum impetus naturalem excedit, eo major in eodem citra locum obstructum, pulsatio percipitur. Nam quo impetus sanguinis in locum obstructum naturali est major, eo major fit fibrarum tensio, & hinc dolor, (§. 267.) & eadem etiam fibræ acutius,

(a) BOERH. Epist. ad RUYSCH. de Gland. p 41.

tius, quam naturaliter sentiunt. Quia igitur impetus sanguinis naturalem excedit (per hypoth.), ejus in hacce, & plures, & acutè sentientes, fibras actio cum motu naturali est major (§. 72.). Quare, quum impulsus sentiamus, quando nobis sumus conscii, corpus in nos cum motu agere; quo impetus sanguinis in locum obstructum naturali fit major, eo major in eodem pulsatio, ad quemvis cordis ictum sentitur.

SCHOLIUM.

Eadem phainomena (§. 265. ad 270.) etiam CEL. BOERHAAVE, & Ejus ILL. COMMENTATOR BARO DE SWIETEN habet (a).

§. CCLXXI.

Quando in parte nostri corporis simul tumor, calor, rubor, dolor, & pulsatio sentiuntur; eadem *inflammata* dicitur (b); ut adeo *Inflammatiō* fit tumor alicujus partis, cum dolore, rubore, calore, atque pulsatione, in eadem perceptis.

§. CCLXXII.

Quando in parte quadam inflammatio percipitur, istam partem obstructam esse, & sanguinem rubrum in eam impetu, naturali majore, impingere oportet; & contra, quando in partem obstructam, impetus sanguinis rubri naturali fit major, istam partem inflammari oportet. Etenim pars inflammata præternaturaliter tumet, & rubet (§. 271.). Rubor autem intra corpus nostrum genitus, non nisi a sanguine rubro dependet: nam hoc eloto omnia pallent; & tumor est augmentum partis in magnitudinem præternaturalem (§. 266.). Ergo, quia augeri dicitur, quidquid homogeneo adjecto fit

TOM. I.

O

ma-

(a) Comment. §. 382. - (b) Ibid.

majus, in partem inflammata[m] plus sanguinis præternaturaliter adfertur, quam inde reducitur; hinc vasa effluentia sanguini rubro effluxum non concedunt; consequenter obstructa sunt (§. 218.). Porro in parte inflammata pulsatio sentitur (§. 270.): impulsus vero non sentimus, nisi quando nobis sumus conscii, corpus in nos cum motu agere: in partem inflammata[m] itaque sanguis cum impetu ruit (§. 72.), & quidem naturalem excedente. Nam tantus est, ut ob dolorem conjunctum (§. 271.), fibra dissolutionem mineatur (§. 267.); & ob calorem naturali majorem (§. 271.) attritus partium, hinc & actio in se invicem cum motu naturalem excedat (§. 229.). Inflammatio ergo non nascitur, nisi quando in locum obstructum impetus sanguinis rubri naturali fit major (§. 72.). Q. E. primum.

Contra, quando sanguis ruber in canalem obstructum impetu naturali majore irrumpit, oriuntur in parte, cui iste canalis inservit, dolor, atque pulsatio, antea non præsentis (§. 267. 270.), & augentur calor (§. 265.), tumor (§. 266.), atque rubor (§. 268.): ubicunque vero hæc phaenomena apparent, ibi adest inflammatio (§. 271.). Inflammatio itaque oriri debet, quando in partem obstructam impetus sanguinis rubri naturali fit major. Q. E. alterum.

§. CCLXXIII.

COROLLARIUM I.

Quoniam propositiones convertibiles ^(a) definitionibus æquivalent ^(b); igitur jam habemus duas propositiones (§. 272.), quæ definitioni (§. 271.) non solum æquipollent, sed

(a) WOLF. Logie. Latin. §. 282. (b) Ibid. §. 1221.

fed & alia inde realis definitio formari potest. Scilicet *Inflammatio* est obstructio (§. 218.) canalis convergentis circa finem, cum impetu sanguinis rubri (§. 72.), in canalem obstructum, naturali majore.

SCHOLIUM I.

Quum hæc definitio (§. 273.) similis sit ei, quæ a veteribus soli *Phlegmonæ* dicata fuit (a); eadem quoque soli *inflammationi sanguineæ*, seu *Phlegmonæ veræ* convenit, nec ad minorum vasorum inflammationem extendenda. De ea autem sola hic agimus, quia sola vasa rubra (§. 6.) præsentī considerationi subjecimus.

SCHOLIUM II.

Inflammationes (§. 273.) absque prævia obstructione fieri posse contendit HALLERUS (b). Verum rationes, quas adfert, nihil evincere, facile ostenditur. Etenim 1.) sanguinem in parte inflammata in cellulosa fabricam etiam penetrare, ipse adstruxi (§. 268.); verum an non idipsum præviam obstructionem (§. 273.) magis confirmat? quis innumera vascula rubra sensibus discernat, ut in oculo? an æqua hæc comparatio est? 2.) Lubens largior, ligatis magnis vasis, inflammationes non fieri; quum illi eo impetus totus (§. 72.) destruatur, nec per vasa vicina impetus ille augeri possit (§. 258.). Denique 3.) ad inflammationem requiritur obstructio plurium ramorum (§. 220. in schol. 2.); neque proinde adduci deberent ab HALLERO obstructiones in vasis minimis visæ. Si vero earum aliquæ in majoribus ramis sunt observatæ, certe obstructiones illæ ob vicinam anastomosis aliquam (§. 151.) prohibitæ fuerunt. Nulla proinde alia inflammationis causa proxima est, quam quæ (§. 273.) dicta.

SCHOLIUM III.

Phlegmonæ veterum ἀπὸ τῆς τὸν φλέγην inflammare, urere, derivatur.

O 2

§. CCLXXIV.

(a) B. de SWIETEN Comment. §. 371. (b) l. c. T. I. p. 116. & seq.

§. CCLXXIV.

COROLLARIUM II.

Quoniam obstructions non tantum in arteriis, sed etiam in venis reperiuntur (§. 220.); & systema venosum versus cor etiam convergit (§. 39.); atque celeritas sanguinis versus cor major est (§. 144. ad 152.); sequitur *inflammationes etiam in venis fieri.*

§. CCLXXV.

Inflammatiō semel nata inflammationem facillime auget. Canalis enim inflammatus violenter tumet (§. 266. 268. 273.), hinc vascula sibi proxime adjacentia angustat (§. 195. γ.), proinde obstruit (§. 218. 219.), & ob impetum majorem inflammat (§. 273.). Porro, quia inflammatio impetu sanguinis, in locum obstructum naturali majore, absolvitur (§. 273.), simul ac inflammatio nata est, oscula arteriarum serosarum, ex lateribus canalis, circa locum obstructum oriundarum, violenter dilatata (demonstr. §. 268.), minus resistunt (demonstr. §. 92.); sanguis vero majore vi contra locum obstructum projectus (§. 265.), in canalibus, loco obstructo vicinis & apertis, cum celeritatem (§. 262.), tum calorem (§. 261.), majorem possidet. Quum itaque calor dilatet vasa, hinc minus resistantia reddat (§. 92.); celeritate autem aucta, etiam impetus crescat (demonstr. §. 72.), nata inflammatione globulus ruber sanguinis, contra vasa, globulis flavis destinata, vicina & minus resistantia, majore vi (§. 265.) impingens, in ea irruit errore loci (§. 194. α.). Hæc autem vasa sensim angustiora fiunt, sive arteriæ (§. 20.), sive venæ (§. 39.) fuerint; hinc obstruuntur (§. 219.), & ob impetum majorem

rem conjunctum (§. 72. 262.) inflammantur (§. 273.). Inflammatio itaque semel nata inflammationem facillime auget.

§. CCLXXVI.

Quo magis in febribus inflammatoriis, vis vitæ crescit, eo sanguis compingibilis (§. 58. in schol.) specificè gravior redditur. Etenim in quavis inflammatione impetus sanguinis naturali est major (§. 273.), hinc actio ejus cum motu in latera vasorum ultra naturalem increscit (§. 72.); quoniam itaque in conflictu corporum, omnis actio æqualem habet reactionem ^(a), reactio vasorum in sanguinem naturalem pariter excedit. Porro in inflammatione adest obstructio (§. 273.), cordi igitur resistentia est aucta (§. 221.): & quia cruor majore vi in latera vasorum irrumpit (per demonstrat.), vascula minora, majoribus interjecta, atque per compressionem externam inde oriundam obstructa (demonstrat. §. 275.), etiam ex hac ratione cordi resistentiam augent (§. 221.). In morbis inflammatoriis itaque vis, sanguinem versus cor repellens, est major (§. 221.). Verum vis vitæ magis magisque insurgit (per hypoth.); vis adeo, sanguinem a corde propellens, pariter increscit (§. 228.). Quum igitur sanguis sit compingibilis (§. 58. in schol.), non potest non in arctius spatium redigi (§. 92.): & quoniam specificè gravius est, quod in minore spatio idem habet pondus ^(b); sanguis compingibilis eo specificè gravior evadit, quo magis in febribus inflammatoriis vis vitæ crescit.

(a) S'GRAVESANDE l. c. n. 361. (b) HAMBERGER. Phys. §. 115.

SCHOLIUM.

Hæc propositio (§. 276.) tamdiu vera est, quamdiu nulla humorum resolutio putrida adest; ita enim in febre ardente, cujus tamen essentiam inflammatio totius corporis absolvit (a), ab alcali putrido, aut oleoso rancido oriunda, humores dissolutissimi sunt.

§. CCLXXVII.

Quo magis vis vitæ insurgit, eo magis pars aquosa sanguinis dissipatur. Quo magis enim vis vitæ insurgit, eo magis sanguis a corde, & arteriis premitur. (§. 228.) Aqua vero non est compressilis, (b) sed potius indolem suam sequitur, ut magis pressa diffuat eo, ubi minus premitur. (c) Igitur, quia inter omnes partes sensibiles, massam sanguineam constituentes, aquosæ minime cohærent; quo magis vis vitæ insurgit, eo magis pars aquosa sanguinis, qua data porta, e corpore se subducit.

§. CCLXXVIII.

Quo magis in febribus inflammatoriis, vis vitæ crescit, eo viscosior sanguis compingibilis, & concrescibilis evadit. Quo magis enim in febribus inflammatoriis vis vitæ insurgit, eo magis calor sanitatem excedit (§. 256. 265. 273.); hinc cum sanguis concrescibilis sit (§. 62.), eo magis ad soliditatem inclinatur; (d) adeoque eo fortius inter se cohæret. Præterea, quo magis in febribus inflammatoriis vis vitæ adscendit, eo fortius globuli sanguinis, & a parte anteriore: & a tergo, & a lateribus, premuntur (demonst. §. 118.) hinc, quia figura eorum est mutabilis (§. 58. in schol.), eo facilius figuram sphaericam cum polyedra commutant.

(a) BOERH. Aphor. §. 742. (b) HAMBERGER. Phys. §. 359. (c) S' GRAVESANDE l. c. II. 1419. (d) HALLER. l. c. T. II. p. 41. & seqq.

tant. Quoniam ergo pars dilutissima sanguinis eo magis dissipatur, quo major vis vitæ evadit (§. 277.), globulos hosce ob spatia intermedia, hoc modo eo magis imminuta, propius ad se invicem accedere, & tandem se mutuo contingere, oportet. Enim vero, quamdiu globosi erant, in paucissimis punctis possibilibus se contingebant (demonst. §. 55.); ut itaque, dum polyedri facti sunt, inter eos numerus punctorum contactus augeatur, est necesse. Quare, quum sint compingibiles (per hypoth.), cohærere debent (§. 276.). Sed cohæsiones sunt, ut numerus punctorum contactus (§. 15. n. 1.), & viscositas est in ratione cohæsionis (§. 58.); proinde sanguis viscosior evadit.

SCHOLIUM.

Suam iterum hæc propositio (§. 278.) habet exceptionem, in febre ardente putrida, ut (§. 276. in schol.) dictum.

§. CCLXXIX.

Quoniam Igitur sanguis compingibilis, & concrescibilis eo viscosior, specificèque gravior, redditur, quo major vis vitæ in febribus inflammatoriis evadit (§. 278. 276.): idem sanguis in ultimos vasorum sibi priorum fines delatus, non modo capacitatem eorum excedendo (§. 219. n. 2.), eo facilius eosdem obstruit (§. 218.); sed & massam, in locum obstructum impingentem, eo magis auget (§. 60.). Et quia globus, vel polyedrum ad sphæram quam proxime accedens, specificè graviora facta, ac eadem, vel etiam majore, vi, & in eodem fluido resistente (in nostro casu in parte aquosa sanguinis, non compingibili (§. 277.), nec per

ca-

calorem, naturali majorem, concrefcibili,) ac ante, projecta, majorem impetum habent. (§. 73.) Quamobrem, quum inflammatio crefcat, prout in eundem canalem obftructum impetus fanguinis naturali fit major (§. 273.); priori (§. 275.) nova accedit ratio, quare *inflammatio femel nata inflammationem facillime augeat.*

SCHOLIUM.

Ne leges bonæ methodi violaffe arguar, moneo, quod quum propositio (§. 275.) cum hac (§. 279.) omnino eadem fit, & non aliter ac bipartita, fit confideranda, membrum ejus primum (§. 275.) illo loco, ad uberio rem definitionis (§. 273.) demonstrationem, poni debuerit; at membrum alterum (§. 279.) ad hunc locum erat refervandum, cum ejus demonstrationem propositiones (§. 276. 278.) tanquam præmiſſæ ingrediantur.

§. CCLXXX.

Quum fanguis noſter compingibilis & concrefcibilis eo viſcoſior evadat, quo magis in febribus inflammatoriis vis vitæ crefcit (§. 278.), adeoque inflammatorius fiat; pulſus autem durus in arteria percipiatur, in quam fanguis inflammatorius magna vi projicitur ^(a); liquet, quomodo in dictis febribus *pulſus* major (§. 256.) & fortior *in durum tandem degeneret.*

SCHOLIUM.

Similiter, ex (§. 278) dictis, plerique rationem reddere volunt, quare in febribus inflammatoriis fanguis, & ſerum, e vena miſſa, duram craſſam, rigidamque pellem forment. Verum rationem eam minime ſufficere.

(a) BOERH. Inſtit. §. 952.

cere, neque *crustam* sic dictam *inflammatoriam* individuum inflammationis præsentis esse indicium, plurimis experimentis ostendit ILL. DE HAEN (a). Neque his sufficienter respondit HALLERUS (b).

§. CCLXXXI.

Quo magis vis vitæ augetur, eo massa sanguinea oleosior redditur. Quo magis enim vis vitæ augetur, eo major quoque fit calor (§. 256.); & prout hic augetur, eo magis etiam olea fundit. Ergo, quia fusio est mutatio solidi in fluidum, & minus fluidi in magis fluidum (c); ut pro augmento vis vitæ partes pinguedinis minus inter se cohæreant (d), magisque in quamvis loci differentiam tendant (e), necesse est. Quapropter, quum pro incremento vis vitæ, impetus sanguinis (§. 72. 257.), adeoque & actio ejus in arterias crescat; hæ vero folliculos pinguedinosos sibi adjectos, magis tunc comprimunt; ideo, quo magis vis vitæ infurgit, eo magis pinguedo, ex loculis suis excussa, per venas reforbentes in fabricam cellulosem patulas (f), intra massam sanguineam absorbetur (§. 221. 91. 92.).

§. CCLXXXII.

Quoniam in febribus inflammatoriis sanguis specificè gravior evadit (§. 276.), adeoque majore impetu (§. 279.), hinc & majore vi (§. 265.) movetur; quo magis in iisdem febribus vis vitæ infurgit, eo majorem sanguis calorem concipit (§. 229.). Et quia idem sanguis ob viscositatem suam, cum inflammatoriam (§. 278.), tum oleosam (§. 281.),

TOM. I.

P

auc-

(a) Rat. Med. T. I. p. 83. & seqq. & T. III. p. 130. & seqq. (b) l. c. T. II.

p. 126. & seqq. (c) HAMBURGER. Phys. §. 250. (d) Ibid. §. 110.

(e) S'GRAVESANDE l. c. n. 1419. (f) RUYSCH, Epist. ad BOERN. de Gland. p. 60.

calorem, naturali majorem, concrefcibili,) ac ante, projecta, majorem impetum habent. (§. 73.) Quamobrem, quum inflammatio crefcat, prout in eundem canalem obftructum impetus fanguinis naturali fit major (§. 273.); priori (§. 275.) nova accedit ratio, quare *inflammatio femel nata inflammationem facillime augeat.*

SCHOLIUM.

Ne leges bonæ methodi violaffe arguar, moneo, quod quum propositio (§. 275.) cum hac (§. 279.) omnino eadem fit, & non aliter ac bipartita, fit confideranda, membrum ejus primum (§. 275.) illo loco, ad uberio rem definitionis (§. 273.) demonstrationem, poni debuerit; at membrum alterum (§. 279.) ad hunc locum erat refervandum, cum ejus demonstrationem propositiones (§. 276. 278.) tanquam præmiſſæ ingreſſiantur.

§. CCLXXX.

Quum fanguis noſter compingibilis & concrefcibilis eo viſcoſior evadat, quo magis in febris inflammatoriis vis vitæ crefcit (§. 278.), adeoque inflammatorius fiat; pulſus autem durus in arteria percipiatur, in quam fanguis inflammatorius magna vi projicitur ^(a); liquet, quomodo in dictis febris *pulſus* major (§. 256.) & fortior *in durum tandem degeneret.*

SCHOLIUM.

Similiter, ex (§. 278) dictis, plerique rationem reddere volunt, *quare in febris inflammatoriis fanguis, & ſerum, e vena miſſa, durum craſſam, rigidamque pellem formant.* Verum rationem eam minime ſufficere.

(a) BOERH. Inſtit. §. 952.

cere, neque *crustam* sic dictam *inflammatoriam* individuum inflammationis præsentis esse indicium, plurimis experimentis ostendit ILL. DE HAEN (a). Neque his sufficienter respondit HALLERUS (b).

§. CCLXXXI.

Quo magis vis vitæ augetur, eo massa sanguinea oleosior redditur. Quo magis enim vis vitæ augetur, eo major quoque fit calor (§. 256.); & prout hic augetur, eo magis etiam olea fundit. Ergo, quia fusio est mutatio solidi in fluidum, & minus fluidi in magis fluidum (c); ut pro augmento vis vitæ partes pinguedinis minus inter se cohæreant (d), magisque in quamvis loci differentiam tendant (e), necesse est. Quapropter, quum pro incremento vis vitæ, impetus sanguinis (§. 72. 257.), adeoque & actio ejus in arterias crescat; hæ vero folliculos pinguedinosos sibi adjectos, magis tunc comprimunt; ideo, quo magis vis vitæ infurgit, eo magis pinguedo, ex oculis suis excussa, per venas reforbentes in fabricam cellulofam patulas (f), intra massam sanguineam absorbetur (§. 221. 91. 92.).

§. CCLXXXII.

Quoniam in febribus inflammatoriis sanguis specificè gravior evadit (§. 276.), adeoque majore impetu (§. 279.), hinc & majore vi (§. 265.) movetur; quo magis in iisdem febribus vis vitæ infurgit, eo majorem sanguis calorem concipit (§. 229.). Et quia idem sanguis ob viscositatem suam, cum inflammatoriam (§. 278.), tum oleosam (§. 281.),

TOM. I.

P

auc-

- (a) Rat. Med. T. I. p. 83. & seqq. & T. III. p. 130. & seqq. (b) l. c. T. II. p. 126. & seqq. (c) HAMBARGER. Phys. §. 250. (d) Ibid. §. 110. (e) S'GRAVESANDE l. c. n. 1419. (f) RUYSCH, Epist. ad BOERH. de Gland. p. 60.

auctam, calorem semel conceptum diutius retinet, dum priores causæ continuatæ novum iterum excitant; *calor in febribus inflammatoriis insigniter augeri debet (§. 229.), & in æstum transire.*

CAPUT III.

DE

GANGRÆNA, SPHACELO, SUPPURATIONE,
SCIRRHO, CANCRO, ET CARCINOMATE.

§. CCLXXXIII.



Si 1.) humores in loco inflammato sunt acres, 2.) valde moti, 3.) vasa rigida, 4.) obstructio magna, & 5.) irresolubilis, inflammatio in gangrænam degenerat. ^(a) Quoniam enim humores sunt valde moti (per hypoth.) magna celeritate (§. 92. 94. 95.), hinc & ingenti impetu (§. 72.) gaudent; qui molis obstructis, in loca assiduo angustiora pulsæ (§. 218. 273.) viscositatem augendo (§. 276. 278.) efficiunt, ut diutius in vasis, quæ ob tumorem non perspirant, hærens ea moles, cum vasculis obstructis, & tunica cellulosa infarcta, in crustam duram, non perspirabilem coalescat. Porro, quia humores sunt acres (per hypoth.), figuram acutam habent (§. 209.); ideo quia aculeus, ut cuneus, vires aliunde acceptas insigniter multiplicat (§. 119. in schol. 1. 2.), impetus humorum, quem ex massa, atque celeritate, auctis obtinent, adhuc major evadit.

Ve-

(a) B. de SWIETEN Comment. §. 388.

Verum canales ultra locum obstructum sunt rigidi (per hypoth.), impetui igitur sanguinis irruentis minus cedunt (§. 188.); hinc quia obstructio magna est, & resolvi nequit (per hypoth.), integrum ejusdem sanguinis impetum sustinent (§. 92.). Quum adeo ob figuram acutam humorum, impetus hic non applicetur magnæ parti corporis densi, sed parvæ superficiei vasorum: ideo

α.) Hæc vascula rumpuntur (§. 91. 92.); unde

β.) Fines eorum discissi, ob elaterem suum, retrofliunt, &, a conjuncta acrimonia irritati, & crispati, fortiter se contrahunt; hinc

γ.) omnibus humoribus effluxuris obex ponitur (§. 218.); atque

δ.) in tunicam cellulofam non, nisi paucò liquido, sub ipsa ruptura in eam effuso, exitus conceditur; quod

ε.) ob ingentem æstum in vicinia vigentem (§. 282.), putrefactum, mox in luridam faniem degenerat. Proinde, quoniam in loco, a reliquo corpore abscisso (α. huj.), circulatio fluidorum cessat (γ. huj.), vita vero in circulo humorum consistit; ut

ζ.) ista tunicæ cellulosæ pars vita privetur, est necesse. Et quia privatio vitæ mors audit, mors autem tunicæ cellulosæ notionem gangrænæ constituit ^(a): ideo, quum vascula abrupta (α. huj.), semiviva (ζ. huj.), & putrida (ε. huj.), circa finem integre (γ. huj.) constricta sint (β. huj.), ejusmodi vero constrictio Eschara audiat; patet, unde, sub hypothese theorematidis.

P 2

η.) Lo-

(a) B. de SWIFTEN Comment. §. 419. 420.

η.) Locus inflammatus escharam gangrænosam obtineat.

SCHOLIUM.

Hic status (§. 283.) γάγγραινα a γράω, vel γράϊνω depascor dicitur.

§. CCLXXXIV.

Gangræna, ob signa prægressa (§. 283.) præsentē, notæ inflammationis (§. 271.) in loco prius inflammato subito evanescunt; comparent vero in limitibus hujus loci, ubi antea non erant. Nam si gangræna ex inflammatione fit, fines vasculorum obstructi abscinduntur (§. 283. α.); consequenter locus, in quo hærent isti fines abscissi non amplius obstructus dici potest (§. 218.): & quia humorum influxu non amplius gaudet (§. 283. γ.), etiam impetum eorum non experitur (§. 72.). Quum igitur per impetum sanguinis, in locum obstructum naturali majorem, signa inflammationis (§. 271.) determinantur (§. 272.); cessantibus illis hæc quoque evanescunt. Q. E. primum.

Porro quando ex inflammatione gangræna nascitur, impetus sanguinis mirifice est auctus (§. 72. 92. 95. 283. n. 2.); vascula viva vero a mortuis (§. 283. ζ.) abscissa (ibid. α.) fortiter se contrahendo (ibid. β.) fluidisque transitum denegando (ibid. γ.), obstructionem generant (§. 218.): in margine itaque locum gangrænosum ambiente, inflammatio nascitur (§. 273.), & dolor, calor, atque pulsatio percipiuntur (§. 265. 267. 270.). Q. E. alterum.

§. CCLXXXV.

§. CCLXXXV.

COROLLARIUM.

Quum *sphacelus* ultimus gangrænæ (§. 283. 284.) gradus sit ; ^(a) ex dictis (283. 284.) *facile intelligitur*.

SCHOLIUM.

Σφάκελος a σφάζω mactō deducitur.

§. CCLXXXVI.

Si 1.) *humores in loco inflammato sunt blandi*, 2.) *morbis ultra triduum, semper cum vehementia, persistit*; tumque 3.) *impetus humorum adhuc ingens manet*; atque 4.) *obstructio magna est*; nec 5.) *resolvi potest: inflammatio in suppurationem transit*. ^(b) Nam, ob humores blandos, id est, non acres, ex inflammatione gangræna non metuitur (§. 283. n. 1.). Quia tamen impetus humorum, in multa vasa obstructa, ultra triduum, citatus persistit, & hoc elapso, adhuc talis manet (per hypoth.), non solum benignæ resolutionis notæ deficiunt; sed & particulæ obstruentes, impetu sanguinis aucto, in majores assiduo angustias (per hypoth.) pulsæ (§. 273.), ibidemque viscidiores factæ (§. 276.) 278.) resolutionem adhuc difficiliorem reddunt, ^(c) Quoniam autem impetus auctus, & ob obstructionem (per hypoth.) irresolubilem integer, iisdem intra triduum plusquam 259200 vicibus adplicatur; ad quemvis enim cordis ictum renovatur (§. 270.); cor vero, in statu sano, in uno horæ minuto primo, ad minimum, 60, adeoque in inflammatione adhuc plures ictus absolvit; igitur non possunt non

P 3

α.) Va-

(a) B. de SWIETEN Comment. §. 420. (b) Ibid. §. 337. (c) Ibid. §. 336.

α.) Vascula hæc obstructa in continuitate tandem solvi (§. 92. 267.), atque humores contentos, una cum mole obstruente, in tunicam cellulofam ambientem effundere; si hoc fit,

β.) Vascula perrupta, ob elaterem suum retrosiliunt (§. 25. 41.), & versus axin canalisi sui se adplicando (§. 22. 40.), sanguini rubro exitum præcludunt, sero autem ejus, & chylo, ob blanditiem humorum præsentem (per hypoth.), fervant:

γ.) Qui autem in loco inflammato tenax est factus (§. 278.), jam in tunicam cellulofam, ipsa suppuratione actu jam fiente; non amplius æstuosam, sed tantum tepidam (§. 287. n. 2.) effusus indolem suam sequitur, in tenue liquidum deliquescens (§. 278. in schol.); præterea

δ.) Qui, sub ruptura, effusus est sanguis ruber, extra vim, atque territorium, circulationis jam positus, proprioque elateri (§. 58.) commissus, in globulos flavos, ex his in pellucidos (§. 56.) dissilit:

ε.) Partes solidæ denique, per continuum istum impetum adplicatum minutissimæ detritæ, fluidis quam simillimæ evadunt. (a) Quoniam itaque chylus recens, & cremorosus, serum sanguinis, sanguis ruber pellucidus factus, sanguis tenax liquidus redditus, solida fluidis adsimilata (β. γ. δ. ε. huj.), cum oleo tunicæ cellulosæ, in hoc loco clauso (α. huj.), & tepido (§. 287. n. 2.) per vim vitæ in vicinis vigentem, exacte miscentur, atque subiguntur; remanet tandem

ζ.) Par-

(a) BOERH. Instit. §. 461.

§.) Parte tenuiori, per venas bibulas, in tunicam cellulofam patulas, intra fanguinem reſorpta (§. 281.), humor homogeneous, albus, ſpiſſus, glutinoſus, & pinguis. Ejusmodi vero humor, inflammationi ſuccedens, vocatur pus: (a) ergo, quia pars ſuppurari dicitur, quando in loco, prius inflammato, pus generatur; vere ſub conditione theorematis,

n.) Inflammationi ſuppuratio ſuccedit.

SCHOLIUM.

Inde (§. 286.) communiter *puris* origo repeti ſolet. Verum ingens ejus quandoque copia, & ejusdem, ubi nulla ſuppurationis (§. 286.) ſuſpicio, ab ILL. de HAEN, aliisque obſervata, præſentia, me cogunt, ut cum ILL. CLINICO, aliam adhuc *puris* originem credam, & quidem eandem forte, a qua cruſta inflammatoria (§. 280. in ſchol.) provenit. Legi ſuper hac re meretur ILL. VIRI elegans, pro more ſuo, Diſſertatio. (b)

§. CCLXXXVII.

Suppurationem 1.) *inſtare novimus, ſi, poſtquam inflammatio per triduum vel quatrimum, cum vehementia, duravit, in loco inflammato calor, dolor, atque pulſatio augentur.* 2.) *Eandem vero jam actu fieri, conſtat ex crebro horrore, absque evidenti cauſa, per totum corpus vago, ſenſuque diſtractionis, in loco inflammato, notas (n. 1.) prægreſſas ſequentibus.* 3.) *Eam denique abſolutam eſſe diſcitur, ex notis (n. 1. 2.) prægreſſis, remiſſione doloris, caloris, pulſus (n. 1.), atque diſtractionis (n. 2.), cum gravitate in loco hiſce ſuccedente.* Si enim ſuppuratio inſtat, canalis inflammatus ad ſolutionem continui ſucceſſive accedit (§. 286. a.),

(a) B. de SWIETEN Comment. §. 158. n. 7. (b) Rat. Med. T. II. p. 8. & ſeqq.

α.), & tantum attritum patitur, ut particulæ ejus minutissimæ deraſæ, cum ipsis fluidis, in massam homogeneam (ibid. ζ.) demum coeant (ibid. ε.). Quare quum dolor crescat, prout fibra rupturæ fit propior (§. 267.), & calor adſcendat, quemadmodum attritus fit major (§. 229.); ubi pus instat, dolor, & calor augentur. Quoniam vero uterque impetum sanguinis auctum ſupponit (§. 286. n. 3.), & pulsatio, in loco inflammato aucta, de impetu sanguinis in eundem majore (§. 270.) testatur, & suppurationem simul declarat. Q. E. primum.

Quodſi autem pars actu ſuppuratur, in loco inflammato nunc hic, nunc ibi vasculum obſtructum abſcinditur (§. 286. α.), humoribusque in illud vasculum irruentibus, magna ex parte liber effluxus paratur (ibid. γ.); humores adeo latera vasculi præterlabendo, in eadem non amplius agunt, confequenter impetus eorum infringitur (§. 72.), adeoque & calor (§. 265.); præprimis quum, mole obſtruente jam abſciſſa, non amplius integro impetu in latera vaſorum agant. Quoniam itaque imminutio caloris frigus audit, (a) nervis, in loco inflammato præſentibus, ſenſus frigoris communicatur, & ob conſenſum eorundem, per totum corpus diſpergitur; hinc, quia paucis ante momentis magnus calor aderat (n. 1. huj.), magno calori ſubitaneum frigus ſuccedit. Quamobrem, quum ingens æſtus, ſubitaneo frigori præviuſ, horripilationem producat, horror per totum corpus vagus, & notas (n. 1. huj.) ſine evidenti ratione excipiens, partem prius inflammataſ actu jam ſuppurari prodiſ. Porro, ſi
ſup-

(a) HAMBERGER. *Phyſ.* §. 493.

suppuratio actu fit, fines vasculorum discissi retrofiliunt (§. 286. β.), hinc tunicam cellulofam, cum integumento incumbente, se verſus trahendo, diſcerpere conantur; (a) humores autem, in tunicam cellulofam, aliquamdiu adhuc integram manentem, effuſi (ibid. β.), eam in tumorem elevando, etiam ex hac ratione ſenſum diſtractionis excitant (§. 267.). Q. E. alterum.

Postquam vero ſuppuratione abſoluta eſt, omnia vaſcula diſciſſa ſunt (§. 286. α.), quum itaque dolor non oriatur in fibra, cujus continuitas ſoluta jam eſt (§. 267.); remiſſio doloris, cæteris paribus, ſuppurationem finitam, utique demonſtrat. Quum pulſus in loco inflammato ſentiatur, quoniam ſanguis majore impetu, in vaſa ejus obſtructa irruiſit (§. 270. 273.), & calor in hoc morbi ſtadio adſit, quia attritus humorum ad vaſa eſt tantus, ut partes horum minutim detritæ, fluidis adſimilentur (§. 286. ε.): ideo ex remiſſione pulſus atque caloris ad hanc adſimilationem, tanquam partem ſuppurationis (§. 286. ζ.), & obſtructionem, finitas concludere licet, ſi reliqua conſpirant. Porro, ſi ſuppuratione eſt abſoluta, hæret in tunica cellulofa humor lubricus, glutinofus, & pinguis (§. 286. ζ.), qui tunicam cellulofam, cum integumento incumbente, laxando & emolliendo, ſenſum diſtractionis, & tenſionis obtundit. (b) Tandem ſi ſuppuratione finita eſt, hæret in loco, prius inflammato, faccus pure plenus (n. 2. huj. §. 286. ζ.), antea non præſens, quem, quia fines canalium abſciſſi ſunt (§. 286. α.), ſola tunica cellulofa ſuſtinet. Quum itaque ſic moles ſuſti-

TOM. I.

Q

nen-

(a) BOERH. Aphor. §. 162, 163, 183. (b) Ibid. §. 228. n. 1.

nenda fit aucta, vires sustinentes autem minutæ: evidens est ratio, quare suppurationi absolutæ gravitas in parte suppurationis succedat (§. 245.). Q. E. tertium.

§. CCLXXXVIII.

Fibra diu dolens, fit admodum debilis. Nam in fibra diu dolente solutio continui diu intentatur (§. 267.), hinc inter particulas fibram constituentes, numerus punctorum contactus tandem fit minor. (a) Quoniam ergo robur fibræ a cohæfione particularum ejus dependet (§. 184.); hæc vero, cæteris paribus, ut numerus punctorum contactus se habet (demonst. §. 15. n. 1.), fibra diu dolens admodum debilitatur.

§. CCLXXXIX.

Quum fluida æquabiliter diffluant, ubi ipsis minus resistitur (demonst. §. 262.); minus autem ipsis resistatur in vasis debilibus, quam non debilibus (§. 175.): ideo, quia fibra diu dolens admodum debilitatur (§. 288.), *pars diu dolens humores adtrahit.*

§. CCXC.

Si, 1.) postquam inflammatio jam diu, v. g. per aliquot dies, semper cum vehementia perstitit, 2.) vis vitæ infra sanitatem, multum, atque 3.) sine correctione causæ, deprimitur; inflammatio facile in scirrhum tendit. Quum enim inflammatio jam diu, cum vehementia semper, perstiterit (per hypoth.), eadem facile molem obstruentem, majoribus indies angustiis (§. 218. 273.) impingit, vasa obturat, comprimit; sanguini duram tenacitatem (§. 276. 278.) concit-

(a) WOLF. Ontol. §. 724. 728

ciliat. Quoniam igitur vis vitæ infra sanitatem multum deprimitur (per hypoth.), etiam celeritas sanguinis, adeoque & impetus (§. 72.) naturali fit minor (§. 257.): in loco inflammato adeo etiam dolor cessat (§. 267.). Verum hæc omnia fiunt absque correctione causæ (per hypoth.), hinc absque sublata obstructione (§. 273.): manet igitur tumor antea præsens (§. 218.). Enimvero, ob inflammationem jam diu præsentem (per hypoth.) pars eadem affecta jam dudum doluit (§. 273.): tumor igitur facile in loco inflammato manet (§. 288.). Quare, quum hic tumor sit durus, & absque dolore (per demonstrat.); durus vero, atque indolens tumor scirrhus vocetur; (a) facile, sub conditione theorematidis, inflammatio in scirrhum transit.

SCHOLIUM.

Scirrhus (§. 290.) a σκίρρῶς, *induro*, nomen accepit.

§. CCXCI.

Scirrhus in loco affecto stuporem, atque gravitatem producit. Quoniam enim scirrhus non dolet, licet sit tumor (§. 290.); sensu ipse caret; quumque tumore suo nervos vicinos comprimendo, & obstruendo (§. 275.), subjectas partes sensu privet; (b) sensus autem ablati stupor vocetur; in parte scirrhosa constans adest stupor. Q. E. primum.

Porro, scirrhus est tumor, materia densa, & compacta, infarctus (§. 290.); tumor autem est augmentum partis in magnitudinem præternaturalem. In parte scirrhosa itaque moles sustinenda est aucta; &, quia idem scirrhus, partes

Q 2

vi-

(a) B. de SWIETEN Comment, §. 392. (b) BOERH. Instit. §. 284. n. 4.

vicinas comprimendo, sicque influxu liquidi nervei orbando, vires sustinentes minuit : non potest non in parte scirrhusa gravitas sentiri (§. 245.). Q. E. alterum.

§. CCXCII.

Si, postquam Scirrhus est natus (§. 290. 291.), vis vitæ iterum naturalem excedit; scirrhus facile in cancerum, & carcinoma transit. Inflammatio enim in scirrhum non degenerat, nisi absque correctione causæ (§. 290. n. 3.), consequenter non nisi absque correctione obstructionis (§. 273.): quodsi igitur scirrhus est natus, in loco scirrhoso obstructio adest. Verum vis vitæ iterum naturalem excedit (per hypoth.); ergo etiam impetus sanguinis naturali fit major (§. 72. 257.), & margines scirrhi adhuc vivi inflammari debent (§. 273.). Quum igitur scirrhus inflammatus Cancer dicatur; (a) ubi scirrhus nato vis vitæ augetur, scirrhus facile in cancerum transit. Q. E. primum.

Si scirrhus inflammato, vis vitæ aucta manet, vel adhuc major evadit; etiam impetus sanguinis adhuc magis augetur (§. 72. 257.); adeoque inflammatio longe lateque proferpens (§. 275. 279.) obstructionem pariter auget (§. 273.). Enimvero, quum scirrhus materia dura, & compacta infarciatur (§. 290.), quæ maxima ex parte extra territorium circulationis hæret; vasa scirrhusa, rigida facta, obstructionem hanc auctam irresolubilem reddunt: hinc sanguis, contra marginem scirrhi vivum arietans, vascula ejus, integro suo impetu elongata, abscindendo (§. 283. a. §. 286. a.), marginem scirrhi, ex inflammato (n. 1. huj.), partim in sup-
pu-

(a) B. de SWIETEN-Comment. §. 492.

purationem (§. 286.), partim vero (quia hæc suppuratio non fit æquabilis ob inflammationem non simul & semel factam; sed facculus pure plenus (§. 287.), in uno loco factus, vascula vicina comprimendo inflammatur (§. 275.), & dum hæc pars suppurata inflammatur, eodem modo vicina inflammatur, dum interea pus, in loco primum suppurato & clauso (§. 286. α.) hærens, exitum non invenit, sed, & mora, & æstu vasculorum vicinorum inflammatorio (§. 271.) putrescens acris evadit (a) in gangrænosum (§. 283.) convertit: unde

α.) Subtilis fanies generatur (§. 283. ε.); quæ

β.) Apicem integumentorum includentium, per latam plagam lamellatim desquammando attenuat; hinc

γ.) Papillulæ nerveæ, sua cuticula orbatae, nudissimæ fiunt;

δ.) Cancro occulto, foras tendenti, resistentia minuitur;

ε.) Apex integumentorum perumpitur (§. 91. 92.), & labiis ejus, a cancro erumpente retorridis factis, facile

ζ.) Aer externus admittitur, qui faniem (α. huj.) acrem, foetidam, cadaverosam reddendo,

η.) Margines scirrhi inflammatos (n. 1. huj.) exulcerat. Quoniam vero scirrhus exulceratus Carcinoma audit; (b) scirrhus in carcinoma tendit. Q. E. alterum.

SCHOLIUM I.

Quum *Cancer* (§. 292.) Καρκίνος Græcis dicatur, ex hoc, & νέμα depasco, *Carcinoma* derivatur.

Q 3

SCHO-

(a) Ibid. §. 406. (b) Ibid. §. 492. 498. 499.

SECTIO VII. CAPUT III. SCHOLIUM II.

Mala (§. 290. ad 292.) non tantum in folis glandulis, ut vulgo creditur, sed etiam in aliis corporis humani partibus reperiuntur. Ita pulmones scirrhopos vidit ILL. BARO DE SWIETEN, aliique. (a) Quod autem in glandulis ea mala sæpius occurrant, facit difficilis præ aliis partibus per glandulas humorum trajectus, ut docet harum fabrica, & earum a centro motus distantia, habita ratione spatii ab humoribus decurrendi, & servandæ directionis ab hoc centro ad ultima glandulæ vasa, ut loquitur ILL. PRÆSES NOSTER D. MAC-NEVEN. (b)

SCHOLIUM III.

Quum vitia (§. 290. ad 292.) nulla alia ex ratione, quam quæ (schol. 2.) dicta, in glandulis sæpius, frequenter autem etiam in aliis corporis partibus, ubi similis est vasorum dispositio, occurrant; nullus dubitavi, ea mala hoc loco recensere, ob summum, quem cum prægressis (§. 262. ad 287.) habent, nexum.

SCHOLIUM IV.

Multas ex propositionibus (§. 221. ad 292.) olim CL. JUSTUS ARNOLDUS GULICH, ad determinatam morbi speciem adplicavit. (c)

SCHOLIUM V.

Quorum uberiores expositionem propositæ brevitatis ratio forte prohibuit; de his ILL. BARONIS DE SWIETEN Commentaria conferri possunt.



CA-

(a) Comment. §. 843. 484. (b) Dissert. de raro Ventr. casu p. 23. (c) Medit. de furore Hæmorrh. intern.

CAPUT IV.

DE

ANEURYSMATE ET VARICE.

§. CCXCIII.



*S*i una arteriarum membrana (§. 16. 22.) quocumque modo læsa, aut debilitata fuerit, in loco adfecto Aneurysma orietur. Arteriæ sanguine semper plenæ sunt (§. 106.); sanguis autem vi a corde accepta (§. 65.) cum impetu per eas movetur (§. 72.), & arterias dilatat (§. 110.); sed huic dilationi resistunt parietes arteriarum in ratione densitatis suæ (§. 23.); quum igitur resistantia hæc, ut vis, vi cordis directe opposita, concipi possit (§. 91.), & sanguis moveatur in ratione inversa resistantiæ (§. 93.); erit etiam motus sanguinis in arteriarum parietes in ratione inversa densitatis horum parietum; hinc eo majori impetu ruet sanguis in parietes illos (§. 92.), eosque, cum flexiles sint (§. 14.), eo magis dilatabit, quo ipsi minus densi fuerint. Sed parietum densitas a numero, & densitate membranarum pendet (§. 16. 22. 23. 25.), & una harum læsa est, aut debilitata (per hypoth.); ergo hujus membranæ resistantia in hoc loco aut nulla est, aut minor; hinc & arteria in hoc loco minus resistit, quam in reliquis locis. Quare major erit vis cordis versus eum locum (§. 92.), & quum fluidum pressum æquabiliter diffluat, eam partem versus, ubi minus resistitur (demonst. §. 262.); sanguis majori impetu (§. 72.) in hunc locum feretur, eumque

que dilatabit (§. 110.). Sed dilatatio arteriæ præternaturalis in quadam ejus parte Aneurysma (*a*) dicitur; proinde sub hypothefi theorematis Aneurysma nascetur.

SCHOLIUM I.

Ab ἀνευρύω dilato denominatur.

SCHOLIUM II.

In *verum*, & *spurium* distingui solet. *Verum* (§. 293.) descriptum est. *Spurium* habetur, quoties membranæ (§. 16. 22.) in continuitate sua solvuntur, & humorem retinendum in fabricam cellulofam emittunt, unde tumor, sic dictus, nascitur (*b*); hinc ad Ecchymosin (§. 201.) refertur. De priori (§. 293.) hinc tantum agimus.

§. CCXCIV.

COROLLARIUM.

Ergo in qualibet arteria, hinc in omni corporis loco aneurysma (§. 293.) nasci potest.

SCHOLIUM I.

Loca præcipua, ubi aneurysmata reperta fuerunt, enumerat ILL. de HAEN. (*c*)

SCHOLIUM II.

Aneurysma quandoque duplex adparet, cum vere unicum est; & his intus, veluti per insulas difformes, osseum ILL. VIR reperit. (*d*)

§. CCXCV.

Aneurysma natum (§. 293.) in ingentem molem excre-
scere potest. Aneurysma natum sanguinem in sinum suum recipit (§. 293.), & vim cordis majorem experitur; ergo,
quum

(*a*) B. de SWIETEN Comment. §. 112. (*b*) Ibid. §. 178. (*c*) Rat. Méd. T. IV. p. 9. & seqq. (*d*) Ibid. p. 14. & seq.

quum membranæ in hoc loco sint debiliores (per hypoth.), extenduntur (§. 179. n. 1.); fibra autem diu tensa, magis continuo debilitatur (§. 288.), & hinc humores magis attrahit (§. 289.); ergo etiam aneurysma continuo magis debilitatur, & majorem sanguinis copiam recipit; igitur magis dilatatur.

SCHOLIUM.

Non semper pro ratione molis in aneurysmate membranæ extenuantur; sed aliquando crassiores, aliquando lamellatim dispositæ deprehenduntur. Sanguis enim polypofus tunicis his sese adplicare, & earum crassitiem augere potest; ipsæ etiam arteriarum tunicæ ab invicem lamellatim secedere, & sanguinem compactum recipere possunt. (a) Hinc etiam color cutis externæ in aneurysmate raro mutatur. (b)

§. CCXCVI.

Pulsus in aneurysmate parvo, & incipiente, semper adest.
In aneurysmate membranarum fibræ tenduntur (§. 293. 295.), & vis cordis in illud major est (§. 293), atque præterea, quum in arteria notabiliore deprehendatur, vis cordis acceleratrix eo pervenit (§. 114.). Ergo fibræ tensæ ad quemvis cordis ictum tenduntur magis, hinc dilatantur, & vi cordis cessante, elasticitate sua se contrahunt; ergo pulsum habent (§. 113.).

SCHOLIUM I.

In majoribus aneurysmatibus is pulsus (§. 296.) sæpe abest, sive ob tunicarum crassitiem (§. 295. in schol.); sive ob nimiam molem suam, quæ vires cordis debilitat; sive demum ob sanguinem in aneurysmate grumosum, a quo pulsus suffocatur. (c)

TOM. I.

R

Scho-

(a) Rat. Med. T. IV. p. 21. & seq. (b) B. de SWIETEN Comment. §. 176.

(c) de HAEN l. c. p. 22. & seq.

SCHOLIUM II.

Communiter hoc pulsu (§. 296.) aneurysmata ab aliis tumoribus distinguuntur. Verum an hoc solo signo uti tuto licet? haud videtur (schol. I.)

SCHOLIUM III.

Aneurysma saepe ita loco mutari potest, ut in antiqua sede ultra non inveniatur. Exemplum habet ILL. de HAEN (a); & mutationis hujus rationem esse credit, quod aneurysma magnum, & ponderosum, dum in parte averfa ponderis forsitan augmentum fit, eo versus tota mole propendeat, antiquæ sedis ligamenta elonget, eamque vacuum relinquat. (b)

SCHOLIUM IV.

In aneurysmate explorans digitus tremorem percipit, & si aliquantum continuatur, ingratus est, major in alio, in alio minor; præcipue autem in aneurysmate brachii talis tremor sentitur (c). Causam hujus phainomeni esse suspicatur ILL. CLINICUS, quod, cum aneurysma immediate, firmissime, & calli veluti ope cum arteriæ corpore sit coadunatum, utique motu arteriæ in contractione, & dilatatione efficiatur, sed cum obsequiosum præ duritie non sit, fortassis ideo tantummodo tremit, non autem manifeste expandatur, contrahaturque: jamque novus sanguis assiduo ex arteria in hoc cavum impulsus, & a tremente hoc operculo repulsus, videatur quoque hinc tremorem augere. Binæ enim causæ continuo agitant hoc corpus superpositum, quod sua duritie non nisi levissime reagere, agique possit. (d) Unde autem, aliquantum continuatus, hic tremor ingratus evadat, haud perspicio; nisi a membranarum callositate is proveniat, ex quo motus ingratus in stuporem abeuns nascitur. (e)

§. CCXCVII.

Quo aneurysma majus est, eo sanguis in illo facilius grumescit, & propriam indolem sequitur. Quo enim aneurys-

ma

(a) Ibid. p. 15. & seq. (b) Ibid. p. 23. & seq. (c) Ibid. p. 26. (d) Rat. Med. T. IV. p. 57. (e) BOERH. Instit. §. 484.

ma majus est, eo cavitatem habet ampliorem (§. 293.); hinc eo magis sanguinis celeritas in eo minuitur (demonst. §. 67.); neque ob debilitatem (§. 293.) reagere potest in sanguinem aneurysma; ergo motus sanguinis in hoc loco lentior est, & fere nullus, si aneurysma nimis sit magnum. Sed motu diminuto, aut cessante sanguis grumescit (§. 127.); proinde, quo aneurysma majus est, eo sanguis facilius grumescit. Q. E. primum.

Porro sanguis ad naturam urinosam pronus est (§. 134.) & solo fere motu a putredine defenditur (§. 133.). Sed in aneurysmate is motus minuitur, aut cessat (n. 1. huj.), & præterea adest calor putredinem adjuvans; ergo sanguis putrescit. Q. E. alterum.

§. CCXCVIII.

Quoniam vero venæ æque suas membranas habent (§. 36.), ut arteriæ; & sanguis etiam latera earum valide premit (§. 163.); eadem ratione, si membranarum aliqua debilitata, aut læsa fuerit, tumor similis illi (§. 293.) in venis nascetur. Sed talis tumor venosus Varix, seu Ramex dicitur. (a) Ergo si in venis membrana aliqua debilitata aut læsa fuerit, Varices nascuntur.

SCHOLIUM I.

Varix (§. 298.) Græcis Κίρσος, aut ἰξία HIPPOCRATI dicitur.

SCHOLIUM II.

Quum venæ arteriis sint tenuiores (§. 33.), & magis gravitet sanguis earum (§. 149), facilius, quam arteriæ, similibus tumoribus (§. 298.) adficiuntur. Immo, quoties levi tantum obstaculo motus sanguinis venosi impeditur, ut v. g. ab utero in gravidis venas Iliacas comprimente, venæ varicosæ fieri possunt.

R 2

§. CCXCIX.

(a) B. de SWIETEN Comment. §. 112.

§. CCXCIX.

Quum omnia ossa corporis nostri quondam mollia fuerint, & membranacea; (a) atque solo fere partium vicinarum in ea motu condensante, callosa primum facta, tum demum indurata, observentur, ut alibi patebit; arteriarum autem membranæ dicto modo densentur, idque naturaliter in omni arteria, & ubique (§. 136.), præternaturaliter vero in aliqua arteriæ parte magis, in alia minus, fieri possit, ut consideranti adparet; liquet *Arterias vitium oppositum* (§. 293.) *incurrere, nempe, sive naturaliter in senio, sive præternaturaliter in quacunque ætate, callosas, aut plane ossas reddi posse.*

§. CCC.

Quoniam demum sanguis noster movetur in ratione inversa resistantiarum (§. 93.), arteriæ vero osseæ (§. 299.) cæteris paribus, resistunt infinite, & insuper magis, quam rigidæ (§. 189.) cordis depletionem impediunt; sequitur, quodsi magna arteriarum pars circa cor ossea fuerit, motum sanguinis ibi esse nullum; sed motus sanguinis sublatus mors est; ergo *mortis pure senilis ratio elucescit.*


SCHOLIUM.

Hanc *mortis naturalis* theoriam (§. 300.) impugnat ILL. HALLERUS.

(b) At meminerit CL. VIR arteriarum densationem (§. 136.) mox a se admissam fuisse (c), atque cellulosam telam, per quam majorum arteriarum vascula distribui, recte adferit, in hac ætate, ac constitutione, ut in toto reliquo corpore, consumi plurimum, & obliterari.

(a) B. de SWIETEN Comment. §. 512. (b) Elem. Physiol, T. II. p. 237.
(c) Ibid. p. 236. & seq.





WENCESLAI JOAN. NEPOM.
LANGSVERT,
PHILOSOPHIÆ ET MEDICINÆ DOCTORIS.
THEORIA MEDICA,
DE
VASORUM LYMPHATICORUM,
HUMORUM SECRETIONIS,
TELÆ CELLULOSÆ,
ET
TEMPERAMENTORUM,
IN
CORPORE HUMANO
ADFECTIONIBUS.
TOMUS SECUNDUS.



VETERO-PRAGAE,
EX OFFICINA IOANNIS IOS. CLAUSER, REGII TYPOGRAPHI.

Sine profunda Mechanices scientia nil veri vos
intellecturos, nil boni prolaturus aliis, uta-
mini quolibet adminiculo, audacter affirmo.

*Boerhaav. in Orat. de Ufu Ratioc.
Mechan. in Medic.*

SACRÆ CÆSAREÆ, REGIÆ,
APOSTOLICÆ
MAJESTATI,
MARIAE THERESIAE,
AUGUSTISSIMÆ ROMANORUM
IMPERATRICI,
HUNGARIÆ, BOHEMIÆ, DALMATIÆ,
CROATIAE, SCLAVONIAE, &c. &c.
REGINÆ,
ARCHIDUCI AUSTRIÆ,
&c. &c.
DOMINÆ DOMINÆ
CLEMENTISSIMÆ.

WENCESLAUS LANGSVERT.

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

AUGUSTISSIMA
ROMANORUM IMPERATRIX
REGINA APOSTOLICA.



*Si, quam gratioſo Vultu, quam
inſigni Clementia, priorem
laboris mei, SACRATIS-
SIMO NOMINI TUO devotiſſime
inſcripti, partem ſuſceperis AUGU-
STISSIMA IMPERATRIX, ver-
bis hoc loco enarrare contenderem; rem
ſane & inutilem, & viribus meis longe
ſuperiorem in me eſſem ſuſcepturus: pro-
pterea, quod TUUS in hominum littera-*

torum genus , & scientiarum studia tantus sit Amor; ut ignorari a mortalium nullo, a nullo etiam e condigno possit celebrari.

Cujus equidem Materni Amoris TUI orbi universo illustre exemplum jam dudum, ut alios innumeros præteream, in ARCHIATRO TUO BARONE de SWIETEN exhibuisti; quem ideo summis apud TE honoribus donasti, quia
di-

*diligis : ideo diligis, quia sapientem esse
adgnoscis.*

*Quapropter ineffabilem CLEMEN-
TIAM TUAM, DOMINA AU-
GUSTISSIMA, qua me, & levidense
conamen meum, suscepisti, non inani
verborum significatione, sed alacritate po-
tius majori, qua ad alterum huncce to-
mum accessi, contestari adlaborabam.
Quem dum ad SACRATISSIMÆ
MA-*

MAJESTATIS TUÆ *pedes iterum
reverentissime depono , & mihi gratiam,
& labori meo præsidium , e Materno
Sinu TUO devotissime
polliceor.*

PRÆ-



PRAEFATIO.



Quum Arteriarum, & Venarum in corpore humano adfectiones eæ fuerint, quæ animum meum in sui contemplationem omnium primum abripuere;^(a) haud aliam mihi reddendam esse rationem existimo; quod, ad eam vasorum historiam continuandam, Lymphatica Vasa, hoc altero Tomo, prima exponere sim adgressus. Enim vero ad horum pertractationem pars haud exigua eorum, quæ de rubris dicta sunt, est necessaria; quare oportuniori loco eadem recenseri posse, omnino mihi visum non fuerat.

b

Eo-

(a) Praefat. T. I. p. 2.

Eodem jure humorum e sanguine nostro secretion-
tiones huc referendas arbitrabar; in hac enim
Physiologiæ parte, hodiedum obscura adeo, quid-
quid firmi sperari potest, ex vasorum organa secre-
toria constituentium, & humorum ad hæc delato-
rum, indole est petendum.

Deinde ad Telæ Cellulosæ enarrationem pro-
gredi, nullus dubitaveram, ubi de solidorum no-
strorum elementis pauca addidi; Temperamento-
rum denique doctrinam subjeci, quod hæc ab hu-
moribus, & solidis, hucusque recensitis, pendeat
adeo, ut ex iis intelligi facile possit.

Ex quibus simul manifestum esse reor, ordi-
nem, quem sequutus sum, satis sibi cohærere; ta-
meti rigorem geometricum nusquam sustineat,
qualem quidem a Geometra, non Physiologo, po-
stulaveris.

Methodum eandem, quam priori Tomo sum
amplexus, retinui; unicum tamen monendum esse
pu-

putavi: nempe, quod in descriptionibus Anatomicis, & experimentis, tam physicis, quam practicis, citandis, duobus potissimum fontibus usus fuerim.

Primus eorum est ILLUSTRISSIMUS ARCHIATRO-
RUM CÆSAREORUM COMES BARO
de SWIETEN, VIR ad Artis incrementa natus, ex
QUO, quidquid ad morborum cognitionem, cu-
rationemque, est necessarium, uberrime hauriri
potest. Hoc DUCE potissimum morbosas corpo-
ris adfectiones enarrare contendo; Cui vitam,
felicitatemque, & ego, & mecum omnes boni,
precamur.

Alter est ILL. BERNENSIVM DUCENTVM VIR
ALBERTVS V. HALLER, VIR pariter de Re Medi-
ca optime meritus, in CUIVS Physiologiæ Ele-
mentis, præter descriptiones Anatomicas adcura-
tissimas, omnes fere de singulis hujus scientiæ ca-
pitibus Auctorum, qui ad dimidium hujus sæculi, &
ultra extitere, opiniones, summo labore, & non
minori industria, expositas, est videre,

Prætereo alios, tam in disciplinis Philosophicis, quam Medicis claros, & omni laude dignissimos Viros; quoniam, non Auctorum omnium, quos citavi, seriem, sed eorum binos tantum hic proponere constitui.

His itaque binis in citando plurimum usus sum; qua citandi ratione, & Lectoris utilitati, quia Auctores sunt optimi, & commoditati, quia pauci, consultum iri confidenter existimavi. Dabam

Pragæ Bohemorum in Musæo meo XIV.

Calend. April. Anno salutis
MDCCLXIV.





INDEX GENERALIS CAPITUM.

SECTIO VIII. De Fabrica Vasorum Lymphaticorum.

CAPUT I. De Vasis Lymphaticis in genere.

II. De Venarum Lymphaticarum Natura.

III. De Arteriarum Lymphaticarum Natura.

SECTIO IX. De Humoribus in Vasis Lymphaticis contentis.

CAPUT I. De Proprietatibus Seri, & Lymphæ generalibus.

II. De Seri, & Lymphæ differentia.

SECTIO X. De Vasorum Lymphaticorum Actione.

CAPUT I. De Arteriarum Lymphaticarum Actione.

II. De Venarum Lymphaticarum Actione.

SECTIO XI. De Morbis Vasorum Lymphaticorum.

CAPUT I. De Morbis Lymphaticorum ratione partis
solidæ.

II. De Morbis Lymphaticorum ratione partis
fluidæ.

III. De Morbis Lymphaticorum compositis.

SECTIO XII. De Humoribus e sanguine secretis.

CAPUT I. De Secretione in genere.

II. De Natura Humorum Secretorum.

CAPUT III. De Fabrica Organorum Secernentium.

SECTIO XIII. De Causis Secretionis Humorum e Sanguine.

CAPUT I. De Causis mutantibus Humores, antequam
ad organa secretoria deferantur.

II. De Causis mutantibus Humores in Organis secretoriis.

III. De Causis mutantibus Humores secretionem
facta.

SECTIO XIV. De Secretionibus Morbosis.

CAPUT I. De Secretione læsa in genere.

II.

II. De Sécrationibus Morbosis ratione partis
solidæ.

III. De Secretionibus Morbosis ratione partis
fluidæ.

IV. De Morbis Secretionum Compositis.

SECTIO XV. De Tela Cellulosa.

CAPUT I. De Fabrica Telæ Cellulosæ.

II. De Natura Pinguedinis.

III. De Pinguedinis Secretione.

IV. De Actione Telæ Cellulosæ.

SECTIO XVI. De Morbis Telæ Cellulosæ.

CAPUT I. De Morbis Telæ Cellulosæ ratione partis
solidæ.

II. De Morbis Telæ Cellulosæ ratione partis
fluidæ.

III. De Morbis Telæ Cellulosæ Compositis.

SEC-

SECTIO XVII. De Temperamentis.

- CAPUT I. De Temperamentis in genere.
II. De Temperamento Sanguineo.
III. De Temperamento Phlegmatico.
IV. De Temperamento Cholerico.
V. De Temperamento Melancholico.

E R R A T A.

Pag.	lin.	penult.	fit	lege	fic.
18	17		n ailliud		nil aliud
24	6		glundulas		glandulas
--	7		cam		eam
51	29		§. 352.		§. 252.



SEC-



SECTIO VIII.
DE
FABRICA VASORUM LYMPHATICORUM.
CAPUT I.
DE
VASIS LYMPHATICIS IN GENERE.

§. CCCI.



Canales, (§. 5.) qui liquores a sanguine rubro (§. 8.) alienos vehunt, sunt 1) *vasa serosa*, 2) *lymphatica*, 3) *nervea*, 4) *inter has series* (n. 2. 3. huj.) *media*, 5) *ductus viscerum excretorii*.

SCHOLIUM I.

Duas priores series (§. 301. n. 1. 2.) hic examinabimus; reliquas (ibid. n. 3. 5.) alibi pertractaturi: illa vero, quæ (ibid. n. 4.) memorantur, quum sola ratione hucusque adsequamur, nec oculis subicere ulla ars potuerit; nemo etiam ulteriori indagini exponere valet; fors ventura ætas plura docebit.

SECTIO VIII. CAPUT I.

SCHOLIUM II.

Quum *vasa serosa*, & *lymphatica* (§. 301. n. 1. 2.) sola fere magnitudine, & liquore, quem vehunt, inter se differant; ea sub communi *lymphaticorum* nomine, plerumque simul pertractare haud displicet.

§. CCCII.

Pars flavescens & aquosa sanguinis *serum* dicitur.

§. CCCIII.

Idem serum (§. 302.) aliquando modico rubore tinctum, alias omnino pellucidum, *Lympha* adpellatur.

§. CCCIV.

Vasa lymphatica (§. 301. n. 1. 2.) in sanitate serum, (§. 302.) & lympham (§. 303.) continent, quæ per eadem jugiter moventur. Demonstratur ut (§. 9. 10.).

§. CCCV.

Vasa lymphatica in sanitate globulos sanguinis rubros non admittunt. Vasa lymphatica in sanitate lumina diametro globuli sanguinei rubri minora habent, ut docet microscopium, & injectiones; ergo globulos sanguinis rubros non admittunt.

SCHOLIUM I.

Quoties vasa lymphatica in morbis diametro augentur (§. 194. n. 1.), sanguinem admittunt,

SCHOLIUM II.

Proportio inter globulos sanguinis, feri, & lymphæ (§. 56. in Schol. 1.) dicta est.

§. CCCVI.

Vasa lymphatica pellucida sunt. Partes minimæ cujusunque corporis pellucidæ sunt; ^(a) sed vasa lymphatica sunt in-

(a) S' GRAVESANDE Elem. Phys. Math. n. 3443. & seq.

inter ea corporis nostri vasa, quæ oculis, & arte anatomica conspici possunt, minima; ergo pellucida sunt.

SCHOLIUM I.

Pelluciditatem hanc (§. 306.) a posteriori docet Anatome. (a) Quandoque rubella adparent, a lymphæ (§. 303.) rubella transparente.

SCHOLIUM II.

Vasa lymphatica alia esse *venosa*, alia *arteriosa*, ex eorum proprietatibus mox sequuturis deducetur; unde hanc eorum divisionem interea supponere licet.

SCHOLIUM III.


Quum autem ordo doctrinæ nos jubeat ab iis incipere, quæ cognitu facillima sunt; faciliora vero sint, quæ oculis subjici possunt; patet vasa lymphatica *venosa* prius, quam *arteriosa* (Schol. præc.) esse examinanda.

CAPUT II.

DE

VENARUM LYMPHATICARUM NATURA.

§. CCCVII.

 *Vasa*, quæ ab Anatomicis sub nomine lymphaticorum demonstrantur, oriuntur, 1) ex arteriis, 2) ex venis, 3) ex ductibus viscerum excretoriis, 4) ex tela cellulosa, 5) ex caveis corporis tum majoribus, cum minoribus, 6) ex arteriis decoloribus. Ligaturæ, injectiones, microscopia, morbi has origines detegunt.

SCHOLIUM I.

Vasa lymphatica a minimis, & inconspicuis glandulis derivat MALFIGIUS. (b) Sed numerosissima vasa lymphatica reperiuntur, ubi nulla

A 2

gland.

(a) HALZER, Elem. Physiol. T. I. p. 156. (b) de gland. conglobat. p. 4.

SECTIO VIII. CAPUT II.

glandularum conglobatarum adest suspicio, ut in manu, pede, pulmone, &c. Neque vasorum lymphaticorum repletio, per arterias, ullis intercipitur nodulis, quales ex materie folliculos glandulosos replente nasci deberent. Vasa denique lymphatica, quæ in glandulis conglobatis reperiuntur; ex iis non oriri, sed prius nata, eas glandulas solum adire injectionis artificium demonstrat.

SCHOLIUM II.

Vasorum lymphaticorum origines (§. 307.), & decursus, fuse describit ILL. HALLERUS. (a) Inventi autem gloriam tribuit RUDBEKIO. (b)

§. CCCVIII.

Ex his originibus (§. 307.) sensim in ramos majores colliguntur, in hoc itinere eorum, si non omnia, certe plurima, glandulas conglobatas adeunt, inde ad ductum thoracicum deducuntur. Docet Anatome.

SCHOLIUM I.

Quum glandularum historia ad secretionem referri soleat, de harum fabrica alibi dicendum erit.

SCHOLIUM II.

Inter Anatomicos nondum determinatum est, num vasa lymphatica omnia ad ductum chyli feruntur; an vero eorum aliqua venis rubris se immittant; nos cum BOERHAAVIO, (c) & HALLERO (d) priorem partem sustinemus, donec futura ætas aliud docuerit.

§. CCCIX.

In vasis (§. 307. 308.) descriptis liquor (§. 302. 303.) ex ramis in truncos, ex his in ductum thoracicum, inde ad sanguinem, & cor movetur. Ligaturæ, & injectiones hoc iter ostendunt.

SCHO-

(a) Elem. l. c. p. 170. & seqq. (b) Ibid. p. 162. & seqq. (c) Prælect. Acad. T. I. ad §. 129. (d) Elem. l. c. p. 179.

SCHOLIUM.

Experimenta id (§. 309.) evincentia refert HALLERUS. (a)

§. CCCX.

Omnia vasa, quæ ab Anatomicis sub nomine lymphaticorum demonstrantur, venosa sunt. Quoniam vasa hæc ab Anatomicis demonstrantur (per hypoth.), oculis conspicua redduntur; sed omnia vasa, quæ ab Anatomicis oculis conspicua redduntur, origines, decursus, & fines habent descriptos (§. 307. 308.), & in iis liquor ex ramis in truncos, ex his in ductum thoracicum, inde ad sanguinem, & cor movetur; consequenter a corporis extremitatibus ad cor reducitur; quum igitur canales, qui liquorem ab extremitatibus ad cor reducunt, Venæ hodie omnibus dicantur (§. 7.), patet dicta vasa omnia venosa esse.

SCHOLIUM.

Vasa lymphatica arteriosa etiam dari (§. 306. in Schol. 2.) supposuimus; ast ea ratione sola adsequi, nec oculis in statu sano subicere possumus; ut infra patebit.

§. CCCXI.

Vasa hæc (§. 310.) quoad fabricam, rubris sunt tenuiora; sed tamen satis firma. Experimenta docent vasa lymphatica majorem luminis rationem ad partem solidam dicere, quam vasa rubra; consequenter (demonst. §. 33.) lymphatica rubris tenuiora sunt. Q. E. primum.

Firmitas est in ratione cohæsionis (demonst. §. 23. n. 2.); sed vasa lymphatica satis valide cohærent; quum impetum vehementem Anatomici per siphonem, argentum

A 3

vi-

(a) l. c. p. 251. & seqq.

vivum, febum, ceramque, sanguine nempe & crassiores liquores & ponderosiores, toto conatu suorum muscutorum, pondereque innitentis corporis urgentis, facile & absque ruptura ferant; proinde satis firma sunt. Q. E. alterum.

§. CCCXII.

Vasa lymphatica canales sunt teretes, & flexiles; idque magis ob tenuitatem majorem (§. 311.), quam vasa rubra. Demonstratur ut (§. 12. 14.).

§. CCCXIII.

COROLLARIUM.

Hinc etiam proprietates venarum (§. 37. 38. 39.) recensitæ iis conveniunt.

§. CCCXIV.

Vasorum lymphaticorum membranæ similes sunt membranis venarum rubrarum. Docet Anatome.

SCHOLIUM.

Tunicam cellulosam BILSIUS, musculosam NUCKIUS descripsit. (a)

§. CCCXV.

Vasa lymphatica minus contractilia, minusque elastica, rubris sunt. Demonstratur ut (§. 40. 41.).

SCHOLIUM I.

Ob contractilitatem suam (§. 315.) tam cito a morte visui se subducunt.

SCHOLIUM II.

Irritabilitatem iisdem tribuit HALLERUS; (b) sed de hac fusius infra.

§. CCCXVI.

(a) HALLER. Elem. 1. c. p. 164. (b) Ibid. p. 165. & seq.

§. CCCXVI.

Vasa lymphatica copiosas valvulas habent. Has docet Anatome.

§. CCCXVII.

Valvulae (§. 316.) in sanitate fluido per vasa moto regressum denegant. Id ostendunt injectiones.

§. CCCXVIII.

Vasa lymphatica non habent ubique eandem firmitatem. Firmitas est in ratione cohæsionis (demonst. §. 23. n. 2.), & hæc in ratione densitatis (Ibid.); sed parietum densitas, cæteris paribus, a membranarum eos constituentium numero pendet (demonst. §. 293.); ergo & firmitas. Quoniam igitur valvulae (§. 316.) lymphaticorum pro membranis haberi possunt, quæ internæ parietum superficiei additæ sunt, sequitur vasa lymphatica in locis, ubi valvulae reperiuntur, esse firmiora; proinde non ubique eandem firmitatem habent.

SCHOLIUM.

Cohæsiones in ratione superficierum esse (demonst. §. 15. n. 1.) adsumsi. Quæ lex experimentis satis evicta est; tabulae enim duæ vitreae, quo magis politæ fuerint, eo magis sibi cohærebunt. Globuli duo plumbei, abrasis paululum superficierum ita, ut duas habeamus superficies, exiguas, planas, bene nitidas, sibi invicem secundum eas superficies adplicati, arcte cohærent, idque eo magis, quo plurium particularum datur contactus mutuus. (a) Habet se igitur plerumque cohæsio *in ratione punctorum contactus*. Ex quo sequitur, corpora ea sibi cohærere firmitus, quæ densiora, & hinc aliis specificè graviora sunt. Lex hæc, etsi in multis corporibus naturalibus locum habeat, sæpe tamen exceptionem patitur. Ita,

licet

(a) s' GRAVESANDE l. c. n. 81.

SECTIO VIII. CAPUT II.

licet plumbum ferro, aurum adamante, specificè gravius, & hinc densius sit; tamen partes plumbi & auri minus, quam illæ ferri & adamantis inter se cohærent. Unde rectius ex Lege Virium CL. ROGERII BOSCOVICH determinatur, *cohæsiones esse in ratione inclinationis, & recessus arcuum ab axe.* (a) Quum vero hæc lex non nisi iis, qui disciplinis Philosophicis majorem operam navant, hætenus nota sit; veniam facile impetrabo, quod lege priori, utpote nota magis, in pertractione mea hucusque usus fuerim, & porro utar, quamdiu rei exponendæ necessitas alteram non postulat. Eadem de causa inter contactum *adparentem*, seu *physicum*, & *immediatum*, seu *mathematicum*, etsi priorem in rerum natura dari tantum credam, nullam mentionem hic feci; quæ præterea Philosophi, non Medici, contemplationem sibi deprecant. Conferri de his meretur Laudatus BOSCOVICHUS, CL. STEPLING (b), & nuper DOCTIS. DIESBACH. (c)

§. CCCXIX.

COROLLARIUM.

Quum vasis resistantia sit in ratione densitatis, & hinc firmitatis parietum (demonst. §. 23. n. 2.); evidens est (demonst. §. 318.): *Vasa lymphatica dilatationi suæ magis resistere in iis locis, ubi valvulæ reperiuntur.*

§. CCCXX.

Vasa lymphatica nodosa sunt, ita tamen, ut nodi versus corporis extremitates sint latiores, quam versus ductum thoracicum. Vasa lymphatica dilatationi suæ magis resistunt in sedibus valvularum (§. 319.); sed lumina vasorum sunt in ratione composita, ex directâ virium distendentium, & inversa resistantium (§. 18. in Schol. 1.); ergo lumina lymphaticorum majora erunt, ubi valvulæ defunt: minora, ubi re-

(a) DIESBACH. c S. J. Expos. system. BOSCOVICH. N. 53. (b) Miscell. Philosoph. Anni 1759. p. 41. & seqq. (c) l. c. N. 57. & seqq.

reperiuntur. Quoniam igitur valvulæ reperiuntur copiosæ (§. 316.), sæpius lumina lymphaticorum jam augebuntur, jam minuentur, seu internodia efficient; hinc nodos repræsentabunt. Q. E. primum.

Quum valvulæ in sanitate fluido regressum denegent (§. 317.), pars vasis lymphatici, inter binas valvulas intercepta, pro folliculo solitario concipi potest, qui in parte versus corporis extremitates clausus (demonst. §. 317.), in parte vero versus thoracicum ductum minori ostio (demonst. n. 1. huj.) patens est. Is ergo folliculus, si undique æqualiter resisteret, a fluido contento in sphærulam expandere-
tur (§. 18. in Schol. 1.); sed non resistit ubique æqualiter, nam versus thoracicum ductum patet (per demonst.), & in lateribus à pondere partium adjacentium, puta muscutorum, adipis, &c. comprimitur, ac præterea a fibris telæ cellulossæ ad vicinas partes revincitur, ut docet Anatome; ergo in sphæram extendi nequit, sed ad figuram ovalem aliquantum accedit. Quia vero vasa hæc venæ sunt (§. 310.), in venis autem liquor magis gravitat (§. 149.), etiam fluidum cavum hoc versus corporis extremitates, præsertim cum ibi pro clauso haberi possit (per demonst.) magis distendit; hinc nodus versus corporis extremitates latior est. Q. E. alterum.

SCHOLIUM I.

Eam vasorum lymphaticorum figuram optimi Anatomici invenerunt.

(Fig. 1.)

Fig. 1.

SCHOLIUM II.

Commode simul ac utiliter huic veritati (§. 320.) adplicari potest sequens theoria BERNOULLII: (a) Vidimus (§. 18. in Schol. 1.) filum,

TOMUS II.

B

quod

(a) De Motu Muscul, n. II.

quod in omnibus suis punctis tenditur ad perpendicularum a viribus æqualibus, curvari in circulum; unde concludimus *cava lymphaticorum* (demonst. §. 320. n. 2.), quorum latera utique æqualiter, in omnibus suis punctis premuntur ad perpendicularum a *fluido contento*, esse circularia; ita ut si *vas lymphaticum* nullam resistantiam superandam haberet, *cava hæc* in perfectos, & integros circulos perexiguos expanderentur; sed quia *vas lymphaticum* semper pondera, & resistantias, *partium adjacentium*, & *vinculorum cellulosorum* (demonst. §. 320. n. 2.) submovere debet, fit ut *cava* non integram adipiscantur figuram circularem; resistantia enim impedit, quo minus in longitudine se satis contrahere possint, non secus, ac fieri solet cum istis ampullis, quas infantes ex lotura saponis ob æquabilem aeris expansi vim elasticam in perfectam sphaeram intumescunt; sed cum interdum guttula in fundo ampullæ adhæret, tunc ob gravitatem guttullæ ampulla tantillum elongatur, & ex sphaera mutatur in sphaeroidem ex circumvolutione segmenti circularis factam: pariter itaque *cava lymphaticorum* habebunt figuram ex duobus segmentis æqualibus ejusdem circuli compositam, ut monstrat (Fig. 2.); ex his pluribus cavis in longitudinem similiter instar annulorum catenæ positis, formari ponimus *vas lymphaticum*, ceu ostendit (Fig. 3.), ubi *valvula vasis arctationes efficiunt* (demonst. §. 320. n. 1.). Quia demum in segmento, quod corporis extremitates respicit, vis distendens augetur (demonst. §. 320. n. 2.), superat illa majori gradu vires resistentes, & hinc *cava* versus eas extremitates latiora fiunt (Fig. 1.)

SCHOLIUM III.

His ita se habentibus invenire licebit, cum eodem BERNOULLIO, vires dilatatrices *cava lymphaticorum*, modo prius supputaverimus rationem inter vim dilatantem, & resistantias, seu quanta requiratur vis *fluidi contenti* pro singulis elevationibus resistantiarum semper æqualium. (a) Sit itaque *cavum vasis lymphatici* BEAD (Fig. 4.) compositum ex duobus segmentis circularibus BDA, & BEA; & C centrum arcus AEB, ductisque

(a) Ibid, n. 12.

que radiis CA, EC, ille ad extremitatem, hic per medium *cavi*, ita ut DE sit latitudo maxima, quam bifariam secat in R longitudo maxima AB, seu chorda arcus AEB, vel ADB; quoniam nunc angulus EAC = recto = RAC + ACR, erit angulus EAR = ACR, ideoque arcus AE est mensura anguli EAR, vel duplus BEA mensura dupli anguli EAD: hinc datis semilongitudine lateris *cavi*, id est arcus AE in partibus aequalibus 100000, & semiangulo dilatationis EAR, inveniri potest elevatio resisten-
 tia, quæ nempe est æqualis excessui, quo arcus AEB superat suam chor-
 dam AB, vel duplo excessui, quo arcus AE superat suum sinum rectum:
 AR; quod itaque peragitur. Fiat ut peripheria circuli ad radium, id est
 ut 44 ad 7. ita numerus graduum peripheriæ 360 ad quantum $57\frac{5}{11}$, qui
 erit æqualis longitudini radii in gradibus: facto nunc ut numerus gra-
 duum anguli AER, vel arcus EA ad $57\frac{5}{11}$ ita numerus partium æqualium
 100000 longitudinis arcus EA ad quantum, qui erit æqualis numero par-
 tium æqualium ipsius AR, qualium arcus EA continet 100000; duplus
 itaque excessus arcus AE supra sinum AR inventum erit elevatio resisten-
 tiæ quæsitæ. Q. E. I. Hæc inventa vires dilatatrices singulis illis respon-
 dentes ita determinabimus: (a) supra (§. 18. in Schol. I.) posuimus po-
 tentiam curvam in quolibet puncto, vel potius in qualibet differenti cur-
 væ ad perpendicularum prementem = nds: vis itaque dilatans, vel *fluidi*
contenti absoluta, qua latera *cavi* dilatantur, exprimitur per n, sed ibi-
 dem invenimus, ponendo vim sustinentem, vel firmitatis in quolibet fili
 puncto requisitæ = a, radium arcus circuli, in quem filum incurvatur,
 fore = $\frac{1}{n} a$. Quia vero per prop. modo allegatam (§. 18. in Schol. I.)
 CL. VARIGNONII resistentia v. g. z. est ad vim sustinentem in B, cujus
 utique directio est ipsa tangens BF, ut sinus anguli EBD ad sinum anguli
 EBR, erit.

$$a = \frac{ZM \sin. EBR,}{\sin. EBD}$$

Et sit substituto in quantitate $\frac{1}{n} a$ loco a ejus vicario, habebitur radius
 (per modum supra propositum inventus, quem itaque vocemus r)

$$r = \frac{ZM \text{ fin. EBR,}}{\text{fin. EBD}}$$

Ideoque vis absoluta *fluidi distendentis*

$$n = \frac{ZM \text{ fin. EBR:}}{rM \text{ fin. EBD}}$$

ac propterea vis, qua premitur semilatus *cavi*, id est, erit

$$NAE = \frac{100000 ZM \text{ fin. EBR.}}{rM \text{ fin. EBD}}$$

Quoniam demum vis gravitatis etiam accedit (demonst. §. 320. n. 2.); hæc autem crescit in ratione altitudinis, fluidum premet cavum suum eo magis, quo valvulæ suæ, quæ regressum eidem denegat (§. 317.), & pro fundo concipi potest, est propius; hinc si cavum vasis lymphatici dividatur v. g. in sectiones 7, viribus dilatatricibus alia vis accedit, quæ continuo crescit in progressionem arithmetica numerorum 0. 1. 2. 3. 4. 5. 6. ita ut si ponamus

$$\frac{100000 ZM \text{ fin. EBR}}{rM \text{ fin. EBD}} = b,$$

& vim gravitatis = u, pressiones singularum sectionum hujus cavi exprimi poterunt hac formula:

$$\div b. b+u. b+2u. b+3u. b+4u. b+5u. b+6u. \quad Q. E. I.$$

SCHOLIUM IV.

Valvulas lymphaticorum (§. 316.) ad conservandam vasorum angustiam plurimum facere, ita de monstrat CL. HAMBERGERUS: (a) Minima vis, directe in fibræ rectam flexilem agens, hanc distendit, & incurvat (per principia mechan.); tali igitur dilatatione amplissima fiet vasis capacitas, hinc insigne fluidi contenti pondus, si parietes vasis sint longi; contra vero minori longe gradu vasis crescet capacitas, si vas longum ita fit constructum, ut breves tantum ejus partes expandi queant. Sit enim

Fig. 5.

vas longum *akmn* (Fig. 5.); ponamus vim fluidi in vase contenti tantam esse,

(a) Physiol. Med. §. 775.

esse, ut una fibra v. g. *an* longitudinem *afn* extendendo adquirere queat, & erit capacitas vasis expansi *afnmngk*; sit jam idem vas longum *akmn* ita structum, ut in *c, r, o, s, u, & x*, extendi nequeat, intermediæ vero inter dicta puncta fibræ *ac, cr, &c.* ab eodem fluido expandantur fibræ longiori proportionate, & erit, in hoc casu speciali per figuram expresso, capacitas unius partis expansæ, v. g. *abcedk* ad capacitatem integri vasis expansi, ut 1 ad 343; ergo capacitas omnium partium expansarum ad capacitatem totius vasis expansi ut 1 ad 49, vel generaliter in ratione quadratorum longitudinum partis & totius. Quomodo vero CL. HAMBERGERUS lymphæ retrogressum impediendi munus iis valvulis detrudere, aut saltem unicam in quolibet vasorum trunco ad id sufficere, (a) ponere potuerit, minime perspicio; oblitus certe fuerat vis gravitatis, quæ præ ratione altitudinis augetur; & in unicam hanc valvulam tota vi niteretur; ubi econtra hæc vis per valvularum numerum insigniter minuitur (§. 150. in Schol. 1.).

§. CCCXXI.

Vasa intestinorum lactea vera sunt vasa lymphatica (§. 307. ad 320.) *descripta*: Fabrica partium, non perpetuus, chyli per eadem motus, microscopia id evincunt.

SCHOLIUM.

Veram lympham in *vasis lacteis* (§. 321.) sæpius contineri, multi viderunt. (b)



(a) L. c. §. 774. (b) BOERH. Præl. Acad. T. I. ad §. 129.

CAPUT III.

DE

ARTERIARUM LYMPHATICARUM NATURA.

§. CCCXXII.

Arteriæ lymphaticæ in corpore humano reperiuntur.
 Nullum vas potest liquidum, quod in corpore
 circulum obit, deferre versus cor, quin ab alio
 vase hoc liquidum deferendum receperit, in quo vase antea
 illud liquidum a corde versus extremitates movebatur; er-
 go etiam venæ lymphaticæ nequeunt humorem suum ad-
 ductum thoracicum, & inde ad cor deferre, nisi eum hu-
 morem ab aliis vasis receperint, in quibus ille humor a cor-
 de versus extremitates motus fuerat. Sed canales, qui
 humorem a corde versus corporis extremitates vehunt, Ar-
 teriæ dicuntur (§. 7.); ergo æque arteriæ lymphaticæ, uti
 venæ dantur.

SCHOLIUM I.

Arterias lymphaticas (§. 322.) primus descripsit BOERHAAVE. (a)

SCHOLIUM II.

Quod in sanitate neque microscopio conspicuæ sint hæ arteriæ (§. 322.),
 rationem reddit mox laudatus A U T H O R, quia pellucida illa vasa non mi-
 nus ac in pediculo, ubi a posteriore novimus infinita esse vasa, quæ tamen
 ob pelluciditatem nobis haud licet videre. (b)

SCHOLIUM III.

Hæ arteriæ in morbis conspicuæ fiunt, dum sanguis ruber errore loci
 eas ingreditur (§. 194. in Schol. 1. 2.).

§. CCCXXIII.

(a) HALL. Elem. Physiol. T. I. p. 110. & seqq.
 cum access. HALL. T. I. p. 536.

(b) Method. Stud. Med.

§. CCCXXIII.

Arteriæ lymphaticæ in corpore humano sunt necessariae.
Demonstratur ut (§. 16.).

SCHOLIUM.

Ulteriorem horum vasorum in *lymphatica primi, secundi &c. generis* divisionem proponit CEL. BOERHAAVIUS. (a) Quam uti ratione certo adsequimur (§. 322. 323. 301. n. 4. & §. 301. in Schol. 1.), ita oculis subicere minime valemus (§. 322. in Schol. 2.).

§. CCCXXIV.

Arteriæ lymphaticæ rubris, quoad proprietates (§. 12. 14. 16. 18. 19. 20. 21. 22. 23. 25. 26. 27. 28. 29. 30.) conveniunt, & sola magnitudine, atque parietum tenuitate ab illis differunt. Demonstratur ut (§. 14. ad 30. & 33.).

§. CCCXXV.

Arteriæ lymphaticæ oriuntur ex arteriis rubris, non tamen secundum ordinem serierum continuo decrefcentium. Id demonstrat facilitas, qua vasa hæc injiciuntur, & celeritas, qua liquores per eadem moventur.

SCHOLIUM.

Series vasorum *sibi ordine succedentes* ponit BOERHAAVIUS; (b) in dubium vocat HALLERUS. (c)

§. CCCXXVI.

Desinunt arteriæ lymphaticæ 1) in venas lymphaticas, 2) in viscerum ductus excretorios, 3) in fabricam cellulosa, 4) in cavitates corporis tum majores, cum minores.

Do-

(a) Ibid. & Præl. Acad. T. II. ad §. 245. (b) Loc. mox cit. (c) Elem. Physiol. T. I. p. 117. & seqq.

Docet id ratio (§. 322.), & venarum lymphaticarum origo (§. 307.).

SECTIO IX.

DE

HUMORIBUS IN VASIS LYMPHATICIS
CONTENTIS.

CAPUT I.

DE

PROPRIETATIBUS SERI, ET LYMPHÆ
GENERALIBUS.



§. CCCXXVII.

Serum (§. 302.), & *lymp̃ha* (§. 303.) quoad proprietates generales (§. 47. ad 57.) cum sanguine conveniunt. Serum, & lympha, cum partes insensiles tam parum sibi cohærentes habeant, ut, minima vi, queant separari, fluida sunt (§. 2.); ergo, etiam proprietates fluidorum generales (§. 47. ad 57.) iis conveniunt.

§. CCCXXVIII.

Serum, & lympha plurimum aquæ continent. Docet analysiſ Chemica.

SCHOLIUM.

CL. RHODES ex unciiis feri quadraginta obtinuit aquæ uncias octodecim cum semisse, sive $\frac{37}{80}$, tentamina similia recenset HALLERUS. (a)

§. CCCXXIX.

(a) Elem. Physiol. T. II. p. 137. & seqq.

§. CCCXXIX.

Seri, & lymphæ globuli sanguineis minus elastici sunt.
 Serum, & lymphæ plurimum aquæ continent (§. 328.); sed aqua non est compressilis (demonst. §. 277.); hinc neque elastica (§. 24.); proinde feri, & lymphæ globuli sanguineis (§. 58.) minus elastici sunt.

§. CCCXXX.

Seri, & lymphæ globuli sanguineis soliditate cedunt.
 Inter liquores, qui specificè graviores sunt, fundum vasis petunt, & contra: ^(a) sed globuli sanguinei, e corpore in patellam emissi, dum quiescunt, fundum petunt, & serosi atque lymphatici supernatant; ergo serosi, & lymphatici sanguineis specificè leviores sunt. Quum igitur soliditas sit ut specifica gravitas (demonst. §. 59.), sequitur, feri, & lymphæ globulos sanguineis minus solidos esse.

§. CCCXXXI.

Seri, & lymphæ globuli minorem motus quantitatem recipiunt, quam rubri. Motus quantitas est in ratione soliditatis (demonst. §. 60.); sed feri, & lymphæ globuli minorem soliditatem habent (§. 330.); ergo & minorem motus quantitatem.

§. CCCXXXII.

Seri, & lymphæ globuli rubris minores sunt. Vasa, quibus feri, & lymphæ globuli continentur, rubris minora sunt (demonst. §. 306.); ergo etiam ipsi globuli (demonst. §. 61.) rubris minores sunt.

CAPUT II.

DE

SERI ET LYPHÆ DIFFERENTIA.

§. CCCXXXIII.

Serum liquor concrecibilis est, & in eo, ab ovi albumine, & lymphæ differt. Serum igne concrecitur; ^(a) ergo liquor est concrecibilis. Q. E. primum.

Serum in aquam fervidam immissum, non format durum coagulum, uti albumen ovi, sed lacteum solummodo colorem aquæ conciliat; ^(b) ergo in eo serum ab ovi albumine differt. Q. E. alterum.

Lympha igni admota non concrecitur, uti serum (demonst. n. i. huj.); ergo etiam serum in eo a lymphæ differt. Q. E. tertium.

SCHOLIUM I.

Veritatem (§. 333. n. 3.) confirmant experimenta instituta 1. in lymphæ ventriculorum cerebri, ^(c) 2. in saliva ^(d) quæ omnino nil aliud, quam miro vasorum adparatu defæcatissima lymphæ est. ^(e) ILL. HALLERUS quidem lympham concrecibilem esse pronunciat; ^(f) ast lymphæ hæc aut non satis a sero defæcata, qualis liquor pericardii, pleuræ, &c. est; aut morbofa fuisse videtur, quam HALLERUS excitat. ^(g) Si autem CL. AUTHOR salivam lympham esse inter errores reputat; ^(h) peto ab EODEM mihi aliud salivam inter & lympham discrimen assignari, si dictam concrecibilitatem a lymphæ separamus.

SCHO-

(a) BOERHAAV. Elem. Chem. II. Proc. CXVII. (b) de HAEN Rat. Med. T. I. p. 96. & seq. (c) Ibid. T. IV. p. 197. & seq. BOERH. Præl. Acad. T. II. ad §. 274. (d) BOERH. Instit. §. 66. (e) COSCHWITZ de ductu salival. p. 19. & seq. (f) Elem. Physiol. T. II. p. 130. (g) Præl. Acad. l. c. (h) Elem. Physiol. T. I. p. 255.

SCHOLIUM II.

A sero concrefcibili (§. 333. n. 1.) materiam *crustæ pleuriticæ* (§. 280. in Schol.) derivat HALLER. (a) Eam vero phainomenis non satisfacere fufe declarat ILL. de HAEN. (b)

§. CCCXXXIV.

COROLLARIUM.

Quoniam serum concrefcibile est (§. 333.), adeoque partes ejus facile inter se cohærent, patet (demonst. §. 62.) *serum etiam viscidum esse.*

§. CCCXXXV.

Lympha ad naturam aquosam magis accedit. Id fapor, pelluciditas, & natura non concrefcilis (§. 333.) declarat.

§. CCCXXXVI.

COROLLARIUM.

Hinc *sero minus elastica* (§. 329.), & *minus solida* (§. 330.) reperitur, ac *minorem etiam motus quantitatem recipit* (§. 331.).



(a) Ibid, p. 126. & seqq. (b) Kat. Med, T. I. p. 90. & seqq.

SECTIO X.

DE

VASORUM LYMPHATICORUM
ACTIONE.

CAPUT I.

DE

ARTERIARUM LYMPHATICARUM ACTIONE.



§. CCCXXXVII.

Quum arteriæ lymphaticæ quoad proprietates (§. 12. ad 30.) rubris conveniant, & sola magnitudine, atque parietum tenuitate ab illis differant (§. 324.); patet *Arterias has etiam similiter ac rubras* (§. 66. 77. ad 83. 86. ad 90. 96. ad 109.) *in liquores suos agere, habito semper, tenuitatis, & inde nati virium decrementi, respectu.*

SCHOLIUM.

Motus feri, & lymphæ, tam per arterias, quam venas lymphaticas, etiam alius *progressivus*, alius *lateralis* est (§. 66. in Schol. 4. §. 141. in Schol. 2.).

§. CCCXXXVIII.

Quoniam arteriæ lymphaticæ liquorem suum ab arteriis rubris habent (§. 325.); *serum, & lymphæ celeritatem suam primigeniam ab arteriis rubris habent.*

§. CCCXXXIX.

Serum, & lymphæ cum impetu arterias transeunt. Demonstratur ut (§. 72.).

§. CCCXL.

§. CCCXL.

COROLLARIUM I.

Quum serum, & lymphæ minorem motus quantitatem habeant (§. 331. 336.); patet, *etiam minori impetu gaudere, quam sanguinem rubrum* (§. 73.).

§. CCCXLI.

COROLLARIUM II.

Proinde *motum suum amittunt citius* (§. 74.), & *latera arteriæ magis sequuntur* (§. 76.).

§. CCCXLII.

COROLLARIUM III.

Hinc *facilius in ramos arteriarum laterales transeunt* (§. 341.).

§. CCCXLIII.

Quoniam arteriæ lymphaticæ similiter, ut rubræ, in liquores suos agunt (§. 337.); liquet etiam, *ea, quæ de sanguinis celeritate* (§. 92. ad 96.) *dicta sunt, sero, & lymphæ, habito tenuitatis vasorum* (§. 337.), & *eorum, quæ* (§. 339. ad 341.) *recensita, respectu.*

§. CCCXLIV.

Arteriæ lymphaticæ non pulsan. Serum, & lymphæ motum suum amittunt citius, quam sanguis ruber (§. 341.); ergo vis cordis acceleratrix alterna ad eorum vasa non pertingit (demonst. §. 143.). Sed quo vis cordis acceleratrix alterna non pertingit, ibi nullus observatur pulsus (§. 115.); ergo arteriæ lymphaticæ non pulsan.

§. CCCXLV.

Arteriæ lymphaticæ vaporem in corporis cavitates, ut pleuræ, pericardii, peritonæi, ventriculorum cerebri, &c. emittunt. Is vapor continuo in animale vivente adest, ut docet vivorum anatome; ergo per vasa eo deferri debet, quæ liquores a corde acceptos eo deponunt; sed talia vasa sunt arteriæ (§. 7.), ergo ex arteriis is vapor emittitur. Porro hæ arteriæ non sunt rubræ, secus enim sanguinem emitterent, quod in sanitate non observatur; ergo sunt rubris tenuiores, id est, lymphaticæ; proinde eum vaporem arteriæ lymphaticæ emittunt.

SCHOLIUM.

Idem confirmat arteriarum injectio, & eadem hujus vaporis (§. 345.) quæ feri, & lymphæ est (§. 333. in Schol. I.), indoles.

§. CCCXLVI.

Quum porro arteriæ lymphaticæ similiter, ut rubræ, in liquores suos agant; etiam *effectus similes illis, qui* (§. 116. ad 130. 133. ad 136. 138.) *expositi, in sero, & lymphæ producunt.*

§. CCCXLVII.

Non tamen generatur calor in arteriis lymphaticis. Ad motum calorificum (demonst. §. 131.) requiritur partium motarum determinata elasticitas, ut alias indicavi; ^(a) sed feri, & lymphæ globuli sanguineis minus elastici sunt (§. 329. 336.); ergo ad dictum motum inepti sunt; hinc calor in eorum arteriis non generatur.

§. CCCXLVIII.

(a) Dissert. Inaugur. de Causa Calor. in sang. §. 14. γ.

§. CCCXLVIII.

Serum, & lymphæ rubore carent. Ad ruborem certus densitatis gradus requiritur (demonst. §. 132.): sed serum sanguine minus densum est (§. 330.); ergo serum rubedinem concipere nequit. Q. E. primum.

Quum colores in determinata radiorum a corpore colorato reflexione pendeant, ^(a) corpora pellucida, quia in his radii nullam patiuntur reflexionem ^(b), colore destituuntur. Sed lymphæ, ejusque vasa pellucida sunt (demonst. §. 306.); ergo colore, consequenter rubore lymphæ caret. Q. E. alterum.


CAPUT II.

DE

VENARUM LYMPHATICARUM ACTIONE.

§. CCCXLIX.

Axioma.

 *Seri, & lymphæ velocitas primigenia ea est, quam a causis, hos liquores in venarum origines (§. 307.) promoventibus, accipit.*

§. CCCL.

Eam velocitatem (§. 349.) non accelerant glandulæ (§. 308.); sed potius minuunt. Eæ corporis partes humorum motum non accelerant, in quibus humores omnium frequentissime stagnant; atqui id in his glandulis observatur; ^(c) ergo lymphæ motum non accelerant. Q. E. primum.

Por-

(a) Dissert. de Causa Rubed. in sang. §. 9. (b) s' GRAVESANDE l. c. n. 3449. (c) HALLER. Elem. Physiol. T. I. p. 192. & seqq.

Porro in glandulis lumen ramorum ad lumen trunci majus fit, & frictio simul augetur, ut docet injectio; ^(a) sed hæc liquidi celeritatem minuunt (demonst. §. 81. 82.); ergo glandulæ lymphæ celeritatem minuunt. Q. E. alterum.

SCHOLIUM.

Glandulas has nullas musculares fibras habere HALLERUS refert, & eam retardationem (§. 350.) injectionibus est expertus. ^(b)

§. CCCLI.

Eam lymphæ celeritatem multum augent valvulæ. Valvulæ celeritatem augent, dum ponderi liquoris resistunt (§. 150.); sed lymphaticæ venæ copiosas valvulas habent (§. 316.); ergo lymphæ celeritatem multum augent.

§. CCCLII.

*Eadem (§. 349.) a vi derivationis plurimum promove-
tur.* Venæ lymphaticæ per valvulas in cava solitaria dividuntur (demonst. §. 320.); quoties igitur horum cavorum aliquod a vi venarum contractili (§. 315.), & pressione ambientium evacuatur, Boyleanum vacuum fit, in quod unda lymphæ proxima, absque ullo renixu, sequitur, ^(c) ab eadem contractilitate, & pressione ambientium, propulsa; sed hæc vis derivationis est (demonst. §. 104.); ergo, quum cava hæc numerosa sint (§. 316.), ab ea vi celeritas lymphæ plurimum promovetur.

§. CCCLIII.

Quum denique venæ lymphaticæ proprietates (§. 310. ad 317.) venis rubris aliquantum similes habeant; *celeritas lymphæ primigenia (§. 349.) etiam similes fere mutationes,*
ac

(a) Ibid. (b) Ibid. (c) BOERH. Præl. Acad. T. I. ad §. 115.

ac (§. 142. ad 160.) dictæ, subit, habito tamen harum venarum diversitatis, & eorum, quæ (§. 318. ad 320.) recensita sunt, respectu.

§. CCCLIV.

COROLLARIUM.

Hinc etiam similes fere effectus, ac in venis (§. 162. ad 168.) enarrati sunt, sequuntur.

§. CCCLV.

Vaporem cavitatum (§. 345.) venæ lymphaticæ resorbent. Is vapor in sanitate per arterias continuo emittitur (§. 345.), non tamen colligitur; ergo vasa adeste debent, quæ hunc vaporem sanguini reddunt; sed ea vasa venæ sunt (§. 7.); ergo venæ vaporem illum resorbent. Quoniam autem vapor resorbendus rubro est tenuior; patet etiam venas has non esse rubras, sed tenuiores, id est, lymphaticas; ergo eum vaporem venæ lymphaticæ resorbent.

§. CCCLVI.

COROLLARIUM.

Præcipua autem earum utilitas est humores tenuiores sanguini reddere.



SECTIO XI.

DE

MORBIS VASORUM LYMPHATICORUM.

CAPUT I.

DE

MORBIS LYMPHATICORUM RATIONE

PARTIS SOLIDÆ.

§. CCCLVII.



Morbi vasorum lymphaticorum in excessu conditionum (§. 304. ad 356.) enumeratarum, aut earum impedimento siti sunt. Demonstratur ut (§. 171.).

§. CCCLVIII.

COROLLARIUM.

Hinc eorum morbi (§. 357.) eandem patiuntur divisionem, ut in vasis rubris (§. 172. 173.).

§. CCCLIX.

Quum eadem sint vasorum lymphaticorum, atque rubrorum, elementa, & simili modo invicem jungantur (demonst. §. 174.), etiam morbis cohesionis minutæ, auctæ, aut sublatae (§. 175. 181. 183. 184. 191.) vasa lymphatica obnoxia sunt.

§. CCCLX.

Debilitas (§. 175.) arteriarum lymphaticarum (§. 359.), manente eadem vi cordis, facit feri, & lymphæ in corporis cavitatibus 1) collectionem, 2) stagnationem, 3) putredinem.

nem. Debilitas nata facit vaforum extensionem (§. 179. n. 1.); ergo lumina arteriarum augentur (ibid.). Sed quantitas fluidi, quæ determinato tempore exit, cæteris paribus, est in ratione directâ luminum; ^(a) ergo in arteriarum lymphaticarum debilitate, quum vis cordis eadem maneat (per hypoth.) plus feri, & lymphæ effluet in corporis cavitates, quam in sanitate (§. 345.), consequenter plus, quam intra datum tempus venæ lymphaticæ possint reforbere (§. 356.); proinde serum, & lymphæ in corporis cavitatibus colligetur. Q. E. primum.

Quum serum, & lymphæ, ob copiam reforberi omnis nequeat (demonst. n. 1. huj.), neque in arterias suas redire possit, ponitur extra territorium circulationis; hinc stagnat. Q. E. alterum.

Serum, & lymphæ quiete, & calore putrescunt; ^(b) sed in dicta vaforum debilitate in loco calido, corporis nempe cavitatibus, hi liquores quiescunt (n. 2. huj.); ergo putredo iis inducitur. Q. E. tertium.

SCHOLIUM.

Veritas (§. 360. n. 1.) sic declaratur: sint duæ arteriæ lymphaticæ, altera sana A, altera debilitata B; quantitas lymphæ intra datum tempus, v. g. 1' horæ, effluentis ex sana = Q, ex debilitata intra idem tempus = q; lumen sanæ = L, debilitatæ = l; vis cordis in sana = F, in debilitata = f; resistentia in sana = R, in debilitata = r:

Erit $Q < q.$

Nam (c) $Q : q = L\sqrt{F} : l\sqrt{f}$

sed (per hyp.) $F = f$

D 2

Er-

(a) s' GRAVESANDE l. c. n. 1638. (b) BOERH. Elem. Chem. II. Proc. CXV. (c) s' GRAVESANDE l. c. n. 1639.

Ergo $Q : q = L : l$.

Jam vero (§. 18. in Schol. I.)

$$L : l = Fr : fR$$

Et quum (per hyp.) $F = f$.

Erit $L : l = r : R$

Ergo etiam $Q : q = r : R$

sed (per hyp.) $r < R$

Ergo $Q < q$. Q. E. D.

§. CCCLXI.

Quando serum aquosum extra vasa fusum, & cavitatibus receptum est, vel stagnans alicubi vasa sua nimium distendit, Hydrops vocatur; ^(a) sed id in debilitate arteriarum lymphaticarum evenit (§. 360.); ergo *Arteriarum lymphaticarum debilitas hydropem inducit.*

SCHOLIUM I.

Ἡαυτοῦ (§. 361.) una *Hydropis* causa est.

SCHOLIUM II.

Idem morbus (§. 361.) pro loci varietate diversa nomina fortitur. Ita in capite *Hydrocephalus*, in thorace, pericardio, glandulis, mulierum ovariis, utero, scroto, testibus, *hydrops thoracis*, *pericardii* &c. In aspera arteria *Bronchocele*, in fabrica cellulosa *Anasarca*, *Hypofarca*, *Leucophlegmatia*, in cavo abdominis *Ascites* dicitur; quo etiam a multis *Tympanites* refertur.

SCHOLIUM III.

Ὅδρωψ ex ὕδωρ aqua, & ὀπτομαι video, ὕδρωκέφαλος ex ὕδωρ & κέφαλον caput, βρογχοκήλη ex βρόγχος media pars aspera arteria, & κήλη tumor, ἀνασάρκα, ὑποσάρκα, ex ἀνά inter, aut ὑπὸ sub, & σὰρξ caro, λευκοφλεγματία a λευκὸς albus, & φλεγμα

(a) Воевн. Aphor. §. 1215.

μα pituita, ἀσκήτης ab ἀσκήος iter, denique τυμπανίτης a τυμπανίῳ tympani instar sono, derivatur.

SCHOLIUM IV.

De Tympanitidis natura alibi dicitur. Confer interea ILL. de HAEN. (a)

§. CCCLXII.

Debilitas venarum lymphaticarum (§. 359.), *manente arteriarum lymphaticarum statu sano*, eadem (§. 360.) *producit*. Venæ lymphaticæ in sanitate tantum vaporis resorbere debent (§. 356.), quantum ex arteriis emissum fuit, fecus enim feri, & lymphæ collectiones fierent (demonst. §. 360.). Sed celeritas fluidi in vasis nostris est in ratione inversa diametrorum (demonst. §. 81.), & si tempora sint æqualia, celeritates sunt ut spatia (demonst. §. 94.); quum igitur a debilitate lumina venarum resorbentium augeantur (demonst. §. 360. n. 1.), minuetur celeritas liquidi resorpti, & hinc spatium, a liquido resorpto in venis percursum. Quoniam vero arteriarum lymphaticarum status sanus manet (per hyp.), eadem lymphæ quantitas emittitur (§. 345.) ac ante, & minus resorbetur (per demonst.); ergo ferum, & lymphæ in corporis cavitatibus colligitur. Porro feri, & lymphæ stagnatio, & putredo, demonstratur ut (§. 360. n. 2. 3.). Proinde debilitas venarum lymphaticarum, sub data hypothesi, eadem (§. 360.) *producit*.

SCHOLIUM I.

Sint duæ venæ lymphaticæ, altera sana E, altera debilitata D; quantitas lymphæ intra datum tempus, v. g. 1' horæ resorptæ in sana = V,

D 3

in

(a) Rat. Med. T. II. p. 73. & seqq. T. IV. p. 58. & seqq. T. V. p. 36. & seqq.

in debilitata intra idem tempus $= v$; lumen sanæ $= L$, debilitatæ $= l$;
celeritas liquidi in E $= C$, in D $= c$; spatium a liquido percursum in
E $= S$, in D $= s$; Tempus in E $= T$, in D $= t$.

Erit $V > v$

Nam $V : v = ST : st$

Sed (per hyp.) $T = t$

Ergo $V : v = S : s$.

Jam iterum (demonst. §. 94. in Schol.)

$S : s = CT : ct$

Ergo etiam $S : s = C : c$

Sed (demonst. §. 81.) $C : c = l : L$

Igitur $S : s = l : L$

Proinde etiam $V : v = l : L$

Sed (demonst. §. 362.) $l > L$.

Ergo etiam $V > v$. Q. E. D.

SCHOLIUM II.

Ad sanitatem requiritur (demonst. §. 362.), ut sit (§. 360. in Schol.
§. 362. in schol. I.)

$Q : V = q : v$,

& actio vasorum est

$AE : BD = QV : qv$

sed (in hypoth. §. 362.) A manet idem, & E mutatur in D, erit igitur

$AD : BD = Qv : qv$,

Id est, si arteria sana fuerit, & vena debilitata, erit, manente eadem
lymphæ secretionē, minor resorptio; hinc lymphæ colligetur in cavo suo.
Q. E. D.

SCHOLIUM III.

Ad stagnationem in venis lymphaticis (§. 362.) etiam confert, quod
in venis lymphaticis debilitatis valvulæ suo officio (§. 351.) satis defungi
non valeant, ubi lymphæ sæpe relabitur, quæ potissimum BILSIO causa fuit,
ut ex receptaculo chyli, tanquam corde, lympham versus omnes corporis
partes deferri crederet. (a)

§. CCCLXIII.

(a) HALL. Elem. Physiol. T. I. p. 252. & seqq.

§. CCCLXIII.

COROLLARIUM.

Hinc *debilitas* (§. 362.) *itidem hydropem* (§. 361.) *inducit.*

SCHOLIUM.

Hæc (§. 362.) *altera hydropis causa est.*

§. CCCLXIV.

Si debilitas arteriarum (§. 360.) *debilitati venarum* (§. 362.) *jungatur, eo citior & vehementior hydrops nascitur.* Quoniam effectus proportionalis est causæ adæquatæ, & causa utraque seorsim sumpta suum producit effectum (§. 360. 362.), junctæ invicem majorem etiam ponent effectum. Consequenter hydrops a junctis causis (§. 361. 363.) citior, & vehementior inducetur.

§. CCCLXV.

Quum vasa lymphatica irritabilia reperiantur (§. 315. in Schol. 2.); *etiam morbosas irritabilitatis mutationes patiuntur* (§. 192.).

§. CCCLXVI.

Vasa lymphatica etiam diametro præternaturaliter minui vel augeri possunt. Demonstratur ut (§. 193.).

§. CCCLXVII.

COROLLARIUM.


Hinc *similibus etiam morbis, ac* (§. 194. 195.) *recensiti sunt, adfici possunt.*

CAPUT II.

DE

MORBIS LYMPHATICORUM RATIONE
PARTIS FLUIDÆ.

§. CCCLXVIII.

 Quum certa fit sanguinis ad serum, lymphamque, proportio (demonst. §. 202.), evidens est, *serum, & lympham, copia nimium aucta, aut minuta, peccare posse.*

§. CCCLXIX.

Quo major feri, & lymphæ quantitas (§. 368.) in corpore habetur, eo cordi resistentia major fit. Serum, & lymphæ motum a corde impressum amittunt citius (§. 341.); ergo, quo major est feri, & lymphæ in corpore quantitas, eo humores citius motum a corde impressum amittunt. Quum igitur resistentia sit id, quod effectui alicujus vis vel toti, vel ex parte æquilibrium dat (demonst. §. 91.), quo citius humores motum a corde impressum amittunt, eo magis augetur vis, qua motui cordis æquilibrantur; ergo, quo major feri, & lymphæ quantitas in corpore habetur, eo cordi resistentia fit major.

§. CCCLXX.

Quo major feri, & lymphæ quantitas (§. 368.) in corpore habetur, eo minor fit humorum in corpore motus. Quo major feri, & lymphæ quantitas in corpore habetur, eo cordi resistentia fit major (§. 369.); sed humores in corpore moventur in ratione inversa resistentiarum (§. 93.); ergo, quo major feri, & lymphæ quantitas habetur, eo minor fit humorum in corpore motus.

§. CCCLXXI.

§. CCCLXXI.

COROLLARIUM.

Hinc effectus (§. 222. ad 251.) ex eadem feri, & lymphæ quantitate nimia (§. 368.) sequi etiam possunt.

§. CCCLXXII.

Quo major feri, & lymphæ quantitas in corpore habetur, eo magis corporis nutritio depravatur. Quo major feri, & lymphæ quantitas in corpore habetur, eo minor fit humorum in corpore motus (§. 370.); sed ad nutritionem corporis bonam, requiritur sufficiens humorum in corpore motus (demonst. (§. 177. n. 4.)); ergo, quo major feri, & lymphæ quantitas in corpore habetur, eo magis corporis nutritio depravatur.

§. CCCLXXIII.

COROLLARIUM I.

Cachexiæ nomine intelligi solet ea dispositio corporis, quæ nutritionem ejus depravat per totum illius habitum simul; ^(a) quum igitur nimia feri, & lymphæ quantitas corporis nutritionem depravet (§. 372.); sequitur, ex nimia feri, & lymphæ quantitate Cachexiam oriri.

SCHOLIUM.

Καχεξία ex κακὸς malus, & ἔξις habitus componitur.

§. CCCLXXIV.

COROLLARIUM II.

Quoniam debilitas vasorum (§. 175.) ex mala nutritione oritur (§. 176. 177.); ex vasorum autem lymphati-

TOMUS II.

E

CO-

(a) BOERH. Aphor. §. 1166.

corum debilitate hydrops sequitur (§. 363.); patet ex *Cachexia* (§. 373.) *hydropem oriri.* ^(a)

§. CCCLXXV.

Quo minor feri, & lymphæ copia (§. 368.) *in corpore habetur, eo viscosior sanguis compingibilis, & concrescibilis evadit.* Serum, & lymphæ humores plurimum aquosi sunt (§. 328.); ergo, quo minor feri, & lymphæ copia in corpore habetur, eo magis pars aquosa in sanguine deficit. Sed quo magis pars aquosa in sanguine deficit, eo sanguis compingibilis, & concrescibilis viscosior evadit (demonst. §. 278.); ergo quo minor feri, & lymphæ copia habetur, eo viscosior sanguis compingibilis, & concrescibilis evadit.

§. CCCLXXVI.

Quo minor feri, & lymphæ quantitas in corpore habetur, eo facilius in corpore obstructio, inflammatio, &, quæ inde sequuntur mala, oriuntur. Quo minor feri, & lymphæ quantitas in corpore habetur, eo viscosior sanguis compingibilis, & concrescibilis evadit (§. 375.); sed quo viscosior sanguis compingibilis, & concrescibilis evadit, eo facilius in corpore obstructio, inflammatio, &, quæ inde sequuntur mala, oriuntur (demonst. §. 279.); ergo, quo minor feri, & lymphæ quantitas habetur, eo facilius in corpore obstructio, inflammatio, &, quæ inde sequuntur mala, oriuntur.

§. CCCLXXVII.

Quoniam serum, & lymphæ qualitates fere similes, ac sanguis habent (§. 327. ad 336.); etiam *vitiis similibus, ac* (§. 204.

(a) B. de SWIETEN Comment. §. 1169.

(§. 204. ad 217.) recensita, serum, & lymphæ adfici possunt.

§. CCCLXXVIII.

Acrimonia salina in sero, & lymphæ facillime prædominantur. ^(a) Salia non agere, nisi soluta, cuique notissimum est; ergo ibi agunt potentius, ubi melius soluta reperiuntur. Sed optime soluta reperiuntur in humoribus aquosis; ^(b) ergo, quum serum, & lymphæ humores aquosi sint (§. 328.), in sero, & lymphæ optime soluta reperiuntur; hinc ibi agunt potentius, & facillime prædominantur.

§. CCCLXXIX.

COROLLARIUM I.

Quum scorbuti causa proxima sit ea sanguinis indoles, qua & crassitie simul in una, & tenuitate acri salia, alcalica, vel acida in altera parte peccat; ^(c) evidens est, ab acrisero, & lymphæ scorbutum oriri posse.

§. CCCLXXX.

COROLLARIUM II.

Inde (§. 379.) etiam pleraque mala cutanea originem ducunt.

SCHOLIUM I.

Scorbuti (§. 379.) nomen ab antiquo vocabulo *Schorbuk*, quo septentrionales populi hunc morbum designabant, derivat ILL. B. de SWIETEN. ^(d)

SCHOLIUM II.

De *Scorbuti* natura, causis, & curatione, pulcherrima ILL. de HÆEN novissime proposuit. ^(e)

E 2

SCHO-

(a) BOERHAAV. Instit. §. 760. (b) Id. Elem. Chem. I. p. 568. & seqq.
(c) BOERHAAV. Aphor. §. 1153. (d) Comment. §. 1148. (e) Rat. Med. T. VIII, p. 198. & seqq.

Quum *scorbutus* videatur gingivas, & dentes, primario, ac citissime adficere, (a) ob copiosum tenuis, olidissimæ salivæ effluxum, (b) & hinc etiam saliva citissime corrumpi videatur; an non iterum suspicari licet, eandem salivæ, quæ lymphæ, esse indolem (§. 333. in Schol. 1.)?

CAPUT III.

DE

MORBIS LYMPHATICORUM COMPOSITIS.

§. CCCLXXXI.



Vasa serosa, & lymphatica obstrui possunt. Demon-
stratur ut (§. 220.).

§. CCCLXXXII.

Vasa serosa, & lymphatica obstructa tument. Demon-
stratur ut (§. 266.).

§. CCCLXXXIII.

Quum ubique serosis, & lymphaticis vasis rubra vicina sint, ut docet Anatome; & serosa, atque lymphatica obstructa tumeant (§. 382.); patet a vasis serosis, & lymphaticis obstructis, non modo vicina sui generis, sed & vicina rubra diametro minui (§. 195. γ.)

§. CCCLXXXIV.

COROLLARIUM I.

Ergo humores per vasa vicina rubra, serosa, & lymphatica, non obstructa, sed tamen angustata (§. 383.) feruntur celerius (demonst. §. 81. 257. 262.).

§. CCCLXXXV.

(a) B. de SWIETEN Comment. §. 1151. n. 2. (b) Ibid. n. 3.

§. CCCLXXXV.

COROLLARIUM II.

Hinc in vicinis rubris calor major oritur (§. 261. 264.).

§. CCCLXXXVI.

Quando vasa serosa, & lymphatica, aucta humorum celeritate (§. 384.) obstructa sunt, dolor oritur. Demonstratur ut (§. 267.).

§. CCCLXXXVII.

Quo magis vasa serosa obstruuntur, eo magis locus obstructus flavo colore tingitur. Quo magis vasa serosa obstruuntur, eo magis eadem extenduntur (demonst. §. 266. 382.); hinc initia eorum capaciora facta, aliquos globulos rubros recipiunt (demonst. §. 366. 94. in Schol. 1. 2.). Sed vasa serosa pellucida sunt (§. 306.), & ob serum flavum (§. 302.) simili colore tinguntur; color autem flavus intensior fit, dum aliquid rubri ei admiscetur; ergo, quo magis vasa serosa obstruuntur, eo magis locus obstructus flavo colore tingitur.

SCHOLIUM.

Idem in vasis lymphaticis fit, quoties errore loci serum, & ipsi globuli rubri, ea ingrediuntur. (a)

§. CCCLXXXVIII.

Quando in parte nostri corporis simul tumor, calor, flavedo, & dolor sentiuntur; eadem *Erysipelatosa*; dicitur, ut adeo *Erysipelas* fit tumor alicujus partis, cum dolore, flavedine, & calore in eadem perceptis. (b)

E 3

§. CCCLXXXIX.

(a) Ibid. §. 372. (b) Ibid. §. 380.

§. CCCLXXXIX.

Quando in parte quadam Erysipelas percipitur, istam, partem obstructam esse, & serum cum paucis sanguine rubro in eam impetu, naturali majore, impingere oportet; & contra quando in partem obstructam, impetus sanguinis, & feri naturali fit major, istam partem erysipelatosam fieri oportet. Demonstratur ut (§. 272.).

§. CCCXC.

COROLLARIUM.

Hinc *Erysipelas* est obstructio vasis serosi, aut lymphatici circa finem, cum impetu sanguinis rubri, & feri, in canalem obstructum naturali majore.

SCHOLIUM.

Ερυσίπελας ex *έρυθρον rubrum*, & *πέλας* prope deducitur.

§. CCCXCI.

Quum autem *Erysipelas* (§. 390.) a *Phlegmone* vera (§. 273.) in hoc solo differat, quod in priori serum cum paucis sanguine rubro, in posteriori ipse sanguis ruber obstructionem faciat; & sanguis ruber errore loci, vasa serosa ingredi possit (demonst. §. 387.); liquet, *Erysipelas* facile in *Phlegmonem* veram transire posse.

§. CCCXCII.

Quando vasa lymphatica obstruuntur a lymphâ, locus obstructus albus manet. Lympha enim in sanitate pellucet (§. 303.), hinc neque, dum in vasis suis, aut minoribus hæret, aliquem colorem iis conciliare potest, sed locus obstructus albus manet.

§. CCCXCIII.

§. CCCXCIII.

Quando in parte nostri corporis simul tumor, calor, albedo, & dolor sentiuntur, eadem *calide oedematosa* dicitur; ut adeo *Oedema calidum* sit tumor alicujus partis, cum dolore, albedine, & calore in ea perceptis. ^(a)

§. CCCXCIV.

Quando in parte quadam oedema calidum percipitur, istam partem obstructam esse, & lympham, ac serum in eam impetu naturali majore impingere oportet; & contra, quando in partem obstructam impetus lymphæ, & feri naturali sit major, istam partem calide oedematosam fieri oportet. Demonstratur ut (§. 389.).

§. CCCXCV.

COROLLARIUM.

Hinc *Oedema calidum* est obstructio vasis lymphatici circa finem, cum impetu lymphæ, & feri, in canalem obstructum naturali majore.

SCHOLIUM.

Dicitur *Οἰδήμα* ab *οἰδέω* inflatus sum, tumeo. *Calidum* ad distinctionem *frigidi*, de quo alibi.

§. CCCXCVI.

Quoniam *Oedema calidum* (§. 395.) ab *Erysipelate* (§. 390.) in hoc solo differt, quod in priori lymphæ, & serum, in posteriori serum cum paucis sanguine rubro, obstructionem faciat; *Oedema calidum* facile in *Erysipelas*, & ex hoc in *Phlegmonem veram* (§. 391.) transire potest.

§. CCCXCVII.

(a) B. de SWIETEN Comment. §. 380.

§. CCCXCVII.

COROLLARIUM I.

Est ergo *Erysipelas*, & *Oedema calidum inflammatio*, vera (§. 373.) in vasis serosis, lymphaticis, aliisque minoribus facta. ^(a)

§. CCCXCVIII.

COROLLARIUM II.

Quia *Erysipelas*, & *Oedema calidum*, in *Phlegmonem* veram transire possunt (§. 391. 396.) etiam eosdem cum vera phlegmone exitus (§. 283. ad 292.) habere possunt.

§. CCCXCIX.

COROLLARIUM III.

Quum denique ex hodierna Anatome constet, omnes fere corporis partes vasa habere, quæ demonstrari ad oculum possunt; ^(b) *Arteriæ ipsæ, venæ, nervi, membranæ, musculi, glandulæ, ossa, cartilagine, tendines, viscera omnia*, adeoque totum fere corpus, ^(c) inflammari queunt.

SCHOLIUM I.

De Arteriis, & venis, omnis generis, (§. 16. 17. 46. 314. 324.) patet; de reliquis partibus suis locis dicitur.

SCHOLIUM II.

Hæc Inflammatio (§. 399.) pro loci varietate diversa nomina accipit. Ita si inflammatio in arteriis lymphaticis membranarum, quæ ad ligamenta juncturarum, *Rheumatismus* dicitur; ^(d) si lumborum sedem occupat, *Lumbago rheumatica*, si coxam, *Ischiadicus* vel *coxarius dolor* audit. ^(e)

SCHO-

(a) BOERH. Aphor. §. 372. (b) B de SWIETEN Comment. §. 374. (c) BOERH. Aphor. §. 374. (d) Ibid §. 1493. (e) Ibid. §. 1494.

SCHOLIUM III.

Rheumatismus a ῥέω fluo denominatur. De dolore coxario legi meretur ILL. de HAEN. (a)

§. CCCC.

Si in vase lymphatico membrana (§. 314.) aliqua læsa, aut vas quocunque modo in aliquo loco debilitatum fuerit, in loco adfecto Hydatis orietur. Hydatis est membranaceus folliculus variæ magnitudinis aqueo humore turgidus in vase lymphatico ortus; (b) ergo videtur idem esse, ac varix in venis, aut aneurysma in arteriis rubris; sed aneurysma, & varix oritur, si una arteriarum, aut venarum membrana quocunque modo læsa, aut debilitata fuerit (§. 293. 298.); ergo, si in vase lymphatico membrana aliqua læsa, aut vas quocunque modo in aliquo loco debilitatum fuerit, in loco adfecto hydatis oritur.

SCHOLIUM I.

Hydatides (§. 400.) non esse naturales folliculos dilatatos ex eo patet, quod *Hydatides* observatæ fuerint in talibus locis, ubi nulli tales folliculi reperiuntur; integram enim placentam uterinam in *hydatides* mutatam observavit RUYSCHIIUS. (c) Unde cum fabrica aneurysmatibus sint similes, expositam (§. 400.) *Hydatidum* originem statuere haud dubitavi.

SCHOLIUM II.

Hydatis ab ὕδωρ aqua, olim vocabatur pinguedinis superiori palpebræ substratæ extrema parte incrementum. (d)

§. CCCCI.

Hydatis nata (§. 400.) in ingentem molem excrecere potest. Demonstratur ut (§. 295.).

TOMUS II.

F

Scho-

(a) Rat. Med. T. IV. p. 126. & seqq. (b) B. de SWIETEN Comment. §. 112. (c) Observat. Chirurg. p. 33. (d) B. de SWIETEN l. c.

SCHOLIUM.

Sunt, qui observarunt, *Hydatides* tales, ab omni nexu cum se invicem vel vicinis partibus liberas, in majori sacco membranaceo conclusas, fluctuare; & quod magis mirum est, majores *hydatides* continebant in suo cavo minores alias, pariter ab omni nexu liberas: dum una cum suis folliculis coquebantur aquæ hydropici mortui, visum fuit ipsam folliculorum substantiam, quæ membranacea adparuerat, fuisse dissolutam. Unde concluderunt CEL. VIRI *hydatidum* pelliculas non esse partes organicas, sed ex liquido incrassato forte natas fuisse. (a) An non similia sunt, quæ de Aneurysmatum genesi ILL. de HAEN habet? (b) Ex quibus omnino novum robor opinioni meæ (§. 400.) accedere autumo.

SECTIO XII.

DE

HUMORIBUS E SANGUINE SECRETIS.

CAPUT I.

DE

SECRETIONE IN GENERE.

§. CCCCII.



Pars organica corporis, quæ humores adlatos per suam fabricam plurimum mutat, sic ut hæc mutatio profit totius corporis vitæ & sanitati, *Viscus* adpellatur. (c)

§. CCCCIII.

Ex quibusdam visceribus (§. 402.), itemque membranis, tam externis, quam internis, durante sanitate de com-

mu-

(a) Ibid. (b) Rat. Med. T. IV. p. 21. & seq. (c) B. de SWIETEN Comment. §. 41.

muni sanguinis massa, alii, & a sanguine diversi, & a se ipsis varii, humores ea lege prodeunt, ut in qualibet ejus corporis particula idem constanter humor generetur. Id quotidiana experientia certum est.

§. CCCCIV.

Actio, qua dicti (§. 403.) humores parantur, *secretio* dicitur; humores vero ita prodeuntes, *secreti* audiunt.

SCHOLIUM.

Ad eam actionem (§. 404.) non sufficit, monente CL. de GORTER, ut liquor divaricatione vasorum in multas partes dividatur, quæ nihil inter se, & a priore differunt humore. (a) Unde, cum hoc negotium (§. 138.) innuerem, *Elementa sanguinis* in arteriis separari dixi.

§. CCCCV.

Omnis secretio (§. 404.) fit per arterias. Secretio enim est actio, qua de communi sanguinis massa humores diversi parantur (§. 403. 404.); ergo per vasa fieri debet, quæ hanc communem sanguinis massam vehunt; ea vero in dictis organis (§. 403.) arterias, & venas esse, Anatome docet. Sed non fit hæc actio per venas, hæ enim jam residuum a secretionem sanguinem ad cor revehunt (§. 7.); ergo per arterias fieri debet.

SCHOLIUM.

Unicum exemplum *Venæ portarum* in hepate excipi debet.

§. CCCCVI.

Quoniam omnis actio in corpore nostro a duabus determinatur causis, altera nempe agente, quæ mutationem alteri, tanquam subiecto inducit, altera vero patiente, quæ

F 2

eam

(a) De secret. n. i.


eam mutationem recipit; etiam *ratio*, quare in qualibet corporis particula, in sanitate, idem constanter humor generetur (§. 403.), partim in natura humoris secreti, partim in fabrica organi secernentis est quærenda.

CAPUT II.

DE

NATURA HUMORUM SECRETORUM.

§. CCCCVII.

 Humores secreti (§. 404.) in *Aquosos*, *Mucosos*, *Gelatinosos*, *Oleosos*, & *Spirituosos*, dividuntur.

SCHOLIUM.

Priores quatuor classes (§. 407.) ILL. HALLERUS habet, (a) quintam vero adjeci, quod spiritus nervei ad nullam harum classium commode referri queant.

§. CCCCVIII.

Humores, in quibus aqua maximam rationem ad reliqua elementa habet, *Aquosi* dicuntur.

§. CCCCIX.

Humores aquosi 1) expeditissime fluunt, 2) neque filtrabunt, 3) ab igne fere toti, minimo terræ momento superstitite, dissipantur, 4) ab alcohole vini, aut a meracissimis acidis metallicis, non coguntur. Aqua inter liquores fluidissima deprehenditur; (b) hinc eandem, & liquores omnes, in quibus abundat ipsa, expeditissime fluere necesse est; sed in humoribus aquosis aqua abundat (§. 408.); ergo humores aquosi expeditissime fluunt. Q. E. primum. Ut

(a) Elem. Physiol. T. II. p. 360. (b) BOERH. Elem. Chem. I. p. 557.

Ut humores fila trahant, particulæ eorum tenacius invicem cohærere debent; talis autem cohæsió cum fluiditate maxima consistere nequit (demonst. §. 18.); quum igitur humores aquosi inter reliquos fluidissimi sint (demonst. n. 1. huj.), fila non trahunt. Q. E. alterum.

Porro aqua igne dissipatur; ^(a) ergo etiam humores, qui plurimum aquæ continent (§. 408.), igne dissipantur. Aqua vero pura, sincera, simplex, elementalis haud reperitur; ^(b) sed terræ elementa sibi semper conjuncta habet, ^(c) quæ in igne persistunt; ^(d) ergo idem de humoribus aquosis verum est (demonst. n. 1. huj.); proinde humores aquosi ab igne fere toti, minimo terræ momento superstitite, dissipantur. Q. E. tertium.

Demum aqua alcohol vini, ^(e) & meracissima acida metallica, ^(f) solvit, & diluit; ergo ab his non cogitur ipsa, & consequenter neque humores aquosi (demonst. n. 1. huj.) ab his coguntur. Q. E. quartum.

SCHOLIUM.

Ad hanc classẽ (§. 409.) ab HALLERO ^(g) reducitur urina perspirabile sanctorianum, vapor e pulmonibus exhalans, saliva, lympa pancreatis, lachryma, humor aqueus oculi, & humores, qui in vasis diaphanis (§. 301. n. 4.) vehuntur; quorum omnium ratio suis locis exponetur. Ego lympham sanguinis, lympham ventriculorum cerebri, addere nullus dubito (§. 333. in Schol. 1.).

§. CCCCX.

Humores prioribus (§. 409.) minus fluidi, fila trahentes, ad solida corpora firmiter adhærescentes, aquæ facile miscibiles, *Mucosi* adpellantur. Schol-

(a) Ibid. p. 553. (b) Ibid. p. 543. (c) Ibid. p. 627. (d) Ibid. p. 631.
(e) Ibid. p. 579. (f) Ibid. p. 568. (g) Elem. Physiol. T. II. p. 361.

SECTIO XII. CAPUT II.
SCHOLIUM.

Ad eam classem (§. 410.) refertur mucus narium, palati, linguæ, faucium, asperæ arteriæ, pulmonum, oesophagi, ventriculi, ductuum biliariorum, intestinorum, vésicæ urinariæ, urethræ utriusque sexus, uteri, vaginæ muliebris. Huc porro reducitur ab HALLERO succus funiculi umbilicalis, & verior pars seminis, quæ a teste advenit; denique pigmentum nigrum, quod internam ueræ faciem obducit. (a)

§. CCCCXI.

Humores, qui certo caloris gradu, aut alcohole, aut acidis mineralibus coguntur, *Gelatinosi* audiunt.

SCHOLIUM.

Tales humores (§. 411.) sunt sanguinis serum, ovi albumen, humor qui pullum in ovo circumfluit, liquor annii humani, vapor pleuræ, pericardii, abdominis, liquor ovulorum Graafianorum, liquor glandularum renalium, succus ventriculi, & intestinorum, vapor telæ cellulosæ, gluten quod in nervis & medulla spinali reperitur, unguen Haversianum.

§. CCCCXII.

Humores, quorum maximam partem portio inflammabilis constituit, *Oleosi* sunt.

SCHOLIUM.

Hujus census (§. 412.) est pinquedo, sebum cutaneum, cerumen aurium, bilis, pars sanguinis rubra, lac, succus thymi, & prostatarium. Huc etiam materia electrica ab HALLERO revocatur. (b)

§. CCCCXIII.

Humores denique, qui simplicissimi, subtilissimi, mobilissimi, & summe volatiles sunt, *Spirituosi* dicuntur.

SCHOLIUM I.

Eam classem (§. 413.) liquidum nerveum absolvit, de quo suo loco.

SCHO-

(a) Elem. Physiol. l. c. p. 363. & seq. (b) Ibid. p. 367.

SCHOLIUM II.

Quilibet facile perspiciet, multos in corpore humano humores, ex variis (§. 408. ad 413) recensitis, commixtos esse, qui inde *Miscellanei* dici possent; ne tamen nimium subtiles finius, sufficit unumquemque humorem secundum præcipuam suam partem ad certam classem reduxisse.

§. CCCCXIV.

Quoniam omnis secretio fit per arterias (§. 405.), organa autem fecernentia (§. 403.) omnia arterias ab aorta habent, hæc vero e ventriculo cordis sinistro prodit, ut docet Anatome; sequitur *sanguinem ad omnium humorum* (§. 407.) *secretionem e ventriculo cordis sinistro provenire.*

§. CCCCXV.

Ergo *sanguis in sinistro cordis ventriculo contentus talia possidet, ex quibus postea secretorii humores omnes* (§. 407.) *confici possunt* (§. 414.).

SCHOLIUM I.

Duplici modo (monente CL. de GORTER (a)) possumus considerare liquores fecernendos, vel quod existant in sanguine permixti, quales postea fecernuntur propter reliquorum liquidorum permissionem non conspicui, ut sales soluti in aqua non conspiciuntur optimis microscopiis, quum tamen revera in isto sint liquore, separatione postea producendi: vel quod materia reperiatur in sanguine talis, ex qua fieri potest liquor, qui est fecernendus. Uti ex vegetabilibus, mineralibusque multa educuntur fermentatione, putrefactione, combustionem, aliove modo, quæ revera talia non præxistebant in iis, (b) etsi in iis præsens fuerit materia, quæ arte ita potuerit commutari. Verum omnia ex omnibus non possunt præparari, sed requiritur præexistentia materiæ huic mutationi aptæ. Debet ergo in ventriculo cordis sinistro talis liquor adesse, qualis separatur
per

(a) De secret. n. 36. (b) Conf. BOERHAAVE. Elem. Chem. II. p. 4.

per organa secretoria, aut talis, ex quo organi ope confici potest secretorius humor. (a)

SCHOLIUM II.

Fuerunt, qui bilem semel confectam non redire ad cor crederent, verum fusam ex ductu cholidocho in Duodenum, a venis Meseraicis absorberi, sicque iterum per venam portæ duci versus hepar, atque ita peculiarrem sibi servare circulationem. At, quæso, unde primæ bilis venerat materies? an non bilis deperditur quotidie, & hinc nova restitui debet? (b) an non bilis portio quædam cum chylo lactea intrat, & ad cor devehitur? (c)

§. CCCXXVI.

Per arterias ad omnia organa secretoria fertur liquor; ubique fere ejusdem indolis, ex quo peculiaris futura est secretio. Per arterias ad omnia organa secretoria fertur liquor ex ventriculo cordis sinistro (§. 414.), quo paulo ante in venis commistus (§. 168.) advenerat; & qui liquor talia continet, ex quibus omnes humores confici possunt (§. 415.); ergo ubique fere ejusdem indolis est.

SCHOLIUM I.

Ea propositio (§. 416.) vera est, si consideremus ad omnia organa secretoria communem sanguinis massam deferri; neque repugnat iis, quæ de sanguine carotico (§. 71.) dicta, & quæ de venæ portarum sanguine alibi dicuntur; rigoris tamen geometrici gratia fere additum est.

SCHOLIUM II.

Quæ vero HALLERUS de sanguine carotico in oppositæ (§. 71.) sententiæ favorem profert, (d) debiliora mihi esse videntur iis, quæ pro nostra sententia (e) habet. Nam I. longe major copia sanguinis est, quæ
ad

(a) Conf. HALLER. Elem. Physiol. T. II. p. 368. (b) Conf. BOERHAAVE. Praelect. Acad. T. I. ad §. 112. (c) Ibid. ad §. 105. (d) Elem. Physiol. T. IV. p. 142. (e) Ibid. T. II. p. 413. & seqq.

ad reliquas corporis partes deferitur, quam ea, quæ ad cerebrum mittitur, ut omnes norunt. 2. An velocitas illa major sanguinis carotici ex sola rectitudine viæ? an non potius etiam ex majori hujus sanguinis soliditate derivanda (demonst. §. 71.), quum motus quantitas factum ex celeritate in massam fit.

§. CCCCXVII.

COROLLARIUM I.

Ergo ratio, quare in qualibet corporis particula idem constanter humor, in sanitate, generetur, potissimum in iis mutationibus, quas ille liquor (§. 416.) experitur, consistit.

§. CCCCXVIII.

COROLLARIUM II.

Si vero eæ mutationes (§. 417.) per morbos, in aliis corporis partibus contingant, ac in sanitate, etiam humores alios generari, necesse est.

SCHOLIUM.

Quemlibet fere humorem in quacunque corporis parte secerni posse, observationes medicæ docent, quarum multas collegit HALLERUS. (a)

§. CCCCXIX.

Humores secreti sæpe longe aliam indolem adquirunt, dum ad locum sui officii perveniunt, aut excernuntur, quam in actu secretionis habuerunt. Id experimenta docent, si urinam in pelvi renali cum urina vesicæ, bilem hepatis cum bile vesiculæ felleæ, aut ductus cholidochi conferamus.

§. CCCCXX.

COROLLARIUM.

Ergo liquori ad secretionem adlato (§. 416.) aliæ mutationes induci possunt, antequam ad organum secretorium per-

veniat per ea, quæ (§. 67. ad 134.) dicta: aliæ in ipso organo secretorio: aliæ demum post secretionem jam factam.

CAPUT III.

DE

FABRICA ORGANORUM SECERNENTIUM.

§. CCCCXXI.



Omnes arteriæ, per quas in corpore humano secretiones fiunt (§. 405.), aut in vascula exhalantia recta porrecta desinunt, aut glandulas, aut viscera (§. 402.) his similia constituunt. Microscopia, & injectiones anatomicæ id evincunt.

SCHOLIUM.

Glandularum historia, quarum jam alias mentionem feci (§. 308. in Schol.), hic exponenda venit.

§. CCCCXXII.

Pars corporis humani peculiaris fabricæ, quæ humores adlatos per suam fabricam determinata ratione mutat, mutatosque per proprium ductum excretorium ad usum quemdam ablegat, *glandula* dicitur.

SCHOLIUM I.

Glandularum eam dare definitionem, quæ omnes veras glandulas comprehendat, & nullis aliis partibus sit communis, rem esse adeo difficilem, ut præstantissimi, acutissimique viri id præstare non potuerint, cum CL. HEISTERO, (a) confiteor. Quare glandulam per *fabricam peculiarem*, & *ductum excretorium proprium* ab aliis partibus humores mutantibus, aut

sc-

(a) Compend. Anat. T. II, §. 356.

secernentibus, puta pulmonibus, pleura, pericardio, intestinis &c. distinguere putavi. Fateor tamen, etiam dari aliquas in corpore nostro glandulas, de quarum ductibus excretoriis inter Anatomicos necdum quid certi determinatum reperitur. Verum an ideo hisce destituuntur? Fors ventura ætas eos deteget. Porro vocabulo generico *mutationis* (§. 422.) etiam hæ glandulæ comprehenduntur, quæ humores solum ita mutant, ut nulla secretio in illis contingat, quales sunt e genere conglobatarum.

SCHOLIUM II.

Glandula (§. 422.) nomen a glandibus forte quercinis, quarum figuram nonnullæ æmulantur, derivat mox laudatus HEISTERUS. (a) Græcis ἀδὴν dicitur, & ejus descriptio jam in HIPPOCRATICIS libris reperitur. (b)

§. CCCCXXIII.

Glandulæ (§. 422.) in *simplicissimas*, *compositas*, *conglobatas*, & *conglomeratas* dividuntur.

SCHOLIUM.

CEL. BOERHAAVE glandulas tantum in *simplices*, & *compositas* dividit, (c) & simplices quidem *conglobatas*, compositas vero *conglomeratas* (quæ mens SYLVII de le BOE (d) nunquam fuit) dicit, (e) ubi tamen præterea aliud *simplicium* genus ipse describit. (f) In Epistola autem ad CL. RUY-SCHIUM (g) divisionem, quæ (§. 423.) facta est, & cum libro Naturæ optime convenit, proposuit.

§. CCCCXXIV.

Pars corporis, quæ propriæ membranæ simplici adparatu involucrum cavum format, intra quod singularis humor secretus, contentus, fatus, mutatus, per emissarium denique inde excretus, spectatur, *glandula simplicissima* dicitur.

G 2

SCHO-

(a) Ibid. §. 355. (b) περὶ ἀδένων. (c) Instit. Med. §. 241. (d) Disput. Med. V. (e) Instit. Med. §. 241. 242. 257. (f) Ibid. §. 352. (g) de Gland. Fabr.

SCHOLIUM I.

Hanc definitionem (§. 424.) BOERHAAVIUS (a) dedit, eamque ipse RUYSCHIIUS agnoscit, glandulas tamen has potius *Cryptas* adpellat. (b) *Glandula* etiam nomen his minus recte convenire existimat CL. HEISTERUS. (c)

SCHOLIUM II.

Ad eam classẽ (§. 424.) ILL. HALLERUS reducit glandulam ad radicem linguæ positam, (d) glandulas buccales, labiales, epiglottideas, pharyngeas, oesophageas, palatinas, faucium, asperæ arteriæ, ventriculi, & intestinorum solitarias, & forte etiam glandulas vesicæ urinariæ, vesiculæ fellis, & agmina intestinorum glandulosa. (e) Huc etiam pertinent glandulæ cerumen adiposum secernentes, tum glandulæ in caruncula lachrymali, in areola mammarum, sub axillis, in inguinibus, in facie, naso, labro superiore, cute capillata capitis &c. (f).

§. CCCCXXV.

Quæ ex pluribus simplicissimis (§. 424.) sibi junctis conflatur, *glandula composita* audit.

SCHOLIUM I.

Triplici modo has glandulas (§. 425.) oriri posse HALLERUS statuit. (g) 1. Quando unice vicinæ, celluloso vinculo laxè conjunctæ, suum tamen quæque ostiolum excretorium sibi proprium habent, ut in expansione mucosa linguæ, glandulis arytenoidæis. 2. Quando vicinæ, & præterea communi velamento obvolutæ, in aliquem ejus recessum, multis cryptis perinde patentem, mucum suum deponunt, tonsillarum exemplo. 3. Quando simplex folliculus suum quidem quisque excretorium ductum habet, ii vero ductus ex multis vicinis folliculis in unicum communem canalem excretorium conveniunt. Tales in intestinis, ductu cæco linguæ, narium septo, reperiuntur. Hæc ultima ea species est, quam BOERHAAVIUS sub nomine *compositarum glandularum* descripsit, & depinxit. (h)

SCHO-

(a) Epist. ad RUYSCH. p. 3. (b) Epist. ad BOERH. p. 49. (c) Comp. Anat. §. 399. (d) Oper. min. T. I. p. 569. (e) Id. Elem. Physiol. T. II. p. 400. (f) Ibid. p. 409. & seq. (g) Ibid. p. 400. seq. (h) Epist. cit. p. 25.

SCHOLIUM II.

Ad eam classẽ (§. 425.) etiam quædam nasi, faciei glandulæ sebaceæ pertinent. (a) Denique huc *sinus mucosi* HALLERI referendi sunt, quorum alios statuit simplices, ut in naribus secundum septi basin, urethra, & partibus genitalibus utriusque sexus: alios compositos, ut in urethra virili, intestino recto, (b) & palpebris. (c)

§. CCCCXXVI.

Glandulæ, quæ vasa lymphatica emittunt, & recipiunt, *Conglobatæ* dicuntur.

SCHOLIUM I.

Ad has (§. 426.) primario *Glandularum* nomen pertinere HALLERUS existimat. (d) Reperiuntur autem tales in facie, ad glandulam parotidem, in maxilla inferiore, in pharynge; tales sunt jugulares, cervicales, occipitales, subclaviæ, superscapulares, axillares, sternales, submamillares, dorsales, omentales, gastricæ, mesentericæ, aliæque plures, quarum historiam apud HALLERUM videre est. (e).

SCHOLIUM II.

In his glandulis (§. 426.) acini copiosi reperiuntur, qui tamen uneri vasorum glomeruli sunt, uti RUYSCHIIUS, (f) & ALBINUS detexerunt.

§. CCCCXXVII.

Quæ demum ex prioribus (§. 426.) componuntur, *Glandulæ Conglomeratæ* adpellantur.

SCHOLIUM.

Tales (§. 427.) sunt Parotides, Maxillares, Thymus, Thyroidea, mamma, pancreas, capsulæ renales, prostata &c. Hisce MALPIGHIUS viscera pleraque, ut hepar, lienem, renes, testes, cerebrum comparabat. Huc etiam reducit HALLERUS glandulas ad articulationes fitas. (g)

G 3

§. CCCCXXVIII.

- (a) HALL. Elem. l. c. p. 411. (b) Ibid. p. 401. & seq. (c) Ibid. p. 411.
 (d) Ibid. T. I. p. 181. (e) Ibid. p. 187. & seq. (f) Epist. de Fabr. Glandul. p. 65. (g) Elem. Physiol. T. II. p. 403. & seqq.

§. CCCCXXVIII.

*Glandularum conglomeratarum (§. 427.), viscerumque
bis similiarum (§. 421.) minores acini omnes, non sunt folli-
culi cavi, sed veri vasorum glomeres. Id experimenta
RUYSCHII, ALBINI, aliorumque quamplurima contra
MALPIGHIIUM demonstrant.*

SCHOLIUM I.

Hæc est ea lis (§. 428.), quæ tam acriter MALPIGHIIUM inter &
RUYSCHIIUM agitata fuit. (a)

SCHOLIUM II.

Viscera (§. 427. in Schol.) nominata ad glandulas non pertinere egre-
gie probat CL. HEISTERUS; licet enim omnes glandulæ partes sint vasculosæ
(§. 428.), non tamen omnes partes vasculosæ glandulæ dicendæ sunt, sed
vasculosum a glanduloso sollicitè distinguendum esse putat mox laudatus
VIR. (b)

§. CCCCXXIX.

COROLLARIUM.

Hinc *arteriarum longitudo, & inflexiones in glandulis
insigniter augentur (§. 428.)*

§. CCCCXXX.

Eadem RUYSCHII industria compertum habemus, *ul-
timas vasorum arteriosorum extremitates (§. 429.) in quoli-
bet secernente organo aliter esse configuratas.* (c)

§. CCCCXXXI.

Quoniam igitur omnis secretio fit per arterias (§. 405.);
eæ vero arteriæ omnes, aut in vascula exhalantia recta por-

rec-

(a) Conf. HALLER. l. c. p. 379. & seqq. (b) Comp. Anat. §. 398. (c)
Conf. RUYSCH. Thes. VI. p. 60. 81. Prodrum. ad dict. Thes. p. 4. n. 3. &
BOERHAAV Epist. ad RUYSCH. de Fabr. Gland. p. 28. & seq. & HALL.
l. c. p. 423. & seqq.

recta definunt, aut glandulas, & viscera his similia constituunt (§. 421.); evidens est, *omnium humorum* (§. 407. ad 413.) *organa secretoria esse aut vasa exhalantia, aut glandulas, & viscera his similia* (§. 422. ad 430.).

SCHOLIUM I.

Humores præcipui, qui ex glandulis prodire solent, (§. 424. ad 427. in Schol.) dicti sunt. Per vasa autem exhalantia secernuntur quidam aquosi (§. 408.), ut perspirabile sanctorianum, vapor pulmonum, lachryma, humor oculi aqueus, saliva, lymphæ ventriculorum cerebri; quidam mucosi (§. 410.), ut mucus uteri, vaginæ, vesicæ urinariæ, narium, sinuumque pituitariorum, mucus niger uverz; quidam gelatinosi (§. 411.), ut vapor pleuræ, pericardii, abdominis &c.

SCHOLIUM II.

Neque quis miretur, si uni eidemque humori plura diversaque cola assignata viderit, quum id reapse in corpore obtineat; exemplo est saliva, mucus &c. Atque id ipsum etiam summam in determinanda secretionis causâ difficultatem parit.



SECTIO XIII.

DE

CAUSIS SECRETIONIS HUMORUM
E SANGUINE.

CAPUT I.

DE

CAUSIS MUTANTIBUS HUMORES, ANTEQUAM
AD ORGANA SECRETORIA DEFERANTUR.

§. CCCCXXXII.

Non omnibus ostiis secretoriis eadem sanguinis elementa offeruntur. Non omnia sanguinis elementa eandem soliditatem habent (§. 59.), hinc nec eandem motus quantitatem (§. 60.), directionemque recipiunt; sed quæ eorum solidissima, quales globuli rubri sunt, potissimum lineam rectam (demonst. §. 71.), axinque canalis tenent (§. 75.); reliqua vero, quæ minus solida sunt, latera canalis magis sequuntur (§. 341.), & in ramos laterales transeunt (§. 342.). Sed in vasorum lateribus, & ex ramis lateralibus multa ostia secretoria oriuntur; hæc ergo aut nullos, aut pauciores certe globulos rubros recipient; ergo non omnibus ostiis secretoriis eadem sanguinis elementa offeruntur.

SCHOLIUM I.

Hanc propositionem (§. 432.) experimentis confirmat HALLERUS. (a)

SCHO-

(a) Elem. Physiol. T. II. p. 416.

SCHOLIUM II.

Eadem propositio minime repugnat illi, quæ (§. 416.) stabilita, nam potest fane ejusdem indolis liquor ad organum deferri, & tamen eadem hujus liquoris elementa ostiis secretoriis non adplicari.

§. CCCCXXXIII.

Sanguis non pervenit eadem velocitate ad omnia organa secretoria. Lumina arteriarum non sunt in omnibus organis secretoriis æqualia, neque omnia organa æqualiter a corde distant, neque arteriarum rami æquales cum truncis suis angulos ubique constituunt, & vario modo insuper flexi sunt, ut Anatome docet. Sed hæ causæ velocitatem sanguinis primigeniam mutant (demonst. §. 81. ad 89.); ergo sanguis non pervenit eadem velocitate ad omnia organa secretoria.

§. CCCCXXXIV.

Quo major est sanguinis ad organum delati velocitas, manente eodem ostii secretorii lumine; eo major est liquoris in hoc organo, intra datum tempus, secreti quantitas. Fluidi quantitates, quæ in dato tempore, ex datis foraminibus, fluunt, sunt generaliter in ratione composita temporum, foraminum, & radicum quadratarum altitudinum fluidi supra foramina. ^(a) Quum igitur velocitas sit in ratione directa altitudinum fluidi supra foramina, ^(b) erunt quantitates fluidi in ratione composita temporum, foraminum, & velocitatum. Sed tempora, & foramina manent eadem (per hypoth.); ergo quantitates fluidorum erunt in ratione velocitatum; proinde quo major est sanguinis ad organum delati

TOMUS II.

H

ve-

(a) s' GRAVESANDE Elem. Phys. Math. §. 1639. (b) Ibid. §. 1574.

velocitas, eo major est liquoris intra datum tempus secreti quantitas.

SCHOLIUM.

Sint duo vasa fecernentia A, & B; ostium secretorium in A = L, in B = l; altitudo fluidi in A = F, in B = f; velocitas fluidi in A = C, in B = c; tempus in A = T, in B = t; quantitas fluidi secreti in A = Q, in B = q.

Erit : $Q : q = C : c.$

Nam (demonst. §. 434.):

$$Q : q = TL\sqrt{F} : tl\sqrt{f}.$$

Ergo etiam (a) $Q : q = TLF : tlf.$

Sed (demonst. §. 434.):

$$C : c = F : f.$$

Ergo etiam : $Q : q = TLC : tlc.$

Quum autem (per hypoth.) $T = t,$

Et $L = l,$

Erit $Q : q = C : c.$ Q. E. D.

§. CCCCXXXV.

COROLLARIUM I.

Quæcunque ergo, cæteris paribus, humorum velocitatem versus quoddam organum secretorium augment; eadem etiam humoris secreti quantitatem augment; & contra, quæcunque eam velocitatem minuunt, etiam humoris secreti quantitatem minorem reddunt (§. 434.).

§. CCCCXXXVI.

COROLLARIUM II.

Quoniam motus musculorum sanguinis velocitatem auget (§. 105.); patet, quare idem secretiones augeat; quies vero musculorum easdem minuat.

§. CCCCXXXVII.

(a) de la CAILLE Leçons Elem. de la Géom. n. 308.

§. CCCCXXXVII.

COROLLARIUM III.

Hinc *Animali dormienti, moerenti, hibernanti, secretiones parvæ* (§. 436.).

§. CCCCXXXVIII.

Quo major est sanguinis ad organum delati velocitas; eo, cæteris paribus, majores humorum particulae per eadem ostia secretoria transeunt. Ostia secretoria sunt extremitates arteriarum (§. 431.), hinc teretia, & flexilia (§. 12. 14.), habentque se in ratione directa virium distendentium, & inversa resistentium (§. 18. in Schol. 1.); vires autem distendentes sunt ut sanguinis velocitates (§. 92.); ergo, quo major est sanguinis velocitas, eo, cæteris paribus, ostia secretoria magis dilatantur. Porro sanguinis elementa non habent omnia eandem magnitudinem (§. 61.); ergo, quo magis ostia secretoria dilatata fuerint, eo majores sanguinis particulae per eadem transire poterunt; proinde, quo major est sanguinis velocitas, eo majores humorum particulae per eadem ostia transeunt.

SCHOLIUM.

Idem (§. 438.) in injectione Anatomica observatur. (a) Inde etiam a motu vehementiore sæpe sputum sanguineum, aut mictus cruentus.

§. CCCCXXXIX.

COROLLARIUM I.

Hinc *motus sanguinis lentior iterum facit, ut particulae humorum crassiores ab ostiis secretoriis excludantur.*

H 2

§. CCCCXL.

(a) HALLER. Elem. Physiol. T. II. p. 419.

§. CCCCXL.

COROLLARIUM II.

Igitur humorum velocitas aucta, secretionibus uberiores, sed impuriores: minuta vero, secretionibus parciales, sed puriores reddit (§. 435. 438.).

§. CCCCXLI.

Quo major est sanguinis ad organum delati velocitas, eo humores secernuntur fluidiores; & contra, quo minor est ea velocitas, eo humores secernuntur viscosiores. Quo major est sanguinis ad organum delati velocitas, eo celerius ejus elementa inter se moventur, & puncta contactuum sæpius mutantur; sed quo puncta contactuum sæpius mutantur, eo humor redditur fluidior (demonst. §. 126.); ergo quo major est sanguinis velocitas, eo humores secernuntur fluidiores. Q. E. primum.

Contra vero, quo minor sanguinis velocitas est, eo facilius sanguinis particulae ab invicem adtrahuntur (demonst. §. 125.), & hinc humor fit viscosior (§. 62.); ergo quo sanguinis celeritas minor est, eo humores secernuntur viscosiores. Q. E. alterum.

§. CCCCXLII.

Quoniam autem partes liquidi homogenei facilius se invicem adtrahunt, & congregantur, ut docet experientia; ea vero adtractio particularum in motu tardiore augetur (demonst. §. 441. n. 2.); sequitur humores eo magis homogeneos secerni, quo sanguis ad organum minori velocitate defertur; liquet igitur altera ratio, *quare humorum velocitas minuta secretionibus puriores reddat.*

SCHO-

Experimenta id (§. 442.) confirmantia adducit HALLERUS (a).

C A P U T II.

D E

CAUSIS MUTANTIBUS HUMORES IN
ORGANIS SECRETORIIS.

§. CCCCXLIII.



Mutationes, quæ humoribus in organis secretoriis contingunt, non pendent a fermentis. Fermentum enim est id, quod admixtum aliis ea in suam naturam mutat. ^(b) Tale autem fermentum nec quoad originem, nec quoad sedem, nec quoad actionem intelligitur. Nam vel in sanguine paratum præsto est: vel eorum quodlibet a sanguine in viscere suo demum generatur: vel cum homine in quoque viscere est coniunctum. Si primum, non intelligitur ratio, quare singula fermenta de communi sanguinis massa in suis visceribus separentur; si alterum, redibit quæstio; si tertium, intelligi non poterit, quomodo ea fermenti quantitas, quæ in embryonis visceribus contineri potuit, pro tota vita sufficere possit. Deinde tale fermentum vel hæreret in arteriis, vel in venis, vel in vasis secretoriis; primum admitti nequit, quum in arteriis sanguis a communi massa haud diversus observetur; alterum admittere nihil confert, quia venæ sanguinem a secretionis residuum ad cor reducunt; tertium a nemine intelligitur, quod in

H 3

duc-

(a) Elem. Physiol. T. II. p. 420. & seq. (b) HALLER. l. c. p. 465. & seq.

ductibus secretoriis humor secretus jam fit. Denique omnia fermenta ad actionem suam tempore, aere, amplis vasis, & motu tardissimo, aut plena quiete opus habent. ^(a) Ergo mutationes, quæ humoribus in organis secretoriis contingunt, non pendent a fermentis.

SCHOLIUM I.

Sententia (§. 443.) fuit HELMONTII, aliorumque. ^(b)

SCHOLIUM II.

Si vero *Fermentum* eo sensu intelligamus, quo a CL. HAMBERGERO fumitur, ^(c) de nomine lis erit.

§. CCCCXLIV.

Neque eæ mutationes (§. 443.) a diversa figura pororum in organis secretoriis repeti possunt. Secretiones enim omnes fiunt per arterias (§. 405.); harum autem lumina omnia circularia sunt, neque aliam figuram induere possunt (§. 18.); proinde nulli tales pori figura diversi existunt, & consequenter neque aliquæ humorum mutationes ab illis repeti possunt.

SCHOLIUM.

Hæc (§. 444.) CARTESII, & BORELLI opinio fuit. ^(d)

§. CCCCXLV.

Neque organorum secretiorum pori definito humore per totam animalis vitam pleni homogeneas de sanguine particulas adtrahunt. Id enim si obtineret, deberent humores definiti per totam vitam manere homogenei; atqui contrarium
often-

^(a) BORELL. de motu Anim. L. II. Prop. 136. 137. &c. ^(b) Conf. HALL. Elem. Physiol. T. II. p. 465. & seq. ^(c) Physiol. Med. §. 330. in Schol. ^(d) Conf. HALL. l. c. p. 468. & seqq.

ostendit diversitas humorum in foetu, & in adulto, ^(a) in sano, & ægroto. Proinde ea opinio in corpore humano locum non habet.

SCHOLIUM.

Hæc (§. 445.) humorum adtractio a BERNARDO CONNOR, LEIBNITZIO, multisque proposita fuit. ^(b)

§. CCCCXLVI.

Neque singulo humori sua major ad solidum determinatæ densitatis adtractio tribuenda, qua fieret, ut per ejusmodi tubulum facilius transfiret. Quodsi enim talis adtractio organis, humoribusque tribueretur, deberet idem definitus humor semper per unum idemque organum secerni, & vicissim idem organum unum eundemque humorem perpetuo secernere. Atqui contrarium experientia fere quotidiana docet; ^(c) ergo talis adtractio admitti nequit.

SCHOLIUM I.

Hypothesis (§. 446.) ea est, cui ILL. NEWTONUS, & CL. de GORTER famam conciliarunt. ^(d)

SCHOLIUM II.

Neque firmiorem adsensum meretur *Adtractio KEILIANA*, ex qua sequeretur viciniam cordis ad secretiones mutandas requiri unice; ubi tamen experientia certum est, in locis a corde remotissimis humores tenuissimos nasci; & contra. ^(e)

§. CCCCXLVII.

Neque humores in organo mutantur ob adhæSIONEM ad parietes solidos densitatis sibi proportionatæ. Nam si gravita-

(a) Ibid. p. 472. (b) Ibid. p. 471. (c) Ibid. p. 473. & seqq. (d) Ibid. p. 471. & seq. (e) Ibid. p. 475. & seq.

tatis specificæ inter humores, & solida proportionatæ ratio eam adhæſionem produceret, proportio perpetua inter humores ſecernendos, & viſcera ſecernentia daretur. Atqui experientia aliud nos docet. ^(a) Deinde ſtante tali proportionē non poſſent per idem organum diverſi humores, & idem humor per diverſa organa ſecerni, quod tamen obſervatur (demonſt. §. 446.). Ergo humores a tali adhæſione non mutantur.

SCHOLIUM.

Hæc (§. 447.) eſt celebris CL. HAMBERGERI ſententia, quam acriter impugnavit HALLERUS. ^(b)

§. CCCCXLVIII.

Mutat vero humores in organo ſecretorio 1) diverſa ultimarum arteriolarum configuratio. Ultimæ vaſorum arterioſorum extremitates in quolibet ſecernente organo aliter configuratæ ſunt (§. 430.); ergo in quolibet organo ſecernente flexiones ramorum, eorum anguli, diviſiones, & longitudines variant (§. 429.); conſequenter & velocitas (demonſt. §. 67. 68. 81. ad 89.), huiusque effectus (§. 116. ad 135.) in quolibet viſcere mutantur. Sed mutatis his humores etiam mutari neceſſe eſt (demonſt. §. 434. ad 442.); ergo diverſa ultimarum arteriolarum configuratio humores in organo ſecretorio mutat.

SCHOLIUM.

Ab hac ſola finium arterioſorum diverſitate (§. 448.) totam ſecretionum varietatem explicari credidit RUYSCHIVS. Verum ſunt quæpiam, quæ id prohibeant. Nam 1) fatendum eſt, retium varietatem veram, &

ulti-

(a) Ibid. p. 480. & ſeqq. (b) Ibid. p. 476. & ſeqq. & HAMBERG, Phyſiol. Med. §. 340. & ſeqq.

ultimam nondum satis innotuisse, cum de minimis, ultimisque arterioli hic quærat, ex quibus vascula novum humorem vehentia prodeunt; quæ vero majora retia, ex truncis potius multorum globulorum constituunt, ea non satis sui dissimilia, neque pro diversi humoris, qui quoque loco gignitur, varietate satis a se invicem aliena sunt. 2) Similis ultimarum etiam venarum diversitas in visceribus observatur, quæ tamen ad secretionem nihil confert. (a)

§. CCCCXLIX.

2) *Diversa diameter vasculi recipientis.* Sanguinis elementa non habent omnia eandem magnitudinem (§. 61.); quæcunque proinde diametrum vasculi recipientis superaverint, non transibunt vasculum illud, dum reliqua his minora transeunt; ergo diversa diameter vasculi recipientis humores in organo secretorio mutat.

SCHOLIUM.

Eam veritatem (§. 449.) injectiones Anatomica confirmant. (b) Nec obstat 1) dubium esse, num liquorum nostrorum particulae magnitudine inter se differant. 2) In animalibus grandissimis, & minutissimis, in homine adulto, & fœtu, per similia viscera humores similes generari, in quibus diametri vasculorum recipientium certe variæ esse debent. Nam ad primum meminisse oportet, aquæ puræ elementa minora esse, (c) quam salis, terræque elementa; indeque humores, quo plus aquæ continent, eo subtiliores esse debere; quid dicam de iis humoribus, qui sensus nostros fugiunt? Ad alterum recordari juvat, quanta sit differentia humorum in fœtu, & in adulto; animalia vero adulta minora possunt habere ductus secretorios æque magnos, ac grandissima animalia, sed numero pauciores; quid repugnat? (d) Demum non statuimus hanc unicam (§. 449.) causam diversitatis in humoribus secretis.

TOMUS II.

I

§. CCCCL.

(a) HALL. l. c. p. 427. & seq. (b) Ibid. p. 429. & seqq. (c) BOERHAAVE. Elem. Chem. I. p. 555. (d) Conf. HALLER. l. c. p. 432. & seqq.

§. CCCCL.

3) *Ostiolorum secretoriorum densitates.* Lumina vasorum flexilium sunt in ratione composita ex directa virium distendentium, & inversa resistentium (§. 18. in Schol. 1.); sed vires resistentes in ostiis secretoriis sunt in ratione densitatis (demonst. §. 42.); densitas vero in ostiis illis varia deprehenditur; ^(a) ergo & lumina ductuum secretoriorum variant. Quoniam igitur diversa diameter ostiorum secretoriorum humores mutat (§. 449.), idem a diversa eorum densitate obtinetur.

SCHOLIUM.

Idem (§. 450.) secretiones morbosæ confirmare videntur. ^(b) Eam tamen causam nimium ornavit CL. LAMURE. ^(c)

§. CCCCLI.

4) *Diversa vis irritabilis ductuum excretoriorum.* Partes corporis nostri ita sunt comparatæ, ut quæcunque earum stimulo quodam irritetur, illico humores ex aliis corporis partibus velocitate majori in eam ruant, ut docet experientia; ^(d) ergo pro diversa vi irritabili ductuum excretoriorum velocitas humoris ad organum delati variat. Sed mutata humoris ad organum delati velocitas secretionem mutat (§. 434. ad 442.); ergo diversa vis irritabilis ductuum excretoriorum humores in organo secretorio mutat.



CA-

(a) Ibid. p. 437. & seq.
438. & seqq.

(b) Ibid.

(c) Ibid. p. 483. & seq.


(d) Ibid. p.

CAPUT III.

DE

CAUSIS MUTANTIBUS HUMORES FACTA
SECRETIONE.

§. CCCCLII.

 *Humores e sanguine per causas (§. 432. ad 441. & §. 448. ad 451.) mutati, & secreti, mutantur ulterius pro varia ductus excretorii nascentis rectitudine, aut anfractibus.* Ductus glandularum, & viscerum excretorii canales sunt (§. 301. n. 5.); ergo liquores in iis contenti mutantur similiter, ut in canalibus. In canalibus autem liquoris contenti velocitas mutatur pro varia canalis rectitudine aut inflexione, pro varia ejus longitudine, angustia, pro varia plicarum, aut rugarum internarum ratione (§. 67. ad 70. & 81. ad 89.). Quum igitur hæc cuncta in ductibus excretoriis plurimum variare, deprehendat Anatome; necesse est, velocitatem humorum secretorum etiam plurimum mutari. Sed hæc mutata humores mutat (§. 434. ad 442.); ergo humores secreti pro varia ductus excretorii rectitudine, aut anfractibus mutantur.

SCHOLIUM.

Alias adhuc mutationes, ex eadem (§. 452.) causa provenientes, paulo inferius dicemus. Exempla adducit HALLERUS. (a)

§. CCCCLIII.

Quidam humores secreti in folliculos minores (§. 424. 425.), alii in receptacula (§. 5.) majora, deponuntur. Docet Anatome.

I 2

SCHO-

(a) l. c. p. 443. & seqq.

SCHOLIUM.

Receptacula majora (§. 453.) sunt intestina, vesicula felle, vesica urinæ &c. (a)

§. CCCCLIV.

Receptaculorum (§. 453.) alia proprios iterum excretorios ductus habent, quibus certo tempore in definitum usum humores eruçant; alia simili ductu destituuntur. Confirmat Anatome.

SCHOLIUM.

Priorum (§. 454.) exemplum præbet vesicula felle, vesica urinæ &c. qui ductus excretorii diversam fabricam nacti sunt, ut humores aliquantisper retinere, & suo iterum tempore emittere valeant. (b) Posteriorum exempla sunt cavæ articularum, cameræ oculi &c. (c)

§. CCCCLV.

Humores in folliculis, & receptaculis majoribus (§. 453.) contenti, in his 1) partem tenuiorem amittunt, 2) spissantur, 3) depurantur, 4) aliis humoribus miscentur, 5) acrimoniam induunt, 6) in usus necessarios adservantur. In folliculos, & receptacula quæcunque, non minus numerosæ, & forte copiosiores venulæ, quam arteriolæ exhalantes, aperiuntur, ut docet injectio; hæ autem humores tenuiores resorbent (demonst. §. 356.); ergo humores in folliculis partem tenuiorem amittunt. Q. E. primum.

Spissitudo humoribus inducitur, dum parte sua tenuiori spoliantur; hoc autem contingit in folliculis (n. 1. huj.). Porro, cum humores in receptaculis longiori tempore detineantur (§. 5.), particulæ humorum facilius se adtrahere possunt (demonst. §. 441. n. 2.). Denique receptacula

hæc

(a) Ibid. p. 445. (b) Ibid. p. 447. & seq. (c) Ibid. p. 457. & seq.

hæc calore humano continuo foveri, nemini dubium est; calor autem fluidiora dissipat, & humores inspissat. ^(a) Ergo humores in folliculis spissantur. Q. E. alterum.

Ostia secretoria, quæ humores aqua crassiores (§. 410. ad 413.) transmittunt, aquam, humoresque ei similes excludere nequeunt; ergo dum fecernuntur, ejusmodi humoribus misti sunt; depurantur igitur, si dicti humores auferantur. Sed hi humores in folliculis resorbentur (demonst. n. 1. huj.); ergo humores in folliculis depurantur. Q. E. tertium.

Humores diversos misceri eo melius, quo diutius in loco tepido adservantur, probat digestio Chemica; sed in folliculis, & receptaculis diversi generis humores sæpe conveniunt, ut vasorum ad hæc loca decursus docet; ^(b) ibique, tanquam in loco tepido (demonst. n. 2. huj.), aliquamdiu foveantur; ergo ibi aliis humoribus miscentur. Q. E. quartum.

Humores nostri ad naturam urinofam dispositi sunt (§. 134.); ergo similem acrimoniam induunt, quamprimum in loco tepido aliquamdiu detinentur; sed id fit in folliculis (demonst. n. 4. huj.); ergo in his acrimoniam induunt. Q. E. quintum.

Quoniam demum quædam actiones humanæ, certo tempore, definitam cujusdam liquoris copiam, exigunt, qui eo tempore tantus, & talis, præparari haud posset; aut definita liquoris excernendi quantitas colligitur, ne perpetua ejusmodi humoris excretio alias hominis actiones turbaret; patet

I 3

eos

(a) BOERHAAVE. Elem. Chem. I. p. 553. (b) HALL. l. c. p. 452. & seq.

eos humores in folliculis, & receptaculis in usus necessarios adſervari. Q. E. ſextum.

SCHOLIUM.

Veritates has (§. 455.) exemplis, & experimentis confirmat ILL.

HALLERUS. (a)

§. CCCCLVI.

'COROLLARIUM.

Quoniam & arteriæ exhalantes, & venæ reſorbentes, & tepor naturalis, etiam in plurimis ductibus excretoriis adſunt; liquet *mutationes* (§. 455.) *humoribus etiam in ductibus hiſce contingere.*

§. CCCCLVII.

Folliculi, & receptacula (§. 453.) *vel evacuantur propria vi contractili musculari, vel preſſione partium ambientium, vel utroque modo ſimul.* Fabrica partium, & phaenomena id demonſtrant. (b)

§. CCCCLVIII.

Ad eam evacuationem (§. 457.) *ſtimulantur vel ab acrimonia, vel pondere, humorum.* Docet experientia, & effectus irritabilitatis.

§. CCCCLIX.

Quicumque vero mutationes humorum (§. 432. ad 456.) expoſitas, attente conſiderat, videbit ſane nullam harum conditionum, quæ ad dictas mutationes requiruntur, ſolam ſufficere, ut in qualibet corporis particula, in ſanitate, idem conſtanter, & ab aliis diverſus humor generetur (§. 406.); ergo *ratio diverſitatis humorum in plurium conditione-*

(a) Ibid. p. 448. & ſeq. (b) Conf. HALL. l. c. p. 455. & ſeqq.

ditionum (§. 432. ad 456.) enumeratarum aggregato consistit.

§. CCCCLX.

Quoniam vero conditiones hæ (§. 459.) & in singulis, & in eodem sæpe organo secretorio vario modo possunt inter se combinari, ut consideranti adparet; clarum est, & *in singulis organis diversos, & quandoque in eodem organo diversos, aut in diversis organis eosdem humores generari posse.*

SCHOLIUM.

Hujus rei (§. 460.) veritas elucescet, cum de ejuslibet humoris secretionem in specie actum fuerit. Confer interea HALLERUM. (a)



SEC-

(a) Ibid. p. 462. & seqq.

SECTIO XIV.

DE

SECRETIONIBUS MORBOSIS.

CAPUT I.

DE

SECRETIONE LÆSA IN GENERE.



§. CCCCLXI.

Quum omnis actio læsa morbus fit (§. 170.); erit etiam *secretio* (§. 404.) *læsa morbus*, qui vel in excessu, aut impedimento conditionum enumeratarum (§. 459.) consistet (demonst. §. 171.).

§. CCCCLXII.

Ea læsio (§. 461.) contingit, dum *secretio* 1) *augetur nimium*, 2) *præternaturaliter minuitur*, 3) *penitus supprimitur*, 4) *depravatur*. ^(a)

§. CCCCLXIII.

Quoniam porro conditiones enumeratæ (§. 459.) partim in natura solidorum, partim in natura fluidorum (§. 406.), partim in utrisque consistunt; *totidem etiam erunt læsarum secretionum* (§. 461.) *fontes*.

CA-

(a) BOERH. Instit. Med. §. 803.

CAPUT II.

DE

SECRETIONIBUS MORBOSIS RATIONE

PARTIS SOLIDÆ.

§. CCCCLXIV.

Organa secretoria (§. 431.) *omnia morbos cohæ-*
sionis (§. 174.) *pati possunt.* Organa secreto-
 ria omnia, aut sunt arteriæ exhalantes, aut
 partes ex vasis compositæ (§. 428.); sed vasa hæc morbis
 cohæsionis adfici possunt (§. 174. ad 192. & §. 359. ad
 364.); ergo etiam organa secretoria his adfici possunt.

§. CCCCLXV.

Quo major fit organi secretorii debilitas (§. 364.), *vi*
cordis manente eadem, eo uberius fit humoris per idem orga-
num secretio. Quo major fit organi secretorii debilitas, eo
 ostia secretoria magis dilatantur (demonst. §. 179. n. 1.);
 sed quo ostia secretoria magis dilatantur, vi cordis manen-
 te eadem, eo uberius fit humoris per idem organum secre-
 tio (demonst. §. 360. n. 1.); ergo quo major fit orga-
 ni secretorii debilitas, vi cordis manente eadem, eo uberius
 fit humoris per idem organum secretio.

SCHOLIUM.

Ob hanc causam (§. 465.) Medici, quoties humoris cujusdam secre-
 tionem provocare nituntur, organum secernens medicamentis debilitanti-
 bus adgrediuntur.

§. CCCCLXVI.

Debilitas vasorum (§. 175.) secretiones minuere, & tandem suppressere potest. Debilitas vasorum facit eorundem extensionem (§. 179. n. 1.) cum parvo, aut nullo eorum in humores renixu (demonst. §. 176. n. 2.); ergo humores in iis adcumulantur. Sed si humores in vasis adcumulantur, resistentia cordi augetur (§. 239.), adeoque sanguinis ad organum delati velocitas minuitur (§. 93.). Quoniam igitur, hac minuta, quantitas humorum secretorum minuitur (§. 435.); debilitas vasorum secretiones minuere potest. Q. E. primum.

Quod si debilitas vasorum increseat, facit humorum stagnationem (§. 179. n. 4.); sed humoribus stagnantibus secretio suppressitur; ergo debilitas vasorum secretiones suppressere potest. Q. E. alterum.

§. CCCCLXVII.

Eadem debilitas humores secretos depravat. Debilitas vasorum ostia secretoria ampliora reddit (§. 465.), & humorum velocitatem minuit (§. 466. n. 1.); sed ostia ampliora (§. 449. 450.), & humorum velocitas minuta (§. 438. ad 442.) secretiones mutant, quæ mutatio, quum a sanitate fit aliena, depravatio est; ergo debilitas humores secretos depravat.

§. CCCCLXVIII.

COROLLARIUM.

Ergo ob vasorum debilitatem secretiones omni modo (§. 462.) peccare possunt.

§. CCCCLXIX.

§. CCCCLXIX.

Quo major fit organi secretorii rigiditas (§. 184.), vi cordis manente eadem, eo parcius fit humoris per idem organum secretio. Quo major fit organi secretorii rigiditas, eo ostia secretoria angustiora fiunt (demonst. §. 187.); sed quo ostia secretoria angustiora fiunt, vi cordis manente eadem, eo parcius fit humoris per idem organum secretio (demonst. §. 360. n. 1.); ergo quo major fit organi secretorii rigiditas, eo parcius fit humoris per idem organum secretio.

§. CCCCLXX.

COROLLARIUM.

Quum vasa secretoria eousque rigida fieri possint, ut humorem secretorium omnino non transmittant (demonst. §. 469.); *potest vasorum rigiditas secretionem impedire.*

SCHOLIUM.

Exemplum horum (§. 469. 470.) præbent mulieres duriori fibrarum compage donatæ, quæ minus, tardius, per longiora intervalla, aliquando omnino nihil, excernunt cruorem menstruum. (a)

§. CCCCLXXI.

Eadem rigiditas humores secretos depravat. Demonstratio est conversa (demonst. §. 467.).

§. CCCCLXXII.

Quum continui solutio (§. 191.) lædat actiones, quæ pendent ab integritate partium, & a determinato fluxu liquorum per vasa; (b) patet, *continui solutionem in organo secretorio humoris per idem organum secretionem lædere.*

(a) BOERHAAVE. Instit. Med. §. 667. & Aphor. §. 52. n. 2. (b) Id. Aphor. §. 149.

§. CCCCLXXIII.

Ostia secretoria diametro præternaturaliter aucta (§. 194.), *secretiones suas augent, & depravant*; & contra *eadem minuta* (§. 195.) *secretiones minuunt, sistunt, & depravant*. Demonstratur ex (§. 465. 467. 469. 470. 472.).

§. CCCCLXXIV.

Quoniam diversa vis irritabilis ductuum excretoriorum secretiones mutat (§. 451.); clarum est, *secretiones lædi, quoties ductus excretorii irritabilitate aucta, aut minuta peccant*.


CAPUT III.

DE

SECRETIONIBUS MORBOSIS RATIONE

PARTIS FLUIDÆ.

§. CCCCLXXV.

 *Plethora* (§. 197.) *secretiones* 1) *augere*, 2) *minuere*, 3) *supprimere*, 4. *depravare potest*. Plethora est abundantia sanguinis boni (§. 197.); sed abundantia sanguinis boni vasa, quibus continetur, dilatat, & hinc ostia secretoria ampliora reddit; ergo (demonst. 465.), quamdiu vires cordis adhuc sufficientes manent, plethora secretiones augere potest. Q. E. primum.

Quodsi sanguis ruber ulterius augeatur, vasa rubra continuo magis magisque distenduntur (demonst. n. 1. huj.); adeoque vasa rubra volumen priori majus adquirunt; vasa igitur, quæ his vicina, & teneriora sunt, facile ab his an-
gu-

gustantur (§. 195. 7.). Sed talia esse vasa ultima fecernentia, Anatome docet; ergo vasa fecernentia angustantur; his autem angustatis secretio minuitur (§. 469.). Porro quo major est sanguinis abundantia, eo major fit moles, quæ a corde moveri debet, & hinc cordi resistantia fit major (demonst. §. 239.); quo major autem fit cordi resistantia, eo minori celeritate sanguis movetur (§. 93.), & quo minori celeritate sanguis movetur, eo parcius fit humorum secretio (§. 435.). Ergo plethora secretionem minuere potest. Q. E. alterum.

Si plethora continuo aucta fuerit, causas parcius secretionis (demonst. n. 2. huj.) quoque augeri, necesse est; hæ itaque ad summum perductæ gradum secretionem omnino impediunt; igitur plethora secretionem supprimere potest. Q. E. tertium.

Ad bonam secretionem requiritur certa diameter ostiorum secretoriorum (§. 449.) & certa sanguinis velocitas (§. 434. ad 442.); sed hæc plethora depravat (demonst. n. 1. & 2. huj.); ergo plethora secretionem depravare potest. Q. E. quartum.

SCHOLIUM.

Secretiones a plethora *augeri* (§. 475.) docet mensium fluxus; (a) *minui*, immo *supprimi* posse, exemplum præbet ischuria a plethora nata; (b) *depravari* demum pulchre demonstrat ILL. B. de SWIETEN. (c)

§. CCCCLXXVI.

Quoniam omnes humores e communi sanguinis massa fecernuntur (§. 414.), facile patet, *ab inopia sanguinis* (§. 200.) *secretiones minui, aut penitus supprimi debere.*

K 3

SCHO.

(a) BOERH. Instit. Med. (§. 665. (b) Ibid. §. 821. (c) Comment. §. 106. d.

SCHOLIUM.

Incaſſum, immo cum ægroti damno in hoc caſu (§. 476.) Medici ſecretiones provocare ſtudent, niſi prius debita ſanguinis quantitas reſtituta fuerit. (a)

§. CCCCLXXVII.

Secretiones turbantur 1) *ſi ſanguinis elementa peccent ſoliditate aucta vel minuta* (§. 205. 206.). Sanguinis elementa juſto ſolidiora, ob majorem motus quantitatem (§. 60.), & ſuperficiem minorem (§. 108. in Schol.) facile vaſa tranſeunt, quæ in ſanitate tranſire prohibentur; & contra minus ſolida ab iis, quæ in ſanitate permeare debent, excluduntur; ergo, ſi elementa ſanguinis peccent ſoliditate aucta, vel minuta, ſecretiones turbantur.

SCHOLIUM.

Hinc ob minutam humorum ſoliditatem in morbis a glutinoſo ſpontaneo ortis, ſecretiones impediuntur. (b)

§. CCCCLXXVIII.

2) *Si ſanguinis elementa peccent magnitudine aucta, vel minuta* (§. 207. 208.). Ad bonam ſecretionem certa diameter vaſculi recipientis neceſſaria eſt (§. 449.); ſed ſi elementa ſanguinis juſto majora fuerint, non tranſibunt diametros, quas in ſanitate permeare debent; & contra, ſi juſto minora, tranſibunt, quæ retineri debent. Ergo, ſi elementa ſanguinis peccent magnitudine aucta, vel minuta, ſecretiones turbantur.

§. CCCCLXXIX.

(a) de GORTER Med. Compend. Tract. XXXIV. §. 5. (b) B. de SWIETEN Comment. §. 72.

§. CCCCLXXIX.

COROLLARIUM.

Igitur ad secretionum integritatem obtinendam non est semper, & unice tenuitati humorum studendum.

SCHOLIUM.

Male itaque CORNELIUS BONTEKOE integritatem valetudinis fere unice in tenuissimo sanguine posuerat. (a)

§. CCCCLXXX.

3) *Si peccent figura.* Ex sanguine enim acri (§. 209.) humores itidem acres fecerni, necesse est; quum elementa, quæ figuram sphaericam in vasis rubris non adquisivere, aut acquirere non potuerunt, eo minus in vasis secretoriis tenuioribus multo, & debilioribus, acquirere possint. Porro sanguis talis acrimonia sua vasa fecernentia lædit, aut constringit (demonst. §. 451.); ergo secretionem mutat.

SCHOLIUM.

Inde in acutissimis febribus, quibus tam subita putrefactio³ fit, saliva, bilis, sudor, urina mox degenerant, ut monet ILL. B. de SWIETEN. (b)

§. CCCCLXXXI.

4) *Si peccent cohæsione, aut divisibilitate nimia* (§. 214. 215.). Ad secretionem enim requiritur determinata elementorum magnitudo (§. 478.); ea vero pendet a determinata elementorum cohæsione, & divisibilitate (§. 56.); ergo secretionem turbantur, si elementorum cohæsiō, aut divisibilitas nimia sit.

SCHO-

(a) Conf. HALLER. Elem. Physiol. T. II. p. 151. (b) Comment. §. 86.

Ob talem vitiosam elementorum sanguinis cohæſionem in melancholicis ſecretiones lædi obſervamus. (a)

§. CCCCLXXXII.

Quum elementorum mollities nimia cohæſiones augeat (demonſt. §. 210.); rigiditas vero eorum nimia diviſioni reſiſtat (demonſt. §. 211.), liquet (§. 481.) ſecretiones turbari 5) *ſi ſanguinis elementa peccent mollitie, aut rigiditate nimia.*

§. CCCCLXXXIII.

Quoniam demum ad ſecretionum integritatem requiritur, ut in ſiniſtro cordis ventriculo ſanguis contentus talia poſſideat, ex quibus poſtea ſecretorii humores confici poſſunt (§. 415.); ea vero ſanguis in debita proportione poſſidere nequit, quoties ejus elementa proportione inter ſe peccant (§. 202.); patet ſecretiones turbari 6) *ſi ſanguinis elementa proportione peccent.*

CAPUT IV.

DE

MORBIS SECRETIONUM COMPOSITIS.

§. CCCCLXXXIV.



Si in organo ſecretorio vaſa ſecernentia obſtructa fuerint, nulla fiet humoris per vaſa obſtructa ſecretio.

Obſtructio eſt obturatio canalis tranſitum tollens liquido per eum tranſjiciundo (§. 218.); quæcunque ergo vaſa ſecer-

nen-

(a) B. de Swieren Comment. §. 1094.

nentia obstructa fuerint, humorem secernendum non transmittent; ergo si in organo secretorio vasa secernentia obstructa fuerint, nulla fiet humoris per vasa obstructa secretio.

SCHOLIUM.

Exemplum (§. 484.) præbet Icterus perpetuus ab hepatis scirrho. (a)

§. CCCCLXXXV.

COROLLARIUM.

Quoniam in parte corporis inflammata obstructio semper adest (§. 272.); patet, *quod si vasa secernentia inflammata fuerint, nullam pariter humoris per eadem fieri secretionem (§. 484.).*

SCHOLIUM I.

Veritatem hanc (§. 485.) confirmat v. g. ischuria in nephritide. (b)

SCHOLIUM II.

Inflammationes glandularum pro loci diversitate varia nomina fortuntur. Ita si in glandulis circa aures positis reperiantur, *Parotides*; si in inguinalibus, aut subaxillaribus, *Bubones*, &c. dicuntur. (c)

SCHOLIUM III.

Παρωτίς Græcis, quasi παρὰ τοῖς ὠσὶν ἀπόστημα prope aures abscessus dicitur; apud HIPPOCRATEM sæpe τὸ παρ' ὧς ἐπάσματα vocantur, & simpliciter τὰ παρ' ὧς. *Bubones* dicuntur, quia βιβώνας *inguina* vocarunt Græci. (d)

§. CCCCLXXXVI.

Partes glandulosæ (§. 426. 427.), & viscera his similia (§. 428.) obstructiones multo pertinaciores patiuntur. Glandularum, & viscerum his similium minores acini sunt veri

TOMUS II.

L

va-

(a) BOERHAAV. Aphor. §. 946. (b) Ibid. §. 995. (c) B. de SWIETEN
Comment. §. 416. (d) Ibid.

vaforum glomeres (§. 428.), & hinc angustiae, & flexiones in his multo plures sunt, quam in alia corporis parte (§. 429.). Quum igitur angustia vaforum obstructions faciat (§. 219. n. 1.), obstructions hæ etiam multo pertinaciores erunt, ubi dictæ angustiae majores deprehenduntur; proinde partes glandulosæ, & viscera his similia, obstructions multo pertinaciores patiuntur.

§. CCCCLXXXVII.

In dictis (§. 486.) partibus vis vitæ infra sanitatem facile deprimitur. Vis vitæ est aggregatum illarum causarum, a quibus humorum circulatio pendet (§. 228.); ea igitur ibi deprimitur facilius, quo vis acceleratrix non pertingit. Sed ea non pertingit ad harum partium ultima vasa secretoria, ob nimiam eorum (§. 429.) longitudinem (demonst. §. 143.); proinde in dictis partibus vis vitæ infra sanitatem facile deprimitur.

§. CCCCLXXXVIII.

Partes glandulosæ, & viscera (§. 486.), dum obstruuntur (§. 484.), aut inflammantur (§. 485.), facile scirrhusæ fiunt. Partes hæ obstruuntur pertinacius (§. 486.), & vis vitæ infra sanitatem multum, ac sine correctione causæ deprimitur (§. 487.). Sed si in parte quadam corporis obstructa hæc contingant, obstructio in scirrhum tendit (§. 290.); ergo dictæ partes, dum obstruuntur, facile scirrhusæ fiunt.

SCHOLIUM.

Pulcherrimam glandularum scirrhusarum αἰτιολογίαν dedit ILL.

PRÆSES NOSTER D. MAC-NEVEN. (a)

§. CCCCLXXXIX.

(a) Dissert. de raro Ventr. casu p. 16. & seqq.

§. CCCCLXXXIX.

COROLLARIUM.

Hinc etiam *facile in cancrum, & carcinoma* (§. 292.) *transeunt* (§. 488.).

SCHOLIUM.

Hæc est (§. 488. 489.) ratio, quare partes glandulosæ, & his similes, præ aliis facilius dictis vitiis adficiantur (§. 292. in Schol. 2. 3.).

§. CCCCXC.

Quo plura vasa fecernentia in organo secretorio obstructa fuerint (§. 484.); *eo minor humoris quantitas per idem organum, major vero per organa vicina, & aperta, fecernetur.* Quo plura vasa fecernentia in organo secretorio obstructa fuerint; eo plura erunt vasa, quæ pro abolitis haberi poterunt, quia per eadem nulla fiet humoris secretio (§. 484.); sed quo plura vasa in organo secretorio abolita fuerint, eo, cæteris paribus, minor humoris quantitas per idem organum fecernetur; ergo, quo plura vasa fecernentia in organo secretorio obstructa fuerint, eo minor humoris quantitas per idem organum fecernetur. Q. E. primum.

Quo plura vasa fecernentia in organo secretorio obstructa fuerint; eo sanguis celerius per canales loco obstructo vicinos, & apertos movetur (demonst. §. 262.); consequenter sanguis celerius ad organa vicina, & aperta defertur. Sed quo sanguis celerius ad organa vicina, & aperta defertur, eo major per eadem fit humorum secretio (§. 434.); ergo quo plura vasa fecernentia in organo secretorio obstructa fuerint, eo major humoris quantitas per organa vicina, & aperta fecernetur. Q. E. alterum.

SCHOLIUM.

Confirmare id (§. 490. n. 2.) videtur diarrhoea a suppressa transpiratione orta. (a)

§. CCCCXCI.

COROLLARIUM I.

Quoniam in morbis inflammatoriis adest obstructio, dum simul in locis vicinis, & apertis vis vitæ augetur (§. 272.); patet, *quare in morbis inflammatoriis quædam secretiones supprimantur, aliæ vero præternaturaliter augeantur* (§. 490.).

§. CCCCXCII.

COROLLARIUM II.

Quum in morbis inflammatoriis pars aquosa sanguinis dissipetur (§. 277.); liquet ulterius, *quare in his morbis humores aquosi quandoque majori copia secernantur.*

SCHOLIUM.

Inde (§. 492.) sudor symptomaticus sæpius originem ducit. (b)

§. CCCCXCIII.

COROLLARIUM III.

Quum porro velocitas sanguinis aucta secretiones impuras reddat (§. 440.); & in morbis inflammatoriis sanguis oleosior reddatur (§. 281.); clarum etiam fit, *unde in morbis inflammatoriis humores secreti impuri, oleosioresque sæpius evadant.*

§. CCCCXCIV.

(a) B. de SWIETEN Comment. §. 720. 722. (b) Comment. §. 715.

§. CCCCXCIV.

COROLLARIUM IV.

Quia demum in dictis morbis sanguis nimiam viscositatem induit (§. 278.), ideoque ob majorem partium cohæſionem (demonſt. §. 62.) ſecretiones turbantur (§. 481.); patet iterum ratio, *quare in morbis inflammatoriis ſecretiones tam frequenter turbentur.*

SCHOLIUM.

Hæc omnia (§. 490. ad 494.) clariora ſient, cum de ſecretionibus in ſpecie actum fuerit.

§. CCCCXCV.

In glandulis, & viſceribus his ſimilibus (§. 426. ad 428.) hydatides oriri poſſunt. Glandulæ, & viſcera his ſimilia habent lymphatica vaſa (§. 426. ad 428.); ſed in vaſis lymphaticis hydatides oriri poſſunt (§. 400.); ergo in dictis partibus hydatides oriri poſſunt.

SCHOLIUM.

Quum hydatides non ſint niſi deformationes vaſorum lymphaticorum (demonſt. §. 400.) nemo ſane per eas folliculos MALPIGHIANOS (a) in glandulis, & viſceribus demonſtrare poteſt (§. 400. in Schol. 1.).

§. CCCCXCVI.

Humores, qui per ductus excretorios excernuntur (§. 454.), poſſunt, jam ſecreti, ob vitia ductuum excretoriorum, in excretionem, augeri, minui, ſupprimi, & depravari. Ductus excretorii canales ſunt (§. 301. n. 5.), hinc diametro etiam augeri præternaturaliter poſſunt (§. 193.), aut violentius irritari (§. 474.), ſicque excretionem augere. Q. E. primum.

L 3

Li-

(a) Conf. HALLER. Elem. Phyſiol. T. II. p. 383. & ſeq. & 390. & ſeqq.

Iidem etiam diametro minui, immo claudi possunt (demonst. n. 1. huj.); ergo excretionem minuere, aut suppressere. Q. E. alterum, & tertium.

Quia vero ad sanitatem requiritur, ut quidam humores in folliculis suis mutantur, & adferventur (§. 455.), ea mutatio eo major erit, quo humores diutius in folliculis contenti fuerint; & contra. Quodsi igitur humores nimis copiose, aut nimis parce excernantur, aut demum penitus retineantur, aliter, ac in sanitate requiritur, mutabuntur; proinde humores depravari sic possunt, Q. E. quartum.

SCHOLIUM.

Quod eadem mala (§. 496.) ex resolutione, aut nimia contractione sphincterum musculosorum, quæ in ostiis quorundam ductuum excretoriorum adsunt, contingere possint, manifestum fiet, cum de natura ejusmodi sphincterum actum fuerit. Interea id confirmat urinæ incontinentia a resolutis fibris sphincteris vesicæ, (a) dysuria, & ischuria a spasmo earundem fibrarum. (b)

§. CCCCXCVII.

In organis secretoriis (§. 424. ad 427.) tumores generari possunt. Organa hæc obstrui possunt (§. 484.); partes autem obstructæ tument (demonst. §. 266.). Porro potest organum secernens esse sanum, & ductus excretorius diametro minui vel claudi (§. 496.); ergo, manente eadem humoris secretionem, excretio fiet parcior, aut nulla (per eund.); consequenter humor in organo accumulabitur, & generabitur tumor (demonst. §. 266.); ergo in organis secretoriis tumores generari possunt.

SCHO.

(a) БОЕРН. Instit. Med. §. 823. (b) Ibid. §. 821.

SCHOLIUM I.

Hi tumores (§. 497.) varia nomina accipiunt vel a loco, vel a materie contenta. Ita qui in glandulis simplicissimis (§. 424.), aut compositis (§. 425.), oriuntur, a ductu excretorio obstructo, *Ampullæ*, sique in specie sint in cute capillata capitis, *Talpæ* dicuntur; (a) si in mesenterii, aut colli glandulis, *scrophulæ*, vel *strumæ* &c. A materie, si ea melli similis, *Melicerides*, si pulvi frumentaceæ, *Atheromata*, si sebo, *steatomata* &c. dicuntur.

SCHOLIUM II.

Talpæ a similitudine nomen habent; *scrophulæ* Græcis *χοιράδες*, quia porcos infestare solent, dicuntur; *Meliceris* ex *μέλι* mel, & *κηρίον* favus compositum est; *ἀθήρωμα* ab *ἀθήρα* pulvis genus, & *στέαμα* a *στέαρ* sebum, derivatur.

SCHOLIUM III.

Qui MALPIGHIIUM sequuntur, his (§. 497. Schol. I.), & similibus morbis ad glandularum folliculos demonstrandos utuntur. Verum, quum similes tumores etiam in fabrica cellulosa, quæ ubique adest sedem figant, ut suo loco dicetur, nihil omnino exinde pro glandularum fabrica concludi potest. (b)



SEC-

(a) B. de SWIETEN Comment. §. 112. (b) Conf. HALLER. Elem. Physiol. T. II, p. 382, & seqq. & 389. & seq. HEISTER. Comp. Anat. §. 400.

SECTIO XV.

DE
TELA CELLULOSA.

CAPUT I.

DE
FABRICA TELÆ CELLULOSÆ.

§. CCCCXCVIII.



Partes humani corporis minimæ, & simplicissimæ, ex quibus aliæ partes componuntur, *Elementa corporis humani* adpellantur.

SCHOLIUM.

Eo sensu (§. 498.) *Elementum* GALENUS sumpsit. (a) Non consideramus autem hic elementa corporis in genere, sed elementa corporis humani, ut talis.

§. CCCCXCIX.

Pars, quæ ex pluribus talibus elementis (§. 498.), secundum longitudinem sibi adpositis, concrefcit, *Fibra* dicitur.

SCHOLIUM.

Veteribus *Fibræ* etiam lobi pulmonum dicebantur. (b)

§. D.

Fibræ (§. 499.) *flexiles sunt, & elasticæ*. *Fibræ* salva cohæsione, in aliam figuram mutari possunt, & in magnitudine sua ita variari, ut eandem, causa distrahente, ablata
ite-

(a) Conf. B. de SWIETEN Comment. §. 21. (b) HEISTER. Comp. Anat. §. 23.

iterum recuperent, ut docet experientia; ergo (§. 13. 24.) fibræ flexiles, & elasticæ sunt.

SCHOLIUM.

Ea natura (§. 500.) etiam in fibris ossis fere superest, si subtilia fila separaveris. (a)

§. DI.

Elementa (§. 498.) *fibrarum* (§. 499.) *sunt terra, & gluten.* Terra corpus est, quod nec in aqua solvitur, nec ad ignem fluit, sed fixum perstat; (b) sed ejusmodi partes in fibris animalibus detegit putrefactio; (c) ergo elementa fibrarum sunt terra. Q. E. primum.

Partes terrestres (demonst. n. 1. huj.) friabiles sunt, (d) in fibris vero cohærent inter se cum flexilitate (§. 500.); sed cohæsiō cum flexilitate obtinetur, si inter elementa humor lubricans intercedat (§. 15. n. 2.); humor autem lubricans partium cohæsiōnem augens gluten dicitur; ergo ad fibrarum elementa etiam gluten pertinet. Q. E. alterum.

SCHOLIUM.

Partibus terrestribus (§. 501. n. 1.) aliquam ferri partem mistam esse credit HALLERUS; (e) atque similis conjectura fuisse videtur CEL. BOERHAAVE. (f)

§. DII.

Gluten hoc (§. 501. n. 2.) *aqua, & oleum præbet.* Glutine partes terrestres uniuntur (demonst. §. 501. n. 2.); sed si ex partibus animalibus aqua, & oleum auferatur, perit elementorum cohæsiō, ut docet putrefactio, ossiumque

TOMUS II.

M

Ca-

(a) HALL. Elem. Physiol. T. I. p. 8. (b) BOERHAAVE. Elem. Chem. I. p. 630. (c) B. de SWIETEN l. c. §. 21. (d) BOERH. l. c. (e) Elem. Physiol. T. I. p. 4. (f) Elem. Chem. I. p. 663.

calcinatio; & restituta aqua, aut oleo, hisce partibus, elementorum cohæsiō restituitur; ^(a) ergo gluten hoc aqua, & oleum præbet.

SCHOLIUM I.

Ad cohæsiōnem firmam, & intractabilem sufficit omnino proximus particularum contactus; alienarum (§. 502.) interventus, cohæsiōnem modo adtemperat, quæ tanto laxior est, quo istorum ad terram major ratio. ^(b) In glutine hoc pars plurima aqua est, aliqua oleum, cum hujus ad glutinationem vis maxima sit. ^(c)

SCHOLIUM II.

Quum aqua pura vix obtineri possit, sed salina, saponacea &c. immo terram ipsam, sæpe sibi mixta habeat; ^(d) inde elucescere puto. 1. Quomodo sustineri queat aquam solam gluten (§. 502.) constituere posse. 2. Cur multi homines sola aqua vitam diu sustentare potuerint, ^(e) quale exemplum puellæ decem, & dimidii annorum novissime relatum est, quæ fere quatuor annis sola aqua frigida pro nutrimento utebatur; monendum attamen eandem toto fere hoc tempore, ob morbum, quo adficiebatur, motum muscularem vix exercuisse. ^(f)

SCHOLIUM III.

CL. GAUBIUS aquæ, & oleo (§. 502.) principium salinum addit, ^(g) quod cum principio inflammabili, aquæ & terræ, ad opposita cohærentiæ extrema constitutis, nec nude sociabilibus, interponitur; inflammabile enim terræ, salinum aquæ amicum, alterum quoque alteri facile coalescens; ut adeo horum interventu dissidentes materiæ concilientur. Aqua sic sali nubit, sali phlogiston, huic denique terra, & mixtio omnium stabilis emergit. ^(h) Quo jure autem VIR CL. aquam & terram nude soci-

cia-

^(a) B. de SWIETEN Comment. §. 21. HALL. l. c. p. 4. & seqq. ^(b) GAUBIUS Instit. Patholog. §. 143. ^(c) HALL. l. c. p. 6. ^(d) BOERHAAVE. l. c. p. 547. ^(e) Id. Præl. Acad. T. I. ad §. 49. ^(f) Hist. de l'Acad. Royal. des scienc. 1756. p. 49. Nomen puellæ erat Christiana Michelot. ^(g) l. c. §. 136. ^(h) l. c. §. 145.

ciabilia haud existimet, aliis dijudicandum relinquo. An non enim ossa calcinata aquam, & oleum, æqua aviditate sorbent? (a)

SCHOLIUM IV.

Quum aer in plurimis omnino corporibus reperiatur; (b) mirum non est, eundem etiam in glutine nostro (§. 502.) adesse. (c)

SCHOLIUM V.

Quod autem partes corporis humani, vi ignis tostæ, in cinerem fatiscant non cohærentem (demonst, §. 502.), explicat CL. GAUBIUS, quod excussis volatilibus vacui nascantur in massa terrea loculi, quibus fit, ut hujus moleculæ a proximis contactibus longius absint. Quin & bonam terræ portionem una in auras dissipari, docet fuligo, tum spiritus, salis, olei, quæ prodeunt, depuratio. (d)

SCHOLIUM VI.

Phænomena, & modum cohæsionis in fibris, quæ CL. de GORTER proposuit; (e) ad fasciculos fibrarum, non fibras simplices (§. 499.), de quibus hucusque actum, pertinere existimo.

§. DIII.

Si tales fibræ sibi mutuo adplicentur parallelo ductu, erit *Membrana simplicissima*.

SCHOLIUM.

HALLERUS talem membranam (§. 503.) *Laminam* (f) dicit (Fig. 6.), Fig. 6.

§. DIV.

Rete, quod ex fibris (§. 499.), & membranis (§. 503.) ita componitur, ut areolas diversæ figuræ, & magnitudinis intercipiat, *Tela Cellulosa* dicitur.

(a) BOERN Elem. Chem. II. p. 360. (b) Ibid. I. p. 426. (c) HALLER. I. c. p. 6. & seq. (d) I. c. §. 144. (e) Compend. Med. Tract. I. §. 8. & seq. (f) I. c. p. 8.

SCHOLIUM.

Hæc est descriptio *Telæ Cellulosæ* (§. 504.) *simplicissimæ*, quæ inter fibras ultimas ubique reperitur. Inventionis historiam HALLERUS habet. (a)

§. DV.

Si membrana simplicissima (§. 503.) ita convoluta fuerit, ut fibræ duæ extremæ se contingant, erit *Vas minimum* Fig.7. *simplex*. (Fig. 7.).

§. DVI.

Vasa (§. 505.) ita sibi juncta, ut (§. 503.), *Membrana* Fig.8. *nam primam vasculosam* constituunt. (Fig. 8.)

§. DVII.

Membrana prima vasculosa (§. 506.) convoluta, ut Fig.9. (§. 505.), *Vas vasculosum* facit. (Fig. 9.)

SCHOLIUM.

Quilibet facile intelligit, hanc compositionem (§. 503. ad 507.) ulterius progredi eodem ordine, in partibus corporis humani constituendis. (b)

§. DVIII.

Tela cellulosa (§. 504.) *partes humani corporis omnes investit, & inter se conjungit, cavitatesque diversas replet,* Docet Anatome.

SCHOLIUM.

Sedes hujus *Telæ* (§. 508.) fuse recenset ILL. HALLERUS. (c)

§. DIX.

Omnes cellulae hujus telæ per totum corpus distributæ (§. 508.) *inter se communicant.* Demonstrat flatus, hydrops, morborum metastases.

SCHO-

(a) l. c. p. 9. & seq. (b) B. de SWIETEN Comment. §. 39. (c) l. c. p. 10. & seqq.

SCHOLIUM I.

Experimenta (§. 509.) copiosa HALLERUS habet. (a)

SCHOLIUM II.

Cellulæ hæ (§. 509.) variæ figuræ sunt; dum autem adipe replentur, figuram utcumque rotundam induunt, quia ipse adeps sponte se in rotundas glebularum colligit. (b)

§. DX.

Eadem cellulosa tela (§. 504.) plurimas in corpore humano membranas compositas efficit. Culter anatomicus, flatus, maceratio, id ostendunt.

SCHOLIUM I.

Fere omnes corporis humani solidas partes meram cellulosam telam, strictius congestam, & arctius intricatam esse, HALLERUS credit; (c) ita ut præter fibras osseas, musculares, & nerveas, nullas alias, a cellulosa tela distinctas, agnoscat. (d)

SCHOLIUM II.

Quare corpus humanum ex vasis, & cellulosa tela, compositum omnino adparet. (e)

§. DXI.

Vasa sanguinea, lymphatica, & nervea, per telam cellulosam distribuuntur. Culter anatomicus, & injectiones eadem manifestant.

SCHOLIUM I.

Pulchre itaque *Panniculus adiposus*, & cellulosa membrana, congeries vasorum minimorum, tam arteriosorum, quam venosorum, tum & cellularum, in quas ab arterioso sanguine oleum secernitur, ab ILL. de HÆEN nuncupatur. (f)

(a) Ibid. p. 12. & seqq. (b) Ibid. p. 24. (c) Ibid. p. 19. & seqq. (d) Ibid. p. 22. (e) Ibid. p. 23. & seqq. (f) Vindic. Difficult. p. 139.

Nondum etiam id omne, quod in membranis, dum vasa sanguinea utriusque generis replentur, inter retia vasculosa album manet, & in maceratione, mucii nomine, decedit, fundumque petit; (a) solam cellulosa[m] telam esse, aut magnas quasdam membranas, ut allantoide[m], arachnoideam &c. penitus absque vasis esse, demonstrari posse autumo; quum vasa minorum generum, nulla adhuc arte, oculis subjici queant, ut HALLERUS ipse fatetur. (b)

§. DXII.

Vasa rubra arteriosa, & venosa (§. 511.), tota longitudine sua poris innumeris in cellulas telæ cellulosa[e] patent, per quos liquores tenuiores facillime ex vasis his in cellulas transeunt. Docet injectionis artificium, & morbi.

SCHOLIUM.

Experimenta (§. 512.) HALLERUS refert. (c)

§. DXIII.

Glandulae, & striæ adiposæ, nullæ in tela cellulosa reperiuntur. Id autopsia, & experimenta confirmant.

SCHOLIUM:

Hoc (§. 513.) contra MALPIGHIUM Recentiores Anatomici demonstrarunt. (d)

§. DXIV.

Quoniam autem & vasa (§. 511.), & fibræ, atque membranæ (§. 504.), quibus tela cellulosa constat, elasticæ sunt (§. 25. 41. 315. 500.), & hinc distendi possunt cum renixu (§. 24.); patet *telam cellulosa[m] varie distendi posse cum renixu pro vario elasticitatis suæ gradu.*


SCHOLIO-

(a) HALL. l. c. p. 24. (b) l. c. T. II. p. 427. (c) l. c. T. I. p. 35. & seqq. & 40. seq. (d) l. c. T. I. p. 33. & seqq.

Idem (§. 514.) flatus, & morbi confirmant.

C A P U T II.
DE
N A T U R A P I N G U E D I N I S.

§. DXV.

 *Pinguedo, dum animal vivit, fluida est.* Partes pinguedinis insensiles, dum animal vivit, tam parum sibi cohærent, ut, minima vi, queant separari, quod sæpius autopfia docuit; ^(a) ergo (§. 2.) pinguedo, dum animal vivit, fluida est.

SCHOLIUM I.

Quum aliqui *Adipem*, aut *sebum* pinguedinem duriorem duntaxat appellarent; *pinguedinem* vero, dum fluida est; factum vidimus, ut nullum omnino adipem in corpore humano vivo deprehendi crederent: sed de nomine lis est.

SCHOLIUM II.

Pinguedo hæc (§. 515.) in cadavere, frigore, & quiete, coit, & solida fit, atque pro varietate loci, & ætatis, quibus adest; alimentique, quo animal utitur, varium duritiæ gradum acquirit. ^(b)

§. DXVI.

Pinguedo humor est oleosus. Humor, cujus maximam partem portio inflammabilis constituit, oleosus est (§. 412.); sed id de pinguedine ostendit analysis chemica; ^(c) ergo pinguedo humor oleosus est.

§. DXVII.

^(a) Ibid. p. 28. & seq. ^(b) Ibid. p. 25. & seqq. ^(c) Ibid. p. 30. & seqq.

§. DXVII.

Globuli pinguedinis in sanguine continentur. Confirmat autopfia. ^(a)

§. DXVIII.

Globuli pinguedinis sanguineis, & serosis specificè leviores sunt. Oleum aqua specificè levius est, ut cuivis notum, sed globuli sanguinei, & serosi, aqua specificè graviores sunt (§. 59. in Schol.); ergo eo magis globuli pinguedinis, qui maximam olei partem continent (demonst. §. 516.), globulis sanguineis, & serosis, gravitate specifica cedunt.

§. DXIX.

COROLLARIUM.

Quum globuli specificè graviores canalium axin, specificè leviores vero eorum latera teneant (§. 76. 432.); sequitur (§. 518.) *globulos pinguedinis vasorum rubrorum latera magis sequi.*

SCHOLIUM I.

Id (§. 519.) experimento confirmat HALLERUS. ^(b)

SCHOLIUM II.

Quod pinguedo corporibus motis interposita frictionem minuat, eorum cohesionem augeat, corporibus non aqueis adhæreat, aqua difficulter miscetur, calore fundatur, ætate demum, & aeris tactu rancescat; ^(c) a portione ejus inflammabili (§. 516.) pendet.



CA-

(a) HALLER. l. c. T. II. p. 107. & seqq. T. I. p. 38. (b) Ibid. T. II. p. 416. (c) Ibid. T. I. p. 30.

CAPUT III.

DE

PINGUEDINIS SECRETIONE

§. DXX.

Globuli pinguedinis suis ostiis secretoriis adplicantur.
 Ostia pinguedinis secretoria sunt pori, qui tota arteriarum rubrarum longitudine in cellulas telæ cellulosæ patent (§. 512.), quod injectio demonstrat; ut igitur globuli pinguedinis his ostiis adplicantur, necesse est, ut iidem vasorum rubrorum latera magis sequantur; sed id agunt (§. 519.); ergo globuli pinguedinis suis ostiis secretoriis adplicantur.

§. DXXI.

Globuli pinguedinis suis ostiis secretoriis adplicati (§. 520.) & facillime transeunt, & e sanguine secernuntur.
 Ostia pinguedinis secretoria liquores tenuiores facillime ex vasis rubris in cellulas transmittunt (§. 512.); ergo globulos pinguedinis, dum iis adplicantur (§. 520.), facillime transmittunt. Q. E. primum.

Liquor e sanguine secernitur, dum de communi sanguinis massa alius, & a sanguine, & ab aliis liquoribus diversus prodit; sed dum globuli pinguedinis per ostia secretoria in cellulas suas transeunt (demonst. n. 1. huj.), colligitur in his cellulis liquor, & a sanguine, & ab aliis liquoribus, diversus; ergo (§. 403.) dum globuli pinguedinis suis ostiis secretoriis adplicantur, iidem e sanguine secernuntur. Q. E. alterum.

SCHOLIUM.

Facilitas hujus secretionis (§. 521.) ex brevitate temporis, quo animalia pinguescunt, manifestior redditur. (a)

§. DXXII.

Quo major est sanguinis per sua vasa velocitas, eo minor pinguedinis quantitas, intra datum tempus, secernitur. Quo major est sanguinis per sua vasa velocitas, eo globuli pinguedinis, sanguini in sinistro cordis ventriculo intime misti (demonst. §. 416.), difficilius se se invicem colligere possunt (demonst. §. 441. n. 2.); sed quo difficilius iidem globuli se se colligere possunt, eo pauciores latera vasorum sequuntur (demonst. 519.), & hinc pauciores ostiis secretoriis, intra datum tempus, adplicantur (§. 521.); consequenter eo pauciores e sanguine secernuntur; ergo, quo major est sanguinis per sua vasa velocitas, eo minor pinguedinis quantitas intra datum tempus secernitur.

SCHOLIUM I.

Hæc (§. 522.) exceptio est propositionis (§. 434.).

SCHOLIUM II.

Huic quidem propositioni (§. 522.) copiosæ pinguedinis circa cor secretio, (b) adversari videtur; sed in vasis coronariis cordis globulorum pinguedinis ad ostia secretoria adplicationem faciliorem minor horum vasorum diameter reddere videtur. Neque inde iterum quis deduxerit copiam pinguedinis in corde, quæ vasa coronaria comitatur, esse debere in ratione inversa diametrorum vasorum coronariorum; aliter nempe, ac experientia docet; (c) nam copiam pinguedinis collectæ non solum a magnitudine secretionis, sed etiam ab amplitudine telæ cellulosæ æstimari debere certum est. Et an non hæc ipsa pinguedo in ratione motus muscularis, quem animal exercet, adesse observatur?

§. DXXIII.

(a) HALL, l. c. T. I. p. 39. (b) Ibid, p. 324. & seq. (c) Ibid.

§. DXXIII.

COROLLARIUM.

Quæcunque igitur motum sanguinis per sua vasa minuunt, eadem obesitatem augent; & contra (§. 522.).

SCHOLIUM I.

Id (§. 523.) observatio per omne fere animalium genus confirmat. (a)

SCHOLIUM II.

Hæc una (§. 523.) ratio est, quare muscularis motus macilenta, quies vero obesa, animalia reddat.

§. DXXIV.

Quum humores pinguedine tenuiores, ut serum, lymphæ &c. ob minorem motus quantitatem (§. 331.) itidem vasorum latera sequantur; neque ab ostiis secretoriis pinguedinis (§. 512.) majoribus excludi possint; patet *una cum pinguedine etiam humores tenuiores ad telæ cellulosæ cavernulas deponi.*

SCHOLIUM.

Idem (§. 524) confirmat injectio anatomica liquorum tenuiorum. (b)

§. DXXV.

Pinguedo in cellulis suis depuratur per venas (§. 512.) resorbentes. Demonstratur ut (§. 455. n. 3.).

SCHOLIUM.

Quæ igitur in cellulis suis reperitur pinguedo, nunquam talis est, qualis in actu secretionis (§. 521.) fuerat; & eo minus illa, quæ jam in solidas glebularum concrevit (§. 515. in Schol. 2.).

(a) Ibid. p. 39. & seq. (b) Ibid. p. 36.

§. DXXVI.

Eadem pinguedo in sanguinem resorbetur. Demonstratur ut (§. 356.).

§. DXXVII.

Hanc resorptionem (§. 526.) adjuvat motus musculorum. Tela cellulosa inter musculos sita est (§. 508.); sed musculi in actione tument; ^(a) ergo spatia intermedia minuunt, & cellulas telæ cellulosæ comprimunt; huic autem pressioni cedit pinguedo fluida (§. 515.); eo igitur se recipit, ubi minus premitur; id est, venas resorbentes intrat; ergo hanc resorptionem motus musculorum adjuvat.

SCHOLIUM.

Hæc (§. 527.) est altera ratio, quare motus musculorum obesitatem minuat. ^(b)

§. DXXVIII.

Aliæ evacuationes auctæ resorptionem pinguedinis augent. Aliæ evacuationes auctæ plurimum de communi sanguinis massa auferunt; igitur vi derivationis (§. 104.) majori pinguedo venas ingreditur; proinde aliæ evacuationes auctæ resorptionem pinguedinis augent.

SCHOLIUM I.

Istud (§. 528.) non tantum de transpiratione, sudore, aliisque evacuationibus auctis verum est; ^(c) sed etiam de venæ sectione nimia: frequens vero in sanitate venæ sectio, ob stimulum cordis minutum, & debilitatem toti corpori inductam, obesitatem auget. ^(d)

SCHOLIUM II.

Hæc tertia (§. 528.) ratio est, ob quam motus musculorum obesitatem minuit, quia idem alias secretiones, & excretiones (§. 436.) auget. ^(e)

SCHO.

(a) BOERHAAVE. Instit. §. 401. n. 7. (b) HALLER. l. c. p. 41. (c) Ibid. p. 42. & seq. (d) Ibid. p. 40. (e) Ibid. p. 42.

SCHOLIUM III.

Pinguedo fere æque celeriter per dictas (§. 527. 528.) causas resorbetur, ac (§. 521. in Schol.) secreta fuit. (a)

SCHOLIUM IV.

Exhausto adipi, imprimis a morbis, fere similis gelatina succedit, qualis ante adipis nati tempora in iis loculis fuit; quod in hydropicis est familiare (b)

SCHOLIUM V.


Ut in maioribus cellulis pinguedo, ita in minoribus vapor tenuissimus reperitur, qui cum eadem ratione secernatur, atque resorbeatur, ut (§. 520. ad 528.) dictum, peculiarem pertractationem non exigit.

CAPUT IV.

DE

ACTIONE TELÆ CELLULOSÆ.

§. DXXIX.

 *T*ela cellulosa omnibus partibus corporis humani suam firmitatem largitur. Partes corporis humani omnes vel fiunt ex vasis, vel ex tela cellulosa (§. 510. cum Schol.); vasis vero suam firmitatem largitur cellulosa tela, ut experientia (c) docet (§. 23. in Schol. 2. §. 314. in Schol.). Deinde partes humani corporis firmat, quidquid eas inter se, & cum vicinis, revincit; sed id facit tela cellulosa, ut culter anatomicus demonstrat. (d) Ergo tela cellulosa omnibus partibus humani corporis suam firmitatem largitur.

SCHOLIUM I.

Quomodo hæc propositio (§. 529.) offibus conveniat, suo loco adparebit.

N 3

SCHO-

(a) Ibid. p. 42. (b) Ibid. 26. 44. (c) Ibid. p. 17. (d) Ibid.

SCHOLIUM II.

CL. de la SONE a diversitate hujus telæ cellulosæ, aut, ut mavult, reticularis, quam in utriusque sexus vasis arteriosis differre observavit, diversam in utroque sexu partium firmitatem deducit. (a)

SCHOLIUM III.

Paradoxa hæc propositio (§. 529.) videri posset, si ad vim, roburque fibræ muscularis reflectamus. Verum ex mechanicis adparet, & suo loco ostendetur, maximam fere partem hujus vis, & roboris pendere ab earum fibrarum muscularium directione, quam tenent, & ab earum tam inter se, quam cum partibus vicinis connexionem; quæ directio, & nexus a tela cellulosa omnino pendent.

§. DXXX.

Eadem tela partium nostrarum mobilitatem conservat. Tela cellulosa elastica est (demonst. §. 514.), hinc extensilis est, & consequenter partes, quæ hujus ope revinciuntur (demonst. §. 529.) loco moveri possunt, quin connexionem hanc solvi, necesse sit; ergo tela cellulosa partium nostrarum mobilitatem conservat.

SCHOLIUM.

Hæc (§. 530.) una ratio est, quare telam cellulosam ablatam muscutorum immobilitas sequatur, quale exemplum refert CEL. BOERHAAVE. (b)

§. DXXXI.

Quoniam præterea Anatome docet, solutis vinculis cellulosis (demonst. §. 529.), figuras, & flexiones plurimarum partium mutari; (c) sequitur, *figuras partium plurimarum, & flexiones ab eadem tela definiri.*

§. DXXXII.

(a) Mem. de l'Acad. Royal. des scienc. 1756. p. 130. & seq. (b) Præl. ad Aphor. Pract. 330. (c) HALLER. l. c. p. 18.

§. DXXXII.

Tela cellulosa in cellulas minores vaporem tenuem, in majores pinguedinem secernit. Demonstratum est (§. 520. ad 525.).

§. DXXXIII.

Pinguedo hic secreta (§. 532.) fibras corporis nostri flexiles (§. 500.) conservat. Ad flexilitatem enim facit humor lubricans intermedius (§. 15. n. 2.); sed pinguedo, cum humor oleosus sit (§. 516.), lubricat; ergo pinguedo fibras flexiles conservat.

§. DXXXIV.

Eadem pinguedo partium nostrarum, quibus interponitur, adtritum minuit. Partium adtritum, cæteris paribus, est in ratione punctorum contactus (demonst. §. 85. n. 2.); sed humor lubricans intermedius puncta contactus minuit; ergo, quum pinguedo humor lubricans sit (demonst. §. 533.), partium nostrarum, quibus interponitur, adtritum minuit.

§. DXXXV.

Quoniam ad motus facilitatem flexilitas partium movendarum, & earundem adtritum imminutus, plurimum faciunt; utrumque autem pinguedo præstat (§. 533. 534.); evidens est, *pinguedinem partium nostrarum mobilitatem conservare.*

SCHOLIUM.

Hæc (§. 535) altera ratio est, quare musculorum immobilitas jacturam telæ cellulosæ sequatur. (§. 530. in Schol.)

§. DXXXVI.

§. DXXXVI.

Quum ulterius eadem pinguedo ope cellulosa telæ partibus corporis nostri interponatur (§. 508.), sicque impediat, ne se invicem nudæ contingere possint; *impedit etiam, ne partes hæ invicem concrecant.*

SCHOLIUM.

Ablata cellulosa tela partes hæ illico concrecant; (a) & hæc tertia subsequens immobilitatis (§. 530. in Schol.) ratio est.

§. DXXXVII.

Porro, quia cavitates diversas replet (§. 508.) partibus multis pulvinaris instar mollis substernitur, ut Anatomæ docet; *stabilitatem multis partibus, & motum liberiores largitur, easque a compressione majore defendit.*

SCHOLIUM.

Exemplo est pinguedo in orbita oculi, pinguedo natium &c. (b)

§. DXXXVIII.

Quum denique aer frigidus fibras solidas accurtet, densetque; (c) eam vero accurtationem, & densationem pinguedo interposita impediat; (d) patet ratio, *quare pinguedo a frigore aeris corpus defendat.*

SCHOLIUM.

Idem (§. 538.) confirmat experientia, dum viatores pedes suos oleo v. g. therebinthinæ inungunt, quo rigorem hyemalem minus sentiant.

§. DXXXIX.

Pinguedo autem in sanguinem resorpta (§. 526.) materiam præbet novæ secretioni. Pinguedo in sanguinem re-
for-

(a) HALLER. I. c. p. 45. & seq. (b) Ibid. p. 47 (c) BOERHAAVE. Instit. §. 747. (d) Conf. B. de SWIETEN. Comment. §. 30.

forpta, cum sanguine ad cor finistrum redit, & cum eodem iterum in arterias transiit; ergo globuli, qui antea huic secretioni apti erant (§. 520.), iterum ostiis secretoriis applicantur, & per ea fecernuntur (§. 521.); cum nihil sit, quod id prohibeat; ergo pinguedo in sanguinem resorpta materiem præbet novæ secretioni.

SCHOLIUM.

An hæc pinguedo (§. 539.) alere possit animal, alibi inquiretur.

SECTIO XVI.

DE

MORBIS TELÆ CELLULOSÆ

CAPUT I.

DE

MORBIS TELÆ CELLULOSÆ RATIONE

PARTIS SOLIDÆ.

§. DXL.



Quum fibræ (§. 499.), & laminæ (§. 503.), ex quibus cellulosa tela componitur (§. 504.), ob elementorum (§. 501.) immutabilitatem, aliis morbis obnoxia non sint, quam cohæsionis (§. 174.); evidens est, *Telam cellulosam absque humore contento spectatam, alios morbos subire non posse, quam cohæsionis.*

§. DXLI.

Si vero eadem tela spectetur, ut membranas in corpore humano constituit, poterit eadem debilitata (§. 540.) tumores, & partium dislocationes producere. Pars enim debilitata humores adtrahit (demonst. §. 289.); ergo, quum partes nostri corporis firmitatem suam a tela cellulosa habeant (§. 529.), ea debilitata (per hypoth.), & ipsæ debilitabuntur, & humores adtrahent; consequenter ob majorem humorum adfluxum in partibus ejusmodi magnitudo præternaturaliter augebitur; sed magnitudo præternaturaliter aucta tumor est (demonst. 179. n. 3.); ergo sub conditione theorematidis tumores producuntur. Q. E. primum.

Partes corporis nostri in situ suo naturali retinentur, per ligamenta, & membranas coercentes, ut docet Anatomicus; sed hæc ut dictas partes retinere possint, definitam firmitatem habere debent; firmitatem vero hanc a cellulosa tela habent (§. 529.), ergo hac debilitata debilitantur etiam, & elongantur. Elongatis igitur ligamentis, atque membranis coercentibus, partes ab his retentas loco cedere, necesse est, consequenter dislocari; ergo cellulosa tela debilitata dislocationes partium producit. Q. E. Alterum.

SCHOLIUM I.

Quia cellulae hujus telæ, dum humoribus replentur, figuram utcumque rotundam induunt (§. 509. in Schol. 2.), etiam tumores similes, ac (§. 497. in Schol. 1.) recensiti, & qui vulgo *Cystici*, a κύστις, *vesica*, dicuntur, in his cellulis oriri possunt. Huc etiam ὑπερσαρκαώσεις (a) reducere possumus, qui tumores sunt carnem referentes (unde ex ὑπὲρ *super*

&

(a) BOERH. Instit. §. 711.

& σάξ *caro*, nomen habent) orti in tela cellulosa, dum ob ejus laxitatem sanguis eam ingreditur. Huc denique *Oedema frigidum* pertinet, quod est tumor mollis, non dolens, & digito tangenti facile cedens, sine mutatione coloris in cute, qui tumor plerumque ab aquosis humoribus parviculum adiposum distendentibus fit. (a)

SCHOLIUM II.

Ad (§. 541. n. 2.) *distorsiones, subluxationes, luxationes, hernia*, & similia reducuntur. (b)

SCHOLIUM III.

Hernia (Schol. præc.) græcis *νήλη* dicitur, & pro varietate loci, ac materiæ contentæ diversa nomina accipit. Ejus species fuse recenset CL. GAUBIUS. (c)

§. DXLII.

Quum fibra rigida facta brevior, & minus flexilis fiat (demonst. §. 187. 188.), etiam tela cellulosa, & membranæ, ac ligamenta, ex ea composita (§. 510.), rigidiora (§. 540.), & breviora fiunt, minusque flexilia; consequenter, quia mobilitas partium nostrarum a debita flexilitate pendet (demonst. §. 530.), *Tela cellulosa rigida facta morbos mobilitatis deficientis* ^(d) *producit.*

§. DXLIII.

Si tela cellulosa nimis debilis, aut rigida fuerit, poterit morbos (§. 179. ad 190. 193. ad 195. 293. ad 300. 360. ad 364. 367. 400. 401. 465. ad 473.) *recensitos generare.* Morbi recensiti a vasorum debilitate, aut rigiditate nimia pendent (§is. citat.); vasorum autem firmitas a tela cellulosa pendet (§. 529.); ergo, si tela cellulosa ni-

O 2

mis

(a) B. de SWIETEN. Comment. §. 112 n. 1. & §. 380. (b) BOERHAAVE. Instit. §. 712. (c) Instit. Patholog. §. 230. & seqq. (d) BOERH. Instit. §. 712.

mis debilis, aut rigida fuerit, etiam vasa nostra talia erunt; proinde morbos dictos generabunt.

§. DXLIV.

Quo tela cellulosa debilior fuerit, eo major corporis erit obesitas; & contra. Quo tela cellulosa debilior fuerit, eo debiliores erunt arteriæ rubræ (demonst. §. 543.); quo autem debiliores sunt arteriæ rubræ, eo minor erit sanguinis per eas velocitas (§. 179. n. 4). Sed quo minor est sanguinis per vasa rubra velocitas, eo major pinguedinis quantitas intra datum tempus fecernitur (demonst. §. 522.); ergo, quo tela cellulosa debilior fuerit, eo major corporis erit obesitas. Porro, quo tela cellulosa debilior fuerit, eo magis cellulæ ejus extenduntur (demonst. §. 179. n. 1.), & cum simul major pinguedinis quantitas fecernatur (per demonst.), eo majorem pinguedinis quantitatem eadem recipiet; proinde, quo tela cellulosa debilior fuerit, eo major corporis erit obesitas. Q. E. primum.

Quo tela cellulosa rigidior fuerit, eo rigidiores erunt arteriæ rubræ (demonst. §. 543.); quo autem rigidiores fuerint arteriæ rubræ (quandiu rigiditas hæc non fuerit nimia) eo major erit sanguinis per eas velocitas (demonst. §. 118.); sed quo major est sanguinis per vasa rubra velocitas, eo minor pinguedinis quantitas, intra datum tempus, fecernitur (§. 524.); ergo quo tela cellulosa rigidior fuerit, eo minor corporis erit obesitas. Porro, quo tela cellulosa rigidior fuerit, eo cellulæ ejus magis extensioni resistent (§. 514.), & cum simul minor pinguedinis quantitas fecernatur (per demonst.), eo minorem pinguedinis quantitatem eadem re-

ci-

cipiet; igitur, quo tela cellulosa rigidior fuerit, eo minor corporis erit obesitas. Q. E. alterum.

§. DXLV.

COROLLARIUM.

Hinc *fœminæ, & eunuchi, viris obesiores esse solent* (§. 544.).

SCHOLIUM.

Exempla majoris obesitatis HALLERUS recenset. (a)

CAPUT II.

DE

MORBIS TELÆ CELLULOSÆ RATIONE.

PARTIS FLUIDÆ.

§. DXLVI.

Quo major est in corpore obesitas (§. 544.), *eo minor est sanguinis quantitas.* Pinguedo ex sanguine secernitur (§. 521.); ergo quo major pinguedinis quantitas secernitur, eo major elementorum copia sanguini decedit; proinde eo minor quantitas in vasis rubris remanet. Deinde quo major est pinguedinis in corpore quantitas, eo majus ipsa spatium occupat, & consequenter vasa rubra teretia (§. 12. 35.) angustiora reddit (§. 195. 7); quare etiam minor quantitas sanguinis in iis contineri potest; ergo, quo major est in corpore obesitas, eo minor est sanguinis quantitas.

(a) l. c. p. 49. & seq.

§. DXLVII.

Quum pinguedo similiter, ac (demonst. §. 546.) dictum, nervos (§. 511.), immo multo facilius, ob eorum mollitiem majorem, comprimere, ficque partes corporis sensu privare (demonst. §. 291. n. 1.), possit; *quo major est in corpore obesitas, eo minor partium sensus.*

SCHOLIUM.

Exemplum (§. 547.) DIONYSIUS Heracleæ Tyrannus præbet, qui acubus in carnes defixis excitari debuit.

§. DXLVIII.

Quo major est in corpore obesitas, eo minor ad motum muscularem aptitudo. Tela cellulosa cum pinguedine inter singulas fibras musculares interponitur (demonst. §. 508.); ergo, quo majori copia ea pinguedo adest, eo magis fibræ musculares ab invicem removentur; sed quo magis fibræ musculares ab invicem removentur, eo majorem cum tendine suo angulum efficiunt; & quo majorem cum tendine suo angulum intercipiunt, eo plus de vi sua musculo decedit; sunt enim vires impenſæ, ad vires efficaces, ut sinus totus, ad sinum anguli, sub quo fibræ in tendinem suum se immittunt. ^(a) Quo autem plus de vi sua musculo decedit, eo minor est ad motum muscularem aptitudo; ergo, quo major est in corpore obesitas, eo minor ad motum muscularem aptitudo.

SCHOLIUM I.

Hunc fibrarum ab invicem discessum (§. 548) Anatome confirmavit. ^(b)

SCHO.

(a) HALLER, Elem. Physiol. T. IV. p. 492. (b) Ibid. T. I. p. 51.

DE MORBIS TELÆ CELLULOSÆ RATIONE &c. III
SCHOLIUM II.

Motum muscularem a corporis pondere simul in obesitas multum impediri, nemo dubitat.

§. DXLIX.

Quo major est in corpore obesitas, eo major in somnum proclivitas. In somnum proclivitatem facit, quidquid sanguinis per encephalon circuitum difficiliorem reddit; ^(a) sed is circuitus eo difficilior redditur, quo major est in corpore obesitas; nam quo major ea obesitas est, eo magis venæ jugulares comprimuntur, (demonst. §. 546.), dum arteriæ encephali, tutius reconditæ ^(b), a compressionē liberæ manent. Ergo quo major est in corpore obesitas, eo major in somnum proclivitas.

SCHOLIUM I.

Hinc etiam CEL. BOERHAAVE. *obesitatem humores intra urgentem* inter somnolentiæ causas refert. ^(c)

SCHOLIUM II.

Verum est in cane a ligata vena jugulari utraque nullum soporem sequutum fuisse, ut ILL. B. de SWIETEN, ^(d) & ILL. HALLERUS, ^(e) experti sunt. In homine tamen, ut pulchre monet mox laudatus HALLERUS, cui grandius caput, & venæ jugulares adprime majores sunt, frequentior causa mortis ab apoplexia est, aque sanguine in vasa cerebri congesto. ^(f)

§. DL.

Quo major est in corpore obesitas, eo facilius generatur hydrops. Quo major est in corpore obesitas, eo facilius venæ lymphaticæ comprimuntur (demonst. §. 546.); sed
ve-

(a) BOERH. Instit. §. 591. n. 8. (b) Ibid. §. 231. 232. (c) Ibid. §. 591. n. 8. (d) Comment. §. 170. n. 3. (e) de motu sang. Exp. 113. Oper. min. T. I. p. 90. (f) Elem. Physiol. T. IV. p. 303.

venis lymphaticis compressis feri, & lymphæ resorptio imminuitur, aut penitus impeditur, dum per arterias focias, & per vasa pinguedinem fecernentia (§. 524.) lymphæ continuo advehitur; consequenter lymphæ minus resorbetur, quam adfertur, atque hydrops (§. 360. 361.) generatur; ergo quo major est in corpore obesitas, eo facilius hydrops generatur.

SCHOLIUM.

Hydropis ab aliis causis in tela cellulosa nati, (§. 361. in Schol. 1.) naturam diximus.

§. DLI.

Quo major est in corpore obesitas, eo majus imminet mortis periculum. Quo major est in corpore obesitas, eo magis, ut in toto corpore, ita etiam in pleuræ exteriori cellulosa lanugine, & in mediastino pinguedo colligitur; ergo pulmones, immo cor ipsum comprimit, & consequenter actiones harum partium impedit; sed his impeditis vita cessat; ^(a) vita autem sublata mors est; ergo, quo major est in corpore obesitas, eo majus imminet mortis periculum.

SCHOLIUM.

Homines, & bruta, a nimia pinguedine extinctos legimus. ^(b)

§. DLII.

Si pinguedo in cellulis suis nimis diu retenta fuerit, tumores varios producet. Pinguedo quiete, & frigore fluiditatem suam (§. 515.) amittit, & solidu fit; ergo per venas suas redire (§. 526.) nequit; cellulas itaque, quibus continetur, dum recens continuo advenit, distendit; proinde, sub data conditione tumores (§. 179. n. 3.) producit.

SCHO.

(a) BOERH Instit. §. 695. (b) HALL, l. c. T. I. p. 51. & seq.

SCHOLIUM I.

Hæc est (§. 552.) altera tumorum (§. 541. in Schol. 1.) genesis.

SCHOLIUM II.

Pinguedinem humanam ad calculi fere similitudinem indurari posse, vidit ILL. HALLERUS. (a)

§. DLIII.

Quia vero pinguedo partium nostrarum flexilitatem (§. 533.), & mobilitatem (§. 535.) conservat; patet *ea deficiente*, 1) *partes nostras rigidiores, fragiliores, & ad motum minus idoneas, fieri.*

§. DLIV.

Quoniam præterea eadem pinguedo partium nostrarum concretionem prohibet (§. 536.); sequitur, *ea deficiente*, 2) *partes inter se concreescere.*

§. DLV.

Quum ulterius eadem multis partibus stabilitatem, liberiorioremque motum concedat, alias a majori compressione defendat (§. 537.); elucescit *partes nostras, tela cellulosa sublata*, 3) *hisce commodis etiam spoliari.*

§. DLVI.

Et quum æquabilem quandam corporis symmetriam homines partem formositatis vulgo vocare soleant; ea vero pereat, dum pinguedo, quæ musculorum intercapedines replebat (§. 508.), deficit; patet, 4) *simul formositatis partem ita destrui.*

(a) Ibid. p. 29.

§. DLVII.


Denique, quia pinguedo corpus a frigore aeris defendit (§. 538.); *hæc sublata, 5) partes corporis nostri frigus magis percipiunt.*

CAPUT III.

DE

MORBIS TELÆ CELLULOSÆ COMPOSITIS.

§. DLVIII.

 Quum per telam cellulofam vafa fanguinea distribuuntur (§. 511.), hæc autem obstrui, & inflammari poffint (§. 218. ad 279.); evidens eft, *Telam cellulofam obstrui, & inflammari poffe.*

§. DLIX.

Si 1) humores in locum inflammatum impingentes, nondum funt acres; 2) impetus eorum moderatus, naturalem non multum excedit; 3) obftructio parva; 4) canales non rigidi; & 5) diluens vehiculum fufficienti copia adest; fpes resolutionis adfulget. ^(a) Etenim, fi humores nondum funt acres, a figura fphærica in angulofam acutam nondum recedere (§. 209.); hinc impetum fuum integrum parvæ fuperficie non adplicant. ^(b) Quumque præterea, fedato impetu, in pauca vafa obftructa ferantur (per hypoth.), confequenter actio eorum in loca obftructa moderata fit (demonft. §. 72.), fpes utique eft, fore, ut folidis deſtructio non inferatur. Porro, quia celeritas humorum non multum eft aucta

(a) Вокруглав. Aphor. §. 386. (b) Ibid. Inſtit. §. 725.

aucta (si enim gauderent magna celeritate, impetus quoque esset magnus (demonst. §. 60.), contra hypothefin); igitur vis vitæ non multum increvit (§. 269.), hinc sanguis in loco inflammato non adeo viscosus factus (§. 278.) haud fortiter inter se cohæret, ^(a) & per vehiculum diluens, sufficienti (per hypoth.) copia præfens, facile fluidior, id est, minus cohærens, ^(b) redditur. Quoniam itaque canales, ultra locum obstructum rigidi non sunt (per hypoth.), adeoque, nondum angustiores facti (§. 187.), molem obstructentem, fluidam redditam, eo citius transmittere valent; sperandum utique est, fore, ut liquidum, in loco inflammato concretum, absque ulteriore corruptione, in fluorem pristinum redigatur: quamobrem, quum liquidi concreti in fluorem sanum, absque ulteriore corruptione, reductio resolutio ^(c) audiat; sub data hypothefi, spes resolutionis adfulget.

SCHOLIUM.

De resolutione hac (§. 559.) conferri meretur ILL. B. de SWIETEN. ^(d)

§. DLX.

Si inflammatio in tela cellulosa oborta sit (§. 558.), spes resolutionis varius adfulget. Inflammatione enim in tela cellulosa oborta, sanguis ruber in vasa, hanc telam transcurrentia (§. 511.), impetu naturali majore impingit (§. 272.), & consequenter sanguis ruber in tunicam cellulosam se recipit (demonst. §. 268.), eandem in majorem tumorem adtollit (demonst. §. 266.), sicque vasa sanguinea adhuc ma-

P 2

gis

(a) HAMBERG Phys. §. 165. n. 1. (b) Ibid. §. 110. (c) BOERH. Instit. §. 930. (d) Comment. §. 386.

gis comprimit (demonst. 546.); adeoque obstructionem magnam reddit (§. 219.). Quo major autem obstructio habetur, eo vis vitæ sub initium quidem sensim minor fit (§. 225.), deinde vero iterum eo magis increfcit (§. 260.); & quo magis vis vitæ increfcit, eo magis pars aquosa sanguinis, quæ vehiculum diluens præbet, dissipatur (§. 277.). Deinde in loco inflammato adest calor (§. 271.), olea autem, dum in loco calido detinentur, rancescunt; & acria fiunt; ^(a) proinde etiam pinguedo, quæ humor oleosus est (§. 516.), facile acrimoniam induit. Quapropter adest obstructio magna, vis vitæ naturalem multum excedens, vehiculum diluens deficit, & humores vel actu acres sunt, vel facile in tales degenerant; sub his autem conditionibus resolutionis spes non adfulget (§. 559.). Ergo, si inflammatio in tela cellulosa oborta fit, spes resolutionis rarius adfulget.

SCHOLIUM.

Recte itaque CEL. BOERHAAVE, & ILL. Ejus Commentator inflammationes *nusquam frequentius, & tenacius, quam in adipe, oriri adferunt.* (b)

§. DLXI.

COROLLARIUM.

Igitur *Tela cellulosa inflammata plerumque vel in gangrænam (§. 283.), aut sphacelum (§. 285.), vel in suppurationem (§. 286.) transit (§. 560.).*

SCHOLIUM.

Gangræna, & suppurationis sedem propriam esse telam cellulosam, tum ex (demonst. §. 283. 286.) adparet, tum exemplo pratico ab ILL. B. de SWIETEN confirmatur. (c) Non unicam quidem HALLERUS

(a) BOERH. Elem. Chem. II. p. 96. (b) Comment. §. 374. (c) Ibid. cre-

credit, cum verum pus in cerebri, testium, hepatisve carne nascatur, in quibus visceribus nullus adeps ostendi potuit. (a) Verum ea non satis mihi cum iis cohærere videntur, quæ CL. VIR alibi proponit. Nam 1. Arachnoidea tela cellulosa est, eadem tela minimos vasorum nervorumque furculos tenerrima, semper tamen conspicua ambit. (b) 2. Pus plerumque ipsum adipem esse dicit, (c) unde ergo pus HALLERUS in cerebro &c. derivabit, si tela cellulosa in his nulla? aut si non alia puris origo? Confer (demonst. §. 286. cum Schol.).

§. DLXII.

Si in tela cellulosa 1) *suppuratio* (§. 561.) *absoluta sit* (§. 287. n. 3.); 2) *pus relinguatur diu in loco clauso*; 3) *attenuetur*; 4) *acre fiat, putrescat*; 5) *augeatur*; 6) *vicina consumat, erodat*; 7) *mole, pondere, & motu, eadem permeet; sinus, fistulasque creat.* (d) Etenim in tela cellulosa suppuratio absoluta est (per hypoth.); hæret itaque in tela cellulosa faccus pure plenus (demonst. §. 287. n. 3.), qui diu relinquitur in loco clauso (per hypoth.) quum igitur ob canalium fines abscissos (§. 286. α.) legibus circulationis amplius non subjaceat, sed stagnet (§. 283. ε.), calore loci spontaneam mutationem sequitur, qua in putredinem vergit (§. 286. ε.); pus itaque, si in loco clauso diu relinguatur,

α.) In putredinem vergere incipit; quare

β.) Quum putredo humores intime resolvat, (e) idem pus (α. huj.) attenuatur. Hanc autem tenuitatem, auctam a putredine, semper comitatur major acrimonia; (f) unde.

γ.) Pus idem acrius fieri incipit. Tumque

δ.) Acrimonia sua vicina, præsertim tenerrimam cellulosam telam consumit, & erodit. (g) ε.)

(a) l. c. p. 45. (b) Ibid. p. 10. & seq. (c) Ibid. p. 45. (d) BOERH. Aphor. §. 406. (e) Id. Elem. Chem. II. p. 291. (f) B. de SWIETEN Comment. §. 86. (g) Ibid. §. 86. 406.

ε.) Quoniam autem cavernulæ telæ cellulosæ per totum corpus invicem communicant (§. 509.); pus hoc attenuatum magis (β. huj.), acriusque factum (γ. huj.), mole, pondere (demonst. §. 287. n. 3.), & motu suo in vicinas cellulas sese profunde insinuat, hasque similiter consumit, & erodit (δ. huj.).

ζ.) Pinguedinem etiam, humoresque cæteros, in cellulis vicinis contentos, aut eo advenientes, in similem indolem mutat, ^(a) unde ipsum pus augetur. Quare

η.) Pure sic aucto (ζ. huj.), & tela cellulosa consumpta, ac erosa (δ. huj.), partes molles corporis ab invicem remonentur, & cavum inter eas nascitur. Sed

θ.) Latera hujus cavi ab acrimonia (γ. huj.) ita mutantur, ut vasorum fines abscissi (§. 286. α.), crispentur, seque contrahant (§. 283. β.); quare, dum pus arte, vel natura ex cavo hocce educitur, latera sibi quidem contigua fiunt, concrefcere tamen prius nequeunt, nisi pars ablata (δ. huj.) restituta fuerit, id autem fieri nequit, nisi fines vasorum iterum emolliti fuerint; ^(b) quod tam cito obtineri haud potest; & quia

ι.) Puris magna acrimonia fuit (γ. huj.), latera hæc continuo stimulantur, simul ob partium separationem eorum resistantia minuta est; unde novus humorum adfluxus in hoc cavum perpetuo contingit, qui a reliquiis prioris puris facile iterum in simile pus degenerant (ζ. huj.), quod sane cavi hujus concretionem, & sanationem eo difficiliorem, diuturnioremque reddit. Proinde

κ.)

(a) BOERHAAV. Elem. Chem. l. c. (b) Id. Aphor. §. 190.

κ.) Inter partes corporis molles cavum nascitur (η. huj.), cujus latera, educto pure, contigua facta, non concrefcunt cito inter fe, fed feparata manent diutius (θ. huj.), adeoque in hoc cavo præternaturali quotidie novi humores aggefti difficultatem curæ faciunt; ejusmodi autem cavum Sinus adpellatur. ^(a) Porro

λ.) Si idem pus diutius adhuc in tela cellulofa relinguitur (per hypoth.), mole, & pondere fuo (demonft. §, 287. n. 3.) latera cavi, quo continetur (η. huj.), comprimit, cellulas itaque vicinas delet, & latera hæc callofa reddit (demonft. §. 299.). Quapropter

μ.) Cavum quidem anguftius manet, fed latera ejus callofa fiunt; tale autem cavum Fiftula dicitur. ^(b) Ergo fub conditione theorematis Sinus, Fiftulæque creantur.

SCHOLIUM I.

Sinus (§. 562. κ.) itaque ab alio communi abfcelfu (§. 287. n. 3.) profunditate (§. 562. ε.), difficultate concretionis, & continua novi puris generatione distinguitur; *Fiftula* (§. 562. μ.) vero a *finu* anguftia, & laterum callofitate differt; unde a fimilitudine utrumque malum nomen accepit; *finus* etiam κόλπος, aut ὑπόνομον ἑλκος Græcis dicitur.

SCHOLIUM II.

Sinus, atque *Fiftulas* femper in panniculo adipofò effe, neque constare ullis obfervatis, fide dignis unquam muscularem fubftantiam proprie dictam fiftulas pervafiffe, adfirmat ILL. B. de SWIETEN. ^(c)

§. DLXIII.

Si in tela cellulofa, 1) figna fuppurationis absolutæ (§. 287. n. 3.) adfint; tumque 2) in loco fuppurato adtractu mol-

^(a) B. de SWIETEN Comment. §. 413. ^(b) Ibid. ^(c) Ibid.

mollis cavitas, & undulatio percipiuntur; finum (§. 562.) hic adesse satis certi sumus. Quodsi enim suppurationis absolute signa adsint, satis certi sumus, in loco suppurato faccum pure plenum adesse, quem sola tunica cellulosa sustinet (demonst. §. 287. n. 3.); quumque præterea ad tactu mollis cavitas, & undulatio percipiuntur (per hypoth.), faccum, seu cavum hoc insigne esse, certum est; sed si in tela cellulosa pus diu in loco clauso relinguatur, sinus creat (§. 562.); ergo sub datis signis, finum adesse satis certi sumus.

SCHOLIUM I.

Sinus clausi signa hæc (§. 563.) sunt; apertus enim facile cognoscitur, & si per siphonem prudenter, & leni vi, aqua tepida injiciatur, omnium optime detegitur.

SCHOLIUM II.

Summa tamen prudentia in dignoscendo clauso sinu opus esse, monet ILL. B. de SWIETEN, ne aliquando latens Aneurysma, aut varicosus tumor, pro suppuratione profunda habeantur. (a)

§. DLXIV.

In obesis motus muscularis, nimium auctus febres putridissimas excitare potest. Motus enim muscularis in obesis nimium auctus sanguinis etiam celeritatem nimium auget (§. 105.); consequenter vim vitæ naturali majorem reddit (§. 269.). Præterea motus musculorum pinguedinis in sanguinem resorptionem promovet (§. 527.); proinde massa movenda major fit, & celeritas etiam major est (per demonst.), consequenter vis vitæ naturalem plurimum excedit (§. 228.), & pulsus celerior (§. 252.), adeoque (demonst.

(a) Ibid. §. 414.

monst. §. 253.) adest. Porro, quia pinguedo in sanguinem majori copia resorbetur (per demonst.), sanguinea massa oleosior redditur, hinc calor in æstum transit (§. 282.), & digitum tangentem quasi pungit. ^(a) Demum, quia calore, & motu, aucto humores nostri ad putredinem disponuntur (§. 134.), idque eo magis, quo oleosiores sunt (demonst. §. 560.), humores nostri insigniter degenerant. Adest igitur febris continua, in qua calor digitum quasi pungens, & insignis degeneratio solidarum, & fluidarum corporis partium, cum magna plurium functionum læsione, deprehenditur; sed ejusmodi febris putrida dicitur; ^(b) ergo in obesis solus motus muscularis nimium auctus febres putridissimas excitare potest.

SCHOLIUM.

Hæc ratio fuit (§. 564.), quare multi pinguedinem in sanguinem resorptam noxiam esse crederent, (c) ideoque ejus resorptionem (§. 526.) negarent. Verum quisque facile videt, multum discriminis inter resorptionem naturalem (§. 526.), & præternaturalem (§. 564.) intercedere, & uti pinguedo posteriori modo resorpta noxia est, ita priori modo resorptam utilem esse, ac necessariam (§. 539.).



TOMUS II.

Q

SEC.

(a) BOERHAAVE Aphor. §. 731. (b) B. de SWIETEN Comment. §. 728.

(c) Conf. HALL, Elem. Physiol. T. I, p. 48.

SECTIO XVII.

DE

TEMPERAMENTIS.

CAPUT I.

DE

TEMPERAMENTIS IN GENERE.



§. DLXV.

Mutua quædam sanguinis (§. 8.) elementorum (§. 47. ad 62. 327. ad 336. 415. 418.) inter se proportio, *Temperamentum* vulgo dicitur.

SCHOLIUM.

Hæc veterum Medicorum est definitio (§. 565.), qui nullam partium solidarum rationem in *Temperamentorum* expositione habuerunt; quum igitur communi Medicorum loquendi modo conveniat, & eandem ILL. HALLERUS, (a) similemque CL. HAMBERGERUS, (b) dederint, eam ipsam hic eligere nullus dubitavi.

§. DLXVI.

Temperamenta (§. 565.) ad quatuor genera, *Sanguineum* nempe, *Phlegmaticum*, *Cholericum*, & *Melancholicum* reduci possunt.

SCHOLIUM.

Veteres quatuor simplicia adsumserunt Temperamenta corporis humani, *Calidum* nempe, *frigidum*, *humidum*, & *siccum*, ex quibus alia composita deduxere. Quum verò nullum corpus humanum sanum esse queat, quod non sit naturaliter æque calidum ac humidum, nullum quoque quatuor

(a) l. c. T. II. p. 181. (b) *Physiol. Med.* §. 48.

tuor simplicium temperamentorum solum corpori humano inesse posse, existimat C. L. HAMBERGERUS, sed temperamentum, uti est in corpore humano, esse compositum, nempe *sanguineum* ex *calido* & *humido*, *cholericum* ex *calido* & *siccio*, *phlegmaticum* ex *frigido* & *humido*, & *melancholicum* ex *frigido* & *siccio*. (a) Quare temperamenta subdivisa adparent, quæ BOERHAAVIUS proponit, nempe *calidum*, *frigidum*, *humidum*, *siccum*, *biliosum*, *sanguineum*, *phlegmaticum*, & *atrabiliarium*. (b) Denique haud multum ab ea, quæ (§. 566.) data, divisio ILL. HALLERI abludit, (c) etsi innumerabilia esse, ut cuique homini fere suum sit, præclare moneat. (d)

§. DLXVII.

Temperamentorum diversitas (§. 566.) non pendet a quatuor humoribus veterum, sanguine nempe, pituita, bile flava, & atra. Etenim experimenta hodiernorum tales humores in sanguine sano non deprehendunt, sed portionem flavam ferum, atram vero sanguinem solum arctius congestum esse ostendunt. (e) Ergo temperamentorum diversitas ab his non pendet.

§. DLXVIII.

Ad temperamentorum diversitatem constituendam etiam partes firmæ sunt necessariae. Temperamentum enim est mutua quædam elementorum sanguinis inter se proportio (§. 565.); sed ad ejusmodi proportionem inducendam determinata partium firmarum ratio est necessaria (demonst. §. 118. ad 134. 190.); ergo temperamentorum diversitas a diversa partium firmarum constitutione simul dependet; consequenter ad eorum constitutionem hæ partes sunt necessariae.

Q 2

SCHO-

(a) Physiol. Med. §. 54. & seq. (b) Instit. §. 889. (c) l. c. T. II. p. 141. & seqq. (d) Ibid. p. 146. (e) Conf. Dissert. nostr. de Causa Rubed. in sang. §. 4. 7. 12, & HALL. l. c.

SCHOLIUM I.

Hæc veritas (§. 568.) manifestior reddetur, cum de modo, quo alimenta in partes corporis nostri mutantur, actum fuerit.

SCHOLIUM II.


Ut rationis vivendi in temperamento definiendo potentia maxima est, (a) ita cum idem temperamentum corpori humano semel inductum fuerit, hæud ulla vivendi ratione potest permutari. (b)

CAPUT II.

DE

TEMPERAMENTO SANGUINEO.

§. DLXIX.

 Si globulorum rubrorum ad aquam ratio major fuerit, *Temperamentum sanguineum* adpellabitur.

SCHOLIUM.

Hæc definitio similis est, ac (§. 565.) data, & plures temperamentorum species sub se continet. Differt autem *temperamentum sanguineum* a plethora, quia illud majorem duntaxat globulorum rubrorum ad aquam rationem ponit, etsi tota sanguinis massa (§. 8.) quantitate non excedat, uti excedit, dum plethora adest (§. 197.).

§. DLXX.

Quum globulorum rubrorum major ad aquam ratio a majori arteriarum in corpore actione (§. 130. 132.), & consequenter a determinato earum robore, pendeat; *in temperamento sanguineo* (§. 569.) *definitum partium firmarum robur simul adesse debet* (§. 568.).

§. DLXXI.

(a) HALL. l. c. p. 143. (b) Ibid. p. 147. & seq.

§. DLXXI.

COROLLARIUM I.

Igitur *robur partium firmarum naturali simillimum* (§. 570.), *cum majori globulorum rubrorum ad aquam ratione* (§. 569.), *ideam temperamenti sanguinei proprie talis* ^(a) *absolvit.*

§. DLXXII.

COROLLARIUM II.

Quoniam calor eo major est, quo major rubrorum globulorum ad aquam ratio, & vasa simul robustiora sunt (demonstr. §. 131.); *robur partium firmarum priori* (§. 571.) paulo majus, *cum globulorum rubrorum ad aquam ratione majori, temperamentum calidum* ^(b) *constituit.*

§. DLXXIII.

COROLLARIUM III.

Demum *si in pauca humorum quantitate globuli rubri maximam rationem habeant, & robur, prioribus* (§. 571. 572.) *majus, absque irritabili fere indole, adest, temperamentum siccum habetur.*

SCHOLIUM.

Id (§. 573.) *siccum* BOERHAAVII, ^(c) & *baoticum*, aut *quadratum* HALLERI ^(d) est.

§. DLXXIV.

Si in corpore, 1) caro mollis, copiosa; 2) venæ amplæ cæruleæ, sanguine distentæ; 3) color roseus; 4) flexilis mobilitas; 5) iracundia; 6) pili variores, flavo-albi, fusci; temperamentum sanguineum (§. 571.) *adest.* Etenim mo-

Q 3

les

(a) BOERH. Instit. §. 894. (b) Ibid. §. 890. (c) Ibid. §. 892. (d) l. c. p. 147.

les musculi a repletis arteriis, venis, cellulis oleosis, lymphaticis, imprimis pendet; ^(a) quo itaque caro copiosior fuerit, eo vasa hæc humoribus magis repleta esse oportet; & quum humores, ob cohæsionem elementorum minorem (§. 2.), vi prementi facile cedant cum exiguo renixu; minus fibræ solidæ: corpus autem, quod vi prementi facile cedit cum exiguo renixu, molle sit; quo eadem caro mollior fuerit, eo plures humores adsint, est necesse; demum quia ad mobilitatem flexilem humores intermedii requiruntur (demonst. §. 535.), eadem mollities itidem major majorem humorum copiam præsentem ponit. Quoniam igitur in corpore caro mollis, copiosa, & flexilis mobilitas adest per hypoth.); humores etiam copiosi adsunt. Quia vero simul venæ amplæ, cæruleæ, sanguine distentæ, & color in quibusdam corporis locis roseus deprehenditur (per hypoth.), globulorum rubrorum copiam, a quibus hic calor pendet, majorem in hoc corpore reperiri, certum est; consequenter, cum plethora non adsit (ex hypoth.), major globulorum rubrorum ad aquam ratio habetur. Præterea adest iracundia (per hypoth.); hæc autem motum sanguinis majorem excitat; ad eum vero definitum partium firmarum robur est necessarium (demonst. 179. n. 4.); proinde etiam partium firmarum robur definitum est. Denique fidelis observatio docet, homines, in quibus globulorum rubrorum major ad aquam ratio, & partium firmarum robur definitum adest, pilos rariores, flavo-albos, fuscus habere. Ergo sub datis signis adest in corpore major globulorum rubrorum ad aquam

ra-

(a) BOERH. Instit. §. 400.

ratio, cum robore partium firmarum naturali simillimo; hæc autem ideam temperamenti sanguinei absolvent (§. 571.); ergo temperamentum sanguineum in corpore adest.

SCHOLIUM I.

Robur partium firmarum *naturali simillimum* (§. 574.) illud voco, quod quidem ad globulorum rubrorum copiam majorem elaborandam est sufficiens; sed tamen, si cum robore, quod in subsequen- tibus tempera- mentis (§. 575. 576.) adest, comparetur, minus est, & teneritudinem junctam habet.

SCHOLIUM II.

Tamen si ob lubricitatem, & incertitudinem, qua colorum doctrina hucusque involvitur, rationem, quare in temperamentis diversis, pilorum color adeo diversus sit, immo quandoque in vita mutetur sæpius, dare, maxime arduum sit, & incertum; eorum attamen in temperamentorum discrimine cum aliis signis consideratio, haud exiguum lumen adfert, ut quotidiana experientia docet.

SCHOLIUM III.

CL. KÆMPFIUS diversitatem temperamentorum ex oculis plurimum distingui posse adserit (a); quare *sanguineis* oculos vividos, minus tamen micantes, neque admodum elevatos; amicos, mobiles, neque uni objecto diu inhærentes, tribuit (b).

§. DLXXV.

Si signis (§. 574.) jungatur, 1) corporis calor; 2) robur; 3) pulsus major, crebrior; 4) pili crassi, copiosi, toto corpore; temperamentum calidum (§. 572.) designatur. Ex signis (§. 574.) cognoscitur major globulorum rubrorum ad aquam ratio, cum robore partium firmarum naturali simillimo; quia vero hisce jungitur calor (per hypoth.), qui ob pulsum ma-
jo-

(a) Abhandlung von Temperament. p. 154. & seqq. (b) Ibid. p. 161.

jorem, & crebriorem (per hypoth.) præsentem augetur (§. 256. 261.), & arteriarum actionem majorem exigit (demonst. §. 131.); hæc autem actio major a majori earum robore redditur (demonst. §. 179. n. 4.), quod robur simul in corpore adest (per hypoth.), a quo etiam valida humorum versus corporis peripheriam propulsio, quam pili craffi, copiosi toto corpore (per hypoth.), docere videntur, pendet; sequitur robur partium firmarum, priori (§. 574.) paulo majus esse; proinde temperamentum calidum (§. 572.) sub datis signis designatur.

§. DLXXVI.

Si in corpore, 1) macies; 2) vasa contracta; 3) humida pauca; 4) corpus agile; valde robustum; 5) color in quibusdam corporis locis valde ruber; 6) ἀνασθησία; temperamentum siccum præsens est. Macies enim, & vasa contracta (per hypoth.), humorum paucitatem docent (demonst. §. 574.); quia tamen agilitas simul adest (per hypoth.), reperiuntur quidem humores pauci; sed tamen necessarii in corpore (demonst. §. 574.). In iis vero humoribus elementa rubra abundant, ob colorem in quibusdam corporis locis valde rubrum (per hypoth.). Præterea ob vasa contracta, & corpus valde robustum (per hypoth.), robur partium firmarum majus est (§. 187.), ac (574. 575.) erat; & quia simul ἀνασθησία, seu facultas mutationes, ab objectis externis corpori nostro inductas, percipiendi minuta deprehenditur (per hypoth.), robur hoc tantum est, ut partes firmæ a causis externis vix mutari queant; consequenter etiam indoles irritabilis valde exigua, & fere nulla, iis

in-

ineft. Adest igitur in corpore pauca humorum quantitas, in qua tamen globuli rubri maximam rationem habent; & præterea partium firmarum robur prioribus (§. 574. 575.) majus, fed absque irritabili fere indole; his autem temperamentum ficcum constituitur (§. 573.); ergo sub datis signis temperamentum ficcum adest.

§. DLXXVII.

COROLLARIUM.

Quum igitur temperamentum sanguineum (§. 571.), calidum (§. 572.), & ficcum (§. 573.) in eo conveniant, quod globuli rubri ad aquam rationem majorem habeant; & sola totius humorum massæ quantitate diversa, varioque partium firmarum robore inter se differant (§. 574. 575. 576.); patet ratio, *quare temperamentum sanguineum, calidum, & ficcum, ad sanguineum (§. 569.), tanquam genus suum reduci possint.*




CAPUT III.

DE

TEMPERAMENTO PHLEGMATICO.

§. DLXXVIII.



Si aquæ ad globulos rubros ratio fit major, *Temperamentum phlegmaticum* nuncupatur.

SCHOLIUM.

Distinguitur a Cachexia, quod in hac tanta adfit aquæ copia, ut functiones lædat (demonst. §. 373.); in temperamento *phlegmatico* (§. 578.) vero functiones læsæ non sint.

§. DLXXIX.

Quoniam præsentē majori elementorum aquosorum copia (§. 578.), plura eorum inter elementa terrea (§. 501.) se insinuant, hæcque a contactu removent; quumque aquæ elementa parum sibi cohæreant, partium firmarum cohæsiōnem minuunt; ^(a) adeoque eas partes debilitant (§. 175.); *in temperamento phlegmatico* (§. 578.) *definita simul partium firmarum debilitas adest.*

§. DLXXX.

COROLLARIUM I.

Igitur aquæ ad globulos rubros ratio major (§. 578.), cum debilitate partium firmarum (§. 579.) non irritabili, *temperamentum phlegmaticum proprie tale* ^(b) *constituit.*

§. DLXXXI.

(a) B. de SWIETEN Comment. §. 30. (b) BOERH. Instit. §. 895.

§. DLXXXI.

COROLLARIUM II.

Quum humores aquosi calorem generare nequeant (demonst. §. 347.), & debilitas partium firmarum, ob motum humorum minutum (demonst. §. 179. n. 4.), eundem quoque minuat (demonst. §. 131.); *conditiones, prioribus (§. 580.) paulo majores, temperamentum frigidum* ^(a) *ponunt.*

§. DLXXXII.

COROLLARIUM III.

Denique *aquosorum elementorum quantitas magna, cum debilitate partium firmarum non irritabili, temperamentum humidum* ^(b) *efficit.*

§. DLXXXIII.

Si in corpore, 1) albedo; 2) facilis tumor; 3) mollities; 4) pinguedo; 5) venæ angustæ latentes; 6) pili vari, albi, tenues, tarde crescentes; 7) ἀραισθησία; temperamentum phlegmaticum (§. 580.) adest. Mollities enim copiam quidem humorum præsentem ponit (demonst. §. 574.); quia vero simul adest albedo (per hypoth.), paucos omnino globulos rubros in corpore reperiri demonstrat (demonst. §. 574.), quod ulterius confirmant venæ angustæ latentes (demonst. §. 546.). Deinde adest in corpore pinguedo (per hypoth.); quum autem ad ejus copiosam secretionem motus humorum tardus (§. 522.), & partium firmarum debilitas (§. 542.) plurimum conferant; eandem partium firma-

R 2

rum

(a) Ibid. §. 891. (b) Ibid. §. 892.

rum debilitatem, tumor facilis (§. 179. n. 3.), & pili rari, albi, tenues, tarde crescentes (demonst. §. 575.) itidem confirment; evidens est, partes firmas in tali corpore debiles esse. Quia demum ἀναισθησία etiam adest (per hypoth.); partes irritabiles non esse adparet (demonst. §. 576.). Igitur aquæ ad globulos rubros ratio major, cum debilitate partium firmarum non irritabili, & consequenter temperamentum phlegmaticum (§. 580.) adest.

SCHOLIUM.

His oculos aquosos molles, minus mobiles tribuit CL. KÆMPFIUS. (3)

§. DLXXXIV.

Si signis (§. 583.) frigus, & pulsus minor, tardior, jungatur; temperamentum frigidum (§. 581.) designatur. Ex signis (§. 583.) sequitur, aquæ ad globulos rubros rationem majorem, cum debilitate partium firmarum non irritabili adesse. Frigus autem accedens (per hypoth.), motum in corpore minutum designat (§. 229.), quod & pulsus minor, tardior confirmat (demonst. §. 223. 226.); motus autem minutus partium debilitatem majorem (demonst. §. 179. n. 3.), & aquæ copiam majorem (§. 370.) manifestat. Ergo conditiones (§. 380.) auctæ sunt; proinde temperamentum frigidum adest.

§. DLXXXV.

Si signis (§. 583. 585.) tumor accedat, temperamentum humidum (§. 582.) constituit. Tumor enim, quum
fit

fit magnitudo in parte præternaturaliter aucta (demonst. §. 179. n. 3.), humorum copiam majorem, præsentem ponit; & quia simul signa (§. 583. 584.) adsunt (per hypoth.), horum humorum partem maximam aqua constituit. Proinde temperamentum humidum (§. 582.) in corpore reperitur.

§. DLXXXVI.

COROLLARIUM.

Quia igitur iterum temperamentum phlegmaticum (§. 580.), frigidum (§. 581.), & humidum (§. 582.), in eo conveniunt, quod aquæ ad globulos rubros ratio major, & debilitas partium firmarum non irritabilis, adsit; atque solo diverso harum conditionum gradu (§. 583. 584. 585.) inter se differant; elucescit ratio, *quare temperamentum phlegmaticum, frigidum, & humidum sub phlegmatico* (§. 578.), *tanquam genere suo, continentur.*




CAPUT IV.

DE

TEMPERAMENTO CHOLERICO.

§. DLXXXVII.

 Si vero in sanguine eæ particulæ abundaverint, quæ ad ignem urinofam indolem induunt; *Temperamentum Cholericum*, seu *Biliosum* ^(a) producitur.

§. DLXXXVIII.

Quum sanguinis motus humores nostros ad urinofam naturam disponat (§. 134.); ad eum vero motum partium firmarum robur sit necessarium (demonst. §. 179. n. 4.); & quum præterea in hominibus, temperamento cholerico præditis, magna partium firmarum irritabilitas observetur; *in temperamento cholerico partium firmarum robur, cum irritabilitate magna adest.*

§. DLXXXIX.

Si in corpore 1) *durities*, *gracilitas carnis*; 2) *macilentia*; 3) *color fuscus*; 4) *venæ magnæ*; 5) *pulsus magnus, celer*; 6) *iracundia, pertinacia*; 7) *pili copiosi, nigri, crispi*; *temperamentum cholericum* (§. 587.) *adest.* Durities enim, & gracilitas carnis, solidorum ad fluida rationem majorem prodit (demonst. §. 574.); consequenter partium firmarum robur insigne est, & vasa minora admodum contracta sunt (§. 187.); unde humores in venas majores, quæ ob tenuitatem majorem (§. 33.) facilius dilatantur, se

(a) BOERH. Instit. §. 893.

se recipiunt; quod venæ amplæ (per hypoth.) contestantur. Porro, quia vasa magis contracta sunt (per demonst.), sanguis majori celeritate per eadem movetur (demonst. §. 262. n. 2.); quod pulsus magnus, celer (per hypoth.) confirmat (demonst. §. 574.); deinde sanguis in iisdem magis condensatur (§. 190.), & eo magis ad urinofam naturam disponitur (§. 134.), quod color fuscus, ^(a) macilentia (demonst. 522.), iracundia (demonst. §. 574.), & pili copiosi, nigri, crispi (demonst. §. 575.), præsentés (per hypoth.), comprobant. Demum, quia idea objecti eo diutius in sensorio communi præsens manet, quo eadem clarior est; ^(b) eadem vero eo clarior fit, quo vividior est ejusdem objecti actio in sensorium commune; ^(c) & ad actionem porro vividiorē reddendam irritabilitas plurimum conferat (demonst. §. 576.); sequitur ex pertinacia (per hypoth.) præsentē irritabilitatem magnam ostendi. Adfunt igitur in sanguine copiosæ particulæ, quæ ad urinofam naturam dispositæ sunt (per demonst.), & partium firmarum robur, cum irritabilitate magna, easdem concomitatur; his autem temperamentum cholericum absolvitur (§. 587. 588.). Ergo sub datis signis temperamentum cholericum adest.

SCHOLIUM I.

Capillos sæpe rufos in *biliofis* (§. 587.) observari, excitat HALLE-
RUS, ^(d) & observavit CL. KÆMPF, non tamen perpetuo. ^(e)

SCHO.

(a) Conf. Dissert. nostr. de Causa Rubed. in sang. §. 4. 12. (b) BOERH. Institut. §. 579. (c) Ibid. §. 576. (d) Elem. Physiol. T. II. p. 142. (e) l. c. p. 163.

SCHOLIUM II.

Oculos micantes, elevatos, facile mobiles, vividos, objectis firmitus inhaerentes, Cholericis proprios esse CL. KEMPFF scribit. (a)

SCHOLIUM III.

Ab hoc (§. 589.) solo gradu differre videtur *temperamentum Melancholicum* BOERHAAVII. (b)

CAPUT V.

DE

TEMPERAMENTO MELANCHOLICO.

§. DXC.



Si demum in corpore partium firmarum debilitas, cum irritabilitate magna, *Temperamentum Melancholicum* erit.

SCHOLIUM I.

Temperamentum hoc (§. 590.) in solidis partibus unice consistere, adparet, 1) quia idem sub diversa elementorum in sanguine proportionem praefens reperitur, ut observationes practicae probant. 2) Quia in sanitate humor atrabiliaris nunquam adesse deprehenditur. 3) Quia ipsum malum hypochondriacum ex hoc temperamento ortum, saepe in corpore ceteroquin puro adest. (c) Unde in nimia systematis, ut ajunt, nervosi mobilitate situm est, de qua tanta scripsit CL. SYDENHAM; ideoque, cum de nervis actum fuerit, hac temperies facilius intelligitur.

SCHO-

(a) Ibid. p. 160. (b) Institut. §. 896. (c) B. de SWIETEN Comment. §. 1098.

SCHOLIUM II.

Recte igitur ILL. HALLERO *Hystericum*, & *Hypochondriacum* dicitur. (a) Et quia ad generationem humoris atrabiliaris corpus disponit, ut mox adparebit, *Atrabiliarium*, aut *Melancholicum* etiam dici potest.

§. DXCI.

Cognoscitur hoc temperamentum (§. 590.) facili ab objectis externis mutatione, & frequenti spasmodicarum adfectionum labore. Objecta enim externa motu in corpus nostrum agunt, ut cuique notum; motus autem partibus eo facilius imprimitur, quo minus earum elementa inter se cohærent, id est, quo ipsæ debiliores sunt (§. 175.); præterea pars irritata se constringit, quare frequens spasmodica adfectio, magnam partium irritabilitatem declarat. Irritabilitas autem magna, cum debilitate firmarum partium, temperamentum Melancholicum (§. 590.) constituit; ergo ex datis signis temperamentum Melancholicum cognoscitur.

SCHOLIUM I.

Ab adfectione spasmodica (§. 591.) renum urina copiosa limpida provenit, quam in ejusmodi adfectionibus pro signo pathognomico CL. SYDENHAM habet.

SCHOLIUM II.

Ejusmodi homines oculos fixos, demissos, qui alterius adspectum non diu ferre queunt, tristes, (b) habent.

§. DXCII.

Quum omnis actio læsa morbus sit (§. 170.); si signa (§. 591.) eousque aucta fuerint, ut functiones inde pendentes lædant, morbum constituent, qui malum hypochondria-

TOMUS II.

S

dria-

(a) l. c. p. 147. (b) KÆMPF l. c. p. 162.

driacum in viris, hyſtericum in fœminis, dicitur; ergo *ex temperamento melancholico* (§. 590.) *malum hypochondriacum facile ſequitur.*

§. DXCIII.

In morbo hypochondriaco frequens anxietas adest. In morbo hypochondriaco frequens ſpaſmodicarum adfectionum labor adest (demonſt. §. 592.); adfectiones autem ſpaſmodicæ vaſa coarctant; quare ſanguis arterioſus, & venoſus magis circa cor accumulatur (demonſt. §. 233. 236.); proinde anxietas (§. 243.) frequens adest.

SCHOLIUM.

Quia anxietas (§. 593.) frequenter circa hypochondria obſervatur, morbus (§. 592.) *Malum hypochondriacum* ſalutatur; & ab ILL. B. de SWIETEN *Morbus hypochondriacus ſine materie*, ad diſtinctionem alterius mali, in quo materia atrabiliaria viſcera occupat, nuncupatur. (a) Spasmos autem ſimiles non tantum circa hypochondria, ſed in omni fere corporis parte obſervari, jam dudum docuit SYDENHAMUS; unde morbus hic tam varias facies induere ſolet.

§. DXCIV.

Morbus hypochondriacus (§. 592.) facile humorem atrabiliarium in corpore generat. Morbus hypochondriacus animo mutationes vehementes inducit, ob facilem corporis ab objectis externis mutationem (§. 591. 592.); & ob ſpaſmodicas adfectiones motus in corpore turbat; quare ab his in toto ſanguine mobilia diſſipantur, & immobilia figuntur; (b) naſcitur itaque humor craſſus, pinguis, terreſtris, ut experimenta Chemica oſtendunt; (c) ejusmodi

(a) Comment. §. 1098.

(b) Conf. B. de SWIETEN Comment. §. 1093.

(c) Ibid. §. 1092.

di autem humor atrabiliarius est; ergo morbus hypochondriacus facile humorem atrabiliarium in corpore generat.

§. DXCV.

Quilibet facile intelligit conditiones (§. 571. ad 591.) enarratas, infinitis fere modis inter se combinari posse; adeoque *temperamenta* (§. 565.) *fere infinita nasci queunt, quorum quodlibet ab altero differt, omnia tamen ad classes* (§. 566.) *dictas reduci possunt.*

SCHOLIUM.

Adfectus animi temperamento cuique, tam simplici, quam composito, proprios, fuse exponit CL. KÆMPFIUS. (a)

§. DXCVI.

Et quum quilibet homo definitos humores, partesque solidas (etsi nulla arte hæc diversitas hucusque determinari possit) differentes habeat; ut a posteriori docemur: *unusquisque etiam homo temperiem sibi propriam nactus est.*

SCHOLIUM.

Hæc (§. 596.) temperies *Idiosyncrasia* dicitur (§. 216. in Schol.).

§. DXCVII.

COROLLARIUM I.

Quare, qui homines, suis unusquisque humoribus præditus (§. 596.), sani vivunt; iis permutatis, tales vivere haud possunt.

§. DXCVIII.

COROLLARIUM II.

Igitur *Transfusio in homine locum habere nequit.*

SCHOLIUM.

Transfusionis historiam HALLERUS tradit. (b)

§. DXCIX.

(a) Abhandlung von Temperament.

(b) Elem. Physiol. T. I. p. 232. & seqq.

§. DXCIX.

Quoniam corpus nostrum ob definitum, quod cuique inest temperamentum (§. 565. 595. 596.), ita mutatur, ut aptum sit, causis occasionalibus ^(a) accedentibus, morbum determinatum suscipere, aut eidem resistere, ut consideranti adparet: causa autem morbi remota illa dicatur, quæ corpus dicto modo mutat; ^(b) *a temperamentis* (§. 565.) *magna pars causarum remotarum pendet.* ^(c)

SCHOLIUM I.

Sollicite igitur CEL. BOERHAAVE nocentia, & juvantia cuilibet temperamento subjecit. ^(d)

SCHOLIUM II.

Causa remota (§. 599.) etiam prædisponens, & προηγυμένη a προηγυμαι antecedo, dicitur. Occasionalis vero προκατερχτική a προκατερχομαι antegredior, vel πρόφασις, a προφαίνω praluceo, adpellatur.

§. DC.

Quia denique causa morbi proxima adpellatur tota illa simul, quæ totum morbum jam præsentem ponit, ac continuat, & cujus absentia eum tollit; ^(e) morbus perspicui nequit, nisi ea causa intellecta fuerit; hæc autem ex remota, & occasionali componitur; ^(f) quare intelligi nequit, nisi causa remota perspecta fuerit. Quum igitur a temperamentis magna pars causarum remotarum pendeat (§. 599.); *ex temperamentorum cognitione maxima utilitas in perspicuendis morbis habetur.* ^(g)

SCHOLIUM.

Quam utilitatem temperamentorum cognitio in societate humana præstet, ex sæpius laudati KÆMPFII tractatu, videre est.

FINIS.

(a) BOERHAAVE Instit. §. 743. & seqq. (b) Ibid. §. 741. (c) Ibid. §. 742. 897. (d) Ibid. §. 890. & seqq. (e) Ibid. §. 740. (f) Ibid. §. 741. (g) Ibid. §. 897.



Fig. 2.



Fig. 3.



Fig. 4.




Fig. 6.




Fig. 8.



Fig. 5.




Fig. 9.




Fig. 7.





